

A340/575



BIBLIOTHÈQUE S. J.

Les Fontaines

60 - CHANTILLY

[DENISE (Claude)]

THESAURUS

SACERDOTUM

ET

CLERICORUM.

*Pone Thesaurum tuum in præceptis Altissimi;
& proderit tibi magis quàm aurum.*

Eccli. c. 29. v. 14.



AURELIÆ,

Ex Typis COURET DE VILLENEUVE;
Regis, Aurelian. Ducis, Episcopi,
nec-non Collegii Typographi.

M. DCC. LIV.

CUM PRIVILEGIO REGIS.





ILLUSTRISSIMO
AC REVERENDISSIMO
D D.
NICOLAO-JOSEPHO
DE PARIS,
AURELIANENSIIUM
EPISCOPO,

*SUPERVACANEUS foret;
PRÆSUL ILLUSTRISIME,
labor iste noster, & incassum sus-
ceptus, si te omnes quotquot in*

mundo degunt Clerici & Sacerdotes vel audire potuissent, non ita pridem, tamquam imbres eloquia mittentem sapientiæ tuæ & de thesauro cordis tui nova & vetera proferentem, aut etiamnum te possent videre conversantem. Ipse enim quantâ arte, qualive studio, in Sodalitio Clericorum tuorum novas & indefessas Divini Ministerii veluti excubias agens, sicut Aquila provocans ad volandum pullos suos & super eos volitans, Candidatos Sacerdotii cœlestibus instituebas præceptis, Ecclesiasticisque informabas disciplinis! Quanto Sacerdotalis honoris ampliandi, Pastoralisque

vigilantiæ promovendæ zelo succensus, fidissimos in animarum curâ Coadjutores tuos, ad lavanda & reficienda exercitiis spiritualibus retia sua tuo exemplo tuismet impensis provocabas! Quantâ facundiâ ipse Pastorum forma factus ex animo, ipsis quæ munia, quas partes Pastoralis officii, verbis enucleabas, operibusque demonstrabas! At modò, proh dolor! detrimentum vocis, ut aiebat olim Beatus Ambrosius, vertitur tantum in lucrum amoris, dùm oracula quæ priùs ore deprompseras, moribus referre non desinis, actibus-vè tanto fervore pingis.

Non ingratum igitur & Sacer-

*dotibus & Clericis fore confido ,
quos nec vox tua potest attingere ,
nec tua valent exempla illustrare ;
ſi ad eos hæc noſtra editio perve-
niat , ut in hoc exiguo volumine
veluti compendium quoddam , ac
ſummam contractam habeant &
inſtitutorum tuorum , quæ fidenter
exequi , & virtutum tuarum , quas
ad vivum exprimere ſatagant.*

*Tibi ergò jure merito, PRÆSUL
ILLUSTRISſIME , com-
petit & cedit , tibiſque lubens ſiſti-
tur parvus iſte Sacerdotum & Cle-
ricorum Theſaurus ; quippe qui
cum univerſos almæ Matris Eccle-
ſiæ Miniſtros apprimè inſtruat , tui*

*maximè partes agere videatur , qui
totus in Sacerdotum & Clerico-
rum decus & profectum incumbens,
facultates Ecclesiasticas libentissi-
mè & largissimè impendis , & su-
perimpenderis ipse pro animabus
eorum. Opus est , iste Libellus ,
ex diversis optimæ notæ auctōribus
undèquaque collectum ; nec minùs
ided præstans & jucundum , non
enim ex uno sed ex multis floribus
Apis industria mel suum conficit.
Suscipe igitur hoc tenue munus-
culum meum quod tibi voveo , dico ,
consecro in obsequii testimonium :
Quatenus dùm & eloquia & exem-
pla tua Posteritati mandabun-
tur , nomen tuum vivat à ge-*

neratione in generationem , quod
tibi de Sacerdotali honore tam egre-
giè merito faustum precatur ,

PRÆSUL ILLUSTRISIME,

Devotissimus & addictissimus,
COURET DE VILLENEUVE.



COLLECTOR
PIO LECTORI.

Grandis dignitas Sacerdotum, intonabat olim S. Hieronimus, *sed grandis ruina si peccent; lætamur ad ascensum, sed timeamus ad lapsum: Non est tanti gaudii excelsa tenuisse, quanti mœroris de sublimioribus corruisse.* Sacerdotalem igitur meditare gradum, LECTOR BENEVOLE, & attende quomodo officium istud agitur quidem in terra, ut Sanctus asserit Chrysostomus, *sed cœlestibus negotiis continetur. Non enim homo, non Angelus, non Archangelus, non quævis alia creatura, sed ipse Spiritus Sanctus hoc munus instituit, atque adhuc manentes in carne, ministerio fungi præstitit Angelorum.*

Quidni ergo Angelicam æmulabitur sanctitatem, puritatem ac sedulitatem, qui ad tantam tamque sublimem dignitatem, & ad onus ip-

sismet Angelicis humeris formidandum, vel anhelat, vel sese à Deo vocatum & electum contemplabitur? Eò spectat, RELIGIOSE LECTOR, hic præsens Thesaurus, ut tibi, scilicet, ad tam eximiâs partes viam aperiat, & quasi manu te deducat ad hoc sanctuarium, sicque finem statui tam sancto tamque sublimi maxime congruum valeas adipisci.

Hæc erit igitur in instruendo isto opusculo nostri studii ratio; cum Apostolus nos admoneat videre vocationem nostram; os Domini interrogare te oportet, ut scias, ait S. Bernardus, *an vocatus veneris, & vocatus à Deo, cujus nimirum hæc vocatio est.* Quod quidem ut facilius præstes,

1°. præmittitur PARVUM OFFICIUM, pro obtinendâ à Deo gratiâ perfectè cognoscendi excellentiam Ministerii Ecclesiastici, illudque ritè adimplendi.

2°. Quoniam *Iustus ex fide vivit*, ut nempe omnia opera tua in charitate fiant, subjicitur tibi EXERCITIUM DIURNUM ad omnes diei

actiones piè dirigendas & instituen-
das.

3°. Quoddam tibi exhibetur **SPE-
CULUM**, in quo præcipua quæ
ad pietatem accendendam, Eccle-
siasticum-vè decus ampliandum me-
dia conducunt, ex Scriptura, SS.
Patribus, Conciliorum Sanctionibus
concinnata, & veluti depicta reperies:
his accedent monitiones S. Caroli
Borromæi ad Sacerdotes & Cleri-
cos, in IV. Concil. Mediol. adum-
bratæ.

4°. Cum præstantissimum Sacerdo-
tis munus sit offerre sacro-sanctum
Missæ sacrificiûm, de eo copiosius
differitur; ejusdem ritus & ceremo-
niæ indagantur & enucleantur juxta
placita rerum liturgicarum peritorum,
imprimisque SS. Dom. Nost. Pontif.
Benedicti XIV. in præclaro tractatu
de Sacrificio Missæ. Item & suppe-
tunt tibi meditationes de præcipuis
Christi in Eucharistiâ dotibus, ac
orationes ante & post Sacrum ex SS.
Patribus depromptæ, quibus & præ-
parationem, & gratiarum actionem
piè persolvas.

Nost^{rum} qualemcumque laborem
in coacervando & adornando præ-
senti isto **THESAURO**, boni, quæso,
consule, **BENEVOLE LECTOR**,
æquoque animo suscipe; & ab affectu
sinceræ tuæ pietatis, tuique pro-
gressus spiritualis maximè studioso
profectum crede; ad majorem ejus
honorem cui servire regnare est,
cuique **LAUS ET GLORIA** per in-
finita seculorum secula. Amen.



A P P R O B A T I O.

JU S S U illustrissimi Galliarum Cancellarii, legi Libellum, cui titulus, *Theſaurus Sacerdotum & Clericorum*, eumque approbavi. DATUM Parisiis in ædibus nostris Lexovæis, anno millesimo septingentesimo quinquagesimo secundo, die verò Novembris octavo.

LE SEIGNEUR, Docteur. & Soc. Sorbon.

A P P R O B A T I O.

NICOLAUS-JOSEPHUS, Dei & sanctæ Sedis Apostolicæ gratiâ, Episcopus Aurelianensis: Librum legimus nobis oblatum, cui titulus, *Theſaurus Sacerdotum & Clericorum*, quem in omnibus sanæ doctrinæ, canonicisque sanctionibus consonum invenimus: Insuper & omnia, quibus conflatur, instituta atque exercitia Ministrorum Altaris pietati fovendæ ac enutriendæ viſa nobis fuerunt perutilia. Quapropter dignum illum judicavimus, qui in lucem nostris auspiciis prodeat, & ab omnibus Diœcesis nostræ viris Ecclesiasticis studiosè pervolvatur. Datum Aureliæ in Palatio nostro Episcopali, die 29 mensis Octobris anni 1753. † N. J. Ep. Aurelianensis.

*De Mandato Illust. ac Rev. DD. Episc.
Aurelianensis. PATOUILLE.*

ANTE recitationem hujus Officii.

Oratio.


Domine Jesu-Christe, qui non oraris tantum à nobis ut Deus; sed & ineffabili pietate oras in nobis ut caput nostrum, & oras pro nobis ut Pontifex noster: concede nobis; ut per te, quem advocatum habemus apud Patrem offeramus hostiam laudis semper Deo, id est fructum labiorum consentientium nomini ejus. Qui cum eodem Patre, & Spiritu-Sancto vivis.

POST recitationem Officii.

Oratio.

Domine Jesu-Christe, qui in diebus carnis tuæ, preces, supplicationesque cum clamore valido & lacrymis offerens, exauditus es pro tuâ reverentiâ; ne irascaris super orationem servi tui, neque amoveas orationem meam & misericordiam tuam à me: sed spiritus tuus adjuvet infirmitatem meam ut orem te semper & non deficiam, in omni loco levans puras manus Deo, & benedicens te in omni tempore. Qui cum Patre.

PARS




PARS PRIMA.

OFFICIUM PARVUM

*PRO obtinenda à Deo gratiâ
perfectè cognoscendi excellentiam
ministerii Ecclesiastici, illudque
ritè adimplendi.*

AD NOCTURNUM,

 OMINE, labia mea aperies ;
R. Et os meum annuntiabit
laudem tuam.

Deus, in adjutorium meum
intende : R. Domine, ad adju-
vandum me festina.

Gloria Patri, &c.

Invitator. Dominum Messis, cujus est
mittere operarios in messem suam, * Ve-
nite, adoremus.

▲

2 *Officium Parvum,*

Psalmus 94.

Venite exulemus, Domino: jubilemus Deo salutari nostro: præoccupemus faciem ejus in confessione, & in psalmis jubilemus ei.

Dominum messis, cujus est mittere operarios in messem suam: * Venite.

Quoniam Deus magnus Dominus, & Rex magnus super omnes deos: quoniam non repellet Dominus plebem suam, quia in manu ejus sunt omnes fines terræ, & altitudines montium ipse conspicit.

* Venite, adoremus.

Quoniam ipsius est mare, & ipse fecit illud, & aridam fundaverunt manus ejus: Venite, adoremus, & procidamus ante Deum: ploremus coram Domino, qui fecit nos, quia ipse est Dominus Deus noster; nos autem populus ejus, & oves pascuæ ejus.

Dominum messis, &c.

Hodie si vocem ejus audieritis, nolite obdurare corda vestra, sicut in exacerbatione secundum diem tentationis in deserto; ubi tentaverunt me patres vestri, probaverunt, & viderunt opera mea. * Venite.

Quadraginta annis proximus fui generationi huic & dixi: Semper hi errant corde: ipsi vero non cognoverunt vias meas, quibus juravi in ira mea: Si introibunt in requiem meam.

Dominum messis, cujus est mittere operarios in messem suam, * Venite.

ad Nocturnum.

3

Gloria Patri, & Filio, & Spiritui-Sancto:
Sicut erat in principio, & nunc, & semper,
& in sæcula sæculorum. Amen.

* Venite adoremus.

Dominum messis, cujus est mittere operarios in messem suam, * Venite.

Hymnus.

TEr Sancte, ter potens Deus,
Incomprehensa Trinitas;

O lux perennis! propriis

O ter beata gaudiis!

O vera semper unitas!

O una semper veritas!

O sancta semper, quæ bonum

Diffundis omne, caritas!

Te confitetur in tuo

Et plebs renata nomine;

Firmâque prælibat fide

Amor, quod ambit præmium.

Da posse quod jubes, Pater,

Da scire, Fili, quod doces;

Fac corde toto, Spiritus,

Nos velle quod probas bonum.

Sit laus Patri, laus Filio,

Sit & tibi laus, Spiritus,

Afflante quo mentes sacris

Lucent & ardent ignibus. Amen.

Ant. Ego plantavi te.

Psalms 79.

QUi regis Israël, intende: * qui deducis velut ovem Joseph.

Qui sedes super Cherubim, * manifest-

A ij

4 *Officium Parvum;*

tare coram Ephraïm, Benjamin, & Manasse.

Excita potentiam tuam, & veni: * ut
falvos facias nos.

Deus, converte nos: * & ostende faciem tuam, & salvi erimus.

Domine, Deus virtutum, * quousque irasceris super orationem servi tui?

Cibabis nos pane lacrymarum, * & potum dabis nobis in lacrymis in mensura.

Posuisti nos in contradictionem vicinis nostris, * & inimici nostri subfannaverunt nos.

Deus virtutum converte nos; * & ostende faciem tuam, & salvi erimus.

Vineam de Ægypto transtulisti: * eiecisti gentes, & plantasti eam.

Dux itineris fuisti in conspectu ejus: * plantasti radices ejus, & implevit terram.

Operuit montes umbra ejus, * & arbuta ejus cedros Dei.

Extendit palmites suos usque ad mare, * & usque ad flumen propagines ejus.

Gloria Patri, &c.

Ant. Ego plantavi te vineam electam: quomodo ergo conversa es mihi in prævum vinea aliena? *Jer.* 2. 21.

Ant. Pastores multi.

Ex eodem Psalmo.

UT quid destruxisti maceriam ejus? * & vindemiant eam omnes qui prætergrediuntur viam?

ad Nocturnum. 5

Exterminavit eam aper de silva; * & singularis ferus depastus est eam.

Deus virtutum; convertere, * respice de cœlo, & vide, & visita vineam istam.

Et perface eam, quam plantavit dextera tua, * & super Filium hominis, quem confirmasti tibi.

Incensa igni, & suffossa; * ab increpatione vultûs tui peribunt.

Fiat manus tua super virum dexterae tuae, * & super filium hominis quem confirmasti tibi.

Et non discedimus à te: * vivificabis nos, & nomen tuum invocabimus.

Domine Deus virtutum, converte nos; * & ostende faciem tuam, & salvi erimus.

Ant. Pastores multi demoliti sunt vineam meam; conculcaverunt partem meam; dederunt portionem meam desiderabilem in desertum solitudinis. *Jer. 12. 10.*

ψ. Leva manus tuas in superbias eorum in finem.

℞. Quanta malignatus est inimicus in sancto? *Psf. 73. 4.*

Pater noster.

Absol. Deus det nobis illuminatos oculos cordis, ut sciamus quæ sit spes vocationis ejus.

Jube Domine benedicere.

Bened. ad 1. Lect.

Adaperiat Deus cor nostrum in lege sua & in præceptis suis.

A iij

Dominus confirmet corda nostra in omni opere & sermone bono.

Lectioes infrà pro singulis hebdomadæ diebus post Completorium.

R. j. Non mittebam Prophetas, & ipsi currebant; non loquebar ad eos, & ipsi prophetabant. * Si stetissent in consilio meo, avertissem utique eos à viâ suâ malâ. *Ps.* Ipsi regnaverunt & non ex me: Principes extiterunt, & non cognovi. * Si stetissent. *Jer.* 23. 21.

R. ij. Satagite ut per bona opera certam vestram vocationem & electionem faciatis; * Sic enim abundanter ministrabitur vobis introitus in æternum regnum Domini nostri Jesu-Christi. *Ps.* Ministrate in fide vestrâ virtutem, scientiam, abstinenciam, patientiam, pietatem, charitatem. * Sic enim. Gloria. *R.* Satagite. 2. *Pet.* 1.

Ps. Domine exaudi orationem meam;

R. Et clamor meus ad te veniat.

Oremus.

DEus inspirator sancti Consilii, vota humilitatis nostræ benignus suscipe, & da nobis sedium tuarum assistricem sapientiam; mitte illam de coelis sanctis tuis, ut sciamus quid acceptum sit apud te, & deducat nos in operibus nostris sobriè, & custodiat nos in sua potentia. Per Dominum nostrum, &c.

Ÿ. Domine exaudi orationem meam.

R. Et clamor meus ad te veniat.

Ÿ. Benedicamus Domino.

R. Deo gratias.

A D L A U D E S.

Deus in adiutorium, &c.

Ant. Manè notum faciet.

Psalms 142.

Domine exaudi orationem meam: *
auribus percipe obsecrationem meam
in veritate tua: exaudi me in tua iustitia.

Et non intres in iudicium cum servo tuo: *
quia non iustificabitur in conspectu tuo
omnis vivens.

Quia persecutus est inimicus animam
meam: * humiliavit in terra vitam meam.

Collocavit me in obscuris sicut mortuos
seculi: * & anxius est super me spiritus
meus, in me turbatum est cor meum.

Memor fui dierum antiquorum, medi-
tatus sum in omnibus operibus tuis: * in fac-
tis manuum tuarum meditabar.

Expandi manus meas ad te: * anima
mea sicut terra sine aqua tibi.

Velociter exaudi me, Domine; * defecit
spiritus meus.

Non avertas faciem tuam à me: * &
similis ero descendens in lacum.

Auditam fac mihi manè misericordiam

8 *Officium parvum ;*

tuam ; quia in te speravi.

Notam fac mihi viam in qua ambulem : *
quia ad te levavi animam meam.

Eripe me de inimicis meis Domine , ad
te confugi : * doce me facere voluntatem
tuam , quia Deus meus es tu.

Spiritus tuus bonus deducet me in ter-
ram rectam : * propter nomen tuum , Do-
mine , vivificabis me in æquitate tua.

Educes de tribulatione animam meam : *
& in misericordia tua disperdes inimicos
meos.

Et perdes omnes qui tribulant animam
meam : * quoniam ego servus tuus suum.

Gloria Patri , &c.

Ant. Manè notum faciet Dominus qui
ad se pertineant , & sanctos applicabit sibi ;
& quos elegerit appropinquabunt ei ; &
quemcumque elegerit erit sanctus. *Num.*
16. 5.

Capitulum.

OMnis qui habuerit maculam de semi-
ne Aaron Sacerdotis , non accedet
offerre Hostias Domino , nec panes Deo
suo ; nec accedat ad Altare , quia maculam
habet , & contaminare non debet sanctua-
rium meum ego Dominus. *Lcv. 21.*

R. Deo gratias.

Hymnus.

Splendor Paternæ gloriæ ,
De luce lucem proferens ,
Lux lucis & fons luminis ,

ad Laudes.

9

Diem dies illuminans.

Verusque sol illabere ,
Micans nitore perpeti ,
Jubarque Sancti Spiritus ,
Infunde nostris sensibus.

Votis vocemus & Patrem
Patrem perennis gloriæ ,
Patrem potentis gratiæ ,
Culpam releget lubricam.

Mentem gubernet & regat ,
Casto fideli corpore ,
Fides calore ferveat ,
Fraudis venena nesciat.

Sit laus Patri , laus Filio ,
Sit & tibi laus , Spiritus ,
Afflante quo mentes sacris
Lucent & ardent ignibus. Amen.

℣. Lavabo inter innocentes manus meas.

℞. Et circumdabo altare tuum , Domine.

Ant. Visitabo.

Canticum Zachariæ Luc. 1.

Benedictus Dominus Deus Israël ; *
quia visitavit , & fecit redemptionem
plebis suæ.

Et erexit cornu salutis nobis , * in domo
David pueri sui.

Sicut locutus est per os sanctorum , *
qui à sæculo sunt , Prophetarum ejus.

Salutem ex inimicis nostris , * & de
manu omnium qui oderunt nos.

Ad faciendam misericordiam cum patri-

A V

bus nostris; * & memorari testamenti sui sancti.

Jusjurandum, quod juravit ad Abraham Patrem nostrum, * daturum se nobis.

Ut sine timore, de manu inimicorum nostrorum liberati, * serviamus illi.

In sanctitate & justitia coram ipso, * omnibus diebus nostris.

Et tu, puer, Propheta Altissimi vocaberis; * præbis enim ante faciem Domini parare vias ejus.

Ad dandam scientiam salutis plebi ejus, * in remissionem peccatorum eorum.

Per viscera misericordiæ Dei nostri, * in quibus visitavit nos oriens ex alto.

Illuminare his qui in tenebris & in umbra mortis sedent, * ad dirigendos pedes nostros in viam pacis.

Gloria Patri, &c.

Ant. Visitabo oves meas, & suscitabo super eas Pastorem unum qui pascat eas.

Ezech. 34.

Ÿ. Domine exaudi orationem meam.

R. Et clamor meus ad te veniat.

Oremus.

Spirituum ponderator, Domine, qui sanctum veras dari canibus; emitte, quæsumus, lucem tuam, & veritatem tuam, ut ad cœnam nuptiarum Agni amici sponsi introducantur, & arceantur alieni. Per Dominum nostrum, &c.

A D P R I M A M.

Deus in adjutorium , &c.

Hymnus.

Veni superne spiritus ,
Benigne pauperum pater ,
Donator alme munerum ,
Coeleste mentium jubar.

Tu cordis hospes intimus ,
Tu dulcis laborum quies ;
Tu fletibus quos elicis
Divina misces gaudia.

Adesto te vocantibus ,
Largire septem munera :
Regnare da, da vincere.
Victoribus da præmia.

Sit laus Patri , &c.

Ant. Nec quisquam.

Psalms 24.

AD te Domine levavi animam meam : *
Deus meus , in te confido non cru-
bescam.

Neque irrideant me inimici mei : * ete-
nim universi qui sustinent te, non confun-
dentur.

Confundantur omnes iniqua agentes : *
supervacuè.

Vias tuas Domine demonstra mihi : *
& semitas tuas edoce me.

Dirige me in veritate tua , & doce me : *

quia tu es Deus meus Salvator meus , & te sustinui totâ die.

Reminiscere miserationum tuarum Domine , * & misericordiarum tuarum , quæ à sæculo sunt.

Delicta juventutis meæ , * & ignorantias meas ne memineris.

Secundùm misericordiam tuam memento mei tu , * propter bonitatem tuam Domine.

Dulcis & rectus Dominus : * propter hoc legem dabit delinquentibus in via.

Diriget mansuetos in iudicio : * docebit mites vias suas.

Universæ viæ Domini misericordia & veritas : * requirentibus testamentum ejus & testimonia ejus.

Propter nomen tuum, Domine, propitiaberis peccato meo : * multum est enim.

Quis est homo qui timet Dominum ? * legem statuit ei in via quam elegit.

Anima ejus in bonis demorabitur : * & semen ejus hæreditabit terram.

Firmamentum est Dominus timentibus eum : * & testamentum ipsius ut manifestetur illis.

Oculi mei semper ad Dominum : * quoniam ipse evellet de laqueo pedes meos.

Respice in me , & miserere mei : * quia unicus & pauper sum ego.

Tribulationes cordis mei multiplicatæ sunt : * de necessitatibus meis erue me.

Vide humilitatem meam & laborem meum : * & dimitte universa delicta mea.

Respice inimicos meos , quoniam multiplicati sunt : * & odio iniquo oderunt me.

Custodi animam meam , & erue me : * non erubescam quoniam speravi in te.

Innocentes & recti adhæserunt mihi : * quia sustinui te.

Libera Deus Israël , * ex omnibus tribulationibus suis.

Gloria Patri , &c.

Ant. Nec quisquam sumat sibi honorem ; sed qui vocatur à Deo tanquam Aaron.

Heb. 5. 4.

Capitulum.

NE quis accedat alienigena , & qui non est de semine Aaron , ad offerendum incensum Domino , ne patiatur sicut passus est Core & omnis congregatio ejus loquente Domino. *R.* Deo gratias. *Num.* 16. 40.

R. *brev.* Christe Fili Dei vivi * Miserere nobis. Christe. *ψ.* Qui non temetipsum clarificasti ut Pontifex fieres * Miserere. Gloria Patri. Christe. *Heb.* 5. 5.

ψ. Exurge Christe adjuva nos.

R. Et libera nos propter nomen tuum.

ψ. Domine exaudi orationem meam.

R. Et clamor meus ad te veniat.

Oremus.

OMnipotens Deus qui omnia operaris secundum consilium voluntatis tuæ ; mitte , quæsumus , quos missurus es , ut

qui eis fueris oneris auctor, ipse fias administrationis adjutor, & des virtutem, qui contuleris dignitatem. Per Dominum.

A D T E R T I A M.

Deus in adjutorium, &c.

Hymnus.

Nunc sancte nobis Spiritus,
Unum Patri cum Filio,
Dignare promptus ingeri
Nostro refusus pectori.

Os, lingua, mens, sensus, vigor
Confessionem personent;
Flammescat igne caritas
Accendat ardor proximos.

Sit laus Patri, &c.

Ant. Si quis.

Psalmus 25.

Judica me, Domine, quoniam ego in innocentia mea ingressus sum; * & in Domino sperans non infirmabor.

Proba me, Domine, & tenta me: * ure renes meos & cor meum.

Quoniam misericordia tua ante oculos meos est: * & complacui in veritate tua.

Non sedi cum concilio vanitatis: * & cum iniqua gerentibus non introibo.

Odivi Ecclesiam malignantium: * & cum impiis non sedebo.

Lavabo inter innocentes manus meas: *

& circumdabo Altare tuum Domine.

Ut audiam vocem laudis, * & enarrem
universa mirabilia tua.

Domine, dilexi decorem domus tuæ, *
& locum habitationis gloriæ tuæ.

Ne perdas cum impiis Deus animam
meam, * & cum viris sanguinum vitam
meam.

In quorum manibus iniquitates sunt: *
dextra eorum repleta est muneribus.

Ego autem in innocentia mea ingressus
sum: * redime me, & miserere mei.

Pes meus stetit in directo: * in Eccle-
siis benedicam te Domine.

Gloria Patri, &c.

Ant. Si quis Spiritum Christi non habet,
hic non est ejus. *Rom.* 8. 9.

Capitulum.

Qui non intrat per ostium in ovile
ovium, sed ascendit aliundè, ille fur
est & latro; qui autem intrat per ostium,
Pastor est ovium, huic ostiarius aperiet.
R. Deo gratias. *Joan.* 10. 2.

R. brev. Spiritus tuus bonus * deducet
me in terram rectam. *R.* Spiritus. *Ps.* Di-
riget mansuetos in iudicio. * Deducet. Glo-
ria Patri. *R.* Spiritus. *Psf.* 142. 10.

Ps. Ne projicias me à facie tuâ,

R. Et Spiritum Sanctum tuum ne au-
feras à me.

Ps. Domine exaudi orationem meam,

R. Et clamor meus ad te veniat.

Oremus.

DEus qui facis Angelos tuos Spiritus,
& Ministros tuos flammam ignis,
emitte spiritum tuum, & renova faciem
Cleri, ut Sacerdotes, velut administrato-
rii spiritus in ministerium missi, de regno
tuo tollant omnia scandala, & ignem, quem
venit Jesus mittere in terram, in omnium
cordibus accendant. Per eundem in
unitate ejusdem, &c.

A D S E X T A M.

Deus in adjutorium, &c.

Hymnus.

TE nunc Deus piissime
Vultu precamur cernuo;
Illapsa nobis cœlitus
Largire dona spiritus.

Dudum sacrata pectora .

Tuâ replesti gratiâ;
Dimitte nostra crimina
Et da quietia tempora.

Sit laus Patri, &c.

Ant. Omnis plantatio.*Psalms 23.*

DOmini est terra & plenitudo ejus: *
orbis terrarum, & universi qui ha-
bitant in eo.

Quia ipse super maria fundavit eum: *
& super flumina præparavit eum.

Quis ascendet in montem Domini : *
aut quis stabit in loco sancto ejus ?

Innocens manibus & mundo corde : *
qui non accepit in vano animam suam, nec
juravit in dolo proximo suo.

Hic accipiet benedictionem à Domino, *
& misericordiam à Deo salutari suo.

Hæc est generatio quærentium eum : *
quærentium faciem Dei Jacob.

Attollite portas principes vestras , & ele-
vamini portæ æternales : * & introibit Rex
gloriæ.

Quis est iste Rex gloriæ ? * Dominus
fortis & potens : Dominus potens in prælio.

Attollite portas principes vestras , & ele-
vamini portæ æternales : * & introibit Rex
gloriæ.

Quis est iste Rex gloriæ ? * Dominus
virtutum ipse est Rex gloriæ.

Gloria Patri , &c.

Ant. Omnis plantatio quam non planta-
vit Pater meus coelestis eradicabitur. *Mat.*
15. 13.

Capitulum.

N Oli quærere à Domino ducatum , ne-
que à rege Cathedram honoris : noli
quærere fieri judex , nisi valeas virtute ir-
rumpere iniquitates. *R.* Deo gratias. *Eccli.*
7. 4.

R. *br.* Proba me Deus , * Et scito cor
meum. *R.* Proba me. *Ps.* Interroga me, &
cognosce semitas meas : * Et scito. Gloria

18 *Officium parvum,*

Patri. R. Proba me. *Psal.* 138. 23.

ψ. Vias tuas Domine demonstra mihi.

R. Et semitas tuas edoce me.

Oremus.

Constitue, Domine, super opus tuum viros boni testimonii, plenos Spiritu Sancto, & sapientia, qui velut fideles mysteriorum dispensatores, quæ sua sunt non quærant, sed ab ovibus recipientes necessitatis sustentationem, à Principe Pastorum expectent mercedem. Per eundem.... in unitate ejusdem, &c.

A D N O N A M.

Deus in adjutorium, &c.

Hymnus.

O Veritatis spiritus,
Fons sanctitatis, quo sine
A labe nullus integer,
Imple tuo nos numine.

Veni, lava cor sordidum,
Siccum riga, durum doma,
Reduc vagantes, frigidos
Accende, sana faucios.

Sit laus, &c.

Ant. Amice.

Psalms 14.

Domine quis habitabit in tabernaculo tuo? * aut quis requiescet in monte sancto tuo?

Qui ingreditur sine maculâ : * & operatur justitiam.

Qui loquitur veritatem in corde suo : * qui non egit dolum in lingua sua.

Nec fecit proximo suo malum : * & opprobrium non accepit adversus proximos suos.

Ad nihilum deductus est in conspectu ejus malignus : * timentes autem Dominum glorificat.

Qui jurat proximo suo , & non decipit : * qui pecuniam suam non dedit ad usuram , & munera super innocentem non accepit.

Qui facit hæc * non movebitur in æternum.

Gloria Patri , &c.

Ant. Amice , quomodo huc intraſti non habens vestem nuptialem ? *Mat.* 22. 12.

Capitulum.

VÆ filii desertores , dicit Dominus , ut faceretis consilium , & non ex me , & ordiremini telam & non per spiritum meum , ut adderetis peccatum super peccatum , & os meum non interrogastis.

R. Deo gratias. *Is.* 30. 1.

R. *br.* Tu Domine , * Qui corda nostri omnium. *R.* Tu Domine. *Ÿ.* Ostende quem elegeris accipere locum ministerii hujus. * Qui. Gloria. &c. *R.* Tu Domine.

Ÿ. Si dixerit mihi Dominus , non places.

R. Præstò sum , faciat quod bonum est coram se.

20 *Officium parvum,*

Ps. Domine exaudi, &c.

R. Et clamor, &c.

Oremus.

Sanguis, quem effudit Christus ut exhiberet sibi gloriosam Ecclesiam, clamat ad te, Deus, ut à Sacerdotali ministerio fures & mercenarios arceas; & qui mensæ dæmoniorum gaudent esse participes, ejusdem Dominici sanguinis non finas fieri consecratores. Per eundem.

A D V E S P E R A S.

Deus in adjutorium, &c.

Ant. Omnis.

Psalms 100.

Misericordiam & judicium * cantabo tibi Domine.

Psallam & intelligam in via immaculata: * quando venies ad me.

Perambulabam in innocentia cordis mei: * in medio domus tuæ.

Non proponebam antè oculos meos rem injustam: * facientes prævaricationes odivi.

Non adhæsit mihi cor pravum: * declinantem à me malignum non cognoscebam.

Detrahentem secreto proximo suo: * hunc persequabar.

Superbo oculo & insatiabili corde, * cum hoc non edebam.

Oculi mei ad fideles terræ ut sedeant

mecum : * ambulans in via immaculata ,
hic mihi ministrabat.

Non habitabit in medio domûs meæ ;
qui facit superbiam : * qui loquitur iniqua
non direxit in conspectu oculorum meorum.

In matutino interficiebam omnes pec-
catores terræ : * ut disperderem de civi-
tate Domini omnes operantes iniquitatem.

Gloria Patri , &c.

Ant. Omnis alienigena incircumcissus cor-
de , non ingreditur sanctuarium meum.
Ezech. 44. 9.

Capitulum.

Dominus quasi ignis conflans, & emun-
dans argentum , & purgabit filios Le-
vi ; & erunt Domino offerentes sacrificia
in iustitia. *R.* Deo gratias. *Mach. 3. 3.*

Hymnus.

Veni Creator Spiritus ;
Mentes tuorum visita ,
Imple supernâ gratiâ ,
Quæ tu creasti pectora ;
Qui Paracletus diceris ,
Donum Dei altissimi ,
Fons vivus , ignis , caritas ,
Et spiritalis unctio.

Tu sepsiformis munere
Dextræ Dei tu digirus ,
Tu ritè promissum Patris ;
Sermone ditans guttura.

Accende lumen sensibus ;
Infunde amorem cordibus

22 *Officium parvum ;*

Infirma nostri corporis
Virtute firmans perpeti.

Hostem repellas longius ,
Pacemque dones protinus ;
Ductore sic te prævio
Vitemus omne noxium.

Per te sciamus da Patrem ;
Noscamus atque Filium ,
Te utriusque Spiritum
Credamus omni tempore. Amen.

ψ. Sanctificabor in iis qui appropinquant
mihi.

℞. Et in conspectu omnis populi glori-
ficabor.

Ad Magnificat, Ant. Elegit Sacerdotes.
Cant. B. M. V. Luc. i.

Magnificat * anima mea Dominum.
Et exultavit spiritus meus * in Deo
salutari meo.

Quia respexit humilitatem ancillæ suæ : *
ecce enim ex hoc beatam me dicent om-
nes generationes.

Quia fecit mihi magna, qui potens est ; *
& sanctum nomen ejus.

Et misericordia ejus à progenie in pro-
genies * timentibus eum.

Fecit potentiam in brachio suo : * dis-
persit superbos mente cordis sui.

Deposuit potentes de sede , * & exal-
tavit humiles.

Esurientes implevit bonis , * & divites
dimisit inanes.

Suscepit Israël puerum suum , * recordatus misericordiæ suæ.

Sicut locutus est ad patres nostros , * Abraham & semini ejus in sæcula.

Gloria Patri , &c.

Ant. Elegit Sacerdotes sine maculâ voluntatem habentes in lege Dei : & munda-
verunt sancta. *Mac. 4. 42.*

Oremus.

Domine Jesu , qui temetipsum pro nobis sanctificasti , & irreprehensibiles esse præcipis , quos aliis præesse jubes corrigendis : iis tantum reconciliationis ministerium & sanguinis tui dispensationem committe , qui morum exornantur splendore , ut ex integritate Sacerdotum fiat salus populorum. Qui vivis & regnas.

AD COMPLETORIUM.

Converte. nos Deus , salutaris noster.

R. Et averte iram tuam à nobis,

Deus in adjutorium , &c.

Ant. Adducam eos.

Psalms 83.

Quam dilecta tabernacula tua Domine virtutum , * concupiscit & deficit anima mea in atria Domini.

Cor meum & caro mea * exultaverunt in Deum vivum.

Etenim passer invenit sibi domum ; * &

24 *Officium parvum;*

turtur nidum sibi, ubi ponat pullos suos.

Altaria tua, Domine, virtutum, * Rex meus & Deus meus.

Beati qui habitant in domo tua, Domine: * in sæcula sæculorum laudabunt te.

Beatus vir, cujus est auxilium abs te: * ascensiones in corde suo disposuit in valle lacrymarum in loco quem posuit.

Etenim benedictionem dabit legislator; ibunt de virtute in virtutem; * videbitur Deus deorum in Sion.

Domine, Deus virtutum, exaudi orationem meam; * auribus percipe, Deus Jacob.

Protektor noster aspice Deus; * & respice in faciem Christi tui.

Quia melior est dies una in atriis tuis * super millia.

Elegi abjectus esse in domo Dei mei, * magis quàm habitare in tabernaculis peccatorum.

Quia misericordiam & veritatem diligit Deus: * gratiam & gloriam dabit Dominus.

Non privabit bonis eos, qui ambulant in innocentia: * Domine, virtutum, beatus homo, qui sperat in te.

Gloria Patri, &c.

Ant. Adducam eos in montem sanctum meum, & lætificabo eos in domo orationis meæ; holocausta eorum, & victimæ eorum placebunt mihi super Altari meo. *Is.*

16. 7.

Hymnus.

ad Completorium.

25

Hymnus.

Christe, qui lux es & dies,
Noctis tenebras detegis:
Lucisque lumen crederis,
Lumen beatum prædicans.

Precamur, sancte Domine,
Defende nos in hac nocte,
Sit nobis in te requies,
Quietam noctem tribue.

Ne gravis somnus irruat,
Nec hostis nos surripiat,
Nec caro illi consentiens,
Nos tibi reos statuatur.

Oculi somnum capiant,
Cor ad te semper vigilet:
Dextera tua protegat
Famulos qui te diligunt.

Defensor noster aspice,
Insidiantes reprime,

Guberna tuos famulos,
Quos sanguine mercatus es.

Memento nostri, Domine,
In gravi isto corpore:

Qui es defensor animæ,
Adesto nobis, Domine.

Sit laus Patri, laus Filio,
Sit & tibi laus, Spiritus

Afflante quo mentes sacris

Lucent & ardent ignibus. Amen.

Capitulum.

Qui dixit patri suo & matri suæ: nescio vos, & fratribus suis ignoro vos;

B

& nescierunt filios suos; hi custodierunt eloquium tuum & pactum tuum servaverunt. *Deut. 33. 9.*

R. br. Beati * Qui habitant in domo tua Domine. *R.* Beati. *Ps.* In sæcula sæculorum laudabunt te. * Qui. Gloria Patri. *R.* Beati. *Psal. 83. 5.*

Ps. Elegi abjectus esse in domo Dei mei.

R. Magis quam habitare in tabernaculis peccatorum.

Ad Nunc dimittis. Ant. Omnes.

Canticum S. Simeonis. Luc. 2.

Nunc dimittis servum tuum, Domine, * secundum verbum tuum in pace.

Quia viderunt oculi mei * salutare tuum.

Quod paraſti * ante faciem omnium populorum.

Lumen ad revelationem gentium, * & gloriam plebis tuæ Israël.

Gloria Patri, &c.

Ant. Omnes qui viderint eos, cognoscent illos, quia isti sunt semen cui benedixit Dominus.

Ps. Domine, exaudi. *R.* Et clamor, &c.

Oremus.

Domine Jesu, qui pascaris inter lilia, coelestis nos unktionis dulcedine perfunde, quos immaculati pudoris commendare debent conscientia & fama; ut sancti corpore & spiritu, in veritate tibi serviamus, & castitatis exemplo cæteris præluceamus. Qui vivis, &c.

LECTIONES

Pro singulis hebdomadæ diebus.

DOMINICA.

LECTIO j. Exod. 3.

De Libro Exodi.

VOcavit Dominus Moysen de medio rubi, & ait: Moyses, Moyses. Qui respondit: adsum. At ille; ne appropies, inquit, huc: solve calceamentum de pedibus tuis; locus enim in quo stas, terra sancta est. Et ait: ego sum Deus patris tui, Deus Abraham, Deus Isaac, & Deus Jacob; abscondit Moyses faciem suam: non enim audebat aspicere contra Deum. Cui ait Dominus: vidi afflictionem populi mei in Ægypto, & clamorem ejus audivi propter duritiam eorum qui præsumunt operibus: & sciens dolorem ejus, descendi ut liberem eum de manibus Ægyptiorum, & educam de terrâ illâ in terram bonam & spatiosam, in terram quæ fluit lacte & melle, ad loca Chananæi, & Hethei, & Amorrhæi, & Pherezæi, & Hævæi, & Jebusæi. Clamor ergo filiorum Israël venit ad me, vidique afflictionem eorum, qui ab Ægyptiis opprimuntur. Sed veni & mittam te ad Pharaonem, ut educas populum meum

B ij

filios Israël de Ægypto. Dixitque Moyses ad Deum: Quis sum ego ut vadam ad Pharaonem & educam filios Israël de Ægypto? Qui dixit ei: Ego ero tecum. Tu autem Domine, &c.

L E C T I O ij.

Lectio sancti Evangelii secundum
Joannem. c. 10.

A Men, amen dico vobis: qui non intrat per ostium in ovile ovium, sed ascendit aliunde: ille fur est & latro; qui autem intrat per ostium, pastor est ovium. Huic ostiarius aperit, & oves vocem ejus audiunt, & proprias oves vocat nominatim, & educit eas. Et cum proprias oves emisit, ante eas vadit: & oves illum sequuntur, quia sciunt vocem ejus. Alienum autem non sequuntur, sed fugiunt ab eo: quia non noverunt vocem alienorum. Hoc proverbium dixit eis Jesus. Illi autem non cognoverunt quid loqueretur eis. Dixit ergo eis iterum Jesus: Amen, amen dico vobis, quia ego sum ostium ovium. Omnes quotquot venerunt, fures sunt, & latrones, & non audierunt eos oves. Ego sum ostium. Per me si quis introierit, salvabitur: & ingredietur & egredietur, & pascua inveniet. Fur non venit nisi ut furetur, & mactet, & perdat. Ego veni ut vitam habeant & abundantius habeant.

F E R I A I I .

L E C T I O j .

num. 16.

De Libro Numerorum.

Surrexit Moyses & abiit ad Dathan & Abiron : & sequentibus eum senioribus Israël , dixit ad turbam : Recedite à tabernaculis hominum impiorum , & nolite tangere quæ ad eos pertinent , ne involvami in peccatis eorum. Cumque recessissent à tentoriis eorum per circuitum , Dathan & Abiron egressi stabant in introitu papilionum suorum , cum uxoribus & liberis omnique frequentiâ. Et ait Moyses : in hoc scietis quod Dominus miserit me ut facerem universa quæ cernitis , & non ex proprio ea corde protulerim : si consuetà hominum morte interierint , & visiterit eos plaga , quâ & cæteri visitari solent , non me misit Dominus : sin autem novam rem fecerit Dominus , ut aperiens terra os suum deglutiat eos & omnia quæ ad eos pertinent , descenderintque viventes in infernum , scietis quod blasphemerint Dominum. Confestim igitur ut cessavit loqui , dirupta est terra sub pedibus eorum : & aperiens os suum , devoravit illos cum tabernaculis suis & universâ substantia eorum , descenderuntque vivi in infernum operati humo , & perierunt de medio multitudinis.

B iij

De Actibus Apostolorum. cap. I.

EXurgens Petrus in medio fratrum dixit (erat autem , turba hominum simul , ferè centum vigenti.) Viri fratres , oportet impleri scripturam , quam prædixit Spiritus Sanctus per os David de Juda , qui fuit dux eorum , qui comprehenderunt Jesum : qui connumeratus erat in nobis , & sortitus est sortem ministerii hujus. Et hic quidem possedit agrum de mercede iniquitatis , & suspensus crepuit medius : & diffusa sunt omnia viscera ejus. Et notum factum est omnibus habitantibus Jerusalem , ita ut appellaretur ager ille , lingua eorum , Haceldama , hoc est , ager sanguinis. Scriptum est enim in libro Psalmorum : fiat commoratio eorum deserta , & non sit qui inhabitet in ea : & Episcopatum ejus accipiat alter. Oportet ergo ex his viris , qui nobiscum sunt congregati in omni tempore , quo intravit & exivit inter nos Dominus Jesus , incipiens à baptismo Joannis usque in diem , quâ assumptus est à nobis , testem resurrectionis ejus nobiscum fieri unum ex istis. Et statuerunt duos , Joseph , qui vocabatur Barsabas , qui cognominatus est justus : & Matthiam. Et orantes dixerunt : Tu Domine , qui corda nosti omnium , ostende quem elegeris ex his duobus unum , ac-

cipere locum ministerii hujus, & apostolatûs, de quo prævaricatus est Judas ut abiret in locum suum. Et dederunt sortes eis, & cecidit sors super Matthiam, & annumeratus est cum undecim Apostolis.

F E R I A I I I.

L E C T I O j. Sap. 9.

De Libro Sapientiæ.

Mitte (Sapientiam) de coelis sanctis tuis, & à sede magnitudinis tuæ, ut mecum sit & mecum laboret, ut sciam quid acceptum sit apud te: scit enim illa omnia, & intelligit, & deducet me in operibus meis sobriè, & custodiet me in suâ potentia. Et erunt accepta opera mea, & disponam populum tuum justè, & ero dignus sedium patris mei. Quis enim hominum poterit scire consilium Dei? aut quis poterit cogitare quid velit Deus? Cogitationes enim mortalium timidæ, & incertæ providentiæ nostræ. Corpus enim quod corrumpitur, aggravat animam, & terrena inhabitatio deprimit sensum multa cogitantem. Et difficile æstimamus quæ in terra sunt: & quæ in prospectu sunt invenimus cum labore. Quæ autem in cælis sunt quis investigabit? Sensum autem tuum quis sciet, nisi tu dederis sapientiam, & miseris Spiritum Sanctum tuum de Altissimis: & sic

correctæ sint semitæ eorum , qui sunt in terris , & quæ tibi placent didicerint homines ? Nam per sapientiam sanati sunt quicumque placuerunt tibi Domine à principio.

L E C T I O ij. Act. 13.

De Actibus Apostolorum.

ERant autem in Ecclesia, quæ erat Antiochiæ, Prophetæ, & Doctores, in quibus Barnabas, & Simon, qui vocabatur Niger, & Lucius Cirenensis, & Manahen, qui erat Herodis Tetrarchæ collactaneus, & Saulus. Ministrantibus autem illis Domino, & jejunantibus, dixit illis Spiritus Sanctus: segregate mihi Saulum, & Barnabam in opus, ad quod assumpsi eos. Tunc jejunantes, & orantes, imponentesque eis manus, dimiserunt illos. Et ipsi quidem missi à Spiritu Sancto abierunt Seleuciam, & inde navigaverunt Cyprum. Et cum venissent Salaminam, prædicabant Verbum Dei in Synagogis Judæorum. Habebant autem & Joannem in ministerio. Et cum perambulassent universam insulam usque Paphum, invenerunt quemdam virum Magum pseudo-Prophetam, Judæum, cui nomen Barjesu, qui erat cum Proconsule Sergio Paulo, viro prudente. Hic, accersitis Barnaba, & Saulo, desiderabat audire verbum Dei. Resistebat autem illis Elymas Magus (sic enim interpretatur nomen ejus).

quærens avertere Proconsulem à fide. Saulus autem qui & Paulus, repletus Spiritu Sancto, intuens in eum, dixit: O plene omni dolo, & omni fallaciâ, fili diaboli, inimice omnis justitiæ, non desinis subvertere vias Domini rectas. Et nunc ecce manus Domini super te, & eris cæcus, non videns solem usque ad tempus, & confestim cecidit in eum caligo, & tenebræ, & circuiens quærebat qui ei manus daret.

F E R I A I V.

*LECTIO j. 1. Reg. c. 3. 10.**De libro primo Regum.*

Venit Dominus & stetit: & vocavit sicut vocaverat secundò Samuël, Samuël. Et ait Samuël: loquere, Domine, quia audit servus tuus. Et dixit Dominus ad Samuëlem: ecce ego facio verbum in Israël, quod quicumque audierit, tinnient ambæ aures ejus. In die illa suscitabo adversum Heli omnia quæ locutus sum super domum ejus: incipiam & complebo. Prædixi enim ei quod judicaturus essem domum ejus in æternum, propter iniquitatem, eo quòd noverat indignè agere filios suos, & non corripuerit eos. Idcirco juravi domui Heli quod non expietur iniquitas domus ejus victimis & mu-

B v.

neribus usque in æternum. Dormivit autem Samuël usque manè, aperuitque ostia domus Domini. Et Samuël timebat indicare visionem Heli. Vocavit ergò Heli Samuëlem, & dixit: Samuël fili mi? Qui respondens, ait: præsto sum. Et interrogavit eum: quis est sermo quem locutus est Dominus ad te? Oro te nè celaveris me; hæc faciat tibi Deus, & hæc addat, si absconderis à me sermonem ex omnibus verbis quæ dicta sunt tibi. Indicavit itaque ei Samuël universos sermones, & non abscondit ab eo. Et ille respondit: Dominus est. Quod bonum est in oculis suis faciat: crevit autem Samuël, & Dominus erat cum eo, & non cecidit ex omnibus verbis ejus in terram.

LECTIO ij.

Lectio sancti Evangelii secundum
Matthæum.

Tunc accessit ad Jesum mater filiorum Zebedæi cum filiis suis, adorans & petens aliquid ab eo. Qui dixit ei: Quid vis? ait illi: dic ut sedeant hi duo filii mei, unus ad dexteram tuam & unus ad sinistram in regno tuo. Respondens autem Jesus, dixit: nescitis quid petatis; potestis bibere calicem, quem ego bibiturus sum? Dicunt ei: Possumus. Ait illis, calicem quidem meum bibetis: sedere autem ad dexteram meam vel sinistram non est meum dare:

vobis sed quibus paratum est à Patre meo. Et audientes decem indignati sunt de duobus fratribus. Jesus autem vocavit eos ad se, & ait: scitis quia Principes gentium dominantur eorum: & qui majores sunt potestatem exercent in eos. Non ita erit inter vos: sed quicumque voluerit inter vos major fieri, sit vester minister: & qui voluerit inter vos primus esse, erit vester servus. Sicut Filius hominis non venit ministrari, sed ministrare & dare animam suam redemptionem pro multis.

F E R I A V.

L E C T I O j. *Isai. 22.*

De Isaiâ Propheta.

HÆc dicit Dominus Deus exercituum: Vade ingredi ad eum qui habitat in tabernaculo, ad Sobnam præpositum templi, & dices ad eum: Quid tu hic aut quasi quis hic? quia excidisti tibi hic sepulchrum, excidisti in excelso memoriale diligenter, in petra tabernaculum tibi. Ecce Dominus asportari te faciet, sicut asportatur gallus gallinaceus, & quasi amictum sic sublevabit te. Coronans coronabit te tribulatione, quasi pilam mittet te in terram latam & spaciosam: ibi morieris, & ibi erit currus gloriæ tuæ, ignominia domus Domini tui. Et expellam te de statione

tua, & de ministerio tuo deponam te. Et erit in die illa: vocabo servum meum Eliacim filium Helciæ, & induam illum tunicâ tuâ, & cingulo tuo confortabo eum, & potestatem tuam dabo in manu ejus: & erit quasi pater habitantibus Jerusalem & domui Juda, & dabo clavem domus David super humerum ejus: & aperiet, & non erit qui claudat, & claudet, & non erit qui aperiat.

LECTIO ij. ad Galat. c. 1.

De Epist. B. Pauli Apost. ad Galatas.

CUm placuit ei, qui me segregavit ex utero matris meæ, & vocavit per gratiam suam, ut revelaret filium suum in me, ut evangelisarem illum in Gentibus: continuo non acquievi carni & sanguini, neque veni Jerosolimam ad antecessores meos Apostolos: sed abi in Arabiam: & iterum reversus sum Damascum; deinde post annos tres veni Jerosolimam videre Petrum, & mansi apud eum diebus quindecim: Alium autem Apostolorum vidi neminem, nisi Jacobum fratrem Domini. Quæ autem scribo vobis, ecce coram Deo quia non mentior. Deinde veni in partes Syriæ, & Ciliciæ. Eram autem ignotus facie Ecclesiis Judeæ quæ erant in Christo: tantum autem auditum habebant: Quoniam qui persequabatur nos aliquando, nunc evangelizat fidem quam aliquando expugnabat: & in me clarificabant Deum.

F E R I A V I.

L E C T I O ij. Jerem. c. 1.

De Jeremia Propheta.

F Actum est Verbum Domini ad me dicens : Priusquam te formarem in utero novi te : & antequam exires de vulvâ , sanctificavi te , & Prophetam in Gentibus dedi te. Et dixi , A , à , à , Domine Deus ecce nescio loqui quia puer ego sum. Et Dixit Dominus ad me : Noli dicere : puer sum ; quoniam ad omnia quæ mittam te ibis ; & universa quæcumque mandavero tibi loqueris. Ne timeas à facie eorum : quia tecum ego sum ut eruam te , dicit Dominus. Et misit Dominus manum suam , & tetigit os meum : Et dixit Dominus ad me : ecce dedi verba mea in ore tuo : ecce constitui te hodie super Gentes & super regna , ut evellas , & destruas , & disperdas , & dissipes , & ædifices & plantes.

L E C T I O ij. ad Hab. c. 5.

De Epist. B. Pauli Apost. ad Hæbreos.

O Mnis Pontifex ex hominibus assumptus , pro hominibus constituitur in iis quæ sunt ad Deum , ut offerat dona & sacrificia pro peccatis : qui condolere possit iis qui ignorant & errant : quoniam & ipse circumdatus est infirmitate : & propterea debet , quemadmodum pro populo , ita

etiam & pro semetipso offerre pro peccatis. Nec quisquam sumit sibi honorem, sed qui vocatur à Deo tanquam Aaron. Sic & Christus non semetipsum clarificavit ut Pontifex fieret: sed qui locutus est ad eum: Filius meus es tu, ego hodie genui te. Quemadmodum & in alio loco dicit: Tu es Sacerdos in æternum, secundum ordinem Melchisedech. Qui in diebus carnis suæ, preces supplicationesque ad eum, qui possit illum saluum facere à morte, cum clamore valido & lacrymis offerens, exauditus est pro suâ reverentiâ. Et quidem cum esset Filius Dei didicit, ex eis quæ passus est, obedientiam: & consummatus, factus est omnibus obtemperantibus sibi causa salutis æternæ. Appellatus à Deo Pontifex juxta ordinem Melchisedech.

S A B B A T O.

L E C T I O j. Ezech. c. 34.

De Ezechiele Propheta.

Fili hominis Propheta de Pastoribus Israël: Propheta, & dices pastoribus: hæc dicit Dominus Deus: Væ pastoribus Israël, qui pascebant semetipsos, nonne greges à pastoribus pascuntur? lac comedatis, & lanis operiebamini, & quod

crassum erat occidebatis : gregem autem meum non pascebatis. Quod infirmum fuit non consolidastis , & quod ægrotum non sanastis , quod contractum est non alligastis , & quod abjectum est non reduxistis , & quod perierat non quævistis. Sed cum austeritate imperabatis eis , & cum potentia. Et dispersæ sunt oves meæ , eo quod non esset Pastor : & factæ sunt in devorationem omnium bestiarum agri , & dispersæ sunt. Erraverunt greges mei in cunctis montibus , & in universo colle excelso , & super omnem faciem terræ dispersi sunt greges mei , & non erat qui requireret , non erat , inquam , qui requireret. Propterea pastores audite verbum Domini. . . Hæc dicit Dominus Deus ecce ego ipse super pastores requiram gregem meum de manu eorum , & cessare faciam eos ut ultra non pascant gregem , nec pascant amplius pastores semetipsos : & liberabo gregem meum de ore eorum , & non erit ultra eis in escam.

L E C T I O ij. Luc. 14.

Lectionis sancti Evangelii secundum Lucam.

Qui non bajulat crucem suam , & venit post me , non potest meus esse discipulus. Quis enim ex vobis volens turrim ædificare , non prius sedens computat sumptus , qui necessarii sunt , si habeat ad perficiendum ? ne posteaquam posuerit fundamentum , & non potuerit perficere , omnes,

40 *Lectiones Officii parvi.*

qui vident, incipiant illudere ei, dicentes :
Quia hic homo coepit ædificare, & non
potuit consummare. Aut quis rex iturus
committere bellum adversus alium regem,
non sedens prius cogitat, si possit cum de-
cem millibus occurrere ei qui cum viginti
millibus venit ad se? alioquin adhuc illo
longe agente, legationem mittens, rogat
ea quæ pacis sunt. Sic ergo omnis ex vo-
bis, qui non renunciat omnibus quæ pos-
sidet, non potest meus esse discipulus.
Bonum est sal: Si autem sal evanuerit, in
quo condietur? neque in terram, neque in
sterquilinum utile est, sed foras mittetur.
Qui habet aures audiendi audiat.

FINIS PRIMÆ PARTIS.





SECUNDA PARS.

EXERCITIUM DIURNUM.

I *N* (a) omnibus operibus tuis præcellens eslo, ad istum apicem pervenies, si, juxta normam ab Apostolo præscriptam, (b) omne quodcumque facis in verbo & in opere, omnia in nomine Domini Jesu-Christi studeas facere, sine intermissione orans & levans puras manus Deo in omni loco. Huic assequendo fini comparatum est præsens exercitium diurnum, quod tibi suppetat methodum omnibus diei actibus pie instituendis & dirigendis perutilem.

Monitum tamen te velim, OPTIME LECTOR, hoc exercitium non eâ mente fuisse adornatum, ut ad ea omnia quæ continet, singulis diebus præstanda, te te adstringas; sed ut illud repetitis vicibus attentè legendo, tuum paulatim pius affecti-

(a) *Libri Ecclesi. 33.* (b) *Coloss. 3.*

42 *Exercitium diurnum.*

bus in eo subjectis animum imbuas, qui pro datâ occasione, nec sine magno animæ tuæ emolumento, veluti spontè postmodum erumpent.

MAN È S U R G E N D O.

ŸŸ. Ecce ego quia vocasti me. 1. *Reg.* 3.

Domine, quid me vis facere? *Act.* 9.

Loquere, Domine, quia audit servus tuus. 1. *Reg.* 3.

Doce me facere voluntatem tuam quia Deus meus es tu. *Psf.* 142.

Quid mihi est in coelo, & à te quid volui super terram, Deus cordis mei, pars mea, Deus in æternum? *Psf.* 72.

Induendo Vestes.

ŸŸ. Nox præcessit, dies autem appropinquavit, abjiciamus ergo opera tenebrarum, & induamur arma lucis, sicut in die honestè ambulemus. *Rom.* 13.

Exue me, Domine, veterem hominem cum actibus suis, & indue me novum hominem qui secundum Deum creatus est in justitiâ & sanctitate veritatis. *Ephes.* 4.

Indue me armaturam Dei ut possim stare adversus insidias Diaboli. *Ephes.* 6.

Recita sequentes Psal. de Laudibus Dominicæ.

Psal. 62. Deus, Deus meus ad te de luce vigilo.

Cantic. Benedicite omnia opera Domini Domino.

Psal. 148. Laudate Dominum de coelis.

Orationes.

Domine , Deus omnipotens , qui ad principium hujus diei nos pervenire fecisti , tuâ nos salva virtute : ut in hac die ad nullum declinemus peccatum , sed semper ad tuam justitiam faciendam nostra procedant eloquia , dirigantur cogitationes & opera. Per.

Dirigere & sanctificare , regere , & gubernare dignare , Domine Deus Rex coeli & terræ , hodie corda & corpora nostra , sensus , sermones & actus nostros in lege tuâ , & in operibus mandatorum tuorum : ut hic & in æternum , te auxiliante , salvi & liberi esse mereamur Salvator mundi : Qui vivis & regnas.

Pater luminum , à quo omne datum optimum , & omne donum perfectum descendit , concede propitius ut non defrauder à die bono , & particula boni doni non me prætereat. Da spiritum bonum ; ut videam quomodò cautè ambulem , non quasi insipiens , sed ut sapiens , redimens tempus quoniam dies mali sunt. Per Dominum.

ORATIONI MENTALI VACANDUM.

Cum anima Sacerdotis & Clerici Altare sit , in quo jugiter ardere debet ignis divini amoris , hunc ignem nutrirî par est
(a) *subjiciendo ligna mane per singulos dies. Ni-*

(a) *Levis. 6.*

44 *Exercitium diurnum.*

mirum vel aliquam Dei perfectionem , aliquodvè religionis nostræ mysterium contemplando , vel quasdam veritates afflante Spiritu sancto prolatas mente revolvendo.

Multi tam doctè quàm piè , hujuscemodi meditationum argumenta digesserunt , ad quæ recurrere juvabit ; interim ne tempus orationis inaniter teras , probatam methodum accipe.

Methodus Orationis mentalis.

Oratio Mentalis est mentis ad Deum per pium & humilem affectum elevatio , ad exhibendum supremo numini religionis nostræ famulatum , divinumque ejus poscendum auxilium , ut ex sancto hujusmodi commercio meliores ipsique gratiores efficiamur.

Tres veluti partes in ea distinguntur. Præparatio , Corpus & Conclusio.

I.

In Præparatione tria præstanda.

1. Coram Deo te sistere debes fidei actu, firmiter credendo eum ubique esse præsentem , in loco in quo degis versari ; ipso denique intimo tuo tibi esse intimiorem : Quò inducaris ad supremum Religionis cultum illi præstandum , & cum summâ reverentiâ , in conspectu hujus divinæ Majestatis perseverandum.

2. Confitere te indignum esse qui divino fruaris colloquio , tum quia è nihilo es ,

Exercitium diurnum. 43

tum quia in Deum sæpius deliquisti, delicta igitur tua actu contritionis expungere coneris; & ut securius coram Deo consistas (b) *vestibus valde bonis* fratris tui natu majoris, seu prætiosis meritis Domini nostri J. C. indutus appare, per ipsum & cum ipso & in ipso orans Patrem cœlestem, ut copiosam tibi omnium bonorum spiritualium benedictionem impertiri dignetur.

3. (c) *Quia non sumus sufficientes cogitare aliquid à nobis, quasi ex nobis;* & (d) *quid oremus sicut oportet nescimus* Spiritus sancti auxilium supplex deprecare; (e) *ut ipse adjuvet infirmitatem tuam, & postulet pro te gemitibus inenarrabilibus.*

I I.

Orationis Corpus in tria dividitur Puncta.

In primo. Meditationis argumentum considerare juvat respectu Christi Domini, attendendo quid cogitaverit, dixeritve, aut fecerit circa præsentem materiam, ipsius dicta, vel gesta, vel animi sensus, adorando, & cum sincera grati animi testificatione laudando & amplexando; quibus actibus adjungi poterunt pii affectus admirationis, lætitiæ, compassionis, &c. prout instituti ratio postulaverit; insuper sanctissimæ Trinitati adorationem, & cætera religionis obsequia impendere curabis; maxi-

(b) *Genes. 27.* (c) *2. Cor. 3.*

(d) *Rom. 8.* (e) *Ibid.*

46 *Exercitium diurnum.*

mè si vel aliquam Dei perfectionem, vel aliquam ejus Personam contempleris.

In secundo Puncto. 1. Meditationis propositum versa quantum ad te pertinet; nimirum quid, ad tuum profectum spiritualem, sit fugiendum, quidvè præstandum sit perpendendo. Ut verò efficacius & vitium declinare, & virtutem amplecti valeas, omni momentorum pondere animum tuum preme, & adige ad eas, in præsentī negotio, partes adimplendas, quæ tui sunt officii.

2. Confer tuam agendi rationem cum tuis obligationibus, seriò tecum reputans, nùm in hac parte muneri tuo defueris: hæc vero disquisitio amplam tibi peccatorum lapsuumve segetem patefaciet; ex quibus humilior factus, noxas præteritas repetitis contritionis actibus absterge; pudore suffusus pro miserâ animæ tuæ præsentī conditione, ad emendationem vitæ tuæ pro viribus te accinge; cæterosque affectus elice, peractis jam considerationibus consentaneos.

3. Tandem præterita peccata tua mente revolvens, præsentisque infirmitatis tibi conscius; hoc solum habes residui ut oculos tuos ad Deum dirigas, supplex auxilium gratiæ ejus imploraturus; quò ad meliorem frugem te recipias; ut autem istud impetres, ad merita Christi Domini confuge insuper patrociniū sanctissimæ Dei Genitri-

Exercitium diurnum. 47

eis, Angeli tui, custodis, & Sanctorum, in penuriæ tuæ subsidium, abs te non erit adhibere.

In tertio Puncto. Ut singularis illa, quâ Deus te misericorditer prævenit, gratia, in te vacua non sit; bona tibi statue propo-
sita, eaque subjectæ meditationi, & eges-
sati tuæ congrua: ne autem in fumum evanescant, non tantum generalia sint, sed specialia, tempori, loco, & circum-
stantiis in quibus versaris, accommodata: efficacitate suâ omnibus prævaleant impe-
dimentis; & ad legitima te adigant adhibenda perfectionis media: demum ea ipsa comi-
tentur, & tuæ levitatis benè cautâ suspi-
cio, & firma in Deum fiducia.

III.

In Conclusione, tria pariter præstanda.

1. Grates Deo pro collatis tibi ab ipso in hac-ce meditatione beneficiis persolvendæ.

2. Venia pro omnibus mentis evagationibus exoranda.

3. Rogandus Deus ut sanctis tuis faveat propositis, diemque, vitam, & tuæ mortis horam ipse fortunare dignetur.

Ut vero, sicuti ait Psalmista, (f) *reliquiæ cogitationis diem festum agant tibi.* Ex piis affectibus, sanctisve cogitationibus, quibus in oratione permotus fuisti; quemdam ve-

(f) Ps. 75.

48 *Exercitium diurnum.*

luti fasciculum spirituales sæpius per diem aspirandum tibi compones.

Absolutâ denique oratione, fidissimæ Dei Genitricis tutelæ te commendabis: rogans eam ut sancta tua proposita, omnemque orationis fructum in te conservet, & ad hunc finem recitabis orationem. *Sub tuum præsidium, &c.*

31.

O R A T I O.

Ad invocandum in se vitam D. N. J. C.

O Jesu vivens in Mariâ, veni & vive in famulo tuo, in spiritu sanctitatis tuæ, in plenitudine virtutis tuæ, in perfectione viarum tuarum, in veritate virtutum tuarum, in communionem mysteriorum tuorum; dominare omni adversæ potestati, in spiritu tuo, ad gloriam Patris. Amen.

Notanda quædam ad optatum fructum ex Oratione reportandum.

1. (g) *Ante Orationem præpara animam tuam*, cordis munditiâ, fugâ peccati, aberrantes sensus tum internos tum externos recolligendo, & unam Dei gloriam, ac proprium profectum spirituales intendendo. Tum orationis argumentum prospice, pridie ad vespertinum illud attentè legendo, & manè postero hujus præcipua capita summatim mente revolvendo.

2. Ipso orationis tempore; necessarium non est omnes methodi actus percurrere, sed

(g) *Eccli. 18.*

Exercitium diurnum. 49

sed si in aliqua consideratione, vel sanctâ affectione utiliter distinearis, tamdiù in his persevera, quamdiù afflabit Spiritus-Sanctus: insistendum tamen est potissimum postulationibus, affectibus, & propositis, in quibus orationis summa consistit.

3. Post orationem (h) *omni custodiâ serva cor tuum*, nè fructus orationis evanescat; noli statim vehementiori ardore curis externis incumbere: & idemidem sancta tua proposita animo revolve, ut ea pro opportunitate ad praxim redigere coneris.

HORÆ CANONICÆ RITÈ persolvendæ.

Quisquis, ad laudes Deo, nomine Ecclesiæ, peragendas, deputaris; pensare debes diligenter quàm copiosa, & in toto vitæ decursu, & in mortis articulo, te maneat meritorum seges, si tuas in tam præstanti officio partes exequaris: Quàm terribilia verò tibi impendant maledicta, (i) *si opus Dei facias negligenter*. Noli igitur cursim & perfunctoriè angelicum istud munus obire; sed omnes animi vires recollige, ut illud *dignè, attentè & devotè* valeas adimplere.

1. *DIGNE*, videlicet *DEO*, (l) *in quem Angeli desiderant prospicere*; nec tamen

(h) *Prov.* 4. (i) *Jer.* 48. (l) *1. Pet.* 1.

50 *Exercitium diurnum.*

suo te dedignatur gratificari colloquio.

CHRISTO Ecclesiæ Sponso, qui licet in cœlestibus constitutus partes advocati nostri ut tradit (m) B. Joannes, etiamnum agens, preces supplicationesque tuas, nomine sponsæ suæ præstas, Deo Patri non cessat offerre.

SANCTIS, quorum victorias & triumphos recolis, cum quibus cœlesti propèmodum coaptatus collegio, voce concordi divinos hymnos decantas.

SACRIS Eloquiis quæ per os tuum assumis, in quibus suppetit tibi laudum thesaurus Deo condignarum; etenim, juxta sancti Augustini dictum, (n) ut benè ab homine laudetur, laudavit semetipsum Deus; et ideò quia dignatus est se laudare, invenit homo quemadmodum laudet eum.

VOCATIONE, quâ, ut sanctus asserit Chrysostomus, (o) pro universo terrarum orbe legatus intercedis, deprecatorque apud Deum adstas, ut hominum omnium, non viventium modò, sed etiam mortuorum peccatis, propitiùs esse dignetur.

2. *ATTENTE*, non tantum linguâ, sed & mente & spiritu psallendo, ut præcipiebat Apostolus.

LINGUA, nimirum verba sancta non deglutiendo, media non præcidendo, ut ad-

(m) 1. Joan. 2. (n) Pref. in Psal. 144.

(o) Lib. 6. Sac. c. 4.

Exercitium diurnum. 51

monet sanctus Bernardus, (p) nec integra transiliendo; sed virili, ut dignum est, & sonitu & affectu voces sancti Spiritus depromendo.

MENTE, quomodo enim, ait sanctus Cyprianus, (q) te audiri à Deo postulas, cum te ipsum non audias? Vis esse Deum memorem tui, cum tu ipse memor tui non sis? Adjunge igitur ad verba, cogitationem eorum quæ Psalmo significantur; „ Ora, inquit S. Augustinus, (r) si Psal-
„ mus orat; geme, si gemit; si sperat,
„ spera; time, si timet; gaude, si gratu-
„ letur. „

Plurimum etiam juvabit, vel præstantiora Dei beneficia mente recolere, vel aliqua Religionis mysteria meditari; præstò habes sequentibus versibus septem præcipua passionis Christi capita, singulis horis canonicis accommodata.

Matutina ligat Christum qui crimina solvit.

*Prima replet sputis; causam dat Tertia
Mortis.*

Sexta cruci nescit; latus ejus Nona bipertit.

Vespera deponit; tumulo Completa reponit.

3. **DEVOTE**. Neque enim vocis duntaxat modulatione & mentis attentione,

(p) *Serm.* 47. *in cant.* (q) *De Orat. Dem.*

(r) *In Psalms*, 30.

52 *Exercitium diurnum.*

sed devotione cordis debitum tuæ servitutis pensum absolvere par est. Divinis igitur accensus eloquiis, omnes ex corde tuo pietatis & religionis affectus exæstuent.

HUMILITATIS nempe, quoniam (s) *Respicit Dominus in orationem humilium & non spernit precem eorum.*

CONTRITIONIS, quia (t) *non est speciosa laus in ore peccatoris.* Ad eum enim spectat ista Spiritus-Sancti objurgatio, (u) *Quarè tu enarras justitias meas, & assumis testamentum meum per os tuum?*

FIDEI & SPEI, etenim, sponse Christo, [x] *Quidquid orantes petieritis; credite quia accipietis, & fiat vobis.*

CHARITATIS demùm, non enim clamans sed amans cantat in aure Dei. Dilata ergo cor tuum, & exopta omnes religionis & amoris affectus in te colligere, quibus Angeli & Sancti omnes in coelis effervescent, & animæ justorum in terra inflammantur. Provoca illos dicendo cum Psalmista [y] *Magnificate Dominum mecum, & exaltemus nomen ejus in idipsum, vel, accine illis, repetendo istud Apocalypsis sacrum Epinicion.* (z) *Dignus es, Domine Deus noster, accipere laudem, & gloriam, & honorem, & virtutem, & benedictionem, quia tu creasti omnia, &c.*

Ad hos devotionis sensus percipiendos

(s) *Pf. 101.* (t) *Eccl. 15.* (u) *Pf. 49.*

(x) *Marc 11.* (y) *Pf. 33.* (z) *Apo. 4.*

Exercitium diurnum. 53

maximè proderit, hunc versum *Gloria Patri*, &c. pronunciare, veluti Thema & compendium omnis religiosi cultus qui sanctissimæ Trinitati vel jam exhibitus, vel persolvendus est per infinita sæculorum sæcula.

Oratio ante Officium.

A Peri, Domine, os meum ad benedicens nomen sanctum tuum, munda quoque cor meum ab omnibus vanis, perversis, & alienis cogitationibus: intellectum illumina, affectum inflamma, ut dignè, attentè, ac devotè hoc officium recitare valeam, & exaudiri merear ante conspectum divinæ Majestatis tuæ. Per.

Domine, in unione illius divinæ intentionis, quâ ipse in terris laudes Deo Patri persolvisti, has tibi horas persolvo.

Oratio post Officium.

Sacro-sanctæ & individuae Trinitati; crucifixi Domini nostri Jesu-Christi humanitati; beatissimæ & gloriosissimæ semperque Virginis Mariæ fœcundæ integritati; & omnium Sanctorum universitati; sit sempiterna laus, honor, virtus & gloria ab omni creatura; nobisque remissio omnium peccatorum, per infinita sæcula sæculorum. Amen.

Beata viscera Mariæ Virginis quæ portaverunt æterni Patris Filium; & beata ubera quæ lactaverunt Christum Dominum.

*ANTE EGRESSUM È DOMO,
Hos versiculos mente revolve.*

Mitte, Domine, Angelum tuum qui præcedat me, & custodiat in viâ.
Exod. 23.

Cohibe pedes meos ne oberrent in plateis civitatis. *Eccli 9. -*

Averte oculos meos ne videant vanitatem. *Psf. 118.*

Averte faciem meam à muliere comptâ, ne forte scandaliser in decore illius. *Eccli 9.*

Obtura aures meas ut non exaudiam vocem incantantium, & venefici incantantis sapienter. *Psal. 57.*

Præsta ut aspectu, & auditu justus sim; habitans inter eos, qui de die in diem animam justam iniquis operibus cruciant.
2. Pet. 2.

*IN IPSO TEMPLI INGRESSU,
Ausculta Christum tibi ex intimo Sacrario
dicentem.*

Pavete ad Sanctuarium meum, ego Dominus. *Lev. 26.*

Cum summâ humilitate responde.

ŸŸ. Quam terribilis est locus iste: non est hic aliud nisi domus Dei & porta cœli.
Genes. 28.

Exercitium diurnum. 55

Et quis poterit stare in conspectu Domini Dei sancti hujus? 1. Reg. 6.

Iniquitatem si aspexi in corde meo, non exaudiet Dominus. *Psal.* 65.

Domine averte faciem tuam à peccatis meis, & omnes iniquitates meas dele. *Psal.* 50.

Adorabo ad Templum sanctum tuum in timore tuo. *Psal.* 5.

Introibo in domum tuam in holocaustis, reddam tibi vota mea quæ distinxerunt labia mea. *Psal.* 65.

Ego autem ad Dominum aspiciam, & expectabo Deum Salvatorem meum. Audiet me Deus meus. *Mich.* 7.

Methodum audiendæ Missæ, item & Exercitium sanctissimæ communionis, abundè supeditabit Quarta Pars hujus opusculi, intereà candidatos Sacerdotii memores esse velim istius S. Concilii Tridentini sententiæ; Sess. 23. c. 11. de Reformatione.

Ita de gradu in gradum ascendant, ut in eis cum ætate, vitæ meritum & doctrina major accrescat; quod & bonorum morum exemplum, & assiduum in Ecclesia ministerium, atque major erga Præsbyteros & superiores ordines reverentia, & crebrior quàm antea Corporis Christi communio maximè comprobabunt.

*P O S T M I S S A M**Actus Consecrationis.*

O Domine, quia ego servus tuus & filius ancillæ tuæ, abrenuntio Satanæ & omnibus operibus ejus, & omnibus pompis ejus: tu solus Deus cordis mei & pars mea Deus in æternum; tu solus pars hæreditatis meæ & calicis mei; tu es qui restituas hæreditatem meam mihi. Suscipe ergo solus universam libertatem meam; accipe memoriam, intellectum, voluntatem, sanitatem, vitam, famam. Quidquid habeo mihi largitus es; id totum tibi restituo, ac tuæ prorsus trado voluntati gubernandum. Amorem tui solum cum gratiâ tuâ mihi dones, & dives sum satis; nec quidquam ultra posco. Per.

Oratio ad Christum.

Domine Jesu-Christe, qui cum dilexisses tuos qui erant in mundo, in finem dilexisti eos: concede nobis ut, jugi sacrificio recolentes exitum conversationis tuæ, te videamus in forma Dei pium remuneratorem, quem habuimus in forma servi misericordem convivam & fratrem. Qui vivis, &c

Oratio Sancti Bernardi ad beatissimam Virginem.

Memorare, ô piissima Virgo Maria, non esse auditum à sæculo, quemquam ad tua currentem præsidia, tua implorantem auxilia, tua petentem suffragia,

Exercitium diurnum. 57

esse derelictum. Ego tali animatus confidentiâ, ad te Virgo Virginum Mater curro, ad te venio, coram te gemens peccator assisto, noli Mater Verbi verba mea despicere, sed audi propitia & exaudi. Amen.

*Monstra te esse Matrem,
Sumat per te preces,
Qui pro nobis natus
Tulit esse tuus.*

Post regressum in domum.

ψ. Vivit Dominus, quoniam custodivit me Angelus ejus & hinc euntem, & ibi commorantem, & inde huc revertentem. *Judith. 13.*

Oratio.

Absconde me, Domine, in abscondito faciei tuæ à conturbatione hominum: Protege me in tabernaculo tuo à contradictione linguarum, quoniam diminutæ sunt veritates à filiis hominum; & quoniam vidi iniquitatem & contradictionem in civitate; die ac nocte circumdabit eam super muros ejus iniquitas, & labor in medio ejus & injustitia; & non defecit de plateis ejus usura & dolus: vana locuti sunt unusquisque ad proximum suum: labia dolosa in corde & corde locuti sunt. Domine Pater & dominator vitæ meæ, ne derelinquas me in consilio eorum: nec finas me cadere in illis. Per Dominum.

*PIIS LECTIIONIBUS**Ac potissimum Scripturæ Sacræ
intendendum.*

Attende [a] *Lectiōni, exhortationi, & doctrinæ*, ait Apostolus ad Timotheum; *insta in illis: hoc enim faciens, & teipsum saluum facies, & eos qui te audiunt.*

Primo. Quidem teipsum saluum facies; Quid enim sanctius, quid ad salutem magis proficuum, quàm Deum ipsum, quam amicos Dei & Sanctos audire conversantes, & cœlesti illorum frui colloquio? Porro vivunt isti, in operibus suis, Sancti & amici Dei sibi ipsi superstitēs; hic loquuntur & silent; hic audiuntur & tacent; hic interrogantur & muti respondent. Ipsi te docebunt, inquit S. Isidorus Hispal. [b] quid caveas; tibi ostendent quod teneas, quò tendas, quò sensus & intellectus augeatur: multum proficies eorum opera assiduè versando; quia vita viri iusti, pergit [c] Theodulphus Aurelian. Lectiōne instruitur, ornatur, & munitur à peccato, juxta illum qui dicebat in [e] *corde meo abscondi eloquia tua ut non peccem tibi.* Hæc sunt enim arma, lectiō videlicet & oratio, quibus dia-

(a) 1. *Tim* 4. (b) *De contempt. Sac.*

(c) *Capit. c. 3.* (e) *Psf.* 118.

bolus expugnatur; hæc sunt instrumenta quibus æterna beatitudo acquiritur; his armis vitia comprimuntur; his alimentis virtutes nutriuntur.

Sed quid de Scripturis sacris eloquar, quæ sunt, ut testatur [f] S. Greg. Mag. Epistola quædam omnipotentis Dei ad creaturam suam, in qua supremi illius numinis arcana referantur. In ipsis multa ac varia recondita sunt salutis adminicula. Ignoras viam quam carpere debes? [g] *Lucerna pedibus tuis verbum Dei*; ad fulgorem luminis hujus incede, & securus ad metam pervenies. Insurgunt passionum procellæ, & animam conturbant? [h] *Sermo Dei vivus & efficax penetrabilior omni gladio accipiti, pertingens ad divisionem animæ & corporis, compagum quoque & medullarum*. Extrahe gladium istum, & omnes cupiditatum radices refecabis. Supervenit aliqua prava cogitatio, & animum ad turpia sollicita? Assume tubam, ait [i] S. Ephrem, scripturas videlicet sacras; quemadmodum enim tuba sonans congregat milites; sic & divinæ Scripturæ ad nos clamantes cogitationes nostras congregant ad timorem Dei. Inter varia quibus distraheris implicamenta, animæ tuæ te fugit status & conditio? Adhibe Scripturam sacram, ibi te totum,

(f) *Lib. 4. Epist. Ep. 84.* (g) *Pf. 118,*

(h) *Heb. 4. (i) Serm. de patientiâ.*

60 *Exercitium diurnum.*

inquit [l] S. Prosper , velut in speculo quodam refulgente considerans ; quod in te pravamprehenderis , corriges ; quod rectum est , tenebis ; quod deforme , compones ; quod pulchrum , excoles ; quod sanum , servabis ; quod infirmum , corroborabis.

At vero ut ex sanctis tuis Lectionibus, salutare illos fructus reportes ; ausculta S. [m] Bernardum suadentem tibi , ut ex eis quæ legeris , aliquid quotidie in ventre memoriæ dimittatur quod fidelius digeratur , & sursum revocatum , crebrius ruminetur quod proposito conveniat , quod intentioni proficiat , quod detineat animum , ut aliena cogitare non libeat. Noli demum [n] auditor vel lector obliviosus esse , sed factor operis , non enim auditores aut lectores legis iusti sunt apud Deum , sed factores legis iustificabuntur. Illum potius imitare Diaconum , S. Ephrem dico , qui pingebat actibus paginam quam legerat. Ennod. in ejus vitâ.

Secundo. Sed & eos qui te audiunt salvos facies. Postquam enim meditatus fueris sapientiam , [o] lingua tua loquetur iudicium ; eructabit cor tuum verbum bonum. Tunc (p) amplecteris eum qui secundum doctrinam est fidelem sermonem , tunc potens eris exhortari in doctrina sana , & eos qui contra-

(l) De vita contemp. (m) Ad Fratres de monte Dei. c. 10. (n) Jacob, 1.

(o) Ps. 36. [p] Tit. 1.

Exercitium diurnum. 61

dicunt arguere. Omnis si quidem [q] Scriptura divinitus inspirata, non tantum te instruet ad salutem, sed & utilis est ad docendum, ad arguendum, ad corripiendum, ad erudiendum in justitia, ut perfectus sit homo Dei, ad omne opus bonum instructus. Sermo tuus sale isto condatur, & benè sapidus erit, quando scilicet dices quod ex divina Lectione didiceris, non quod præsumptione humani sensus inveneris. Ex Scriptura à Spiritu Sancto afflata, veluti ex communi quodam sanitatis fonte, remedia vitiis omnibus curandis idonea depromes. Exacuantur in te malevolæ peccatorum linguæ, ingeminantur flagella? [r] habens solatio sanctos Libros, [s] in patientia possidebis animam tuam: Sacerdos Dei Evangelium tenens, & Christi mandata custodiens, occidi potest, vinci non potest. Sit igitur semper in manibus tuis, & diù noctuque mente revolvatur; [t] tenenti codicem, somnus obrepat, & cadentem faciem pagina sancta suscipiat. Fac-sit Deus ut de te prædicetur, quod de Nepotiano testatur idem [u] S. Hieronymus, Lectione affluâ, & meditatione diuturnâ, de pectore suo fecit Christi Bibliothecam.

[q] *Tim. 3. (r) Machab. 12.*

[s] *Luc. 21. [t] S. Hier. Epist. ad Eustoch.*

[u] *In Epitap. Nepot. ad Heliodor.*

62 *Exercitium diurnum.*

Oratio ante Lectionem veteris Testamenti.

Confiteor tibi Pater, Domine coeli & terræ, quia abscondisti hæc à sapientibus & prudentibus, & revelasti ea parvulis: ecce puer ego sum, puer parvulus & ignorans egressum & introitum meum: sonet ergo vox tua in auribus meis; aperi mihi cor intendere his quæ ad nostram doctrinam scripta sunt: ciba me pane vitæ & intellectus, & aquâ sapientiæ salutaris pota me; ut non te derelinquam fontem aquæ vivæ, fodiamque mihi cisternas dissipatas quæ continere non valent aquas. Sint castæ deliciæ meæ scripturæ tuæ, nec fallar in eis, nec fallam ex eis; sint in lege tua voluntas & meditatio mea die & nocte, & ero tanquam lignum quod plantatum est secus decursus aquarum, quod fructum suum dabit in tempore suo. Per Dominum.

Oratio post Lectionem veteris Testamenti.

Deus, qui dedisti mihi cum gaudio suscipere verbum tuum, da virtutem retinendi illud in corde bono & optimo, & fructum afferendi in patientia; ut non auditor obliviosus factus, sed factor operis; obtineam benedictionem servi boni & fidelis, qui cognovit voluntatem Domini sui, & præparavit, & fecit secundum voluntatem ejus. Per Dominum.

Exercitium diurnum. 63

Oratio ante Lectionem novi Testamenti.

Jesu lux vera, qui illuminas omnem hominem venientem in hunc mundum: scio quia ex Deo venisti magister, & viam Dei in veritate doces. Verba quæ locutus es nobis spiritus & vita sunt. Sed quis est dignus aperire librum & solvere signacula ejus? Nonne tu qui occisus es, & redemisti nos Deo in sanguine tuo? Da mihi ergo nosse mysterium regni Dei, & investigabiles divitias tuas, explica mihi omnes thesauros sapientiæ & scientiæ Dei in te absconditos: sermo tuus capiat in me, lucerna sit pedibus meis, & lumen semitis meis; donec aspiret dies, & inclinentur umbræ. Qui vivis & regnas, &c.

Post Lectionem novi Testamenti.

VV. Hæc verba fidelissima sunt & vera. Nunquam locutus est homo, sicut hic homo.

Credo, Domine, adjuva incredulitatem meam.

Domine, ad quem ibimus? verba vitæ æternæ habes.

Oratio.

Salvator noster, cujus apparuit benignitas & humanitas erudiens nos ut abnegantes impietatem & sæcularia desideria, sobriè, & justè, & piè vivamus in hoc sæculo, concede, ut qui te similem nobis foris agnovimus, per te intus reformari mereamur. Qui vivis, &c.

STUDIO INCUMBENDUM.

QUanta virum Ecclesiasticum urgeat studii indefessi necessitas, haud ægrè perspiciet, quicumque ad hæc minitancia Dei verba seriò attenderit, (a) *Quia tu scientiam repulisti, repellam te ne sacerdotio fungaris mihi.* Quisquisve istud Apostoli præceptum auscultaverit; [b] *Sì quis videtur Propheta esse, cognoscat quæ scribo vobis . . . Si quis autem ignorat, ignorabitur.* Revera, inquit idem Gentium doctor [c] *Presbyteri duplici honore digni habeantur; modo tamen benè præsent, maxime si Laborent in verbo & in doctrinâ.* Verum quomodò rectè præerunt, quo pacto ad dispensationem verbi & doctrinæ sese conferent; [d] *Si filios Heli, filios Belial malè æmulantes, nescierint Dominum, neque officium Sacerdotum ad populum?* Nonne magis ex illorum inscitia, & Religioni vulnus lethiferum infligitur, & populi strages infanda subsequetur, & gravissimum ipsismet impendebit exitium?

Dico Sacerdotum ignorantiam esse Religionis vulnus: namque [e] *scientiam non habentes discernendi inter sanctum & profanum;* haud dubiè sanctuarium Dei polluetur, mensa ejus despectui habebitur, mysteria

(a) *Ose 4* [b] *1. Cor. 1. 4.* [c] *1. Timoth. 5.*
 [d] *1. Reg. 2.* (e) *Lev. 10.*

Exercitium diurnum. 65

sancta conculcabuntur, & plenissima gratiæ dissipabuntur fluentia. Ipsi demùm idola facti in domo Domini, plebem sibi commissam in multiplicem veluti idololatriam deturbabunt. Quemadmodum enim inquit [f] Pet. Damian. per Sacerdotum imperitiam, quos post captivitatem Israëlitiçi populi Rex Assyriorum in urbibus Samariæ constituerat, factum est quod scriptura testatur, [g] *unaquæque gens fabricata est Deum suum, posueruntque eos in fanis excelsis*: Ita nunc per Pseudo-Sacerdotum ignorantiam fieri dolemus, ut scilicet alii quorum Deus venter est, luxuriam colant; alii avaritiam quæ est idolorum servitus, venerentur; alii rapinis sacrilega devotione deserviant; & sic diversis criminibus tanquam simulachris & sculptilibus obsequium servitutis impendant.

Hinc claret quam horrenda populo sibi ipsis commisso strages immineat; audiamus Isaïam cladem istam graphicè depingentem (h) *speculatores ejus cæci canes muti non valentes latrare. . . . ipsi pastores ignoraverunt intelligentiam*. Porro quid fiet? Omnes in viam suam declinaverunt unusquisque ad avaritiam suam. Jam antea dixerat [i] *Propterea captivus ductus est populus meus, quia non habuit scientiam, & nobiles ejus interierunt fame, & multitudo ejus siti exa-*

(f) Opusc. 26. contra in scit. Cler.

(g) 4. Reg. 17. (h) Isa. 56. (i) Isa. 5.

66 *Exercitium diurnum.*

ruit: propterea dilatavit infernus animam suam, & aperuit os suum absque ullo termino. Nonne etiam ad hos Clericos & Sacerdotes otio torpentes spectat & istud ejusdem Prophetæ varicinium? [k] Omne caput languidum, & omne cor marens. En desidia & languor in Clero, qui teste S. Greg. Mag. pars est membrorum Christi prima; qualis ruina totum corpus invasura sit; enuntiant verba proximè sequentia. A plantâ pedis usque ad verticem non est in eo sanitas, sed vulnus & livor & plaga tumens, non est circumligata, neque fota oleo, nec curata medicamine.

Quam grave igitur manet eos exitium? nonne supremus Pastor de manu Pastorum illorum sanguinem gregis sui requireret? nonne ipsos ovidibus deperditis, vel inediâ confectis, animarum suarum jacturam facere oportebit? ita profectò, Domino apud Matth. inclamante [l] *cæcus si cæco ducatum præstet ambo in foveam cadunt.* Nimirum dum imperitâ manu flagitiosorum vulnera curare præsumunt, ipsi se cruentant, & vitiorum sordibus quas abstergere satagunt coinquinantur. Imò, ut Beatus ait Laurent. Justinian. (m) *ignorantes discernere inter lepram & lepram, nescientes qualitates criminum, quantumque Deo dis-*

(k) *Isa. i.* (l) *Matth. 15.*

(m) *De spiritali anima inter num. 15.*

Exercitium diurnum. 67

pliceant , sine profectu poenitentis , proprio seipfos mucrone interimunt.

Verumtamen , inquit Apostolus , (n) *si quis se existimat scire aliquid , nondum cognovit quomodo oporteat eum scire.*

(o) Quicumque igitur , pergit S. Thomas , hæc verba commentans , habet scientiam , & non modum eâ utendi , habet scientiam insufficienter. Modus sciendi , inquit post S. Bernardum , est ut scias *Quo ordine ? Quo studio ? Quo fine scire quæque oporteat ?*

1. *Quo ordine ?* ut id prius quod maturius ad salutem. (p) *Contentiones & pugnas legis evita* , inquit Apostolus , *sunt enim inutiles & vana.* Profundiora Religionis myſteria ad trutinam rationis ne expendas ; auscultâ istud Spiritus sancti oraculum. (q) *Altiora te ne quaſieris , & fortiora te ne scrutatus fueris . . . multos suplantavit suspicio illorum.* Hoc ipsum est quod præmonuerat in libro Proverb. (r) *Sicut qui mel multum comedit non est ei bonum , sic qui scrutator est majestatis opprimetur à gloria.* In hujusmodi quæſtionibus , (s) *ne transgrediaris terminos antiquos quos posuerunt patres tui.* Insiste igitur Apostoli consilio. (t) *Dico* , inquit , *per gratiam quæ data est mihi , omnibus qui sunt inter vos ,*

(n) 1. Cor. 8. (o) In cap. 8. 1. cor.

(p) Tit. 3. (q) Eccli. 3. (r) Prov. 5.

(s) Idem 22. (t) Rom. 12.

68 *Exercitium diurnum.*

non plus sapere quam oportet sapere, sed sapere ad sobrietatem.

2. *Quo studio? ut id ardentius, quod efficacius ad amorem.* Noli igitur oscitanter ad studium te conferre, sed amplectere eum qui secundum doctrinam est fidelem sermonem. Quid est amplecti, inquit Doctor Angelicus in hunc textum intendens? (u) Certè aliquid amplectens, illud diligenter constringit, & amplexus fit ex dilectione, oportet igitur te scientiæ inhærere cum amplexu, id est firmâ adhæsiōne animi & cordis dilectione: sed ita ardentem ut etiam efficaciter ad amorem, Jesum quærendo in libris, ut factitabat S. Augustinus. Attende Apostolum, qui licet raptus fuisset usque ad tertium cælum ubi audivit arcana verba quæ non licet homini loqui; aiebat. (x) *Non judicavi me scire aliquid inter vos nisi Jesum-Christum & hunc crucifixum.* Et rursus (y) & si habuero prophetiam, & noverim mysteria omnia, & omnem scientiam, . . . charitatem autem non habuero, nihil sum. Nimirum ea sola utilis est scientia quâ à Deo cognoscaris; porro. (z) *Si quis diligit Deum hic cognitus est ab illo.*

3. *Quo fine? ut non ad inanem gloriam,* pergit Doctor Angelicus, *vel curiositatem velis scire aliquid, sed ad edificationem tui & proximi.* Noli igitur, ait

(u) *In cap. 1. Tit.* (x) *1. Cor. 2.*

(y) *ibid. 13.* (z) *ibid. 8.*

Exercitium diurnum. 69

Apostolus, (a) *intendere fabulis & genealogiis interminatis, quæ quæstiones magis præstant quam adificationem quæ est in fide.* Qui hujusmodi vacant ii sunt de quibus itidem ait (b) *semper discentes, & nunquam ad scientiam veritatis pervenientes.* (c) *Æmulare*, inquit Pet. Blesens. ejusdem Apostoli consilio, charismata meliora, & in corde tuo devoret draco Moyfi draconem Pharaonis; id est veritatis scientia, scientiam vanitatis; non enim ascendet in montem, neque stabit in loco sancto ejus qui in vano accepit animam suam. Noli demum de tua doctrina altum sapere sed time, (d) *servus qui cognovit voluntatem Domini sui & non fecit vapulabit multis.* Verbo dicam, omni studio tuo satage ut scis lucerna ardens & lucens in domo Domini (e) est enim, ait S. Bern. tantum lucere vanum; tantum ardere parum; lucere & ardere perfectum. Cæterum si labor terret merces invitet. (f) *Qui enim hac doctrina docti fuerint, fulgebunt quasi splendor firmamenti, & qui ad justitiam erudiunt multos quasi stellæ in perpetuas æternitates.*

Oratio ante studium.

Deus scientiarum Domine, sapientiæ dux, & sapientium emendator, qui

(a) 1. Tim. 1. (b) 2. Tim. 3.

(c) Epist. 114. (d) Luc 12.

(e) Serm. in Nat. S. I. Bapt. (f) Dan. 12.

70 *Exercitium diurnum.*

doces hominem scientiam, & linguas infantium facis difertas; & qui scientiam repellentes repellis, ne sacerdotio fungantur tibi. Mitte sapientiam de coelis sanctis tuis, & à sede magnitudinis tuæ, ut mecum sit & mecum laboret; ut sciam quid acceptum sit apud te: nam & si quis erit consummatus inter filios hominum, si ab illo abfuerit sapientia tua, in nihilum computabitur. Da mihi intellectum, ut mihi attendens & doctrinæ, devitem profanas vocum novitates, & oppositiones falsi nominis scientiæ; fiamque operarius inconfusibilis rectè tractans verbum veritatis, potens exhortari in doctrina sana, & eos qui contradicunt arguere. Da mihi scientiam Sanctorum; scire etiam supereminentem scientiæ charitatem Christi; & idoneum fac me ministrum Novi Testamenti, ad dandam scientiam salutis plebi tuæ, ut cognoscant te solum Deum verum, & quem misisti Jesum-Christum. Per eundem.

Post studium.

Non finas me, Domine, inflari scientiâ quæ destruetur, sed da caritatem ædificantem quæ nunquam excidit, ut non evanescam in cogitationibus meis, nec judicem me scire aliquid inter homines, nisi Jesum-Christum, & hunc crucifixum. Per Dominum, &c.

*CIBI SUMPTIO SOBRIÈ
& piè instituenda.*

Sive (*a*) manducatis , five bibitis , inquit Apostolus , omnia in gloriam Dei facite. In hunc scopum collineabis , si refectionem tuam moderetur numeris omnibus completa sobrietas , informet vero pietas benè sibi ipsi provida.

Nimirum , quod prius spectat , „ quinque „ nos modis , ait S. Gregorius (*b*) gulæ „ vitium tentat : aliquando nempe indigen- „ tiæ tempora prævenit ; aliquando vero ci- „ bos lautiores quærit : aliquando quælibet „ sumenda sint , præparari accuratius expe- „ tit : aliquando in ipsa quantitate sumendi „ mensuram moderatæ refectionis excedit : „ nonnunquam vero , & abjectius est quod „ desiderat , & tamen in ipso æstu immensi „ desiderii deterius peccat.

Hæc omnia exemplis illustrat idem S. Doctor. „ Mortis sententiam patris ore Jo- „ nathas meruit , quia in gustu mellis con- „ stitutum edendi tempus anteceffit. Et ex „ Ægypto populus eductus in eremo occu- „ buit , quia despecto manna , cibos carnum „ petiit. quos lautiores putavit. Et prima „ filiorum Heli culpa suborta est , quod , ex

(*a*) 1. Cor 10. (*b*) Lib. Mor. c. 27.

72 *Exercitium diurnum.*

„ eorum voto , Sacerdotis puer non , anti-
 „ quo more , coctas vellet de sacrificio car-
 „ nes accipere , sed crudas quæreret quas
 „ accuratius exhiberet. Et cum ad Jerusalem
 „ dicitur , (c) *hæc fuit iniquitas Sodomæ so-*
 „ *roris tuæ , superbia , saturitas panis & abun-*
 „ *dantia* , apertè ostenditur quod idcirco sa-
 „ lutem perdidit , quia cum superbix vitio
 „ mensuram moderatæ refectionis excessit.
 „ Et primogenitorum gloriam Etaii amisit ,
 „ quia magno æstu desiderii vilem cibum ,
 „ scilicet lenticulam concupivit , quam dum
 „ primogenitis prætulit , quo in illam escam
 „ appetitu anhelaret , indicavit „ Hæc om-
 „ nia versiculus sequens complectitur.

*Præproperè lautè , nimis , ardentè ,
 studiosè.*

Primo vitio medeberis , si juxta regulam
 à Cassiano (d) propositam hanc tibi cau-
 tionem indicaveris , ut non potius quid-
 quam , non esus ulla oblectatione devic-
 tus , ante communem refectionis horam ,
 extra mensam percipere tibi met prorsus in-
 dulgeas ; sed ne refectione quidem tran-
 facta , ex his præsumere tibi quantulum-
 cumque permittas. Rationem hanc affert ;
 qui enim gulæ superfluos appetitus inhi-
 bere non potuit ; quomodo æstus carnalis
 concupiscentiæ valebit extinguere ? Et qui

(c) *Ezech. 16.* (d) *Lib. 5. de Spiritu
 Gastrimargia.*

non

Exercitium diurnum. 73

non valuit passiones in propatulo fitas parvasque compescere; quomodo occultas, nulloque hominum teste prurientes, moderatrice discretionem, poterit debellare?

Secundum & tertium vitium præoccupabis; si præscriptum ejusdem (e) Cassiani securus, pro conditionis tuæ modulo & decore. Eligas cibum, non tantum qui concupiscentiæ flagrantis æstus temperet, minusque succendat; verum etiam, qui ad parandum sit facilis, & quem ad comedendum opportuniorem, vilioris pretii compendium præstet. Ergone patrimonium quod sibi Christus tam laboriosè comparavit, epulando splendide deglutires? Istud emit salvator colaphis & flagellis, inquit B. Petrus Damianus, & tu consumeres illud cyathis & scutellis? ipse morte crucis, tu in luxu carnis?

Aliquando tamen charitas persuadet, ut de consueta severitate aliquid remittamus ad recreandos hospites, vel necessitudine nobis conjunctos, quorum conversatio nobis proficua est, vel quibus consuetudine nostra prodesse possumus; non numquam & necessitas & obsequium majoribus debitum exigunt, ut lautioribus mensis affideamus; sed quando hujusmodi respectus absunt, quantum in nobis est, hujusmodi lautitias, & condimentorum ela-

(e) *Ibid.* c. 23.

74 *Exercitium diurnum.*

boratas blanditias , ut voluptatis illecebras repudiare debemus.

Quartum gulæ morbum curabis , si tantum cibi sumas , quantum ad vires corporis , pro ratione statûs & officii quod exerces , corroborandas satis fuerit. Quod quidem experientiâ magistra disces & observabis , (*f*) ita tradit B. Basilius. Quoniam , inquit , innatum nobis corporis vehiculum , neque nimis laxando fræna , neque rursus immodicè illa retinendo , ad virtutis cursum producere oportet : idcirco & corporum status & habitus explorare conveniet , ut valido quidem ac vegeto corpori fræna immittamus , & per inediam redundantiam caloris arceamus : senili vero & frigescenti , cibi potûsque adjumentum ad sustentandas vires ingeramus.

Quintum denique gulæ vitium refranabis , si nimiam cupiditatem coerceas , quæ tam in vili quam in pretioso potest esse edulio ; aliqua mora ut suadet S. Clem. Alex. intemperantiam confitens. Etenim sapiens ait , (*g*) *noli avidus esse in omni epulatione , & non te effundas super omnem escam : & Apostolus (h) carnis curam ne feceritis in desideriis vestris.*

At vero sobrietatem istam coluerunt & ipsi Gentiles Philosophi , ad majora natus sum dictitabat Socrates , quam ut sim man-

(*f*) *Lib. de vera Virginit.* (*g*) *Eccli. 37.*

(*h*) *Rom. 13.*

Exercitium diurnum. 75

epium ventris mei. Actionem igitur tam vilem & abjectam, sanctisque omnibus adeò onerosam, præstantioribus virtutibus nobilitare studeas & consecrâre; sectare humilitatem & religionem; Dei benedictionem supplex deprecare; & gratiarum ipsi actionem rependere ne prætermittas.

Humilitatem dico. Quanto enim pudore suffundi debet Christi Sacerdos, qui ad cœnam nuptiarum Agni, ad comedendum panem Angelorum admissus, eo usque reductum se percipit ut cibo vescatur animalium?

Quanta cum *Religione* mensæ debes accumbere, ubi de fidelium donis & oblationibus sustentaris? nonne consentaneum esset, ut in ea, velut in altari quodam, iuge sacrificium offerres, in quo simul cum dapibus, gustus & cibi appetentia in locum victimæ cederent?

Quam suppliciter *Dei auxilium implorare* debeas ut in tam lubrico gradu tutò consistas; author est ipse B. Augustinus. (i) Quis enim est Domine, inquit, qui non rapiatur aliquantulum extra metas necessitatis? Quisquis est, magnus est, magnificet nomen tuum his tentationibus quotidie conor resistere, & invoco dextram tuam ad salutem meam, & ad te refero omnes æstus meos, quia consilium mihi de hac re non stat.

(i) *Ep. 10. Confess. 31.*

76 *Exercitium diurnum.*

Demum *gratiarum actionem* numquam esse omittendam docet Christus Dominus (*k*) exemplo suo. Suadent priorum sæculorum christiani , (*l*) *frangentes circa domos panes, sumebant cibum cum exultatione & simplicitate cordis, collaudantes Dominum.* Præmonet ipsa mater Ecclesia quæ in hunc finem sequentes preces tibi præfixit.

Benedictio Mensæ ante prandium.

Benedicite. *R.* Dominus. *Ÿ.* Oculi omnium in te sperant, Domine, & tu das escam illis in tempore opportuno. Aperis tu manum tuam, & imples omne animal benedictione. Gloria Patri, &c. Sicut erat, &c. Kyrie eleison. Christe eleison. Kyrie eleison. Pater noster, &c.

Oremus.

Benedic, Domine, nos & hæc tua dona, quæ de tua largitate sumus sumpturi per Christum, &c.

Bened. Mensæ coelestis participes faciat nos Rex æternæ gloriæ.

Ante Canam loco. *Ÿ.* Oculi, dicitur sequens. Edent pauperes & saturabuntur, & laudabunt Dominum, qui requirunt eum: vivent corda eorum in sæculum sæculi. Gloria Patri, &c. Sicut erat, &c.

Bened. Ad coenam perpetuæ vitæ perducat nos Rex æternæ gloriæ.

(*k*) *Matth.* 26. 30. (*l*) *Act.* 2. 46.

Exercitium diurnum. 77

Gratiarum actio post prandium.

ψ. **C**onfiteantur tibi, Domine, omnia opera tua: R. Et sancti tui benedicant tibi. Gloria, &c. Sicut erat, &c.

Agimus tibi gratias, omnipotens Deus, pro universis beneficiis tuis; qui vivis & regnas in sæcula sæculorum. Amen.

Laudate Dominum omnes gentes; laudate eum omnes populi.

Quoniam confirmata est super nos misericordia ejus, & veritas Domini manet in æternum. Gloria Patri, &c. Sicut erat, &c. Pater noster, &c.

ψ. Disperfit, dedit pauperibus; R. Justitia ejus manet in sæculum sæculi.

ψ. Benedicam Dominum in omni tempore: R. semper laus ejus in ore meo.

ψ. In Domino laudabitur anima mea: R. Audiant mansueti & lætentur.

ψ. Magnificate Dominum mecum: R. Et exaltemus nomen ejus in idipsum.

ψ. Sit nomen Domini benedictum, R. Ex hoc nunc & usque in sæculum.

ψ. Retribuere dignare, Domine, omnibus nobis bona facientibus propter nomen sanctum tuum vitam æternam. R. Amen.

ψ. Benedicamus Domino. R. Deo gratias.

ψ. Fidelium animæ per misericordiam Dei requiescant in pace. R. Amen.

D iij

78 *Exercitium diurnum.*

Post canam loco V. Confiteantur, dicitur sequens. Memoriam fecit mirabilium suorum misericors & miserator Dominus: escam dedit timentibus se. Gloria, &c.

Loco Orationis Agimus, dicitur sequens. Benedictus Deus in donis suis, & sanctus in omnibus operibus suis, qui vivit & regnat in sæcula sæculorum. R. Amen.

SOLIS oblectationibus & colloquiis licitis indulgendum

Sicuti arcum ubique semper tensum, ait Cassianus, (a) circumferri minime expedit, ne jugi curvamine rigoris fortitudo laxata mollescat atque dispereat; ita nisi remissione quadam vigorem intentionis suæ interdum animus relevet atque relaxet, irremisso rigore lentescens virtutis spiritus, cum necessitas postulaverit, non poterit obsecundare. Convenit igitur, ut probat S. Thomas 2. 2. Quæst. 168. factis vel dictis interdum uti quasi ad quamdam animæ quietem. Sed circa hujusmodi tria videntur præcipuè cavenda, quorum primum & potissimum est quod prædicta delectatio non quaratur in aliquibus operationibus vel verbis turpibus vel nocivis: Secundum, quod non omninò gravitas animæ resolvatur:

(a) Collat. 24. c. 21.

Exercitium diurnum. 79

Tertium ut congruat loco, tempori, & personæ, & secundum alias circumstantias debite ordinetur.

Quod attinet ad primum; Ne his perversis cætibus, ut præcipit Concil. (b) Agathense, admisceantur Clerici, ubi amatoria cantantur & turpia; aut obscæni motus corporum choreis & saltationibus efferruntur, ne videlicet animus, auditus & obtrusus sacris deputati Mysteriis, turpium cogitationum, spectaculorumvè, atque verborum contagione polluantur. (c) Stultiloquium, aut scurrilitas quæ ad rem non pertinet, nec nominentur inter eos sicut decet Sanctos. (d) Os suum Evangelio consecraverunt; talibus jama perire illicitum, assuescere sacrilegium esset. Nec detractiones, nec maledicta, nec verba atrociora, ea lingua proferat quæ divinis rebus assueta est & dominico corpore sæpius consecratur. (e) Ne disertiis aut mordacibus utantur salibus, ne ve sacræ Scripturæ verbis ad profanos sermones abutantur.

Quomodo enim, addit B. Petrus Damianus, (f) ex ore Sacerdotis oratio ad Deum munda dirigitur, quod videlicet pravi sermonis sordibus coinquinatur? aut quomodo inter Deum & homines lingua

(b) c. 29. (c) Eph. 5.

(d) S. Ber. l. 2. de Conf. c. 13.

(e) Syn. Aquens Tit. de vita & honest. Cler. (f) Ad Epif. Card. l. 2. Epi. 1.

Div

70 *Exercitiu*

doces hominem scien-
tium facis disertas ;
pellentes repellis , ne
tibi. Mitte sapientiam
& à sede magnitudinis
& mecum laboret ; ut
tum sit apud te : nam
summatus inter filios h
abfuerit sapientia tua ,
tabitur. Da mihi intelle-
tendens & doctrinæ , de-
cum novitates , & opposi-
tis scientiæ ; fiamque co-
sibilis rectè tractans verbi-
tens exhorrari in doctrina
contradicunt arguere. Da
Sanctorum ; scire etiam
scientiæ charitatem Chris-
ti fac me ministrum Novi
dandam scientiam salutis
cognoscant te solum Deum
quem misisti Jesum-Christum

Post studiu

Non finas me , Domine
tiâ quæ destruetur ,
ædificantem quæ nunquam
evanescam in cogitationibus
dicem me scire aliquid inte-
Jesum-Christum , & hunc
Dominum , &c.

ercitium diurnum. 81

non perturbetur; unde se fa-
ciunt sibi ad se ipsum redeundum
si fuerit, expediat, sine contro-
versantis voluntatis, absque con-
tractæ delectationis, vel me-
moris.

*S*ed etiam habenda nempe est ratio
in hac, *personæ*; 1. *Loci* quidem:
tunc modum habenda est publico & propalâ oblecta-
tionis, ut fiducia, obsequii, & bonæ
ipsi prodest. Apud Laicos tibi dispereat.

Ne diuturnius iis immore-
tum est ad intentionem men-
tis. Noli igitur iis astipulari de
(o) *estimaverunt lusum esse*
(p) *risus enim eorum dolori*
extrema gaudii luctus occupa-
que perpetuus: Quanto de-
ecclesiastæ senties? (q) *Risum*
, & gaudio dixi quid frustra

manum dico propter infirmi-
tatis delectamentis utere, sed mo-
pro condimento: sicut enim
pauillum salis sufficit in
cucum delectationis sufficit ad
utere ait Tullius, (r) *tum*
feris rebus satisfeceris.,
generati à natura sumus, ut
jocum facti esse videamur,

(p) *Prov. 14.* (q) *c. 2.*
2. 1. *de Offic.*

80 *Exercitium diurnum.*

mediatrix efficitur , quæ iram iudicis ex proprio reatu & ipsa meretur ? Certè si , ut Evangelica ruba intonat , (*g*) *de omni verbo otioso quod locuti fuerint homines , de eo reddent rationem* ; quanto districtius , reponit (*h*) S. Bernardus , de verbo mendaci , mordaci , injurioso , malè adulatorio ? heu quid fiet de his de quibus loquitur Psalmista ? (*i*) *Tota die injustitiam cogitavit lingua tua , sicut novacula acuta fecisti dolum : molliti sunt sermones ejus sicut oleum & ipsi sunt jacula. Sepulchrum patens est guttur eorum , linguis suis dolosè agebant ; quorum os maledictione plenum est & amaritudine.*

Quod secundum spectat. Nimirum ne omnino gravitas animæ resolvatur. In ipso joco ait vel ipse Tullius , (*k*) aliquod probi ingenii lumen eluceat. Caveamus igitur , inquit B. Ambrosius , (*l*) ne dum relaxare animum volumus , solvamus omnem harmoniam quasi concentum quemdam bonorum operum. Declinemus , addit author de ordine vitæ inter opera S. Bernardi , (*m*) ea omnia quæ inflectere possunt gravitatem propositi nostri nostræque professionis : ea tantum veluti delibemus oblectamenta , (*n*) in quibus remittatur ad ho-

(*g*) *Matth. 12.* (*h*) *Ser. de tripl. custod.*

(*i*) *Psalms 51. 54. 13* (*k*) *L. 1. de Offic.*

(*l*) *L. 1. Offic.* (*m*) *C. 3.*

(*n*) *De vit. Solit. c. 8. apud eundem.*

Exercitium diurnum. 82

ram animus, non perturbetur; unde se facile mox, ut sibi ad se ipsum redeundum esse visum fuerit, expediat, sine controversiâ inhibentis voluntatis, absque contagione contractæ delectationis, vel memoriæ imaginantis.

Circa tertium habenda nempe est ratio loci, temporis, personæ; 1. Loci quidem: noli igitur in publico & propalâm oblectari, ne aliquid fiduciæ, obsequii, & bonæ existimationis apud Laicos tibi dispereat.

*2. Temporis: Ne diuturnius iis immore-
ris quam necessum est ad intentionem men-
tis relaxandam. Noli igitur iis astipulari de
quibus sapiens: (o) estimaverunt lusum esse
vitam nostram; (p) risus enim eorum dolori
miscbitur, & extrema gaudii luctus occupa-
bit: luctus utique perpetuus: Quanto de-
centius cum Ecclesiaste senties? (q) Risum
reputavi errorem, & gaudio dixi quid frustra
deciperis?*

Verum humanum dico propter infirmi-
tatem; iis oblectamenti utere, sed mo-
dicè & veluti pro condimento: sicuti enim
ait Philosophus pauxillum salis sufficit in
cibo, ita modicum delectationis sufficit ad
vitam: iis utere ait Tullius, (r) tùm
quùm gravibus seriisque rebus satisfeceris,
non enim ita generati à natura sumus, ut
ad ludum & jocum facti esse videamur,

(o) Sap. 15. (p) Prov. 14. (q) c. 2.
(r) Liv. 1. de Offic.

82 *Exercitium diurnum.*

sed ad severitatem potius, & ad quædam studia graviora atque majora.

Ita quidem sapiebant Gentiles Philosophi solo rationis lumine ducti : Quanto satius est ut iis afficiantur consiliis Clerici & Sacerdotes, quorum maxima hæc esse debet Philosophia, scire Jesum & hunc crucifixum, & post ipsum crucem bajulare?

Quanto magis hujusmodi animi sensus eos decent, quibus tantorum gratiæ Myfteriorum dispensatio concedita est, ut vix eis aliquid residui temporis supersit, quod necessariæ valeant permittere relaxationi?

3. *Persona.* (Personam intellige ratione statûs & conditionis ;) non enim quælibet oblectamenta virum Ecclesiasticum decent, neque ei conceduntur. Eum scilicet sapienter arcant Canones & Statuta Synodalia, maximè Aurelianensia, ab alearum, imprimisque taxillorum & cartharum ludis; nec-non à venatione. In hujusmodi quæstionibus versandis nobis per præsens institutum diutius immorari non licet : adiri possunt authores qui ex professo ista disciplinæ puncta agitavere : imprimisque aureus tractatus de Synodo Dioecesana (s) Benedicti XIV. qui tanta cum laude Ecclesiastici regiminis arcem tenet.

(1) L. 7. c. 61.

Exercitium diurnum. 83

*ANTE OBLECTATIONEM
& quodlibet Colloquium.*

Oratio.

Pone Domine custodiam ori meo & os-
tium circumstantiæ labiis meis, ut non
loquatur os meum opera hominum. Omnis
sermo malus ex ore meo non procedat;
sed si quis bonus ad ædificationem fidei,
ut det gratiam audientibus. Turpitudine, aut
stultiloquium, aut scurrilitas quæ ad rem
non pertinet, nec nominetur in nobis sicut
debet Sanctos; sed quæcumque sunt vera,
quæcumque pudica, quæcumque iusta,
quæcumque sancta; quæcumque amabilia,
quæcumque bonæ famæ. Sermo meus sem-
per in gratiâ sale sit conditus, ut sciam
quomodo me oporteat unicuique respon-
dere; ut non alta sapiens, sed humilibus
consequens, & omnibus omnia factus, om-
nes faciam salvos. Amen.

Oratio ad Christum.

Domine Jesu-Christe, qui ad infor-
mandum vitæ cœlesti genus huma-
num, mirâ & ineffabili dignatione in ter-
ris visus es & cum hominibus conversatus
es; da nobis, quæsumus, tuam sanctissi-
mam cum hominibus conversationem tanta
devotione venerari, ut perfectam ejus ima-
ginem in nostra exprimere mereamur. Qui
vivis & regnas.

84 *Exercitium diurnum.*

POST OBLECTATIONEM & Colloquium.

Oratio.

NE permittas nos, Domine turbari erga plurima; sed ita dulcesce in cordibus nostris, ut dum necessitas est in locutione nostra, gaudium nobis sit in auditione tua. Per Dominum.

EJACULATIONES sæpius per diem faciendæ, ad cognoscendam Dei voluntatem.

LOquere Domine: quia audit servus tuus. 1. *Reg.* 3.

Domine cum ignoremus quid agere debeamus, hoc solum habemus residui, ut oculos nostros dirigamus ad te. 2. *Par.* 20.

Perfice gressus meos in semitis tuis, ut non moveantur vestigia mea. *Psal.* 16.

Vias tuas, Domine, demonstra mihi, & semitas tuas edoce me. *Psal.* 24.

Paratum cor meum Deus, paratum cor meum. *Psf.* 56.

Nonne Deo subiecta erit anima mea, ab ipso enim salutare meum? *Psf.* 61.

Mihi adhærere Deo bonum est: ponere in Domino Deo spem meam. *Psf.* 72.

Deduc me Domine in via tua, & ingrediar in veritate tua, *Psf.* 85.

Exercitium diurnum. 83

Notam fac mihi viam in qua ambulem : quia ad te levavi animam meam. *Pf. 143.*

Doce me facere voluntatem tuam , quia Deus meus es tu. *Ibidem.*

Pars mea Dominus , dixit anima mea : propterea exspectabo eum. *Thren. 3.*

Deus patrum nostrorum , & Domine misericordiæ ; da mihi assistricem sapientiam , & noli me reprobare à pueris tuis. *Sap. 9.*

CONSCIENTIA DISCUTIENDA.

INter omnia quæ ad perfectionem conducunt media , vix ullum reperias tam præstans , & in scripturis , vel apud S. Patres , ac scriptores asceticos commendatum magis atque probatum , quam ut unusquisque quotidie in semetipsum inquirat , omnesque conscientiæ suæ sinus & recessus exploret ; omnia opera , verba & cogitata quæ per diem exciderunt , vespere potissimum , ad strictam Evangelii vocationisque suæ trutinam revocando. (*a*) *Scrutemur , inquit Propheta , vias nostras , & queramus , & revertamur ad Dominum.*

Numquid decet filios sæculi hujus in consiliis suis filiis lucis prudentiores esse ? Ecce negotiator sæcularis , ait S. Ephrem , (*b*) damna & lucra quotidie computat ; & si

(*a*) *Thren. 3.*

(*b*) *Serm. Ascet. de vitâ religiosâ.*

86 *Exercitium diurnum.*

damna perpeffus fuerit, ea refarcire follicitè ftudet. Sed & tu negotiator fpirituales, negotiator utique æternitatis; diebus itaque fingulis diligenter confidera quo pacto negotiatio tua & mercaturæ ratio feſe habeant.

Quam utilis, imo quam neceſſaria fit iſta ſcrutatio, facile percipies ſi attenderis ex ea veluti religatam pendere ſcientiam illam tam ſublimem, ſimul & tam abſtruſam, quæ eſt noſcere te ipſum; cor enim hominis inſcrutabile ſibi ipſi ænigma eſt, niſi, vigilantî cuſtodîâ ad interiora rediens, quotidie profectus ſuos penſet atque defectus.

„Sed & ſi tunc, ut teſtatur S. Chryſoſtomus, (c) peccata tua ſupputaveris; & „ab illis cito liberaberis, & in alia non facile incidet; anima enim heſternum veritatis iudicium, ne eandem rurfus ſubeat ſententiam, ſi pungatur & flagelletur; redetur ad peccatum tardior, & ſic in profecto virtutis habitu teipſum conſtitues: ſi vero exul & profugus eſ domo tua, nunquam aut rarius tecum habitaveris, & hoſpitium cordis tui non ingrediſ; quid de eo fiet? niſi quod præfatur ſapiens: (d) *per agrum hominis pigri tranſivi, & per vineam viri ſtulti; & ecce totum repleverant urtica, & operuerunt ſuperficiem ejus ſpinæ, & maceria lapidum deſtructa erat.*

(c) *1^a Pſal. 4.* (d) *Prov. 24.*

Exercitium diurnum. 87

Demum hujusce inquisitionis emolumentis cumulum addit Apostolus his verbis , (e) *si nosmetipsos dijudicemus , non utique judicemur* ; unde merito exclamat S. Bernardus , quam bonum est istud iudicium quod districto Dei iudicio me subducit ! volo vultui iræ iudicis iudicatus præsentari non iudicandus , quia non bis iudicat in idipsum.

Quomodo rationem illam tecum instituas , viam aperit ipse Propheta brevi quidem isto , sed pleno sententiis versiculo . (f) *Statue tibi speculam , pone tibi amaritudines , & dirige cor tuum in viam rectam*. Implorato igitur Dei auxilio : omnibus tum naturæ , tum gratiæ collatis tibi beneficiis ad splendorem divini luminis consideratis : quicquidem actus in omni supplicatione nostrâ digniorem ac Deo acceptiorem conficiunt prologum.

1. *Statue tibi speculam*. Videlicet supremam mentis tuæ arcem conscendens , ibique veluti ex alto despiciens omnes animæ tuæ obmurmurantes passionēs , & sensuum tuorum evagationem compescens , multa pace tecum fruens ; considera , inquit Hugo à S. Victore , (g) quibus affectionibus frequentius tangeris , quibus cogitationibus magis incusaris , quibus tentationum machinis à maligno spiritu frequentius impugnaris : attende unde venis , quo tendis , quid

(e) I. Cor. II. (f) *Jerem.* 31.

(g) *Lib.* 3. *de anima.*

88 *Exercitium diurnum.*

agis, quid omitis, quantum quotidie proficis vel deficis, quomodo Spiritus Sancti moribus obsequaris vel resistas.

Tibi ipsi dicito, addit S. Ephrem, (h) putasne in aliquo Deum exacerbavi? Numquid verba otiosa protuli? Num inter orandum minus attentus fui? Num per contemptum negligentiamve peccavi? Num fratrem irritavi? num alicui detraxi? Numquid improbæ & sordidæ cogitationes invaserunt me, atque illis libenter immoratus sum? Omnibus itaque animæ tuæ sordibus veluti in angulo cordis collectis, ad exemplum Prophetæ cujus vox ista erat, [i] *Exercitabar & scopebam spiritum meum.*

2. *Pone tibi amaritudines.* Eiusdem Prophetæ vestigiis insistens, quoniam iniquitates tuas ipse cognoscis, & peccata tua stant contra te; huiusmodi noxas fletibus & gemitibus tuis studeas detergere. Dic Deo tuo: (k) *Domine ne intres in iudicium cum servo tuo quia non justificabitur in conspectu tuo omnis vivens. Ecce anima mea turbata est intra me & adhæsit pavimento; vivifica me secundum verbum tuum.* (l) *Numquid in æternum projiciet Deus, aut non apponet ut complacitior sit adhuc? aut obliviscetur misereri Deus aut continebit in ira sua misericordias suas? Tum de Dei bonitate benè confi-*

(h) *Supra.* (i) *Pf. 76.*

(k) *Psal. 142.* (l) *Pf. 76.*

Exercitium diurnum. 89

dens, conclude cum eodem Psalmista: *Dixi (m) nunc capi hac mutatio dextra Excelsi.* Itaque,

3. *Dirige cor tuum in viam rectam*, lapsus tuos ab ipso fonte sedulius investigando, ut illorum rivulos valeas exficcare. Ad quos offendisti scopulos observa, ut illos denuò præcaveas: immunita animæ tuæ loca perpende, ut novis illa munitionibus circumvalles: tanquam strenuus Miles ad vitiorum profligationem à quibus fauciatus es te accinge, istud Psalmistæ ad pugnam sese adhortantis iterans, (n) *Persequar inimicos meos, & comprehendam illos, & non convertar donec deficiam.*

Demum, in rectum virtutum tramitem à quo declinasti, rursùm ingredi nè morearis. Sed cum vana sint consilia tua, nisi Deus illa foecundare dignetur; leva oculos tuos ad ipsum, undè veniet auxilium tibi, istam Judith precationem ingeminans: (o) *Confirma me, Domine Deus Israël, & respice in hac horâ ad opera manuum mearum, ut, sicut promissisti, Jerusalem Civitatem tuam, (seu animam tibi devotam) erigas: & hoc quod credens per te fieri posse cogitavi, perficiam.*

Præter istam generalem conscientiæ indagacionem, aliam præscribunt piæ & de-

(m) *Idid.* (n) *Pf. 17.*

(o) *Judith. 13.*

90 *Exercitium diurnum.*

voræ vitæ Doctores, quæ *examen particulare* vocant; hoc est, certamen veluti singulare adversus vitium aliquod præcipuum; vel pia ad aliquam speciatim virtutem exercitatio. Hujus sanctæ praxis artificium mirificè Cassianus evolvit.

„ (p) Unusquisque, inquit, vitium quo maxime infestatur explorans, adversus illud arripiat principale certamen, omnem curam mentis ac sollicitudinem erga illius impugnationem observationemque deficiens; contra illud crebra cordis suspiria & gemituum tela contorquens; adversus illud cunctos labores ac meditationes sui cordis impendens; indefinentes quoque orationum fletus ad Dominum fundens, & impugnationis suæ extinctionem, ab illo specialiter & jugiter poscens.

Nec etiam abs re erit damna lucravè sua sedulò annotare, diem cum die, hebdomadam cum hebdomade, mensem cum mense conferendo; ut sciat quantum profecerit vel defecerit: (q) *si omni anno, ait pius author imitationis, unum vitium extirparemus, cito viri perfecti efficeremur.*

Rursum, Pergit ibidem Cassianus, „ Cum se à priori vitio senserit absolutum, latebras sui cordis simili intentione perlustrat, & exploret quam passionem inter reliquas perspexerit diriores, atque adversus eam

(p) *Coll. 5. c. 14.* (q) *Lib. 1. c. 11.*

Exercitium diurnum. 91

„specialiùs omnia spiritus arma commoveat;
„ & ita semper validioribus superatis, ce-
„ lerem de residuis habebit facilemque vic-
„ toriam; quia & mens triumphorum pro-
„ cessu reddetur fortior, & infirmior pu-
„ gna (ex parte pravorum affectuum) suc-
„ cedens, promptiorem ei proventum fa-
„ ciet præliorum „. Quod de vitiorum pro-
fligatione profert Cassianus; id de virtu-
tum consecratione dictum existima.

ACTUS CONTRITIONIS

Juxta exemplum S. Mariæ Magdalenæ.

Quis dabit capiti meo aquam, & ocu-
lis meis fontem lacrymarum, ut plo-
rem die ac nocte peccata mea, quibus te,
amantissime Jesu, toties ad iram provoca-
vi? Ad pedes tuos cum Magdalenâ provol-
vor, eosque ex animo amplector & exos-
culator, tuam supplex misericordiam implo-
rans. Parce, Domine, parce peccatis meis;
quæ utinam tam largo lacrymarum imbre,
quam peccatrix illa, possem eluere! Ho-
rum defectum, mi Jesu, roseo tuo, quem
pro me copiosissimè fudisti, sanguine com-
pensa. A pedibus tuis non discedam; hos
firmiter tenebo tamquam salutis meæ an-
choram, nec dimittam donec benedixeris
mihi, & illa audiam summæ consolationis
verba. *Remittuntur tibi peccata multa quoniam
dilexisti multum. Luc. 7.*

*Sanctissimæ Dei Genitrici sui ipsius
Dedicatio.*

O Domina mea sancta *MARIA*, me in tuam benedictam fidem, ac singularem custodiam, & in finem misericordiæ tuæ, hodie & quotidie, & in hora exitus mei, animam meam & corpus meum tibi commendo, omnem spem & consolationem meam, omnes angustias & miseras meas, vitam & finem vitæ meæ tibi committo: ut per tuam sanctissimam intercessionem & per tua merita, omnia mea dirigantur & disponantur opera, secundum tuam, tuique Filii voluntatem.

EXUENDO VESTES.

Quis indicavit tibi quod nudus esses; nisi quod ex ligno de quo præceperam tibi ne comederes comedisti? *Genes. 3.*

Suadeo tibi emere à me aurum ignitum probatum ut locuples fias, & vestimentis albis induaris, ut non appareat confusio nuditatis tuæ. *Apoc. 3.*

Expoliantes vos veterem hominem cum actibus suis, induite novum, eum qui renovatur in agnitionem, secundum imaginem ejus qui creavit illum. *Coloss. 3.*

Non in cubilibus & impudiciis; sed in

Exercitium diurnum. 93

duimini Dominum Jesum-Christum, & carnis curam ne feceritis in desideriis. *Rom. 13.*

Recita sequentes Psalmos.

Psf. 4. Cum invocarem exaudivit me Deus, &c.

Psf. 15. Conserva me, Domine, quoniam speravi in te, &c.

Psf. 50. Miserere mei, Deus, secundum magnam misericordiam, &c.

Evigilando per noctem.

Illumina oculos meos ne umquam obdormiam in morte: nequando dicat inimicus meus; prævalui adversus eum. *Psf. 12.*

Quoniam tu illuminas lucernam meam; Domine: Deus meus illumina tenebras meas. *Psf. 17.*

Dominus illuminatio mea & salus mea: quem timebo? *Psf. 26.*

Anima mea desideravit te in nocte, sed & spiritu meo, in præcordiis meis de manè vigilabo ad te. *Isaiæ 26.*

Illuminare his qui in tenebris & in umbra mortis sedent, ad dirigendos pedes nostros in viam pacis. *Luc. 1.*

Surge qui dormis, & exurge à mortuis; & illuminabit te Christus. *Ephes. 5.*

Manè astabo tibi & videbo; quoniam non Deus volens iniquitatem tu es. *Psf. 5.*

DIVERSE ORATIONES.

*ORATIO ad B. Virginem pro obtinenda à
Deo gratia cognoscendi & adimplendi
voluntatem ejus.*

Virgo benedicta inter mulieres , quæ ab æterno electa es & benedictionibus dulcedinis præventa, ut per te daretur mundo magni consilii Angelus. Per te manifestetur mihi omne consilium Dei in me ; ut probans quæ sit voluntas Dei bona & beneplacens & perfecta , conservem omnia verba ejus conferens in corde meo , & quodcumque dixerit mihi , faciam. Attrahe in me spiritum veritatis quem , perseverantibus tecum in oratione , promeruisti Apostolis ; ut , sciens quia in his quæ Patris mei cœlestis sunt , oportet me esse , continuo non acquiescam carni & sanguini , sed corde magno & animo volenti , dicam patri meo & matri meæ , nescio vos ; & fratribus meis , ignoro vos. Dic , obsecro te , filio tuo quod mater meâ sis , ut bene sit mihi propter te , & vivat anima mea ob gratiam tui. O Mater Pietatis & Misericordiæ , non dedigneris appellare filium , quem dilectissimus unigenitus tuus non confunditur fratrem vocare ! Plena es gratiarum & deliciis affluens ; manum ergo tuam

Exercitium diurnum. 73

aperi inopi , & palmas tuas extende ad pauperem : ciba mendicum tuum de superfluenti mensa tua , tuarumque virtutum vestibus valdè bonis indue me ; ut non intrem ad nuptias Agni non habens vestem nuptialem ; sed divino conspectui gratus appaream , & odor meus odor sit agri pleni cui benedixit Dominus. Amen.

AD ANGELUM CUSTODEM.

Minister Altissimi, potens virtute , & faciens verbum illius ad audiendam vocem sermonum ejus : tibi Deus mandavit de me , ut custodias me in omnibus viis meis. In manibus ergo porta me , ut non incidam in tentationem & in laqueum diaboli ; ipse enim circuit quærens quem devoret , & ecce jam invadit me : fidelissime Custos , præveni eum & supplantâ eum. Dirige gressus meos , & deduc me super semitas justitiæ , ut ambulem in via bona , & calles Justorum custodiam. Est enim via quæ videtur homini recta , novissima autem ejus ducunt ad mortem : præcede me & custodi in via , nec dimittas cum peccavero , & introduc in locum quem paravit Dominus , ut nihil faciam in alteram partem declinando , sed ita observem te , & audiam vocem tuam ; ut humilibus consentiens , & diligens cordis munditiam , hæreditatem capiam salutis. Amen.

AD S. PATRONUM.

SANCTE *N.* qui licet jam de tuâ immortalitate securus sis, adhuc tamen de meâ sollicitus es; adjuva orationis suffragio, quem erudisti conversationis exemplo. Verè etenim possum in vita tua tanquam in speculo & videre quid corrigam, & eligere quid sequar. Fuiſti ſimilis mihi paſſibilis, circumdatus infirmitate, & tentatus per omnia; ſed, in charitate radicatus & fundatus, calcaſti mundum furentem, ſpreviſti blandientem, & viciſti malignum. Pater mi, Pater mi, obſecro ut fiat in me duplex ſpiritus tuus, ut imitator tui ſim, ſicut & tu Chriſti. Trahe me poſt te; curram in odorem unguentorum tuorum, memoria enim tua in compoſitionem odoris, facta opus pigmentarii. Ex quâ die conſepultus ſum cum Chriſto per Baptiſmum in mortem, datus es mihi teſtis & cuſtos pro poſiti mei. Deprecor ergo te ut adjuves me in orationibus tuis pro me ad Deum, ut teneam ſpei meæ conſeſſionem indeclinabilem; & ſatagens ut per bona opera certam meam vocationem & electionem faciam, ad deſtinatum perſequar, ad braviũ ſupernæ vocationis Dei in Chriſto- Jeſu. Amen.

ORATIO

Exercitium diurnum. 97

ORATIO Clerici solá Tonsurá initiati.

Domine Jesu-Christe , qui initiaſti nobis viam novam & viventem per velamen , id eſt carnem tuam in introitu ſanctorum : da leges tuas in corde meo , & in mente mea ſuperſcribe eas , & iniquitatum mearum jam non recorderis ampliùs. In capite libri ſcriptum eſt de me , ut facerem voluntatem tuam , Deus meus volui , & legem tuam in medio cordis mei ; in quocumque enim loco fueris , Domine mi rex , ſive in morte , ſive in vita , ibi erit ſervus tuus. Scio , Deus meus , quod probes corda , & ſimplicitatem diligas , undè & ego in ſimplicitate cordis mei lætus offero meipſum. Domine Deus patrum noſtrorum , cuſtodi in æternum hanc voluntatem cordis mei & ſemper in venerationem tui mens mea permaneat. Numquam ſit in me conſilium diſcedendi à Deo vivo , nec te relinquam diligens hoc ſæculum : ſanctifica me in veritate , ut ſim ſanctus corpore & ſpiritu , utens hoc mundo tanquam non utens , & ſolummodo ſollicitus quomodo placeam tibi , ut ſis portio mea in terra viventium. Amen.

ORATIO Clerici in Minoribus Ordinibus conſtituti.

Tu ſolus , Domine Jesu-Christe , habes clavem David , aperis enim , & nemo claudit ; claudis , & nemo aperit. Tu

98 *Exercitium diurnum.*

solus aperis sensum ut intelligamus Scripturas. Tu solus in potestate imperas spiritibus immundis. Tu lux mundi, quam qui sequitur non ambulat in tenebris. Confice me zelo domus tuæ, ut stans jugiter ad ostium tabernaculi, & observans custodias Domini nocte & die, prohibeam profanari Templum gloriæ tuæ. Revela oculos meos ut legam in libro legis Dei distinctè & apertè ad intelligendum. Contere Satanam sub pedibus meis velociter: & præsta ut sic luceat lux mea coram hominibus, ut videant opera mea bona, & glorificent Patrem meum qui in coelis est. Amen.

ORATIO Subdiaconi.

Domine Jesu-Christe, qui sanctificari vis in iis qui appropinquant tibi, & mundari eos præcipis qui ferunt vasa Domini: continentiam jubes, da quod jubes, & jube quod vis; quis enim potest facere mundum de immundo conceptum semine? Nonne tu qui solus es? Munda me ergo ab omni inquinamento carnis & spiritus, ut perficiam sanctificationem meam in timore Dei: non præsumam circumdare altare tuum; aut tangere vasa quæ ad usum sanctuarii pertinent; nisi laverò inter innocentes manus meas, & fulserint velut mundissimæ manus meæ; nequandò irascaris indignatione contra me, & percutias me super temeritate. Qui vivis, &c.

ORATIO Diaconi.

Domine Jesu-Christe, sanctorum minister & tabernaculi veri, quod fixit Deus & non homo; qui quos constituerent Apostoli tui super Leviticum opus, viros plenos Spiritu sancto & sapientia eligi voluisti; & qui me non meis meritis intra eorundem Levitarum numerum dignatus es aggregare, da mihi & omnibus qui tanto ministerio gloriantur, vigili sollicitudine pauperum tuorum curam habere, ut singulis, prout cuique opus est, dividantur bona tua: da Spiritum sanctum ad robur quibus commisisti consummandorum confortium sacramentorum: da habere Mysterium fidei in conscientia pura; & calceatos pedes in præparatione Evangelii pacis, ut dignos nos facias in partem fortis sanctorum in lumine. Qui vivis, &c.

ORATIO Presbyteri.

Domine Jesu, Apostole & Pontifex confessionis nostræ, semper vivens ad interpellandum pro nobis: qui cum essem parvulus in oculis meis, ex hominibus assumpsisti me; & pro hominibus constituisti me in iis quæ sunt ad Deum, ut offeram dona & sacrificia pro peccatis, & condolare possim iis qui ignorant & errant: emenda, quæso, per sanguinem tuum conscientiam meam ab operibus mortuis, ad ser-

200 *Exercitium diurnum.*

viendum Deo viventi, & sanctifica me in veritate; ut sacrificia mea consumantur igne quotidie, & tibi confixus cruci immoler ipse suprâ sacrificium. Fac ut bonus dispensator multi-formis gratiæ Dei, in membra tua illam administrans, impendam & superimpendar ipse pro animabus fratrum meorum, fervorum tuorum, & concede ut te clarificans super terram, & opus consummans quod dedisti mihi ut faciam, ubi es tu, & ego sim tecum, ut videam claritatem tuam quam dedit tibi Pater, quia dilexit te ante constitutionem mundi. Qui vivis & regnas, &c.

ORATIO Pastoris.

CLementissime Domine Jesu-Christe; Pontifex æternæ, qui me indignum famulum tuum, ignorantem egressum & introitum meum, ad functionem muneris Apostolici vocare dignatus es; ut oves hujus ovilis salutarî pabulo doctrinæ pascere, & Ecclesiæ huic quam tuo pretioso sanguine redemisti, in his quæ ad te sunt præessent. Horreo & toto corpore contremisco, quoties considero quis ego sim, & quid requirat onus, quod infirmis humeris meis incumbit. Qui enim pro unâ & solâ animulâ meâ rationem non possum reddere: pro toto hoc grege quomodo reddam? Quid ego infelix? Quo me vertam,

Exercitium diurnum. 207

¶ tantum thesaurum, si pretiosum depositum illud quod tibi sanguine proprio comparasti, contingat me negligentius custodire? Si stillantem in Cruce sanguinem tuum collegissem, essetque repositus penès me in vase vitreo, quod portare sæpius deberet, quid animi habiturus essem in tanto discrimine? At certe pretiosum illum sanguinem quem tu, mercator non insipiens, imò ipsa Patris sapientia, in pretium animarum dedisti, servandum accepi à te, Domine, idque in vasis fictilibus, & quovis vitro fragilioribus. Impares sunt sanè humeri mei tanto oneri, si meas vires respiciam: impeditioris & tardioris linguæ sum, nescio loqui, puer sum, & regi quàm regere magis idoneus. Obsecro igitur te principem Pastorum & nostrum Archiepiscopum, qui nullum vocare soles ad aliquod munus obeundum, cui non etiam eas largiaris dotes, quibus ornatus & instructus dignè opus ad quod vocatus est perficere possit: me etiam inutile sarmentum inferre in te qui es vitis vera; ut fructus feram uberrimos. Da servo tuo cor docile, ut voluntatem tuam annuntiem populo tuo. Da mihi amplecti eum, qui secundum doctrinam est fidelem sermonem; ut potens sim exhortari in doctrina sana, & eos qui contradicunt arguere. Verbum veritatis ne auferas ab ore meo, & da mihi gratiam, ut ferventi spiritu eloquar illud, ne aures

tantum feriat, sed cor penetret, & fructum optatissimum afferat. Renova vitam meam, & mores meos in melius commuta, ne dum aliis prædicaverim ipse reprobus efficiar. Tolle à me superbiam, iracundiam, sensualitatem, & turpis lucri cupiditatem. Largire hospitalitatem, benignitatem, sobrietatem, justitiam, sanctitatem & continentiam, ne ulli hominum scandalum præbeam, aut blasphemandi verbum tuum occasionem offeram. Concede mihi spiritum quo oves meas in visceribus tuis diligam, nec aliter tractem, quam mater unicum quem habet filium tractare soleat; nulla infirmetur, cum qua ego non infirmer, nulla scandalifetur, & ego non urar; libentissimè mea omnia impendam, & superimpendar ipse pro animabus earum. Juva me, Domine, ut quod infirmum est consolidem; quod ægrotum, sanem; quod confractum, alligem; quod abjectum, reducam; quod perierat, requiram: quos credidisti mihi custodiam, & unus ex eis non pereat. Sanctifica nos in veritate, ô sanctificator hominum benignissimè, atque illos ab omnibus inimicis & adversitatibus corporis & animæ custodi: sic mihi obtemperent, sic me diligant; ut sit rationabile obsequium eorum, & vias christiano dignas ambulent; ut ego & verbo & exemplis eos præcedendo, & illi me sequendo; pariter curramus ad te verum animarum nostrarum.

Exercitium diurnum. 103

Pastorem, qui nos in loco pascuæ collocabis, ubi vivis & regnas, &c.

DEPRECATIO pro Illustrissimo & Reverendissimo in Christo Patre & Antistite nostro.

Pastorum princeps Christe, qui posuisti Episcopos regere Ecclesiam quam acquisisti sanguine tuo: exaudi preces servorum tuorum & respice propitius ad famulum tuum Antistitem nostrum N. In æternum serva illi misericordiam tuam, & testamentum tuum fidele ipsi. Sanctifica eum in veritate, & abundet in spe, & virtute Spiritus sancti: memor sis omnis sacrificii ejus, & holocaustum ejus pingue fiat; ut sequester & medius sit inter te & populum tuum omni tempore, & ascendat ex adverso, opponatque murum pro domo Israël. Da viro dexteræ tuæ contra inimicos suos potentiam, & induc illum virtute ex alto, ut valeat irrumpere iniquitates, non respiciens personam hominum, sed in promptu habens ulcisci omnem inobedientiam, & destruere omnem altitudinem extollentem se adversus scientiam Dei; ad nihilum deducatur in conspectu ejus malignus; timentes autem Dominum glorificet, & sit honorabile nomen eorum coram illo. Oves tuæ vocem ejus audiant, & subpaceant illi; ipse enim pervigilat quasi rationem pro animabus nostris redditurus, ut cum gaudio hoc faciat & non gemens,

204 *Exercitium diurnum.*

hoc enim non expedit nobis. Tu qui corda nosti omnium, ostende, filio hominis quem confirmasti tibi, quos elegeris accipere locum ministerii, ut neque volentis neque currentis ratione habitâ, eos tantum in partem ministerii adsciscat quibus datum est à Patre: ut dum Sacerdotalem gentem per eum multiplicas, Ecclesiæ tuæ magnificetur lætitia, & de profectu sanctarum ovium fiant æterna gaudia Pastoris. Amen.

GEMITUS animæ pro conversione Sacerdotum aberrantium à pietate.

B Enignissime JESU, tradite Sacerdotibus, & impiis ad illudendum, & flagellandum, & crucifigendum; Sanguis quem effudisti clamat ad te, ut intuearis & respicias opprobrium Ecclesiæ quam dilexisti, & pro quâ teipsum tradidisti, ut illam sanctificares, & exhiberes tibi gloriosam, non habentem maculam, aut rugam, aut aliquid hujusmodi, sed ut sit sancta & immaculata. Plorans ploravit in nocte, & lacrymæ ejus in maxillis ejus, & egressus est à sponsa tua decor ejus, propter peccata Prophetarum ejus, & iniquitates Sacerdotum ejus: conjuratio enim ipsorum in medio ejus; sicut leo rugiens rapiensque prædam, animas devorant, contemnant legem tuam, polluant Sanctuaria tua, inter sanctum & prophanum non habent distantiam, à sabbatis tuis avertunt oculos

Exercitium diurnum. 209

suos, & coinquinari in medio eorum. Omnes isti æs, & stannum, & ferrum & plumbum in medio fornacis, scoria argenti facti sunt, non circa altaris officia dediti, sed contempto templo & sacrificiis neglectis, implicant se negotiis sæcularibus & festinant participes fieri conviviorum, ludorum & scurrilitatis nihil habentes dignum Sacerdotio. Mensa, quam parasti in conspectu nostro adversus eos qui tribulant nos, sit ipsis in laqueum, & in retributiones & in scandalum; quia offerunt panem pollutum, ignem alienum super Altare tuum. Quanta malignatus est inimicus in sancto? Quid est quod dilecti tui in domo tua faciunt scelera multa? O mi JESU! Demoliti sunt vineam tuam, conculcaverunt partem tuam, dederunt portionem tuam desiderabilem in desertum solitudinis, retrahunt homines à sacrificio, scandalisant plurimos in lege, & per eos nomen tuum jugiter tota die blasphematur in Gentibus: dedisti eos contemptibiles & humiles omnibus populis; & ecce iniquitas eorum facta est confusio populi tui; etenim propter eos facti sumus opprobrium vicinis nostris, subsannatio & illusio his qui in circuitu nostro sunt. Domine judex noster, Domine legifer noster, Domine Rex noster, quando respicies? Restitue Ecclesiam tuam à malignitate eorum, à filiis Belial sponsam tuam: leva manus tuas in super-

206 *Exercitium diurnum.*

bias eorum , & quia gloriati sunt , qui oderunt te , in medio sollemnitatis tuæ , imple facies eorum ignominiâ , ut quærant nomen tuum. Tempus faciendi , Domine , dissipaverunt legem tuam ; converte manum tuam ad eos , & excoque ad purum scoriam eorum , & aufer omne stannum eorum , & restitue ministros tuos ut fuerunt priùs , & Christos tuos sicut antiquiùs : ingrediatur in eis ignis à Domino , ignis , inquam , non comburens , sed illuminans ; non consumens , sed lucens : esto illis quasi ignis conflans & quasi herba fulionum : purga filios Levi , & cola eos quasi aurum , & quasi argentum : sint tibi offerentes sacrificia in iustitia ; placeat Domino sacrificium Juda & Jerusalem sicut dies sæculi , & sicut anni antiqui : ubi abundavit delictum , superabundet & gratia ; & qui hætenus fuerunt ovibus tuis odor mortis in mortem , sint ipsis odor vitæ in vitam : omnes qui viderint eos , cognoscant illos , quia isti sunt semen cui benedixit Dominus. Amen.

ORATIONES pro universo Clero.

DEus , qui ad excolendum agrum tuum hominibus plantatoribus & rigatoribus ita uteris , ut des solus incrementum : da gratiam tuam adjutoribus tuis , ut profectu eorum manifesto seipsos salvos faciant & eos qui ipsos audiunt * * Ministros

Singulis Hebdomadibus. 107

augusti sacrificii fac nos tibi Deus totos consecrari & devoveri, ut qui in partem venimus Sacerdotii unigeniti filii tui, ejusdem etiam oblationis & sacrificii pars esse mereamur: * * Quos elegisti & posuisti, Domine, ad pascendum Unigeniti tui carne & sanguine populum tuum, fac Ministros tuos omnes eundem cum Filio tuo cibum habere; ut faciant voluntatem tuam, & impigrè ac sincerè opus tuum perficiant: Per Dominum, &c.

SINGULIS HEBDOMADIBUS.

Confessio peccatorum peragenda.

QUando quidem juxtà Spiritus-Sancti oraculum, (a) *Si dixerimus quoniam peccatum non habemus, ipsi nos seducimus, & veritas in nobis non est:* ad salutarem poenitentiae piscinam sæpissimè recurrere operæpretium est ut, omnibus conscientiae foribus absterfis, castis dilecti animæ nostræ sponsi frui mereamur amplexibus.

Nimirum sacramentum hoc, ille ipse fons esse videtur de quo vaticinatus est Zacharias his verbis: (b) *In die illa erit fons patens domui David, & omnibus habitantibus Jerusalem, in absolutionem peccatoris: fons utique justitiæ, & aquæ salientis in vitam æternam.*

(a) 1. Joan. 1. (b) Zach. 13.

208 *Singulis Hebdomadibus.*

Illud est omnipotentis Medici conclave, in quo remedia omnibus animæ morbis & vulneribus sanandis comparata reperies, remedia inquam, ipsomet pretioso & efficacissimo Christi sanguine concreta.

Ipsum est cæleste vestiarius in quo reconditur vestis illa luculenta & nuptialis, sine quâ ad regale Agni immaculati convivium nemini panditur aditus.

Explanare quænam sint hujus-ce sacramenti partes; quibusvè conditionibus & dotibus una quæque pars constare debeat; nec instituti nostri ratio, nec præfixæ patiuntur præsentis voluminis angustiae. Sufficiat igitur aliquos actus ad accendendam tuam pietatem hîc subjicere.

I. O R A T I O.

Juxtà exemplum filii Prodigii. Luc. 15.

Pater, peccavi in Cælum & coram te; jam non sum dignus vocari filius tuus. Desideriis & concupiscentiis meis obtemperavi, te fidelissimo Patre contempto: fodi mihi cisternas consolationum terrenarum, cisternas dissipatas quæ continere non valent aquas, te fonte aquæ vivæ derelicto. Gaudium in creaturis quæsi, quod in te solo inveniri potest. Verè non est pax extra te: quare ad te redeo, ô benignissime Pater, cujus misericordiæ non est numerus, & bonitatis infinitus est thesaurus.

Singulis Hebdomadibus. 109

Iterum exclamo: Pater, peccavi in cælum & coram te: redde mihi, obsecro, licet filii nomine indigno, gratiæ tuæ vestem, quam peccatis meis perdi: restitue amoris tui annulum quem amore creaturarum pessum-dedi; ut hoc ornatu in coenâ tuâ Eucharisticâ graciosus comparere merear, tibi que in æternum conjungi. *Mihi enim adharere Deo bonum est. Ps. 72.*

II. O R A T I O.

Juxta Parabolam ovis perditæ. Luc. 15.

ERravi sicut ovis quæ periit, Pastor bone, pie JESU quære servum tuum, & reduc me in viam mandatorum tuorum. Tu enim dixisti: visitabo oves meas: quod perierat, requiram; & quod abjectum erat, reducam; quod confractum, alligabo; & quod infirmum, consolidabo. Aspice vulnera peccatorum meorum, quorum non est numerus, & sana ea. Tuis me humeris, licet indignum, excipe, & adduc ad gregem electorum tuorum: ibi *miseri-*
cor-
dias Domini in æternum cantabo. Ps. 88.

III. O R A T I O.

UTinam, te, Domine Deus meus, ex toto corde meo, ex tota anima mea, & ex omnibus viribus meis super omnia (quod opto) diligam! Utinam ipsam Se-

210 *Singulis Hebdomadibus.*

raphinorum amorem exæquem, in eoque æternum persistam ! Tu scis, Domine, quia amo te, magisque amare cupiam; quod millies malim mori, quam in talia . . . peccata relabi. O quam doleo quod te summum & amantissimum bonum meum umquam offenderim : Urinam (quod firmissimè tua fretus ope propono) te numquam vel minimo delicto offendam ! Tu enim omni amore, honore, & cultu dignus es, cujus sanctissimam voluntatem in omnibus exequi cupio. Amen.

Gratiarum Actio post Confessionem.

Juxta exemplum Leprosi. Luc. 17.

AD te, ô benignissime JESU, reverter, & gratias ago, quod à foedissimâ peccatorum meorum leprâ mundare me dignatus fueris. Sit nomen tuum benedictum in sæcula. Verè tu JESUS, hoc est, Salvator es, qui neminem à te quemlibet flagitiosum repellis, qui omnes verè pœnitentes in gratiam recipis, & in numerum filiorum tuorum adscribis. Misericordiæ tuæ viscera, ô JESU, agnosco & amplector : meque totum servitio tuo deinceps addico. Adjuva, obsecro, imbecillitatem meam; ut nunquam hujus tui præstiti beneficii oblitus amore ullius delectationis, aut præposterii affectus impulsu, in priora peccata relabar, meque à te separem. Cor & animam meam dilectionis tuæ brachiis ita tē-

Singulis Hebdomadibus. 112

cum constringe, ut dicere cum Apostolo audeam: *Quis me separabit à charitate Christi, &c. Rom. 8.*

Alia Gratiarum Actio.

Per Psal. 102.

Benedic anima mea Domino, & omnia, quæ intra me sunt, nomini sancto ejus. * Benedic anima mea Domino: & noli oblivisci omnes retributiones ejus: * Qui propitiatur omnibus iniquitatibus tuis; qui sanat omnes infirmitates tuas. * Qui redimit de interitu vitam tuam; qui coronat te in misericordia & miserationibus. * Qui replet in bonis desiderium tuum: renovabitur ut aquilæ juvenus tua. * Faciens misericordias Dominus, & judicium omnibus injuriam patientibus. * Notas fecit vias suas Moyfi, filiis Israël voluntates suas. * Miserator, & misericors Dominus, longanimis & multum misericors. * Non in perpetuum irascetur, neque in æternum comminabitur. * Non secundum peccata nostra fecit nobis, neque secundum iniquitates nostras retribuit nobis. * Quoniam secundum altitudinem cœli à terra, corroboravit misericordiam suam super timentes se. * Quantum distat ortus ab occidente: longè fecit à nobis iniquitates nostras. * Quomodo miseretur pater filiorum, misertus est Dominus timentibus se, quoniam

212 *Singulis Hebdomadibus.*

ipse cognovit figmentum nostrum. * Recordatus est quoniam pulvis sumus, homo sicut foenum dies ejus, tamquam flos agri sic efflorescit: * Quoniam spiritus pertransibit in illo, & non subsistet: & non cognoscet amplius locum suum. * Misericordia autem Domini ab æterno, & usque in æternum super timentes eum. * Et iustitia illius in filios filiorum, his qui servant testamentum ejus. * Et memores sunt mandatorum ipsius, ad faciendum ea. * Dominus in coelo paravit sedem suam: & regnum ipsius omnibus dominabitur. * Benedicite Domino omnes Angeli ejus, potentes virtute, facientes verbum illius, ad audiendam vocem sermonis ejus. * Benedicite Domino omnes virtutes ejus: ministri ejus qui facitis voluntatem ejus. * Benedicite Domino omnia opera ejus: in omni loco dominationis ejus, benedic anima mea Domino. Gloria Patri, &c.

Oratio S. Thomæ Aquinatis,

Qua virtutes Christiani hominis petuntur.

COncede mihi, misericors Deus, quæ tibi placita sunt, ardentem concupiscere, prudenter investigare, veraciter agnoscere, perfectè adimplere ad laudem & gloriam nominis tui. Ordina statum meum: & quod à me requiris ut faciam, tribue ut sciam, & da exequi sicut oportet, &

Singulis Hebdomadibus. 213

expedit animæ meæ. Da mihi, Domine Deus meus, inter prospera & adversa non deficere: ut in illis non extollar, in istis non deprimar: de nullo gaudeam vel doleam, nisi quod ducat ad te, vel abducatur à te: nulli placere appetam, vel displicere timeam, nisi tibi. Vilescant mihi Domine omnia transitoria, & cara mihi sint omnia tua propter te, & tu, Deus, præter omnia. Tædeat me gaudii quod est sine te: nec aliquid cupiam quod est extra te. Delectet me Domine, labor qui est pro te & tædiosa sit mihi omnis quies, quæ est sine te. Frequenter da mihi Domine cor ad te dirigere, & lapsus meos cum emendationis proposito dolendo pensare. Fac me, Domine Deus, obedientem, sine contradictione; pauperem sine defectione; castum sine corruptione: patientem sine murmuratione: humilem sine fictione: hilarem sine dissolutione: tristem sine dejectione: maturum sine tarditate: agilem sine levitate: timentem sine desperatione: veracem sine duplicitate: operantem bona sine præsumptione: proximum corrigere sine elatione: ipsum ædificare verbo & exemplo sine simulatione. Da mihi, Domine Deus, cor pervigil, quod nulla abducatur à te curiosa cogitatio: da cor nobile, quod nulla deorsum trahat indigna affectio, da rectum, quod nulla obliquet sinistra intentio: da invictum, quod nulla frangat tri-

114 Singulis Mensibus.

bulatio : da liberum , quod nulla sibi vindicet perversa & violenta animi commotio. Largire mihi, Domine Deus meus , intellectum te cognoscentem : diligentiam te quærentem : sapientiam te invenientem : conversationem tibi placentem : perseverantiam te fideliter expectantem ; & fiduciam te finaliter amplectentem. Da mihi tuis pœnis configi per pœnitentiam : tuis beneficiis uti in via per gratiam ; & tandem tuis gaudiis perfrui per gloriam. Per Dominum , &c.

SINGULIS MENSIBUS.

Ad mortem sese præparandum.

IN hoc totius felicitatis nostræ cardo volvitur , ut benè moriamur ; summa verò miseriarum est , si quis malè vitam finierit : neque hac in parte bis peccare datur ; error , si aliquis contingat : non potest compensari : semel morimur , & exindè omnia pendent : (a) *Si ceciderit lignum ad Austrum, aut ad Aquilonem , in quocumque loco ceciderit , ibi erit : per totam utique æternitatem.*

Beatus igitur inquit author de imitatione Christi , (b) qui horam mortis suæ semper ante oculos habet , & ad moriendum quotidie se disponit : verè beatus , quia procul

(a) *Eccles. II.* (b) *Lib. 1. 23.*

Singulis Mensibus. 225

dubio , (c) *in Domino morietur , amodò dicet ei spiritus ut requiescat à laboribus.* Quam infelices è contrà & miseri , qui ab hoc saluari prospectu oculos mentis avertunt , in coeno terrenarum voluptatum liberius sese volutaturi ! (d) *sicuti enim pisces capiuntur hamo , & sicut aves laqueo comprehenduntur ; sic capientur homines isti in tempore malo , cum eis extemplò super venerit.*

Fidei itaque ac rationi consentaneum esset , cum quilibet actus ultimus vitæ tuæ esse possit , ut juxta Ecclesiastici consilium (e) in omnibus operibus tuis memor esses novissimorum tuorum , & sic in æternum non peccares. Æquum esset , ut saltem singulis diebus ad tantum opus te accingeres , ut suadet author imitationis supralaudatus , manè scilicet , cogitando te ad vesperam forsan non perventurum ; vesperè autem facto , non audendo manè tibi polliceri : sed qualem excusationem prætere pòteris apud summum judicem , si vel per aliquot horas in mense , soli negotio tuo , quod est negotium æternitatis , vacare recusaveris.

Hoc est præparationis hujus artificium ? ut nempe die mensis tibi præfixâ , omnibus aliis post habitis curis , sedulò conscientiam discutiens , in hunc statum te conferre fatigas , in quo optares inveniri si mors in se-

(c) *Apoç. 14.* (d) *Ecclesi. 9.*

(e) *Ecclesi. 7.*

ribus adstaret, & mox ad Dei iudicium effes citandus. Hac ipsâ die confessionem tuam perage quasi effes in ultimo vitæ discrimine, & corpore Dominico, si hoc tibi concedatur, quasi cœlesti viatico agonem tuum munire ne prætermittas. Ad devotionem tuam magis excitandam, nec etiam abs erit, pro teipso commendationem animæ præstare, quam Ecclesia fieri præcipit pro fidelibus in extrema vitæ lucta versantibus. Hanc ad calcem Breviarii reperiēs.

S I N G U L I S A N N I S.

Exercitiis spiritualibus in secessu vacandum.

EX quo tempore Patris cœlestis, Christum ut Magistrum & Doctorem nobis præmonstrantis, audita est in deserto vox ista, (f) *Hic est Filius meus dilectus in quo mihi bene complacui, ipsum audite*; ad solitudinem, quasi ad divinæ doctrinæ scholam, interdum se recipere non dubitat, quisquis piæ & religiosæ vitæ tyrocinium ponere, vel ad ampliōres profectus sese conferre fatagit.

Enim vero in quocumque statu versetur anima tua; ibi omnia salutis adminiculæ reperiēs. Noxis gravioribus inquinari? Habes in solitudine veluti quoddam mare ru-

* (f) *Matth.* 17. (g) *Pf.* 67.

brum in quo omnia submergentur delicta tua; transmigra in hunc montem sicut passer, ibi cum Psalm. canticum istud concines (g) *Deus cum pertransires in deserto, terra mota est, seu cor terrenum conturbatum est; Etenim cæli distillaverunt à facie Dei Sinai, à facie Dei Israël cum eodem & istud iterabis: (h) Torrentem pertransivit anima nostra, torrentem utique poenitentiae, forsitan, alioqui, pertransisset aquam intolerabilem. (i) Anima nostra sicut passer erepta est de laqueo venantium; laqueus contritus est & nos liberati sumus.*

Unde pulchrè admodum exclamat S. Basilii: (k) „O solitudo mors vitiorum, purgatorium sordidorum! Te potentis medici „conclave experiuntur qui vulnerati in prælio hostiles manus effugiunt; tu mundi „persequentis felix refugium, ab æstu sæculi refrigerium; tu Dominicæ sepulturæ „propemodum æmula, quæ peccato mortuos suscipis, & per afflatum S. Spiritus „Deo reviviscere facis.

Si præ nimio torpore languescas, & non nisi remissè jugum Domini sustinueris; habes in solitudine columnam igneam quæ viam tibi demonstrando quam carpere teneris, novo te accendet fervore ut illam impigrè prosequaris. Ibi Spiritus Sanctus

(h) Ps. 123. (i) *Ibid.*

(k) *De laude Jeremi.*

218 *Singulis Annis.*

blandè cordi tuo illapsus, istà Apocalypsis clementi objurgatione te percellet: (l) *Habeo adversum te pauca, quod charitatem tuam primam reliquisti: memor esto unde excideris & age pœnitentiam, & prima opera fac. Tunc concalescet cor tuum intra te, & in meditationibus tuis ignis divini amoris exardescet; licebitque cum Psalm. istud ingeminare: (m) Ecce elongavi fugiens & mansi in solitudine, exspectabam eum qui salvum me fecit à pusillanimitate Spiritus.*

Si verò strenuè viam mandatorum Dei cucurreris; pluet tibi in solitudine manna absconditum, & in fortitudine cibi illius desertum hujus vitæ inoffenso pede percalcans, ambulabis usque ad montem Dei, ad terram fluentem lac & mel. Etenim si petra ista solitudinis refugium est herinaceis, seu pusillanimis: cervi pariter, seu mentes excelsæ & ad pietatem agiles, novos in ea perfectionis montes percurrendos deprehendunt. Ibi justus novas in corde suo disponit ascensiones, & (n) illius *semita quasi lux splendens procedit & crescit usque ad perfectam diem.* Tunc adimpletur in ipso istud Isaïæ vaticinium: (o) *Consolabitur Dominus Sion, ponet desertum ejus quasi delicias, & solitudinem ejus quasi hortum Domini, gaudium & latitia invenientur in ea, gratiarum actio*

(l) C. 2. (m) Ps. 54. (n) Prov. 14.
(o) Isaï. 51.

✠ *vox laudis.* Quicumque ergo , concludit S. Basilius , ad perfectionem pervenerint , tuum , ô solitudo , noverint præconium.

Sed & ipsa virorum Apostolicorum institutrix est & Magistra ; illam Christus Dominus ad exemplum nostrum colere non dedignatus est. Nempe , ut ait Illustrissimus Hallier Episcopus Caballicensis. (p)
„ Divinæ dispensationis mysteria aggressus ,
„ secessit Christus à turbis , quem frequentia populorum non turbabat ; solitudinem petiit , cui in solitudine nota omnia & obvia erant : meditationi vacaturus discessit , qui divinam jugiter Dei faciem & sine cessatione intuebatur : oraturus desertum petiit , qui tamen exaudiri merebatur pro sua reverentia , poteratque præstare quod petebat , & largiri quod volebat.

„ Ea ergo omnia fecit Christus non quod aliquibus egeret vitæ melioris adminiculis , sed perfectum vitæ quam imitamur exemplum tradere volens ; ne prius Hierarchicum gradum subeamus , vel Ecclesiastica ministeria aggrediamur quam , ad nostri Ducis imitationem , secreti à turbis , terrestrium silente tumultu curarum , oratione & aliis piis operibus totos

(p) *Lib. de Sacris Electionibus Sect. 4. de Preparat. ad Ordines Parag. 2.*

„nos Deo committamus, instruendosque
„& imbuendos tradamus.

„Ad hoc exemplum formati Apostoli,
„priusquam divinitus sibi commissam lega-
„tionem implerent, aut prædicandi Evan-
„gelii munere fungerentur: unanimes in
„eadem domo precantes, & divinis medi-
„tationibus sedulò intenti, nobis descri-
„buntur, ut se ad divinum illud Verbi Di-
„vini semen fructuosè per totum orbem
„spargendum præpararent „ Ut quid ergo
tam eximiis vestigiis insistere recusares?
Ad sancta proposita tua corroboranda,
operæ-pretium erit, promissa professionis
Clericalis redintegrare per Psal. 15. *Con-
serva me, Domine, quoniam speravi in te.*

FINIS SECUNDÆ PARTIS.




TERTIA



TERTIA PARS.

SPECULUM SACERDOTUM ET CLERICORUM.

 **N** I H I L est, ait Sacro-Sanctum Conc. Trident. Quod alios magis ad pietatem & Dei cultum assidue instruat, quam eorum vita & exemplum qui se divino ministerio dedicarunt, cum enim à rebus sæculi, in altiore sublati locum. conspiciantur; in eos tanquam in speculum reliqui oculos conjiciunt, ex iisque sumunt quod imitentur. Quapropter sic decet omninò Clericos in sortem Domini vocatos, vitam moresque suos omnes componere, ut habitu, gestu, incessu, sermone, aliisque omnibus rebus, nihil nisi grave moderatum ac religione plenum præferrerant; levia etiam delicta, quæ in ipsis maxima essent, effugiant, ut eorum actiones cunctis afferant venerationem. *Sess. 22. de Reform, c. 1.*

I.

Notio optimi Clerici & Sacerdotis.

Clericus qui Christi servit Ecclesiæ ; interpretetur primo vocabulum suum, & nominis definitione prolata, nitatur esse quod dicitur : si enim *Cleros* græcè, *sors* latinè appellatur ; propterea vocantur Clerici, vel quia de sorte sunt Domini, vel quia ipse Dominus sors, id est pars Clericorum est. Qui autem vel ipse pars Domini est, vel Dominum partem habet, talem se exhibere debet, ut & ipse possideat Dominum & possideatur à Domino. *S. Hieron. Epist. ad Nepotianum.*

Idæam hanc optimi Ecclesiæ Ministri uberiorius explicat Apostolus. Homo est mundo crucifixus & cui mundus crucifixus est, qui exhibet corpus suum hostiam viventem sanctam, Deo placentem, suis se affectibus exuens ut Christum induat, & peccatis mortuus iustitiæ vivat, providens bona non tantum coram Deo, sed etiam coram hominibus ; ita ut in omnibus seipsum præbeat exemplum bonorum operum in doctrina sana, in integritate, in gravitate, abnegans impietatem & sæcularia desideria, ut sobriè, justè, & piè vivat in hoc sæculo.

Dei ministrum & operarium inconfusibilem sese exhibet, in multa patientia in tribulationibus, in necessitatibus, in angustiis,

in laboribus, in vigiliis, in jejniis, in castitate, in scientia, in longanimitate, in suavitate, in Spiritu-Sancto, in charitate non ficta, in verbo veritatis, in virtute Dei, per arma justitiæ à dextris & à sinistris, per gloriam & ignobilitatem, per infamiam & bonam famam, per prospera & adversa; donec ad perfectionis apicem provectus, post legitimum certamen & cursûs consummationem, coronam justitiæ à Domino recipiat. *Ex variis S. Pauli Epist.*

I I.

Ejusdem argumenti series.

SINT Clerici memores perpetuò vocationis quâ eos Dominus dignatus est, ejusque quod scriptum est: Sancti estote quia ego sanctus sum, nemini dantes ullam offensionem, ut non vituperetur ministerium nostrum. Coelestem in terris vitam tanquam Angeli Dei agant, exspoliantes veterem hominem cum actibus suis, & novum induentes. Sint electi Dei Sancti & dilecti; viscera misericordiæ, benignitatem, humilitatem, modestiam, patientiam induentes.

Sobrii sint, ornatî, pudici, prudentes, sed non apud semetipsos, supportantes invicem, non invicem provocantes, non invicem invidentes, subiecti invicem in timore Christi; non dominantes in Cleris, sed

124 *Speculum Sacerdotum*

charitate fraternitatis invicem diligentes ; & honore invicem prævenientes , hospita-
les , invicem suscipientes , & justitiam in-
duentes ; si fieri potest cum omnibus homi-
nibus pacem habentes , omnem ostenden-
tes mansuetudinem ad omnes homines : non
vinolenti sint , non percussores , sed mo-
desti ; non litigiosi , non cupidi , non bilin-
gues , non turpe lucrum sectantes , habentes
mysterium fidei in conscientia pura.

Sint etiam spiritu ferventes , Domino
servientes & orationi instantes , ut ambu-
lent dignè Deo per omnia placentes , in
omni opere bono fructificantes , & cres-
centes in scientia Dei , & quæcumque sunt
vera , quæcumque sancta , quæcumque ama-
bilia , quæcumque bonæ famæ , si qua vir-
tus , si qua laus disciplinæ , hæc cogitent,
Ex variis Ss. Apost. Epist.

I I I.

*Sacerdos sicut dignitate ita & sanctitate sit
præcellens.*

AUdite me beatissimi Patres , & si dignum
ducitis sanctissimi Fratres ; audite me
stirps Davidica , germen Sacerdotale , pro-
pago sanctificata , Duces ac Rectores gregis
Christi. Audite me rogantem vos pariter &
timenem , & honorem sacerdotalem demon-
strare volentem ; ut cum honoris vobis præ-
rogativas monstramus , merita etiam con-

grua requiramus. Dignum est enim ut dignitas sacerdotalis prius noscatur à nobis, & sic deinde servetur à nobis, ut psalmodi sententia queat repelli à nobis: homo cum in honore esset non intellexit, comparatus est jumentis insipientibus, & similis factus est illis. *S. Ambros. Lib. de dign. Sacerd. cap. 2.*

Sacerdotium ipsum in terra quidem peragitur, sed in rerum cælestium classẽ ordinemque referendum est. . . . Idcirco necesse est sacerdotem sic esse purum, ut si in cælis ipsis collocatus, inter cælestes virtutes medius staret. Terribilia namque atque honorifica sunt quæ administrat. Si quis consideret quantum sit id Mysterium, is probè intelliget quanto honore quantaque dignitate Sacerdotes Spiritus-Sancti gratiã dignati fuerint: etenim iis qui terram incolunt atque in ea versantur commissum est, ut ea quæ in cælis sunt dispensent; iis datum est ut potestatem habeant quam Deus opt. nec Angelis, nec Archangelis datam esse voluit: neque enim ad illos dictum est: *Quicumque ligaveritis super terram, &c.*

Etenim quidnam hoc aliud esse dicas nisi omnium rerum cælestium potestatem illis à Deo esse concessam? Quid cum hoc honore conferri potest? A terra judicandi principalem auctoritatem sumit cælum: servus sedet iudex in terra, & Dominus se-

quitur ejus sententiam atque confirmat ; ut quidquid hic in inferioribus judicaverit , hoc ille in supernis comprobet. Quænam , obsecro , potestas hac unâ major esse queat ? Pater omnem potestatem dedit Filio ; cœterùm video eandem ipsam potestatem à Deo Filio Sacerdotibus traditam : nam quasi jam in cœlum translati , ac suprâ humanam naturam positi , sic illi ad principatum istum perducti sunt. *S. Chrysost. lib. 3. de Sacerdot. cap. 3. & 4.*

I V.

Ejusdem argumenti veritas confirmatur.

QUO igitur non oportet esse puriorem tali fruente sacrificio ; quo solari radio non splendidiorum manum carnem hanc dividente , os quod igne spiritali repletur , linguam quæ tremendo nimis sanguine rubescit ? Cogita quali sis insignitus honore ; quali mensâ fruaris. Quod Angeli videntes horrescunt , neque liberè audent intueri propter emicantem inde splendorem , hoc nos pascimur , huic unimur , & facti sumus unum Christi corpus & una caro. Audiamus ergò & Sacerdotes & subditi , quali escâ facti sumus digni : audiamus & horreamus ; sanctis carnibus suis nos dedit impleri , semetipsum apposuit immolatum : quænam igitur erit nobis excusatio , cum talibus pasci , talia peccemus , cum lupi

fiamus agnum comedentes. *S. Chrysoft. Hom. 83. in Math. & Hom. 60. ad pop. Antioch.*

O Sacerdotes , si anima cujuslibet Justi sedes est Dei , multo magis sedes & Templum Dei vos esse debetis purum & immaculatum. Si sepulchrum ejus gloriosum est , in quo corpus ejus jacuit exanime , multo gloriosiora debent esse corpora vestra , quæ à mortuis suscitatus quotidie inhabitare dignatur. Si beatus est venter qui novem mensibus Christum portavit , & beata debent esse corda vestra , in quibus hospitium quotidie eligit Filius Dei. Si beata sunt ubera quæ parvulus succit , beatum debet esse os quod carnem ejus sumit , & sanguinem fugit. Carnes ergo vestras cum ejus timore configite , & vobis diligenter provide , ne lingua quæ vocat de coelo Filium Dei , contra ipsum Dominum loquatur , & ne manus quæ intinguntur sanguine Christi , polluantur sanguine peccatorum. *S. Auguf. Serm. 37. ad Fratres in Eremo , citatus à Molina Carth. Trac. 1. cap. 1. Par. 2.*

V.

De cura salutis propriæ.

Quid prodest homini , si mundum universum lucretur , animæ vero suæ detrimentum patiatur , aut quam dabit homo commutationem pro animâ suâ. Filius enim

hominis venturus est in gloria Patris sui cum Angelis suis, & tunc reddet unicuique secundum opera sua. *Matth. c. 16. v. 26.*

Si quod vivis & sapis, totum das actioni, considerationi nihil, laudo te? In hoc non laudo si item totus vis esse omnium, instar illius qui omnibus omnia factus est, laudo humanitatem, sed si plena sit: quomodo autem plena, te excluso? Et tu homo es: Ergo ut integra sit & plena humanitas, colligat & te intra se sinus qui omnes recipit: alioquin *quid tibi prodest*, juxta Verbum Domini, *si universos lucreris te unum perdens?* Quamobrem cum omnes te habeant, esto etiam tu ex habentibus unus. Quid solus fraudaris munere tui? Usquequò vadens spiritus & non rediens? Usquequò non recipis te & ipse inter alios vice tua? Sapientibus & insipientibus debitor es, & soli negas te tibi? Stultus & sapiens, servus & liber, dives & pauper, vir & foemina, senex & juvenis, justus & impius, omnes pariter participant te, omnes de fonte publico bibunt pectore tuo, & tu seorsum sitiens stabis? Si maledictus qui partem suam facit deteriorem, quid ille qui se penitus reddit expertem; sane deriventur aquæ tuæ in plateas... sed inter cæteros bibe & tu de fonte putei tui, denique *qui sibi nequam cui bonus?* *S. Bern. Lib. 1. de Consider. cap. 5.*

V I.

Zelus gloriæ Dei.

ZElo zelatus sum pro Domino Deo exercituum quia dereliquerunt pactum tuum filii Israël, 3. Reg. c. 19. Phinées, filius Eleazari filii Aaron Sacerdotis avertit iram meam à filiis Israël: quia zelo meo commotus est contra eos, ut non ipse dererem filios Israël in zelo meo. Idcirco loquere ad eum. Ecce do ei pacem fæderis mei, & erit tam ipsi quam semini ejus pactum Sacerdotii sempiternum, quia zelatus est pro Deo suo, & expiavit scelus filiorum Israël. *numer. 25.*

Zelum habere debet Sacerdos, qui in corruptam servare studet Ecclesiæ castitatem: & ideo Princeps Sacerdotum dicit: zelus domus tuæ devoravit me....zelus igitur Dei vita est: sicut enim ante in Adam devoraverat hominem mors prævalens, ita zelus devoravit quem vivificavit in Christo. Zelum habuit Elias & ideo raptus ad cælum est, zelans, inquit, zelavi Dominum.... Quid multa? Apostolus quoque Domini hoc declaratus est nomine, ut Si meon zelotes diceretur. Zelo fidei populus gentilium vitam sibi acquisivit æternam, quam negligentia atque desidia Judæorum populus amisit... Angeli quoque sine zelo nihil sunt, & substantiæ suæ amittunt prærogativam, nisi eam zeli ardore sustentent...

130 *Speculum Sacerdotum*

Et quid miremur si Angeli eum habent? Ipse Deus Pater ait zelans zelabo Jerusalem zelo magno . . . Zelo vindicatur Jerusalem: zelo Ecclesia congregatur, zelo fides acquiritur, zelo pudicitia possidetur. *S. Ambrosius in Psalm. 118. octon. 18.*

V I I.

Zelus domûs Dei.

Zelus (*a*) domûs tuæ comedit me, & opprobria exprobrantium tibi ceciderunt super me. (*b*) Hoc zelo comeditur qui omnia quæ fortè ibi perversa sunt fatagit emendare, cupit corrigere, non quiescit: si emendare non potest, tolerat, gemit. (*c*) Quam terribilis est locus iste! Non est hic aliud nisi domus Dei & porta cæli. (*d*) Ergo nè credibile est ut habitet Deus cum hominibus super terram? Si cælum & cæli cælorum te non capiunt, quanto magis domus ista quam ædificavi?

(*e*) Domine dilexi decorem domus tuæ, & locum habitationis gloriæ tuæ, unde & addit idem Propheta Regius. (*f*) Ecce ego, in paupertate mea, præparavi impensas domûs Domini . . . talis esse debet ut in cunctis regionibus nominetur . . . opus namque grande est, neque enim homini præ-

(*a*) *Pf.* 68. (*b*) *S. Aug. Tract. 10 in Joannem c. 2.* (*c*) *Genes.* 28. (*d*) 2. *Paralip. c. 6.*

(*e*) *Pf.* 25. (*f*) 1. *Paralip. 22, & 29.*

paratur habitatio sed Deo. (g) Quanto magis Sacerdoti convenit, ornare Dei Templum decore congruo, ut etiam hoc cultu Aula Domini resplendeat.

Hoc Presbyteri munus apprime noverat Nepotianus de quo S. Hieronymus ait, (h) erat sollicitus si niteret Altare, si parietes absque fuligine, si pavimenta tersa, si janitor creber in portâ, vela semper in ostiis, si sacrarium mundum, si vasa luculenta; & in omnes ceremonias piâ sollicitudo disposita. Non majus, non minus negligebat officium: ubicumque eum queres, in Ecclesia invenires... Basilicas Ecclesiæ diversis floribus & arborum comis, vitiumque pampinis adumbravit, ut quidquid placeret in Ecclesia, tam dispositione quam visu, Presbyteri laborem & studium testaretur.

V I I I.

Zelus salutis animarum:

Simon (a) Joannis diligis me plus his?... Pasce oves meas. Quasi diceret (b) si dilectionem erga me habes, ubi ostendas habes, ubi exerceas habes, pasce agnos meos. (c) Ex hoc loco agnoscunt fidei magistri non aliter se summo Pastori, id est

(g) S. Ambr. lib. 2. Off.

(h) St. Hier. Epist. 3. ad Heliodor.

(a) Joan. 21. (b) S. Aug. serm. 149. de temp.

(c) S. Cyr. Alex. l. 12. in Joan. c. 21.

232 *Speculum Sacerdotum*

Christo gratos fore, quam si omni studio caveant, ut rationales oves recte curentur & bene habeant.

Quam (d) multa propter hunc gregem passus est Filius Dei? Homo factus est, servi formam assumpsit, conspuratus est, alapis cæsus est; postremo ne mortem quidem recusavit, nec ignominiosissimam: quin & ipsum sanguinem suum effudit. Itaque si quis voluerit illi commendatus esse, curam habeat ovium illius, publicam quærat utilitatem, fratrum suorum salutem prospiciat; nullum enim officium hoc Deo charius est. (e) Deo nec addere, nec detrachere sufficit: reliquit in hoc sæculo similitudinem sui, videlicet hominem, quatenus quod illi honoris impendere volumus, in ejus exhibeamus imagine... erigendo illum de lacu miseriæ & de luto fecis.

Illud profecto Pastoris munus apprime noverat Apostolus cujus hic sermo erat: (f) si Evangelisavero non est mihi gloria; necessitas enim mihi incumbit: vae enim mihi est si non evangelisavero... cum liber essem ex omnibus, omnium me servum feci ut plures lucrificarem: factus sum Judæis tanquam Judæus ut Judæos lucrarer.... Factus sum infirmis infirmus, ut infirmos

(d) *S. Chrys. Orat. de B. Philogonio.*

(e) *B. Laur. Justin. de Compl. Christ. perf.*

(f) *1. Cor. 9.*

lucrifacerem. Omnibus omnia factus sum ut omnes facerem salvos. (g) Quis infirmatur & ego non infirmor? Quis scandalizatur, & ego non uror? (h) *Ego autem libentissimè impendam, & superimpendar ipse pro animabus vestris; licet plus vos diligens minus diligar.* (i) Tanquam si nutrix foveat filios suos: ita desiderantes vos, cupidè volebamus tradere vobis non solum Evangelium Dei, sed etiam animas nostras; quoniam charissimi nobis facti estis.

I X.

Catechisandis Pueris & Rudibus danda opera.

Attende (l) exhortationi & doctrinæ. (m) Adhæsit enim lingua lactentis ad palatum ejus in siti: parvuli petierunt panem, & non erat qui frangeret eis. (n) Ne ergo contemnatis unum de pusillis istis. Intuere Dominum Jesum (o) in quo sunt omnes thesauri sapientiæ & scientiæ absconditi. (p) Offerebant illi parvulos, ut tangeret illos, discipuli autem comminabantur offerentibus. Quos cum videret Jesus, indigne tulit & ait illis: sinite parvulos venire ad me, & ne prohibueritis eos talium est enim regnum Dei. Amen dico vobis,

(g) 2. Cor. 11. (h) 2. Cor. 12.

(i) 1. Thes. 2. (l) 1. Tim. 4. (m) Thren. 4.

(n) Matth. 18, (o) Colos. 2. (p) Marc. 10.

234 *Speculum Sacerdotum*

quisquis non receperit regnum Dei velut parvulus, non intrabit in illud. Et complexans eos, & imponens manus super illos, benedicebat eos.

(q) O piissime Jesu, quis ultra post te verecundabitur esse humilis ad parvulos? Quis tumescens & elatus de sua vel magnitudine vel scientia parvitatem deinceps parvulorum, ignorantiam vel imbecillitatem audebit aspernari; quando tu, qui es Deus benedictus in sæcula, in quo sunt omnes thesauri, &c. usque ad castissimos parvulorum amplexus beata brachia mansuetus inclinas atque circumligas? Procul ergo, procul ex hinc omnis elatio, seorsum sit indignabunda quælibet parvulorum effugatio.

(r) Audi Paulum dicentem: sive mente excessimus, Deo; sive temperantes sumus, vobis: charitas enim Christi compellit nos, judicantes hoc, quia unus pro omnibus mortuus est. Quomodo enim paratus esset impendi pro animabus eorum, si eum pigeret inclinari ad aures eorum? Hinc ergo factus est parvulus in medio nostrum, tanquam nutrix fovens filios suos. Num enim delectat, nisi amor invitet, decurtata & mutilata verba immurmurare? . . . Non ergo

(q) *Gerf. Traët. de Parvul. trah. ad Christ. conf. 4.*

(r) *S. Aug. de Catech. Rudib. c. 10. n. 15.*

recedat de pectore etiam cogitatio gallinæ illius quæ languidis plumis teneros fætus operit, & susurrantes pullos confractâ voce advocat; cujus blandas alas refugientes superbi, præda fiunt alitibus.

X.

Christus in omnibus imitandus.

HOc (a) sentite in vobis quod & in Christo-Jesu, (b) si quis enim spiritum Christi non habet hic non est ejus. (c) Et qui dicit se in ipso manere debet sicut ille ambulavit & ipse ambulare. (d) Nam quos præscivit Deus, & prædestinavit conformes fieri imaginis filii sui, ut sit ipse primogenitus in multis fratribus. (e) Unde & Christus ait exemplum dedi vobis, ut quemadmodum ego feci ita & vos faciatis. (f) Et rursus manete in me: & ego in vobis. Sicut palmes non potest ferre fructum à semetipso, nisi manserit in vite: sic nec vos, nisi in me manseritis. Ego sum vitis, vos palmites: qui manet in me, & ego in eo, hic fert fructum multum, quia sine me nihil potestis facere: si quis in me non manserit, mittetur foras sicut palmes, & arefcet & colligent eum, & in ignem mittent, & ardet.

(a) *Philip. 2.* (b) *Rom. 8.* (c) *1. Joan. 2.*

(d) *Rom. 8.* (e) *Joan. 13.* (f) *Joan. 15.*

236 *Speculum Sacerdotum*

(g) Parum erat Deo, si filium suum faceret demonstratorem viæ; cum ipsum viam fecit, ut per illum ires regentem te, ambulantem per se. (h) Si mundana sapientia ita in suis gloriatur erroribus, ut quem sibi quisque ducem elegerit, ejus opiniones & mores atque omnia instituta sectetur; quæ nobis erit communio nominis Christi, nisi ut ei inseparabiliter uniamur, qui est, ut ipse insinuavit, via, veritas & vita? Via scilicet conversationis Sanctæ, veritas doctrinæ divinæ, & vita beatitudinis sempiternæ.

Istud præcipuè rectorem spectat qui (i) ad hoc studere debet, ut sibi commissos faciat Christi-formes... Undè Apostolus dicit: estote imitatores Dei, sicut filii charissimi. Et: Filioli mei quos iterum parturio, donec Christus formetur in vobis. Sed cum ex verborum doctrinâ minus capiant de doctrina Christi, debent etiam formam ejus visibilem in se ipsis ostendere, ut eis profundius imprimatur, dicentes cum Apostolo: imitatores mei estote, sicut & ego Christi. Quasi dicat: si formam Christi desideratis ad imitandum agnoscere; in meis hanc moribus considerate: & vivo, jam non ego; vivit vero in me Christus. Vicarius enim

(g) *S. Aug. enar. in. Ps. 109.*

(h) *S. Leo Serm. de Resurr.*

(i) *S. Bonav. Tract. de sex alis Seraphi.*

Christi vicem Christi debet gerere, in beneplaciti ejus promotione, in potestatis ejus auctoritate, & in similitudinis ejus representatione, scilicet ut ea quæ vult promoveat in subditis.

X I.

Ecclesiæ vulnus, improborum mores.

Christus (*k*) dilexit Ecclesiam, & se ipsum tradidit pro ea ut illam sanctificaret, mundans lavacro aquæ in verbo vitæ: ut exhiberet sibi gloriosam Ecclesiam non habentem maculam, aut rugam, aut aliquid hujusmodi, sed ut sit sancta & immaculata. (*l*) Inspice, & fac secundum exemplar quod tibi in monte monstratum est, ut possis dicere cum Apostolo, (*m*) adimpleo ea quæ desunt passionum Christi in carne mea, pro corpore ejus quod est Ecclesia, (*n*) non est enim qui consoletur eam ex omnibus caris ejus. Omnes amici ejus spreverunt eam, & facti sunt ei inimici... & ipsa opressa amaritudine. (*o*) Olim prædictum est & nunc tempus impletionis advenit. Ecce in pace amaritudo mea amarissima: amara prius in nece Martyrum, amarior postea in conflictu Hæreticorum, amarissima nunc in moribus domesticorum;

(*k*) *Ephef. 5.* (*l*) *Exod. 25.*

(*m*) *Colof. 1.* (*n*) *Thren. 1.*

(*o*) *S. Bern. Ser. 33. in cantis.*

238 *Speculum Sacerdotum*

non fugare non fugere eos potest ita invaluerunt & multiplicati sunt super numerum. Intestina & insanabilis plaga Ecclesiæ & ideò in pace amaritudo ejus amarissima ; sed in qua pace ? Et pax est, & non est pax : pax à Paganis, & pax ab Hæreticis, sed non profectò à filiis. Vox plangentis in tempore isto : filios enutrivì & exaltavi, ipsi autem spreverunt me : spreverunt & maculaverunt me à turpi vita, à turpi quæstu, à turpi commercio, à negotio denique perambulante in tenebris.

X I I.

Peccata Sacerdotum gravissima.

SI (a) Sacerdos, qui unctus est, peccaverit, delinquere faciens populum, offeret pro peccato suo vitulum immaculatum Domino, &c. Igitur (b) ante Prophetarum tempora ostendere volens Deus hominum peccata longè majori supplicio expiari, dùm à Sacerdotibus, quàm dùm à privatis perpetrantur, mandat, ut tantumdem pro Sacerdotibus, quantum pro universo populo sacrificium offeratur. Quod quidem quid aliud signat, quàm Sacerdotis vulnera majori medicamento atque auxilio indigere ; atque adeò tantò quantò conjuncta simul universi populi vulnera indigent ? Porro majori nequaquàm indigerent nisi ea gra-

(a) *Levit. 4.*

(b) *S. Chryf. l. 6. de Sacer. c. 11.*

viora forent. Atqui graviora certè fiunt, non naturâ ipsâ, sed Sacerdotis qui ea commiserit, conditione ac dignitate.

Undè dicitur, (c) erat ergo peccatum puerorum (Ophni & Phinéés) grande nimis coram Domino: quia retrahebant homines à sacrificio Domini, Et ab Ecclesiæ Ministro se non mediocriter offensum Deus per Prophetam conqueritur; (d) si inimicus meus maledixisset mihi; sustinuissem utique. . . . Tu verò homo unanimis dux meus & notus meus qui simul mecum dulces capiebas cibos. Et rursum (e) Homo pacis meæ in quo speravi, qui edebat panes meos magnificavit super me supplantationem.

(f) Neque licet imperitiam prætere, neque ad ignorantiam confugere, neque aut necessitatis, aut violentiæ speciem opponere. . . Quandoquidem qui delegatus est, ut alienam emendet ignorantiam, tum verò diabolicum instare bellum denunciet, is certè ignorantiam prætere minimè poterit, neque vocem hanc usurpare; tubam non audiui, bellum non prævidi.

Illud idem monet Apostolus (g) confidis teipsum esse ducem cæcorum, lumen eorum qui in tenebris sunt, eruditorem infi-

(c) 1. Reg. 2. (d) Ps. 54. (e) Ps. 40.

(f) S. Chrys. l. 6. de sacerdotibus, c. 1.

(g) Rom. 2.

pientium, magistrum infantium, habentem formam scientiæ & veritatis in lege. Qui ergo alios doces, teipsum non doces; qui prædicas non furandum, furaris; qui dicis non mœchandum, mœcharis; qui abominaris idola, sacrilegium facis; qui in lege gloriaris, per prævaricationem legis Deum inhonoras. Nomen enim Dei per vos blasphematur inter gentes. Gravissimum igitur ipsi impendet exitium. (h) In terra Sanctorum iniqua gessit, non videbit gloriam Domini.

X I I I.

De modestia seu de vita exemplari.

INduite (i) vos sicut electi Dei sancti & dilecti. . . Modestiam quæ (k) nota sit omnibus hominibus, Dominus enim propè est. Hæc ad omnes fideles scribit Apostolus: Quantò magis virum Ecclesiasticum decent qui (l) in omnibus seipsum præbere debet exemplum bonorum operum, in doctrina, in integritate, in gravitate (m) ut is qui ex adverso est vereatur nihil habens malum dicere de illo, (n) & obmutescere faciat imprudentium hominum ignorantiam. (o) Sacerdotalis enim animi pulchritudinem undiquè splendescere oportet, ut oblec-

(h) *Isaia* 26. (i) *Coloss.* 3. (k) *Philip.* 4.

(l) *Tit.* 2. (m) *Ibid.* (n) *1. Pet.* 2.

(o) *S. Chrys.* l. 3. de sacerdot. c. 14.

rare pariter & illustrare possit eorum animos, qui suos in eum oculos convertunt.

(p) Decet enim Pastorem, decet Dominicum Sacerdotem moribus & vita clarescere, quatenus in eo tanquam in vitæ suæ speculo plebs commissa, & eligere quod sequatur, & videre possit quod corrigat.

(q) Decet, inquam, actuum nostrorum testem esse publicam æstimationem & attestationem, ne derogetur muneri: ut qui videt Ministrum Altaris congruis ornatum virtutibus, auctorem prædicet, & Dominum veneretur qui tales servulos habeat. [r] In te, nimirum, oculi omnium diriguntur. Domus tua & conversatio, quasi in specula constituta, magistra est publicæ disciplinæ. Quidquid feceris id sibi omnes faciendum putant: cave ne committas quod, aut qui reprehendere volunt, digne lacerasse videantur, aut qui imitari, cogantur delinquere [s] Quod si dixeris, & mihi sufficit conscientia mea, habeo Dominum iudicem qui meæ vitæ est testis: non curo quid loquantur homines. Audi Apostolum scribentem: providentes bona, non solum coram Deo, sed etiam coram hominibus.

- (p) *S. Greg. in Reg. lib. 7. Indict. 1. Ep.*
32. (q) *S. Ambr. lib. 1. Offic. ultim.*
(r) *S. Hieron. Ep. 3. ad Heliôd.*
(s) *S. Hieron. Ep. 47.*

In exterioris hominis compositione immodestia vitanda.

EX [a] visu cognoscitur vir, & ab occurſu faciei cognoscitur ſenſatus. Amictus corporis, & riſus dentium, & ingreſſus hominis enuntiant de illo. [b] Ipſa etenim corporis ſpecies, ſimulachrum eſt mentis figura probitatis. Bona quippè domus in ipſo veſtibulo debet agnoſci. [c] Quapropter Clerici in habitu, geſtu, inceſſu, ſermone, & omni alia eorum actione nil niſi grave, moderatum & religione plenum præſeferant.

[d] Sic Sacerdotalem vultum gravitas matura componat, ne rigorem nimium intuentium infirmitas perhorreſcat: ſic alios hilaritatis noſtræ dulcedo permulceat, ut ſerenitas noſtra ſeſe in petulantiam, vel laſciviam non reſolvat. [e] Oculis Chriſtum ſpectaturis, nihil aliud digneris aſpicere [f] ne igitur multum circumſpicias in plateis, ne fortè videas undè tenteris poſtmodum, vel ab oratione impediaris, vel phantaſias contrahas eorum quæ intentè reſpexiſti.

[g] Sit præterea inceſſus tuus maturitate

[a] *Eccli.* 19. [b] *S. Ambr.* l. 2. *de Virg.*

[c] *Conc. Trid. ſeſſ.* 22. c. 1.

[d] *Pet. Dam.* l. 2. *Ep.* 1.

[e] *S. Hier. de s. Joann. Bapt. loquens,*

[f] *S. Bonav. de Inſt.* c. 31.

atione immo-

icitur vir, & ab u-
citur sensatus. Am-
dentium, & ingre-
e illo. [b] Ipsa etiam
mulachrum est mem-
na quippè domus in-
gnosci. [c] Quapropter
gestu, incessu, sermone,
actione nil nisi grave, a-
gione plenum præferat
cerdotalem vultum grave-
nat, ne rigorem nimium e-
mitas perhorrescat: sic au-
ostræ dulcedo permulceat
nostra sese in petulantiam
m non resolvat. [e] Oculi
spectaturis, nihil aliud dignum
f] ne igitur multum circum-
ateis, ne fortè videas undè tem-
nodum, vel ab oratione impedi-
phantasias contrahas eorum
respexisti.

Sit præterea incessus tuus maturus

Eccli. 19. [b] S. Ambr. l. 2. de Virg.
Conc. Trid. sess. 22. c. 1.
Pet. Dam. l. 2. Ep. 1.
S. Hier. de s. Joann. Bapt. loquens
S. Bonav. de Inst. c. 31.

plenus,
fractis g-
trorsum
erecta
seu eti
quæ o-
elation
Nonnu-
tas hu-
summa
magis
[i]
mentis
seu me-
oscitati
inhon-
Honest-
membra
istud Sa-
Julianus
significa-
non sta-
librium
vagus,
ac titub-
temptu-
cula ide-
effræne

[g] S

[h] S

(i)

(k)

244 *Speculum Sacerdotum*

mo hærens, spiritusque concisus, interrogationes stultæ & præcipites, responsiones nihilo his meliores, aliæ in alias insultantes, nec graves & constantes, nec eruditionis ordine progredientes... ut hæc confexi statim his verbis usus sum: Quale Romanorum Regio malum alit!

X V.

Lingua refrænanda.

S Is velox [a] ad audiendum, & tardus ad loquendum, [b] quia in multiloquio non deerit peccatum. [c] Si quis autem putat se religiosum esse, non refrænans linguam suam, sed seducens cor suum, hujus vana est religio. [d] Si quis vero in verbo non offendit, hic perfectus est vir: potest etiam fræno circumducere totum corpus.... Lingua modicum membrum est, & magna exaltat. Ecce quantus ignis quam magnam sylvam incendit; & lingua ignis est universitas iniquitatis. Lingua constituitur in membris nostris, quæ maculat totum corpus, & inflammat rotam civitatis nostræ inflammata à gehenna.... Linguam nullus hominum domare potest: inquietum malum, plena veneno mortifero. In ipsa benedicimus Deum & maledicimus

(a) *Jacob. 1.* (b) *Prov. 10.* (c) *Jacob 1.*
(d) *Ibid. c. 3.*

cimus homines qui ad similitudinem Dei facti sunt.

(e) Si mordeat serpens in silentio, nihil eo minus habet qui occultè detrahit: verba oris sapientis gratia, & labia insipientis præcipitabunt eum: initium verborum ejus stultitia, & novissimum oris illius error pessimus. Stultus verba multiplicat. [f] Plenus sum sermonibus, (ait unus ex illis,) & coarctat me spiritus uteri mei: en venter meus quasi mustum absque spiraculo quod lagunculas novas dirumpit: loquar & respirabo paululùm. [g] Terribilis est in civitate sua homo linguosus, & temerarius in verbo suo odibilis erit.

[h] Nec nominetur in vobis sicut decet sanctos, aut turpitudine, aut stultiloquium, aut scurrilitas quæ ad rem non pertinet.

[i] Labia Sacerdotis custodiunt scientiam, & legem requirunt de ore ejus: non nugæ profecto vel fabulas. Verbum scurrile, quod faceri urbanivè nomine colorant, non sufficit peregrinari ab ore procul & ab aure relegandum, sædè ad cachinnos moveris sædius moves. [k] Magna utique mala habitant in anima quæ verba usurpat urbana & faceta, magna effusæ lætitiæ dissolutio, & ironia ac simulatio; hiat compago;

(e) *Eccles.* 10. (f) *Job.* 32. (g) *Eccli.* 9.

(h) *Eph.* 3. (i) *S. Ber. l. 2. de conf. c. 13.*

(k) *S. Chris. in Ep. ad Eph. c. 5.*

marcescit & putrescit ædificium ; exterminatur timor ; abest pietas ac reverentia : habes linguam , non ut comicis dictis incessas , sed ut Deo gratias agas.

X V I.

De Habitu & Tonsurâ Clericali.

ET si [1] habitus non facit monachum ; oportet tamen Clericos vestes proprio congruentes ordini semper deferre ; ut per decentiam habitus extrinseci , morum honestatem intrinsecam ostendant ; tanta autem hodiè aliquorum inolevit temeritas , religionisque contemptus , ut propriam dignitatem & honorem clericalem parvi pendentes , vestes etiam deferant publicè laicales , pedes in diversis ponentes , unum in divinis , alterum in carnalibus. Propterea omnes Ecclesiasticæ personæ , quantumcumque exemptæ , quæ aut in sacris fuerint , aut dignitates , personatus , officia , aut beneficia qualiacumque ecclesiastica obtinuerint , si postquam ab Episcopo suo , etiam per edictum publicum , moniti fuerint , honestum habitum Clericalem illorum ordini & dignitati congruentem & juxta ipsius Episcopi ordinationem & mandatum non derulerint , per suspensionem ab Ordinibus ac officio & beneficio , ac fructibus , redditibus , & proventibus ipsorum beneficio-

(1) *Conc. Trid. sess. 14. de ref. c. 6.*

rum, nec-non si semel correpti denuò in hoc deliquerint, etiam per privationem officiorum & beneficiorum hujusmodi coerceri possint & debeant, secundum Constitutionem Clement. V. in Conc. Vienn. editam, quæ incipit, *quoniam innovando*.

Solent (m) dicere: num de vestibus cura est Deo, & non magis de moribus? At forma hæc vestium, deformitatis mentium, & morum indicium est. Quid sibi vult quod Clerici aliud esse, aliud videri volunt? Id quidem minus castum, minusque sincerum. Nempè habitu milites, quæstu Clericos, actu neutrum exhibent. Nam neque pugnant ut milites, neque ut Clerici evangelisant. Cujus ordinis sunt? cum utriusque esse cupiunt, utrumque deserunt, utrumque confundunt.... Vereor istos non alibi ordinandos, quam ubi nullus ordo, sed sempiternus horror inhabitat.

Quisquis (n) vero Clericus ad sortem Domini vocatus comam nutrit, & capillos radere vel tondere erubescit; profectò se non de Dei, sed de mundi sorte esse testatur; quantò enim quisque carnis crines diligit, fovet & nutrit; tantò cor suum non in cælis, sed in terra fixum esse ostendit; quantò autem radit & edomat, tantò se non terrena, sed æterna diligere com-

(m) S. Bern. L. 3. de cons. c. 5.

(n) Auth. L. de Contemp. mundi c. 3. inter Opera s. Aug. Tom. 9.

248 *Speculum Sacerdotum*

probat. Unde statuit Conc. Trid. (o) ut is etiam fori privilegio non gaudeat, qui clericalementem habitum & tonsuram non desert.

X V I I.

Derisiones malorum virtus superet.

Deridetur (p) Iusti simplicitas. [q] Ambulans recto itinere & timens Deum despicitur ab eo qui infami graditur viâ. [r] Etenim detestantur stulti eos qui fugiunt mala. [s] Venite, inquiunt, circumveniamus Iustum, quoniam inutilis est nobis, & contrarius est operibus nostris, & impropere nobis peccata legis, & diffamat in nos peccata disciplinæ nostræ. (t) Omnes igitur qui piè volunt vivere in Christo Jesu persecutionem patientur.

(u) Illo ergo spiritu vive, quo dictum est; vidi insensatos & tabescebam. Pia est ista tristitia, &, si dici potest, beata miseria, vitiis alienis tribulari, non implicari; moerere, non hærere: dolore contrahi, non amore attrahi. Hæc est persecutio quam patiuntur omnes qui volunt in Christo piè vivere, secundum apostolicam mordacem veracemque sententiam. Quid enim hic magis persequitur vitam bonorum, quam

(o) *Sess. 23 de Refor. c. 6.* (p) *Job. 12.*

(q) *Prov. 14.* (r) *Ibid. 13.* (s) *Sap. 2.*

(t) *2. Tim. 3.* (u) *S. Aug. Ep. 248.*

vita iniquorum, non cum cogit imitari, sed cum cogit dolere quod videt? quoniam coram pio vivens impiè, etsi non obligat consentientem, cruciat sentientem... Sed inhære illi à quo audisti, qui perseveraverit usque in finem hic salvus erit. Conjungere Deo ut crescat in novissimis vita tua. Scio enim non deesse recreationem cordis de fratribus bonis. Huic adjuuge promissiones Dei fideles, magnas, certas, sempiternas, ipsiusque tolerantiae imperturbabilem ineffabilemque mercedem, & vide quam verum Domino cantes, secundum multitudinem dolorum meorum in corde meo, consolationes tuæ lætificaverunt animam meam.

X V I I I.

De Castitate custodienda.

T Eipsum [a] castum custodi. [b] Et omni custodia serva cor tuum. [c] Hæc est enim voluntas Dei sanctificatio vestra; ut abstineatis vos à fornicatione; ut sciat unusquisque vestrum vas suum possidere in sanctificatione & honore, non in passione desiderii, sicut & Gentes quæ ignorant Deum. [d] An nescitis quia Templum Dei estis, & spiritus Dei habitat in vobis? Si quis autem Templum Dei violaverit, dis-

(a) 1. Tim. 5. (b) Prov. 4.

(c) 1. Thess. 4. (d) 1. Cor. 3.

250 *Speculum Sacerdotum*

perdet illum Deus. Templum enim Dei sanctum est, quod estis vos. [e] Glorificate & portate Deum in corpore vestro.

Omnibus (f) igitur Castitas pernecessaria est, sed maximè ministris Christi altaris quorum vita aliorum debet esse eruditio, & assidua salutis prædicatio. Tales enim decet Dominum habere ministros, qui nullâ contagione carnis, sed potius continentia Castitatis splendeant. (g) Sit itaque in ipsis Castitas propria, &, ut ita dixerim, pudicitia Sacerdotalis, ut non solum ab opere se immundo abstineant, sed etiam à jactu oculi, & cogitationis errore, mens Christi corpus confectura sit libera.

Quid (h) nimirum Castitate decorius, Quid ministerio nostro magis honorificum? Ipsa mundum de immundo conceptum femine, de hoste domesticum, Angelum denique de homine facit. Differunt quidem inter se homo pudicus & Angelus, sed felicitate non virtute. Sed etsi illius Castitas felicior, hujus tamen fortior esse cognoscitur. Sola est Castitas, quæ in hoc mortalitatis & loco & tempore statum quemdam immortalis gloriæ repræsentat. . . . Vas interim fragile quod portamus, in quo & crebro periclitamur, tenet Castitas, ut monet Apostolus, in sanctificationem & honorem, & instar

(e) I. Cor. 6. (f) S. Aug. Ser. 249. de temp. (g) S. Hier. in cap. 1. Ep. ad Tit.

(h) S. Bern. Ep. 42. ad Henr. Senon. c. 3.

odoriferi balsami, quo condita cadavera incorrupta servantur, sensus ipsa & artus constringit & continet, ne dissolvantur otis, ne corrumpantur desideris, ne carnis voluptatibus computrescant: Quemadmodum legitur de quibusdam (Joel 1.) quia computruerunt ut jumenta in stercore suo. Hoc itaque tantæ pulchritudinis ornamentum dignè dixerim sacerdotium honorare, quod dilectum Deo & hominibus faciat Sacerdotem, cujus quippe memoria non in carnis successione, sed in spirituali benedictione sit, reddatque similem in gloria Sanctorum, in hac licet adhuc regione dissimilitudinis constitutum.

X I X.

Cavenda cum Mulieribus familiaritas.

IN medio (i) mulierum noli commorari: de vestimentis enim procedit tinea, & à muliere iniquitas viri. Melior est enim iniquitas viri quam mulier benefaciens & confundens in opprobrium. (k) Averte faciem tuam à muliere comprâ, & ne circumpicias speciem alienam. . . . speciem mulieris multi admirati, reprobi facti sunt: colloquium enim illius quasi ignis exardescit. Virginem ne conspicias, ne forte scandaliseris in decore illius; (l) seu ne forte in-

(i) Eccli 42. (k) Eccli. 9.

(l) S. Bas. de Abdicat. sæculi.

terim, dum tu illius os defixis oculis intueris, suscepto ab hoste & malorum satore libidinis semine, corruptionis postea ac perditionis manipulos metas. (m) Numquid etenim potest homo abscondere ignem in sinu suo ut vestimenta illius non ardeant? aut ambulare super prunas, ut non comburantur plantæ ejus?

(n) Cum proximat stipula, incendit ignem; flammigero igne percutit femina conscientiam pariter habitantis, exuritque fundamenta montium.

(o) Quid tibi necesse est in ea versari domo, in qua necesse habeas quotidie aut perire aut vincere? Securius est perire non posse, quam juxta periculum non periisse. (p) Hospitiolum tuum aut raro, aut nunquam mulierum pedes terant. Omnes puellas & virgines Christi, aut æqualiter ignora, aut æqualiter dilige. Memento semper, quod Paradisi colonum de possessione sua mulier ejecerit. Ægrotanti tibi quilibet sanctus frater assistat, & germana vel mater, aut probatæ quælibet apud omnes fidei... Scio quosdam convaluisse corpore, & animo ægrotare cœpisse: periculose tibi ministrat cujus vultum frequenter attendis... Solus cum sola, secreto, & absque arbitro vel teste non sedeas.

(m) *Prov.* 27 (n) *S. Hier. Ep. ad Ocean.*

(o) *S. Hier. l. 2. Ep. 9. de vitand. susp. contuber.* (p) *S. Hier. Epl. ad Nepot.*

Caveto omnes suspiciones, & quidquid probabiliter fingi potest, ne fingatur antè devota. Crebra munuscula, & sudariola, & fasciolas, & oblatos ac degustatos cibos, blandasque ac dulces litterulas sanctus amor non habet... omnes delicias, & lepores, & risu dignas urbanitates, & cæteras ineptias amatorum, in comædiis erubescimus, in sæculi hominibus detestamur: quanto magis in Clericis, quorum & Sacerdotium proposito, & propositum ornatur Sacerdotio? [q] Quid tibi revera cum feminis, qui ad altare cum Domino fabularis? Te cuncti in publico, te in agro rustici, aratores ac vinitores quotidie lacerabunt.

[r] Neque etiam in præterita castitate confidas. Nec sanctior David, nec Samson fortior, nec Salomone potes esse sapientior. [s] Crede mihi, Episcopus sum, veritatem loquor in Christo, non mentior: cedros Libani, & gregum arietes sub hac specie corruisse vidi, de quorum casu non magis præsumebam, quam Gregorii Nazian. aut Ambrosii. [t] Tua ergo cum mulieribus colloquia vel nulla sint, vel rarissima & brevissima.

(q) *Idem Ep. ad Ocean.*

(r) *Idem Ep. ad Nepot.*

(s) *S. Aug. apud s. Bonav. Reg. Nov. c. 11.*

(t) *S. Basil. const. c. 3. & 4.*

Observanda sobrietas, convivia declinanda.

Sobrius [a] esto: & [b] noli esse in conviviis potatorum, nec in commensationibus eorum qui carnes ad vescendum conferunt, quia vacantes potibus consumuntur. Cui vae? Cujus patri vae? Cui rixae? Cui foveae? Cui sine causa vulnera? Cui suffusio oculorum? Nonne his, qui commorantur in vino, & student calicibus epotandis? Ne intuearis vinum quando flavescit, cum splenduerit in vitro color ejus; ingreditur blandè, sed in novissimo mordebit ut coluber, & sicut regulus venena diffundet. [c] Vae qui potentes estis ad bibendum vinum, & viri fortes ad miscendam ebrietatem. [d] Non sit igitur vinolentus Sacerdos, sed sic bibat, ut ignoretur an biberit. [e] An non confusio & ignominia est, Jesum Crucifixum magistrum pauperum atque esurientem, fartis prædicare corporibus, jejuniorumque doctrinam rubentes buccas tumentiaque ora proferre?

[f] Vinolentos Sacerdotes & Apostolus damnat, & vetus lex prohibet: qui altario

(a.) 1. *Timot.* 4. (b) *Prov.* 23. (c) *Isai.* 5.

(d) S. *Ans.* in cap. 1. ad *Timoth.*

(e) S. *Hier.* in cap. 2. *Mich.*

(f) *Idem Ep.* ad *Nepot.*

deserviunt, vinum & ficeram non bibant... Nec hoc dico, quod Dei à nobis creatura damnetur: si quidem & Dominus vini potator est appellatus, & Timotheo dolenti stomachum, modica vini sorbitio relaxata est; sed modum pro ætatis, & valetudinis, & corporum qualitate exigimus in potando: quod si absque vino ardeo adolescentia, & inflammor calore sanguinis, & succulento validoque sum corpore: libenter carebo poculo, in quo suspicio veneni est. (g) Ebrietas in alio crimen est, in Sacerdote sacrilegium; quia alter animam suam necat, vino Sacerdos spiritum sanctitatis extinguat.

(h) Convivia tibi vitanda sunt sæcularium & maxime eorum qui honoribus tument... Consolutores potius nos in mœroribus suis quam convivas in prosperis noverint. Facile contemnitur Clericus qui sæpè vocatus ad prandium non recusat. Numquam petentes, raro accipiamus rogati: beatius enim est, magis dare, quam accipere: nescio enim quomodo etiam ipse qui deprecatur ut tribuat, cum acceperis, viliorẽ te judicat; & mirum in modum, si eum rogantem contempseris, plus te posterius veneratur.

[g] S. Petr. Chrys. *serm.* 25. *de Fideb. dissens.*

(h) S. Hier. *Ep. ad Nepot.*

Otium fugiendum.

Qui (a) sectatur otium stultissimus est (b) multam enim malitiam docuit otiositas; (c) tu vero vigila in omnibus labora, opus fac Evangelistæ, ministerium tuum imple. (d) Labora sicut bonus miles Christi-Jesu... nam & qui certat in agone non coronabitur nisi legitimè certaverit. Sollicitè cura teipsum probabilem exhibere Deo operarium inconfusibilem: ne istud Evangelii in te impleatur, (e) inutilem servum ejicite in tenebras exteriores ibi erit fletus & stridor dentium.

[f] Dicas enim velim: si famulum haberes, qui etsi nec furaretur, nec conviciaretur, nec contradiceret, imò nec inebriaretur, nec reliquorum malorum quicquam designaret; federet tamen perpetuò otiosus, nec aliquid eorum quæ servus hero præstare debet faceret, nonne flagellares eum ut perversum?

[g] Videtur & sanctus David cauterio gravi inurere quosdam Clericos, in labore, inquit, hominum non sunt, & cum hominibus non flagellabuntur: ideò tenuit eos

(a) *Prov.* 12. (b) *Eccli* 33. (c) 2. *Tim.* 4.

(d) 2 *Tim.* 2. (e) *Matth.* 25.

(f) *S. Chrysoft. Hom.* 16. in *Ep. ad Eph.*

(g) *S. Bern. de vit. & mer. Cleric.* c. 4.

superbia. Habent enim singula quæque genera hominum laboris aliquid, aliquid voluptatis. Sed advertere est prudentiam aliquorum (Clericorum,) & mirari quemadmodum novo inter hæc artificio discernentes, & ab invicem sequestrantes ea, totum quod delectat eligunt & amplectuntur; quod molestum est fugiunt & declinant... Cum coeperint resurgere homines unusquisque in ordine suo, ubi putas generatio ista locabitur? Si ad milites forte diverterint, exsufflabunt eos, quod minimè secum labores aut pericula tolerarint. Sic agricolæ, sic negotiatores, & singuli quique ordines hominum, à suis eos similiter arcebunt finibus, ut pote qui in hominum labore non fuerint. Quid igitur restat, nisi ut quos omnis ordo repellit pariter & accusat: eum fortiantur locum ubi nullus ordo, sed sempiternus horror inhabitat.

X X I I.

Præpositis suis obtemperandum.

NUmquid (h) vult Dominus holocausta & victimas, & non potius ut obediat voci Domini? Melior est enim obedientia quam victimæ, & auscultare magis quam offerre adipem arietum. Quoniam quasi peccatum ariolandi est repugnare, & quasi scelus idololatriæ nolle acquiescere (i) vir

(h) L. 1. Reg. 15. (i) Prov. 21.

258 *Speculum Sacerdotum*

autem obediens loquetur victorias. (k) Obedite igitur præpositis vestris & subjacete eis. Ipsi enim pervigilant quasi rationem pro animabus vestris reddituri, ut cum gaudio hoc faciant, & non gementes, hoc enim non expedit vobis.

(l) Nempè cum in præpositis delinquimus, ejus ordinationi, qui eos nobis prætulit obviamus. Unde Moyſes dum contra ſe & Aaron conqueri populum cognoviſſet, ait: Nos enim quid ſumus? nec contra nos eſt murmur veſtrum ſed contra Deum. (m) Omnes, idcirco, Epiſcopum ſequimini ut Chriſtus Patrem, (n) & quaſi animæ parentem ſuſcipite, ipſi ſubjecti tanquàm capiti membra deſerviant, & ejus præcepta, velut imperium Dei ſummopere cuſtodiant. (o) Namque Jeſus Nave filius perfecta ſua obedientia tantum donum promeruit ut Moyſis ſucceſſor fieret. Et Samuel per obedientiam quam Heli Sacerdoti præſtitit, dignus habitus eſt qui vocem Dei audiret. Eliſæus verò hujus adminiculo, pallium & gratiam ſui accepit Magiſtri.

(p) Imò ut ſecurè præeſſe poſſitis, ſub-eſſe & vos cui debetis non dedignemini.

(k) *Hebr. 13.* (l) *S. Greg. Regis L. 12. Indict. 7. Ep. 32.*

(m) *S. Ign. Ep. 1. ad Smirn.* (n) *S. Hier. Ep. ad Nep.* (o) *S. Proſp. Pref. l. 2. de vita Aſt. Sac.*

(p) *S. Bern. Ep. 42. ad Henr. Sen. Ep. 6. 8.*

Dedignatio quippe subjectionis, prælationis reddit indignum. Sapientis est consilium: quanto major es, tanto humilia te in omnibus. Sapientiæ verò præceptum: Qui major est vestrum, fiat sicut junior. Quod si expedit etiam minoribus esse subiectum, majorum jugum quomodo licebit contemnere? Videant in vobis potius subditi quod vobis redhibeant. Intelligitis quæ dico? Cui honorem, honorem. Omnis anima, inquit. Apostolus, potestatibus sublimioribus subdita sit. Si omnis, & vestra. Quis vos excipit ab universitate? Si quis tentat excipere, conatur decipere.

(9) Alioquin quomodo illud implebitur: principem te constituerunt; esto inter illos tanquam unus ex illis? Quomodo tanquam unus ex illis, manens inter humiles superbus, inter subditos rebellis? Ut te putemus tanquam unum ex illis, videamus tam exhibere paratum quàm exigere obedientiam: videamus tam libenter præpositis obtemperare subiectum, quam imperare subiectis. Quod si semper vis obedientes habere & nunquam esse, probas te non esse tanquam unum ex illis, dum unus esse renuis ex obedientibus.

(9) *Idem ibid. c. 9:*



X X I I I.

Quanta esse debeat Sacerdotis Humilitas.

QUANTO (a) major es, humilia te in omnibus, & coram Deo invenies gratiam; quoniam magna potentia Dei solius, & ab humilibus honoratur. (b) Rectorem te posuerunt, noli extolli; esto in illis quasi unus ex ipsis. (c) Qui major est in vobis, fiat sicut minor; & qui præcessor est sicut ministrator. (d) Nam filius hominis non venit ministrari sed ministrare & dare animam suam redemptionem pro multis. (e) Vos, inquit, vocatis me Magister & Domine: & benè dicitis; sum etenim. Si ergo ego lavi pedes vestros, Dominus & Magister: & vos debetis alter alterius lavare pedes: exemplum enim dedi vobis, ut quemadmodum ego feci vobis, ita & vos faciatis. Amen, amen dico vobis; non est servus major Domino suo, neque Apostolus major est eo qui misit illum. (f) Et rursùm, scitis quia principes Gentium dominantur eorum: & qui majores sunt potestatem exercent in eos. Non ita erit inter vos: sed quicumque voluerit inter vos major fieri, sit vester minister: & qui voluerit inter vos primus esse, erit vester servus.

(g) Forma igitur Apostolica hæc est: do-

(a) *Eccli.* 3. (b) *Eccli.* 32. (c) *Luc.* 22.

(d) *Mat.* 20. (e) *Joan.* 13. (f) *Mat.* 20.

(g) *S. Ber. de cons.* L. 2. c. 6.

minatio interdicitur, indicitur ministratio: quæ & commendatur ipsius exemplo legislatoris, qui adjungit ego autem in medio vestrum sum tanquam qui ministrat. Quis se jam titulo hoc inglorium putat, quo se prior Dominus gloriæ præsignavit? Merito Paulus gloriatur in eo, dicens; Ministri Christi sunt, & ego. Et addit: ut minus sapiens dico, plus ego, in laboribus plurimis, in carceribus abundantius, in plagis supra modum, in mortibus frequenter. O præclarum ministerium, quo non id gloriosius principatu? Si gloriari oportet, forma tibi sanctorum præfigitur. Parva nè tibi illa videtur? Quis mihi tribuat similem fieri in gloria Sanctorum? Mihi absit gloriari nisi in cruce Domini nostri Jesu Christi. (h) Bonus profectò fundus humilitas, in qua omne ædificium spirituale constructum crescit in Templum sanctum in Domino: per hanc nonnulli possedere etiam portas inimicorum. Quæ enim virtutum æquè potest dæmonum debellare superbiam, & tyrannidem hominum? Unde Apostolus ait: (i) videte vocationem vestram fratres, quia non multi sapientes secundum carnem, non multi potentes, non multi nobiles; sed quæ stulta sunt mundi elegit Deus, ut confundat sapientes; & infirma mundi elegit Deus, ut confundat for-

(h) *Idem ibid.* (i) *1. Corint 1.*

262 *Speculum Sacerdotum*

tia : & ignobilia mundi , & contemptibilia elegit Deus , & ea quæ non sunt , ut ea quæ sunt destrueret ; ut non gloriaretur omnis caro in conspectu ejus.

X X I V.

Mundus odio habendus.

DE (k) mundo non estis sed ego ele-
gi vos de mundo propterea odit vos
mundus; (l) nolite ergo diligere mundum,
neque ea quæ in mundo sunt. Si quis di-
ligit mundum non est Charitas Patris in
eo: quoniam omne quod est in mundo,
concupiscentia carnis est, & concupiscen-
tia oculorum, & superbia vitæ, quæ
non est ex Patre; sed ex mundo est. Et
mundus transit & concupiscentia ejus. (m)
Nescitis quia amicitia hujus mundi, inimica
est Dei? Quicumque ergo voluerit amicus
esse sæculi hujus, inimicus Dei constitui-
tur. Unde ait Apostolus (n) mihi mundus
crucifixus est & ego mundo.

(o) Verum tu Sacerdos Dei altissimi cui
ex his placere gestis: mundo an Deo? Si
mundo, cur Sacerdos? Si Deo, cur qualis
populus, talis & Sacerdos? Nam si place-
re vis mundo, quid tibi prodest Sacerdo-
tium? Nec enim potes duobus Dominis ser-

(k) Joan. 15. (l) 1. Joan. 2. (m) Jacob. 4.

(n) Galat. 6. (o) S. Hier. Ep. 42. ad
Henr. Sen. c. 2.

vire. . . . Deus inquit Propheta, dissipabit ossa eorum qui hominibus placent, confusi sunt quoniam Deus sprexit eos. Et Apostolus; si hominibus placerem Christi servus non essem. Volens itaque hominibus placere, Deo non places; si non places, non placas.

(p) Qui mundum diligit, & Dei constitutus est inimicus. Suscipiat autem qui ejusmodi est, reconciliationis officium? Num mediatoris, qui etiam proditoris scelere inimicitias cumulavit? Ut meritò jam non ut hostis, sed ut traditor judicetur, ut Judas utique non ut Saulus. . . . Quid enim? horum sibi conscius homo, tanquam qui justitiam fecerit, divino sese vultui sistere non veretur, tanquam domesticus intrat & exit, magistrum salutatur, genua flectit, osculatur ore sacrilego, dolose agit: sed in conspectu Dei: ut inveniatur iniquitas ejus ad odium.

X X V.

Divitiæ contemnendæ.

CAvete (a) ab omni avaritia (b) quæ est idolorum servitus. (c) Nam qui volunt divites fieri, incidunt in tentationem, & in laqueum diaboli, & desideria multa inutilia, & nociva, quæ mergunt homines in interitum & perditionem, radix enim omnium malorum est cupiditas, quam

(p) *Idem Declam. c. 8.* (a) *Luc. 13.*

(b) *Eph. 3.* (c) *1. Tim. 6.*

264 *Speculum Sacerdotum*

quidam appetentes , erraverunt à fide , & inferuerunt se doloribus multis: Tu autem, ô homo Dei, hæc fuge , sectare verò justitiam , pietatem.

Quænam sub sole major vanitas ? (d) Unus est , & secundum non habet , non filium , non fratrem , & tamen laborare non cessat , nec satiantur oculi ejus divitiis : nec recogitat , dicens: cui laboro , & fraudo animam meam bonis ? In hoc quoque vanitas est , & afflictio pessima. Audi igitur quis horum sit fructus. (e) Agite nunc divites , plorate ululantes in miseriis vestris quæ advenient vobis. Divitiæ vestræ putrefactæ sunt ; & vestimenta vestra à tineis comesta sunt. Aurum & argentum vestrum æruginavit : & ærugo eorum in testimonium vobis erit , & manducabit carnes vestras sicut ignis. Thesaurifastis vobis iram in novissimis diebus. (f) Divitias quas devoravit evomet , & de ventre ejus extrahet eas Deus.

(g) Obsecro itaque te , & repetens , iterum iterumque monebo , ne officium clericatus genus antiquæ militiæ putes , id est , ne lucra sæculi in Christi quæras militia : ne plus habeas quam quando Clericus esse cœpisti . . . nonnulli enim sunt Clerici qui possident opes sub Christo paupere , quas

(d) *Eccel.* 4. (e) *Jacob* 5. [f] *Job.* 20.

(g) *S. Hieron. Ep.* 2. *ad Nepot.*

sub locuplete & fallaci diabolo non habuerant. (h) Quid enim; funes ceciderunt tibi in præclaris, & tu opibus inhias terrenis? Si vis habere simul hæc & illa: breviter tibi respondebitur: memento fili, quia recepisti bona in vita tua. Recepisti, dixit, non rapuisti: nec etiam tibi frustra blandiaris, quod tuis contentus aliena non rapias. . . . Quidquid præter necessarium victum, ac simplicem vestitum de altario retines, tuum non est, rapina est, sacrilegium est.

X X V I.

Honores metuendi.

NOli (i) quærere à Domino ducatum, neque à Rege Cathedram honoris. (k) Quoniam judicium durissimum his qui præsumunt fiet: exiguo enim conceditur misericordia, potentes autem potenter tormenta patientur. Non enim subtrahet personam cujusquam Deus, nec verebitur magnitudinem cujusquam: quoniam pusillum & magnum ipse fecit, & æqualiter cura est illi de omnibus: fortioribus autem fortior instat cruciatio.

(l) Considero gradum, & casum vereor. Considero fastigium dignitatis; & intueor faciem abyssi jacentis deorsum. Attendo

[h] *S. Bern. Epist. 2. ad Fulconem.*

[i] *Ecclesi. 7.* [k] *Sap. 6.* (l) *S. Bern. Ep. 238. ad Eug.*

266 *Speculum Sacerdotum*

Celsitudinem honoris, & è vicino periculum reformido; pro eo quod scriptum est: homo cum in honore esset non intellexit: . . . ac si diceretur: honor absorbuit intellectum. . . . Itaque ascendisti in altum; noli altum sapere, sed time: ne forte contingat serò miserabilem illam emittere vocem, à facie iræ & indignationis tuæ elevans allisisti me. Altiolem quippè locum sortitus es, sed non tutiorem; sublimiorem, non securiorem. Terribilis prorsus, terribilis est locus iste: locus, inquam, in quo stas, terra sancta est.

(*m*) Si igitur ii qui necessitate trahuntur, non habent quò fugiant & quò se excusent, si rem malè administrent & sint negligentes. . . . Quanto magis ii, qui in hoc studium suum ponunt, & in illud irruunt? Qui est autem talis, longè magis se omni privabit venià. (*n*) Sed & hoc prætereundum non est, quia sicut is, qui regiminis apicem invitùs assequitur; si quid illic asperum, si quid patiatur adversum, ad cumulum sibi provenit meritorum, & pro tribulatione quam tolerat, non incassum exultationis æternæ præmium sperat. Sic ille qui ultroneus ambit vel importunus ingeritur, vix pro adversitate quam in regimine patitur, præmium consequetur. . . .

[*m*] *S. Chrys. Hom. in Ep. 34. ad Heb.*

[*n*] *S. Pet. Dam. Opusc. 22. contra Cler. Aulicos.*

Domino de talibus attestante : quia receperunt mercedem suam.

X X V I I.

*Inordinatus erga propinquos affectus
refecandus.*

N Olite (o) arbitrari, inquit Christus, quia pacem venerim mittere in terram: non veni pacem mittere sed gladium; veni enim separare hominem adversus patrem suum, & filiam adversus matrem suam, & nurum adversus socrum suam; & inimici hominis domestici ejus. Qui amat patrem aut matrem plus quam me, non est me dignus. (p) Nemo mittens manum ad aratrum & respiciens retrò aptus est regno Dei. [q] Sequere me, & dimitte mortuos sepelire mortuos suos.

(r) Quid facis in paterna domo, delicate miles? Ubi vallum? Ubi fossa? Ubi hiems aëta sub pellibus? ecce de coelo tuba canit: ecce cum nubibus, debellaturus orbem, Imperator armatus ingreditur: ecce bis acutus gladius, ex Regis ore procedens, obvia quæque metit: & tu mihi de cubiculo ad aciem, tu de umbra egrederis ad solem? Corpus assuetum tunicis, loricae onus non fert. Caput opertum linteo galeam recusat. Recordare tyrocinii tui

[o] Matt. 10. [p] Luc 9 [q] Matt. 8.

(r) S. Hier. Ep. 1. ad Heliod.

diem, quo Christo in baptismo consepultus, in Sacramenti verba jurasti, pro nomine ejus non te patri parciturum esse non matri. Ecce adversarius, in pectore tuo, Christum conatur occidere; ecce donativum, quod militaturus acceperas, hostilia castra suspirant. Licet parvulus ex collo pendeat nepos: licet sparso crine, & scissis vestibus, ubera, quibus te nutrierat, mater ostendat: licet in limine pater jaceat: percalcaturum perge patrem: ficcis oculis ad vexillum crucis evola. Solum pietatis genus est, in hac re esse crudelem..... Gladium tenet hostis ut me perimat: & ego de matris lacrymis cogitabo? Propter patrem militiam Christi deferam, cui sepulturam Christi causa non debeo, quam etiam omnibus ejus causa debeo? Domino passuro timidè Petrus consulens scandalum fuit, Paulus retinentibus se fratribus ne Jerosolymam pergeret respondit. Quid facitis plorantes & conturbantes cor meum? Ego enim non solum ligari sed & mori in Jerusalem paratus sum, &c.

X X V I I I.

Quorum devitanda consuetudo.

Substrahe [a] te ab omni fratre ambulante inordinatè. [b] Neque cum his qui in levitate ambulant participem te præbeas

[a] 2. *Thess.* 3 [b] *Tob.* 3.

beas [c] multum enim proficiunt ad impietatem, & sermo eorum ut cancer serpit. [d] Si ergo te lactaverint peccatores, ne acquiescas eis. Si dixerint veni nobiscum.... Ne ambules cum eis; prohibe pedem tuum à semitis eorum, pedes enim illorum ad malum currunt, (e) nam qui eum sapientibus graditur, sapiens erit; amicus stultorum similis efficietur.

(f) Tales, igitur, habeto socios quorum contubernio non infameris; si Lector, si Acolythus te sequantur, non ornentur veste sed moribus, nec calamistrato crispent comas, sed pudicitiam habitu polliceantur... Negotiatorem Clericum, & ex inope divitem, ex ignobili gloriosum, quasi quamdam pestem fuge. Corruptunt bonos mores confabulationes pessimæ. Tu aurum contemnis, alius diligit: tu calcas opes, ille sectatur: tibi cordi silentium, mansuetudo, secretum; illi verbositas, attrita frons, cui munditiæ, fora placent, & plateæ; in tanta morum discordia, quæ potest esse concordia?

(g) Non audistis? vitate canes, vitate malos operarios. Qui sunt isti? Homines hujus sæculi, qui non sequantur vestigia Christi. Rogo te quid tibi demonstrant? Dic

(c) 2. Tim. 2. (d) Prov. 1. (e) Prov. 13.

(f) S. Hier. Ep. ad Nepot.

(g) S. Bas. Tract. ad Virg. de virtutibus. c. 1.

270 *Speculum Sacerdotum*

mihi : castitatem , quam non habent ? Jejunium , quod odiunt ? Humilitatem , quam opprimunt ? Sobrietatem , quam negligunt ? &c. Nescio autem quid vis studere cum ipsis.

(h) Qui tetigerit picem , inquinabitur ab ea : & qui communicaverit superbo induet superbiam. Pondus super se tollet qui honestiori se communicat ; & ditiori te ne socius fueris. . . . Si necessarius illi fueris , supplantabit te , & subridens spem dabit , narrans tibi bona , & dicet : Quid opus est tibi ? Et confundet te in cibis suis , donec te exinaniat bis & ter , & in novissimo deridet te , & postea videns derelinquet te , & caput suum movebit ad te. . . . Advocatus à potentiore discede : ex hoc enim magis te advocabit. Ne improbus sis , ne impingaris ; & ne longè sis ab eo , ne eas in oblivionem. Ne retineas ex æquo loqui cum illo : ne credas multis verbis illius ; ex multa enim loquela tentabit te , & subridens interrogabit te de absconditis tuis. Immitis animus illius conservabit verba tua , & non parcat de malitia : cave tibi , & attende diligenter auditui tuo , quoniam cum subversione tua ambulas.

(h) *Eccli. 13. integro ferè capite.*



X X I X.

Qui frequentandi & consulendi.

Amicus (*i*) fidelis, protectio fortis : qui invenit illum, invenit thesaurum. Amico fideli nulla est comparatio, & non est digna ponderatio auri & argenti contra bonitatem fidei illius. Amicus fidelis, medicamentum vitæ & immortalitatis, & qui meruunt Dominum inveniunt illum. . . . In multitudine presbyterorum prudentium sta, & sapientiæ illorum ex corde conjungere, ut omnem narrationem Dei possis audire, & proverbia laudis non effugiant à te. (*k*) In proverbiiis eorum conversare : ab ipsis enim discas sapientiam & doctrinam intellectus.

(*l*) Horum acquiescendo consiliis, nec præceps eris in sententia, nec vehemens in vindicta. Non in corrigendis remissior, non severior in parcendis, non pusillanimis in expectandis, non superfluous in victu, nec notabilis in vestitu, non citus ad promittendum, non ad reddendum tardus, nec prodigus dator. . . . Et ut brevi omnia sermone concludam, si his credideris, in omnibus, exemplo Apostoli, honorificabis ministerium tuum.

(*m*) Habeas igitur tecum, quorum vitam

(*i*) *Ecclesi.* 6. (*k*) *Ibid.* c. 8. (*l*) *S. Bern. Ep.* 42. ad *Henr. Sen. Episc.* c. 1

(*m*) *Pet. Bles.* de *vita morib. & Offic. Presb. & Cleric.*

172 *Speculum Sacerdotum*

verearis & verba, qui te, etiam si velis; deviare non sinant, refrænent præcipitem, confirmant dubium, & excitent torpescentem. Insolentia magna est non pro ratione, sed pro libidine agere, & bestiale est appetitum consilio anteferre. . . . omnia ergo cum consilio & modesta maturitate disponas. Si rem proposueris arduam, prius tecum delibera, postea cum multis quorum fidem probaveris. . . . Ubi autem consilium familiare non sufficit, eorum consilium explora, licet familiares tui non sint, quos organa Spiritus sancti esse non ambigis.

X X X.

Ducere in via salutis opus est.

ESt (n) via quæ videtur homini recta; & novissima ejus ducunt ad mortem. (o) Inquire, ergo, tibi aliquem fidelem virum qui eat tecum, (p) consiliarius sit tibi unus de mille. (q) Evigila ad eum, & gradus ostiorum illius exerat pes tuus; (r) sine consilio ejus nihil agas & post factum non poenitebis.

(s) Quamdiu igitur mortali hoc peregrinamur in corpore, habemus opus ductore pervigili, cujus sano consilio, cujusvè

(n) *Prov.* 16. (o) *Tob.* 5. (p) *Eccl.* 6.

(q) *Ibid.* 7. 36. (r) *Eccl.* 32.

(s) *B. Laur. Justin. de Instit. & Regim. Præb.* c. 3.

circumspectâ prudentiâ adversariorum spiritualium cognoscamus insidias, emergentia evadamus pericula, casus vitemus noxios, carnis fugiamus vitia, adhortemurque quotidie ad studia, actusque virtutum, (t) quia privato nos amore diligimus, clausis oculis in nostrâ nobis deceptione blandimur. (u) Caveamus verò tales tentationes superbissimas, & periculosissimas, magisque cogitemus & ipsum Apostolum Paulum, licet divinâ & cœlesti voce prostratum & instructum, ad hominem tamen missum esse. . . . Cogitemus centurionem Cornelium, quamquam exauditas orationes ejus, eleemosynasque respectas Angelus nuntiaverit, Petro tamen traditum imbuedum. . . . Nonne cum Moyse Deus loquebatur, & tamen consilium regendi atque administrandi tam magni populi, à socero suo, alienigenâ scilicet homine, & maximè providus, & minimè superbus accepit.

(x) Quin & hæc institutio non solum per veram discretionis viam recto tramite docebit incedere, verum etiam à cunctis fraudibus & insidiis inimici servabit illæsum. . . . Illicò namque ut patefacta fuerit cogitatio maligna, marcescit, & antequam discretionis judicium proferatur, serpens teterrimus, velut è tenebroso ac subterra-

(t) *S. Greg. Hom. 4. in Ezech.*

(u) *S. August. Prolog. de Doct. Christ.*

(x) *Cass. Coll. 2. c. 10.*

274 *Speculum Sacerdotum*

neo specu, confessionis virtute protractus ad lucem, & traductus quodam modo ac dehonestatus abscedit.

X X X I.

*Beatissima Virgo Maria speciali cultu
honoranda.*

Maria (a) de qua natus est Jesus qui vocatur Christus. (b) Quid nobilius Dei matre, quid splendidius eâ quam splendor elegit? Quid castius eâ, quæ corpus sine corporis contagione generavit? Virgo erat non solum corpore, sed etiam mente: corde humilis, verbis gravis, animo prudens, loquendi parcior, legendi studiosior, non in incerto divitiarum sed in prece pauperum spem reponens, intenta operi, verecunda sermone, arbitrum mentis solita non hominem sed Deum quærere. . . . Talis fuit Maria ut ejus unius vita omnium sit disciplina.... Quantæ in una Virgine species virtutum emicant? Secretum verecundiæ, vexillum fidei, devotionis obsequium... hinc sumatis exempla vivendi, ubi, tamquam in exemplari, magisteria expressa probitatis, quid corrigere, quid fugere, quid tenere debeatis ostendunt.

Maria nobilis illa Stella ex Jacob orta, cujus radius universum orbem illuminat, cujus splendor & præfulget in supernis, &

(a) *S. Matth. 1.* (b) *S. Ambr. l. 2. de Virg. c. 2.* (c) *S. Bern. Hom. 2. super missus est.*

inferos penetrat; terras etiam perlustrans, & calefaciens magis mentes quam corpora, fovet virtutes, excoquit vitia. Ipsa, inquam, est præclara & eximia Stella, super hoc mare magnum & spatiosum necessario sublevata, micans meritis, illustrans exemplis. O quisquis te intelligis in hujus sæculi profluvio magis inter procillas & tempestates fluctuare, quam per terram ambulare, ne avertas oculos à fulgore hujus fideris, si non vis obrui procellis. Si insurgunt venti tentationum, si incurras scopulos tribulationum, respice stellam, voca Mariam. Si iracundia, aut avaritia, aut carnis illecebra naviculam concusserit mentis, respice ad Mariam: si criminum immanitate turbatus, conscientiae foeditate confusus, judicii horrore perterritus, barathro incipias absorberi tristitiae, desperationis abyffo, cogita Mariam; in periculis, in angustiis, in rebus dubiis Mariam cogita, Mariam invoca; non recedat ab ore, non recedat à corde. . . Ipsam sequens non devias, ipsam rogans non desperas, ipsam cogitans non erras, ipsam tenente non corruis, ipsam protegente non metuis, ipsam duce non fatigaris, ipsam propitiâ pervenis.

His omnibus adjiciemus sequens Speculum, ex placitis SS. Gregorii & Bernardi conflatum, & ab Illustrissimo Aurelianensi Episcopo Pastoribus suæ Diœcesis oblatum.

*SPECULUM boni Pastoris, ex
SS. Gregorio & Bernardo.*

PASTOR eligendus sit vir probatus
non probandus, quia in curia plus
deficiunt boni, quam meliorantur
mali,

Assumendus potius cunctans & renuens
quam volens & recurrens,

Compellendus intrare, qui præter Domi-
num timeat nihil, nihil speret nisi à
Domino,

Sit in cunctis bene moratus,

In consilio providus,

In iubendo discretus,

In disponendo industrius,

In agendo strenuus,

In loquendo modestus,

In silentio discretus,

In adversitate securus,

In prosperitate devotus,

In zelo sobrius,

In misericordia non remissus,

In otio non otiosus,

In convivio non effusus,

Sit actione præcipuus,

Præ cunctis contemplatione suspensus,

In verbo utilis,

Singulis compassione proximus.

- Bene agentibus per humilitatem socius,
Contra delinquentium vitia per zelum iustitiæ erectus,
Internorum curam in externorum occupatione non minuens,
Externorum providentiam in internorum sollicitudine non relinquens,
Cunctis passionibus moriens spiritualiter vivat,
Prospera mundi postponat,
Nulla adversa pertimescat,
Sola interna desideret,
Pietatis visceribus affluat.
In curis rei familiaris non anxius:
Iis præficiat fidelem servum qui non fraudet, prudentem qui non fraudetur,
Si non inveniatur fidelem, vel prudentem,
potius sustineat minus fidelem, quam se immergat labyrintho huic. Judas fuit Oeconomus Salvatoris.
Non de dote viduæ & patrimonio crucifixi se vel suos ditare festinet,
Secularia negotia aliquando ex compassione toleranda numquam ex animo requirat,
Vulgus non spernat, sed doceat,
Divites non palpet, sed terreat,
Pauperes non gravet, sed foveat,
Pascat gregem exemplo ædificationis, verbo prædicationis, fructu orationis,
Habeat bonitatem, disciplinam, scientiam,
prima dat exemplum, secunda corripit, tertia instruit.

278 *Speculum Sacerdotum*

Habeat eruditionem, sed multò magis unctionem quæ sola docet de omnibus,

Caveat nè alios juvando se deferat, nè alios elevans cadat,

In vultu, in habitu, in incessu illorum qui circa se sunt nihil residere impudicum, nihil indecens patiatur,

Non de severitate sit oneri nec de familiaritate contemptui,

Sit illi necessaria oris custodia, quæ tamen affabilitatis gratiam non excludat,

Orandi Officium gerat,

In omni re plus fidat orationi, quam suo labori,

Amabilem se præbeat non verbo, sed opere,

Reverendum se exhibeat non fastu, sed actu,

Humilis sit cum humilibus,

Duros durè arguat,

Malignantes coerceat,

Reddat retributionem superbis,

Animum habeat liberum, nobilem, firmum, invictum, amplum,

Liberum, quem nulla sibi vindicet violenta occupatio,

Nobilem, quem nulla trahat indigna affectio,

Firmum, quem nulla concutiat repentina turbatio,

Invictum, quem nulla fatiget etiam continua tribulatio,

Amplum, quem nulla coarctet rei temporalis amissio.

Actu sit severus , vultu serenus , verbo
serius ,

Tales habeat familiares quos postmodum
elegisse non poeniteat , tales , qui fræ-
nent præcipitem , dormitantem exci-
tent , quorum libertas excedentem
corrigat , extollentem reprimat , quo-
rum constantia nutantem firmet , eri-
gat diffidentem.

*Si , Pastor dilecte , tuos componere mores
Est animus , Speculum consule , tolle , lege.*

MONITIONES

*S. CAROLI BORROMÆI
ad Clericos & Sacerdotes.*

*Excerpta ex Concil. IV. Mediol. Parte 3.
num. VII.*

PEr vetus illud institutum est, tum sanc-
torum Patrum usu , tum Ecclesiæ auc-
toritate comprobatum , ut quæ Sacerdota-
lem Clericalemque disciplinam , officia , ac
partes maximè attingunt ; ea certis moni-
tionibus comprehensa , ab Episcopo Clero
proponantur. Cujus instituti ratione atque
exemplo nos adducti , monitiones infra or-

dine præscriptas, edendas censuimus, ut diligentius ac religiosius iis universus Clerus sese conformet.

Ad universum Clerum.

1. **P**rimo fratres & filii in Christo carissimi, memores perpetuo estote vocationis, qua vos dignatus est Dominus noster: Qua assiduâ recordatione, memoriâque excitati, eam vos virtutem induite, ut videant alii quasi lumen aliquod, vestram sanctitatem elucere. Quæ si magna in aliis vitæ christianæ institutis requiritur, rectè in vobis, qui mysteriorum Dei ministri, divinæque gratiæ dispensatores estis, major inesse debet. Et sicut ordine sacro à reliquis hominibus sejuncti estis, ita à communis fidelium vitæ usu sejuncti, præcipuum quoddam atque hoc præstantius vivendi genus sequimini, quò ordinis dignitate præcellitis. Cœlestem in terris vitam, tamquam Angeli Dei, moribus vestris exprimere usque adeò studete, ut à vobis divinarum virtutum exempla ad cæteros emanent. Una animi consensione, unoque spiritu in iis elaborate, ut divino cultui, & cœlestium rerum meditationibus, & orationi, & sacrarum Ecclesiasticarumque literarum studiis vacetis; tùm depositis sæcularibus vanisque sollicitudinibus, ab omni vitio, alieni in via Domini rectè ambuletis.
2. Caritatem imprimis, quæ Seminarium

est omnium virtutum omni studio amplectimini. Humilitatem, mansuetudinem, patientiam, justitiam, temperantiam, officiaque Christianæ pietatis reliqua colite. Quæcumque denique sunt vera, quæcumque pudica, quæcumque sancta ac religiosa, ea cogitate, eaque agite. Virtutes Sanctorum Patrum, quas præcipuas, & quasi hæreditarias vobis ad imitationem reliquerunt, non adumbrare solum, sed omnino exprimere certatim contendite. Utque illi, sic vos, abstinentiæ, & jejuniis dediti, clericalis disciplinæ, ac vitæ castissimæ studiosi, tum patriæ coelestis sitientes, Deo servire assiduis divinarum laudum officiis, & in Ecclesia, quasi in perpetua vestra Sacerdotali, Clericalique statione continenter versamini.

3. Omnes qui canonicarum horarum officiis devincti estis, statas eas preces horarias recitate ad præscriptam rationem ac ritum. Nec verò negligenter, sed attentè, piè, decorè, supplicique mente illas dicite. Expletis canonicarum horarum officiis, si quid in illis aut negligentia, aut alia culpâ commiseritis, paululùm colligentes vos, veniam à Deo petite.

4. Qui Sacerdotes estis, Missæ sacrificium sæpiùs facite sanctè ac religiosè. Ad illud faciendum parate vos omni pietate, in tam alti mysteriû meditatione toto animo defixi: & quò purius id faciatis, pro-

priam conscientiam diligenti, accurato, frequentique examine discutate; tum singulis saltem hebdomadis, atque adeò sæpius, & omnino semper, cum peccati mortalis conscii estis, confiteamini. In ea sanctissimi sacrificii actione ab erroribus vel levissimis omnino cavete. Quæ de illo piè ritèque celebrando præscripta sunt, ea vos studiosè diligenterque servate.

5. Diaconi, Subdiaconi, & Clerici inferiorum ordinum, quicumque estis, quæ de confitendis sæpè peccatis, de communionem frequenter sumenda vobis iussa sunt, integrè & sanctè omnia, ut debetis, præstare. Ecclesiasticæ militiæ omnes vos adscripti estis, ad pietatis religionisque exercitationes vos vocatos esse cognoscite. In omni imprimis sancta oratione vos assidue exercete; tum in meditationis, tacitæque piæ orationis studio singulis diebus, certo temporis spatio, toto castissimi animi sensu incumbite.

6. Hæc sanctis precibus, præter cætera, supplices, præsertim afflictis rei christianæ temporibus, orate Patrè misericordiarum & Deum totius consolationis; ut misereatur populi sui: ut fidelium animos ad vitia fugienda, ad virtutesque amplectendas Sancti Spiritus sui ardore inflammer. Ut è Principum Regumque animis evellantur, si quæ sint, discordiæ semina. Ut in unâ animi consensione Christi regnū pro-

pagare studeant, unamque Dei gloriam, atque Ecclesiæ matris defensionem propositam habeant.

7. Quidquid verò temporis à divinis officiis, ab orationis contemplationisque exercitatione, ab Ecclesiasticis functionibus, & ab aliis necessariis actionibus vacuum habetis, non in otio, neque in infidiâ, nec verò in rerum novarum curiositatibus illud conterite; sed cum in sortem Domini vocati sitis, in ejus lege die ac nocte meditemini. Sacrarum igitur litterarum studia diligentius colite, quæ usque adeò complecti debetis, ut qui aspernetur, contra eum dicat Dominus: *Quia tu scientiam repulisti, & ego repellam te, ne sacerdotio fungaris mihi.* Frequentes ad statas lectiones, & ad litterarum tractationes vobis præscriptas convenite. Attento animo in iis adeste, atque in dies ad uberiores sacrorum studiorum fructum progressionem aliquam habete, ut ad Episcopum aliquandò vocari & diligentiae & doctrinae testimonium detis.

8. Lectione librorum spiritualium & clericalium, qui probati sint, animos mentesque vestras pascite; cum iis & præceptorum Ecclesiæ cognitionem, & preces horarias recitandi peritiam, & Ecclesiasticorum rituum, ceremoniarumque notitiam conjungite. At libros de rebus jocosis, ridiculis, obscænis, inanibus, ad poesisque

profanæ studium pertinentibus , vulgari aut latino sermone conscriptos procul abjicite. Nec vero musicas cantiones ridiculè , voluptariè , parùmque pudicè exaratas adhibete.

9. Quotidiè aliquid ex sacris Bibliis legite ; ac , si per Ecclesiasticas occupationes licet , aliquid item ex Sanctorum Patrum opusculis ; atque alios prætereà libros de Sacerdotalis , Clericalisque vitæ rationibus & officiis , de animarum cura , de christianæ pietatis studiis & exercitationibus , de aliisque ejusdem generis piè confectos , ita legite , ut quæcumque ad vitæ sanctæ normam accommodata ex illis animadvertistis ac didicistis , moribus exprimatis.

10. Conciliorum item Provincialium ac Dioecesanorum constitutiones & decreta non percurrите solum , sed usque adeò studiosè legite , ut quæ legeritis , post etiam taciti vobiscum aliquandò mente reputetis ac videatis simul , non solum si quidquam est , quod contra illorum præscriptum egeritis , verum si quid etiam aliud est , quod ex eisdem exequi , præstarevè omiseritis aut neglexeritis. Quod ut præstetis , curate omnino atque efficite.

11. Estis divinâ misericordiâ in ecclesiastico ordine constituti , ad gloriam Dei conservandam , propagandamque : ideò tum ordinis vestri ministerium , quod explere debetis , videte ; tum dignitatem ac deco-

rem servate. In incessu, statu, gestu, ita vos præbete, ut ab ordinis, quem suscepistis, nomine & ratione nullo sane modo discrepetis, proposito vobis beati Ambrosii judicio, qui clero adscribi hominem recusavit, propterea quod ejus gestus & incessus dedeceret.

12. Habitu non exquisito, non delicato nimis; rursus non sordido, non neglecto, sed gravi & talari, atque ejusmodi tum domi tum foris pro unius-cujusque vestrum ordinis gradusque ratione utimini, ut à decretis eo de genere editis, nullà in re vel minimà discedatis. Coronam quod insigne est ordinis clericalis, pro ratione ordinis, quo vos singuli initiati estis, latam & conspicuam deferre.

13. Parcà & frugali mensà contenti sitis; & supellectile etiam modestà ac tenui potius. Ab omni splendido apparatu, pompæque sæculari abstinete. Imagines domi non profanas, sed eas habete quæ pietatis & religionis argumentum & adjumentum præbeant. In omni vita à fastu, luxu, ambitu, ambitionevè & à vanitate longè refugite.

14. Nec verbis quidem præscriptum vitæ modum perversite. Nihil scurriliter, nihil jocose, nihil indecorè, nihil turpiter loquimini. Absint à vobis maledicta, obrectationes, curiositas, levitas, assentationes ac nugæ.

15. Temperantiæ clericalis disciplinam.

vobis præscriptam in reliquis etiam omnino tenete. Commestationes, comportiones, convivia publica, laicaliavè, tum maxime in quibus mulieres interfunt, evitate. Hospites excipite, at illis excipiendis intra parcimoniæ fines vos continete; ita ut clericalis frugalitatis, non sumptuosi convivii testes illos habeatis.

16. A ludis, spectaculis, circulatorumque, atque id genus vilium hominum præstigiis procul estote. Arma abjicite. Sic denique cor vestrum corroborate, ut inania spectacula non appetat, à mundi ludis atque ineptiis abhorreat.

17. Sensus autem vestros ita dirigite, ut cum à Deo utiliter dati sint tanquam rationis ministri, ne eos perperam adhibeatis sicut satellites cupiditatum. Sit igitur vester oculorum aspectus simplex & pudicus; aurium sensus castus & prudens: casta mens, casti omnes sensus: vitæ & morum consuetudo casta & spiritualis. Ad eorum Sacerdotum, qui in ejusmodi vitæ studiis ac disciplinâ exercitati sunt, familiaritatem vos adjungite, ex qua nobis vestræ ad sanctè agendum progressionem consentent.

18. Ad castitatem autem conservandam munite omnem viam: legite propterea sæpè illum (inter opera) Beati Cypriani martyris de singularitate Clericorum librum, qui vos in hac ut in aliis instruet virtutibus.

Suspectarum autem mulierum consortium omnino vitate. In famulatu laïcorum ne sitis , multo - minus feminarum quamvis nobilium : ne verò illas musicam , litterasvè docere. *Ædes vestras ne locationi laïcis date , quorum vita , moresque suspecti sint.*

19. Sæcularibus negotiis , ut est S. Pauli Apostoli documentum , ne vos implicate. A cujusvis generis mercaturâ quæstuosâ , omni negotiatione , prædiorum conductio-
ne , tùm aliis , prorsus cavete. Ne pecu-
niæ , lucrivè avidi sitis. *Nemo potest servire Deo & mammonæ : aut enim unum odio habe-
bit , & alterum diliget ; aut unum sustinebit ,
& alterum contemnet ,* inquit Christus Do-
minus. Si qui pauperes estis , ne cupiatis divites fieri , ut ne incidatis in tentationes multas , & in laqueum diaboli.

20. Paupertatem vestram ne molestè ferte : paupertatem dilexit & docuit cœ-
lestis magister Christus , qui nascens in præ-
sepio ponitur , & nudus in cruce moritur. Scitote paupertati socias adjungi sobrieta-
tem , abstinentiam , & reliquas virtutes qui-
bus præluere oportet Ministros Dei.

21. Proponite vobis Sanctorum veterum Patrum vitam , qui lucrum non spectabant , temporalia non quærebant , & nihil iis ta-
men deerat ; imò in paupertate illis ali-
quando abundabat , quod aliis erogarent. Ne igitur , quia tenuem redditum habetis ,
lucrum quærite ; nec quæstum appetendo ,

injuriam vestro ordini facite avaritiæ for-
dibus volutati.

22. Non sæculi vos mercatores, non Mammonæ ministri estis, sed Christi mercatores: Nolite thesaurizare vobis thesauros in terrâ, sed bonorum operum abundantiam cum charitate conjunctam, facite thesauros in cœlis. Studete vos lucrari animas Deo, & cœleste horreum augere. Exemplo Sanctorum, vos paupertate, sobrietate, & parcimoniâ ita agite, ut non modo à supervacanearum rerum usibus abstinentes, sed vestro etiam defraudantes victu, Ecclesias vestras & altaria exornetis, facta-tecta habeatis, sacra suppellectili instruat; alienis etiam necessitatibus subveniatis & pauperibus opitulemini.

23. Qui verò uberiores Ecclesiasticos redditus habetis, Ecclesias è quarum prædiis fructus percipitis, eò magnificentius & augustius, quò amplioribus donis, bonisvè, augustiorique liberalitate illæ dotatæ sunt, illustri structurâ, præclaro opere reficite, egregiisque muneribus exornate, tum omni ecclesiasticæ suppellectilis apparatu instruite.

24. Christi visceribus substantiam ecclesiasticam erogate, pauperibus scilicet, peregrinis, viduis, pupillis, ægrotis, in vincula conjectis, captivis, quibus egentibus & esurientibus, cum subvenire possitis, si alimenta necessaria denegatis, violatæ charitatis rei estis in conspectu Domini. Memores

S. Caroli Borromæi. 189

essote ejus , quod à sanctissimo Ambrosio scriptum est : *Sua fideles eo animo obtulisse Ecclesiæ ministris , ut per eorum manus , quorum fidei , atque integritati summa omnia tribuebant , ad pauperes pervenirent.* Vos item alii , quicumque estis , quorum fidei Christi patrimonium propriè ad divini cultûs , pauperumque usum commissum est , cavete ne ambitione , aut cupiditate prolapsi , in alium , quam cui addictum est convertatis ; idque propterea sacrilegii rei damnationem æternam subeatis.

25. Universi autem vos & singuli ecclesiastici ordinis homines ; ut summatim complectamur , quæ muneris vestri sunt vobiscum frequenter recolite , ministerium vestrum explere studete ; sanctissima studia religionis & officii vestri rebus aliis potiora ducite. In rerum divinarum sacrarumque cognitionem omni cura incumbite : quæ divina , quæ sempiterna sunt , divitiarum , & honorum , & terrenarum rerum cogitationibus abjectis , amplectamini : restincto cupiditatum ardore , integros castosque vos servate , mundi voluptates , quæ à divinis præceptis detorquent , declinate : prædiorum ecclesiasticorum , quæ non avaritiæ præda , sed instrumenta charitati relicta sunt , redditu & fructibus non abutamini.

26. Humilitati studete ; charitatis opera præstare : induimini Dominum Jesum Christum , Sanctorumque ejus facta imitamini ,

ut & horum imitatione , & illius imprimis divinis præceptis , institutisque conformati , in vocatione quâ vocati estis , dignè Deo ambuletis ; tum vitæ vestræ splendore , laicis hominibus lumen præferatis ad vitam sanctè instituendam ; tum vos repositam vobis justitiæ coronam demum percipiatis.

27. Omnes præterea & singuli qui Ecclesiæ ministerio adscripti aliquo modo estis , Dioecesim , & Ecclesias , quas in ea obtinetis , quibusvè adscripti estis , stationes vestras , in quibus manendum vobis sit , putate : In illis ipsi residete ; debitis muneribus atque oneribus satisfacite. Alia item agite ac præstare ex præscriptâ conciliariis decretis fructuosæ , salutarisque residentiae ratione.

28. Quicumque item Clerici minorum ordinum estis , in Ecclesiis quibus adscripti estis , singuli ordinis quo initiati estis functiones tali pietate obite , ut digni habeamini qui deinceps altiorem gradum affecturi , sanctæ Dei Ecclesiæ inserviat. Nemo autem vestrum , quicumque estis , si alicui functioni estis deputati , ab ecclesiastica statione , personalisque residentiae munere discedat , nisi causis per Episcopum probatis. Hæc quæ communiter atque universè vos moniti estis , singuli servate studiose ac diligenter.

Ad Præpositos Capitulorum & Canonicos.

29. At præterea sigillatim nominatimque

vos, qui in Cathedrali Ecclesiâ dignitates obtinetis; Canonici item, tum ejusdem Ecclesiæ, tum reliquarum quarumvis Ecclesiarum collegiatarum, vel urbanarum, vel diœcesanarum, quicumque sitis, in omni canonicalis disciplinæ officio ita agite, ut canonicè, nempe canonum legibus, ad vitæ vestræ institutum pertinentibus, congruenter vivatis. Id primò maximè stude- te, ut in conspectu Dei omnipotentis, pu- ro corde & casto corpore ministretis. Tùm singuli vos ordinis, dignitati aut canonica- tui annexi, functiones explete, canonica- lisque muneris partes præstare.

30. Omnes in Choro statis horis assisti- te, & ad Deum pro fidelibus pias religio- sasque fundite preces. Dum eo loco estis, memores estote adesse Christum Je- sum Dominum, cui servite cum timore & tremore. Non pigri, non somnolenti, non oscitantes adestote, non mente vagâ, non vagis oculis, non indecenti corporis statu. Attentè, studiose, ritè, piè, religiose di- vinas laudes concelebrate: & psallite Deo in conspectu Angelorum, cantantes in cor- dibus vestris Domino.

31. In choro nemo privatim, nemo ta- citè officium recitet, sed omnes pariter, quicumque adestis, tenes cum junioribus, laudate nomen Domini in psalmis, hymnis & canticis. A quibuscumque colloquiis, & à litterarum, librorum lectionibus, atque

ab omni vagatione abstinete. Pro temporis autem & officii ratione sedete, state, genua flectite, caput aperite & inclinate; accuratè demùm omnia observate quæ eo de genere vobis præscripta sunt, ita ut vestro exemplo aliis Sacerdotibus, Clericisque, & rectè ritèque psallendi, & sanctè orandi, & piè agendi animum addatis. In psalmodum autem, canticorum, & hymnorum intelligentiam studiosè incumbite; ut dum psallitis, pro sensuum sanctissimorum quos mente concepistis, ratione, vos ad omnem pietatis devotionisque affectum exciteris.

32. Non ordinariæ distributionis lucro adducti, sed Dei charitate, religionisque cultu commoti, divinis officiis adeste; ut verè, ex animoque psalmi verba illa concinatis: *Voluntariè sacrificabo tibi, & confitebor nomini tuo, Domine, quoniam bonum est.* Divinis officiis absolutis, paululùm omnes in choro piè orate.

33. Canonicales vestros conventus statim hebdomadæ diebus capitulariter habete. Omnes, qui debetis, ad illos convenite. Singuli ordine & loco sedete, sententiam modestè dicite, & suo quisque loco, non præposterè. A verbis scurrilibus abstinete. In rebus consultandis iras, jurgia & contumelias cavete. Priori loco tractanda proponite, quæ ad divinum cultum, ad spiritualis vitæ progressionem, ad ecclesiasticam disciplinam tuendam; tum quæ ad rerum temporalium

temporalium gubernationem pertinent, ne negligite.

34. Omnia imprimis agite pace mutuâ, concordî voluntate, & caritate fraternâ vos invicem diligite, canonici enim estis; qui, sicut pro collegii ratione, ex antiquo instituto, unâ in Collegiatâ Ecclesiâ, unoque item in canonicali domicilio collocati fuistis; ita uno pacis & caritatis foedere, unaque animorum consensione conjunctissimi, sicut nascentis Ecclesiæ Ministri, quorum erat cor unum & anima una, experiundo videte, sicut in psalmo scriptum est, *Quam bonum & quam jucundum sit, habitare fratres in unum.*

35. Quicumque vero estis, qui inter Canonicos præpositi, aut Archipresbyteri, aut alterius dignitatis nomen, gradumvè obtinetis, sicut honore & dignitate præstatis; ita virtutum exemplis, vigilantique in vestri muneris, curævè partibus obeundis sollicitudine prælucete.

Ad Parochos & alios animarum curam gerentes.

36. Parochi prætereâ, & ceteri quicumque estis, etiam præpositi, Archipresbyteri, aliive qui animarum curam geritis, præter ea quæ vos cum reliquo clero communia universè monuimus, illa etiam quæ præcipuè de vobis decreta sunt, præstare omni sollicitudine.

37. Imprimis oves vobis concreditæ cognoscendæ sunt, & appellandæ nominatim, pascendæ & custodiendæ. Animarum igitur numerum in catalogum redigite. Eorum qui baptizantur, qui item confirmantur, & compatrum etiam qui adhibentur nomina describite. Matrimonia in codicem referte. Parochiæ vestræ incolarum vitam & mores investigate.

38. Indagate omni studio, si qui hæresi contaminati sint, aut suspecti; aut qui sint qui hæreticorum libros habeant, vendant, emant, importent, vel legant. Investigate prætereà de iis qui in vestrà parochiâ docent, eorumque vitam, mores, & fidem observate; cavete & videte, ne superstitiones, magicæ cantiones, & ejusmodi diabolicæ superstitiones in populo vestro sint. Cognoscite publicos peccatores, corruptores aliorum, concubenarios, adulteros, usurarios, blasphemos. Cognoscite etiam alios populorum corruptores, qui, festis diebus, non Deo, sed aleis, ludis, choreis, diabolo serviunt, quique festorum dierum cultum quovis modo violant: illos omnes ab ea malè agendi corrupelâ revocare, ac detertere: omni pietatis officio studetum Episcopo etiam, si opus erit, significite, ut, pro curæ Episcopalis officio, salutare remedium afferatur.

39. Rursus agnoscite etiam pauperes, viduas, pupillos, cæterosque alienâ ope

egentes , quibus & salutari consilio , & consolatione , & re subvenite , aut si minus re potestis , cohortatione alios accendite ad eos sublevandos. Sique illorum gravior inopia deposcit , festis etiam diebus , à pia fidelium liberalitate aliquid in Ecclesia colligendum curate , ut ab Episcopo præscribetur , quod ipsis in eleëmodynâ conferatur. Seorsum etiam locupletes parochiæ incolas convenite , quibus pauperum egestates proponite , & ostendite eis divitias à Deo propterea etiam esse tributas , ut inopibus succurrant.

40. Pascite imprimis populum vobis commissum prædicatione verbi Divini , salutaribus monitis , administratione item sacramentorum , exemplo & oratione. In verbo Dei exponendo planè observatæ quæ vobis præscripta sunt. Pueros festis , dominicisque diebus , in doctrinæ Christianæ rudimentis instruite. Provectoris ætatis homines ad eadem intelligenda invitate. Patres matresque familias monete , ut filios , filias , cæterosque quos in familia habent , ad statas doctrinæ Christianæ Scholas ipsi conducant. Eorum , qui iis scholis adscripti sunt , operam ad hoc institutum adhibete. Curateque ut inter eos caritas , morumque disciplina conservetur.

41. Ne omitte , diebus festis inter Missarum solemnia , aliquid ex iis quæ in Missa leguntur fidelibus exponere , & sanctissi-

mi illius sacrificii mysterium aliquod explanare, & aliquando sanctiores illius sacramentorum ceremoniarum rituumque rationes & significationes explicare, quò diligentius instructi in dies sacro-sancto illi sacrificio religiosius intersint. Docete item quomodo fideles signo Missæ celebrandæ dato, se corde contrito ad eam sanctè audiendam parent. Curate atque efficite perpetuis vestris monitionum officiis, ut in illa, viri aperto capite, mulieres velato, & in omni ejus parte utroque genuflexo, præterquam in Evangelio, adsint.

42. Instruite etiam eos, quam religiosè non solum in missæ sacro, verum etiam in divinis aliis officiis versandum. Quando standum, quando genua flectenda, quando assurgendum. Quam valdè, dum illa fiunt, celebrantur-ve, fugiendæ confabulationes, colloquia, deambulationes, strepitus, clamores, imò verò inanes cogitationes, quibus à piâ meditatione, & mysteriorum quæ aguntur, contemplatione, religiosâque oratione animus distrahitur; quam denique studiosè vitanda reliqua ab eorum officiorum sanctitate & cultu aliena.

43. Rursus quam sanctè item quam religiosè, & quam demisso humilique habitu in supplicationibus; Litanis & stationibus versandum sit. Quâ reverentiâ, quovè pietatis studio in Ecclesiis, locis-ve sacris manendum sit, quæ-ve ab illis procùl abesse

debeant. Quâ etiam, non solum intimâ religiosi animi præparatione; sed externâ etiam cultûs vestitûsque modestiâ, humili genuflexione & armis depositis, ad sanctissimam communionem, tum etiam ad certa Sacramenta accedendum sit.

44. Tum docete ac monete, quomodo dies festi colendi & sanctificandi sint: ostendite indignissimum esse sacris illis diebus, non modo à nefariis operibus, illicitisque negotiis non abstinere, verum etiam religionis, ac pietatis opera non præstare omni diligentiâ. Ac prætereâ nefas esse, sacros dies ad maxima Dei colenda beneficia, summasque ei laudes persolvendas, ac debitum Sanctis honorem tribuendum institutos, ad illa traduci quæ ab illo cultu abhorrent: qualia sunt tripudia, ludi, choreæ, spectacula, quibus ad turpes illecebras incitantibus salutis humanæ hostis diabolus oblectatur.

45. Denuntiate item stata sacrorum temporum jejunia, docete quomodo jejunandum, quæ peccati gravitas in violandis sacris jejuniiis. Quæ prætereâ Christianæ pietatis officia in Sanctorum vigiliis. Quam sanctè observandum quadragesimale jejunium. Statis autem solemnibus, vel Adventus, vel Septuagesimæ, vel aliorum temporum celebritatibus præmonete fideles, atque diligenter instruite ad sacra illorum temporum mysteria sanctis pietatis officiis religiose

colenda. Utque iis pro temporum solemnitarumque ratione illi instrui possint, sæpe monete, ut Dominicis aliisque Festis diebus ad parochialem Ecclesiam conveniant.

46. Sæpè autem ac diligenter eosdem docete quam assiduè orandum sit, quomodo & tacitâ supplicis mentis meditatione, & piis statis orationibus precandum. Quam studiose ac religiose suscipiendum vespertinæ communis orationis institutum, quam diligenter illud semel susceptum piè retinendum. Diebus Dominicis instruite populum, & monete pro quibus oret; tum prætereà, quas singulis hebdomadæ feriis præcipuas preces, christianasque meditationes, atque in orando exercitationes sibi propositas in promptu habere possit. Quam sæpissimè verò sermonibus vestris populo proponite locos perpetuæ christianæ meditationis, de morte, de iudicio, de inferno, de gloria & de præmio paradisi.

47. Monete prætereà sedulò ac frequentissimè patres matresque familias, ut liberos, familiamque suam ad pietatis christianarumque virtutum disciplinam religiose instituant. Ad hoc propterea patres familias inducite, ut de vitæ spiritualis ratione, & piis exercitationibus libros probatos domi suæ habeant, in quorum lectione versentur, seseque ac familiam instituant ad sanctè agendum. Tum alia prætereà docete, quæ opportuna existimaveritis, quibus illi se

suamque familiam in christianæ vitæ institutionis, atque exercitationibus conforment.

48. In officinis etiam & tabernis disciplinæ vitæque christianæ rationem observate; si quid autem vel ab artificibus, vel ab institutoribus, operariis-ve committi animadverteritis, quod dissolutæ disciplinæ sit, id officinarum, tabernarum-ve dominos graviter monete, ostenditeque eâ in re officii sui partes. Estis participes & socii laborum, curæque Episcopalis, & in messe Episcopo commissâ operarii estis; elaborate unâ cum eo, & contendite ut populus cujus cura geritur; tanquam purum triticum, auxiliante divinâ misericordiâ, congregetur in horrea coelestia.

49. *Depositum custodi*, inquit Beatus Apostolus Paulus, id quod vobis singulis dictum esse putate, ut in grege, tanquam deposito fidei curæque vestræ commissio, diligenter custodiendo, ab omnique peccati labe conservando, cogitationem, sollicitudinem, curam, studiumque omne collocetis. Parochiæ igitur unicuique vestrûm conceditæ viciniam, cum à cæteris vitiis omnibus, vos singuli sollicitè custodite, tum curate etiam, ne odia, similitudines, inimicitiae, factiones, necnon temerè jurandi, maledicendi, imprecandi prævæ consuetudines, ac ne detractiones quidem in eâ sint.

50. At vitia imprimis & peccata, ad quæ populum proclivorem esse animadverteritis

reprehendite atque exagitate. Nec verò dissimulate peccata, sed annuntiate populo scelera ejus: publicè peccantes coram omnibus arguite, ut & alii timorem habeant. Idque agite spiritu fortitudinis Domini, & ut strenui ejus milites, bonam militiam militate, nihil inde trepidantes. *Si ab increpatione*, vos monet Sanctus Gregorius, *reticueritis, quia contra vos odia insurgere reformidatis, non jam Dei lucra, sed vestra queritis.* Non maledictis, non vexationibus, non calumniis, non alicujus generis contumeliis, illud vel increpandi, vel palàm arguendi officium deserite, modo Christi gloriæ & animarum saluti serviat.

§1. Rursus non aucupandæ hominum gratiæ studio id agere desistite; *Servus Dei non essem si hominibus placerem*, ait Apostolus; væ vobis tacentibus aut dissimulantibus, si grex curæ vestræ commissus perierit, sanguinem ejus de manibus vestris requirit justus & omnipotens Deus. Si igitur peccatur, ne in increpationibus verba vestra blandientia sint, sed, ut à Spiritu sancto scriptum est, *stimuli sint, & quasi clavi in altum defixi.* Instate opportunè, importunè privatis etiam admonitionibus, consiliis, correptionibus, objurgationibus; ut peccantes, adjutrice divinâ gratiâ, in viam salutis revocetis. In usum etiam sanctè ita revocate fraternam correctionem, ut non modo mutuâ christianâ caritate, vos ipsos

corripiatis, sed reliquos item præsertim Parochiæ incolas, id caritatis, & correctionis officium rectè doceatis.

52. Ad sermonum verò, admonitionum, correctionum partes explendas, locos vobis comparate præsertim ex doctrinâ Cathedismi Romani, in quo magnâ cum populorum vestrorum salutari utilitate versari diligenter potestis: neque ad hoc multiplicis vestræ ecclesiasticæ tractationis negligite adjumenta, quæ aliunde utiliter capere potestis. Cætera autem officia, quæ in sacramentorum administratione, in assidua ad frequentem eorum usum cohortatione, in ægrorum curâ, in aliis parochialis muneris functionibus, vobis præscripta sunt, præstate, atque exequimini accuratè.

53. Videte imprimis ac perpendere, quæ sint, & quam religiosæ muneris vestri partes: caveteque ut in officiis, & curæ vestræ functionibus, non modo quidquam vos non committatis, sed ne omittatis quidem; cum in sacerdotali vitâ, pro muneris quod sustinetis ratione; tum graviores, tum longè plures quam in cæteris hominibus esse possint omissionis culpæ.

*Ad Reliquos Sacerdotes & Clericos
inferioris Ordinis.*

54. Vos prætereà reliqui Sacerdotes quicumque estis, quibus animarum cura non incumbit, cum alia omnia, quæ Ec-

clesiastici ordinis hominibus, de divinorum officiorum cultu, de vitæ honestate, & studiis, & vitæ spiritualis exercitationibus præscripta, aut monita generatim sunt, tùm quæ nominatim, figillatimque ad præcipuam vestram executionem attinent, præstate omninò.

55. Vos item reliqui Clerici inferiorum ordinum, quæcumque ad vos vel nominatim, vel generatim spectant, agite omnia, sicut Clericalis vitæ ratio Canonum & Conciliorum Decretis præscripta, postulat. Christi estis, nempe de sorte Domini, & ipse Dominus fors, pars scilicet vestra; tales præbete vos, ut & ipsi possideatis Dominum, & possideamini à Domino, verèque dicatis: *Dominus pars hereditatis meæ.*

56. Filii mei nolite negligere: vos elegit Dominus ut stetis coram eo, & ministretis illi. Videte igitur, quam valdè intentos vos esse oporteat ministeriis vestris, & quam magnâ vitæ morumque castitate prælucere debeatis. Proborum hominum tantùm, præcipuè Sacerdotum vitæ spiritualis laude præstantium, familiaritate utamini, ex quorum consuetudine tùm fructus vos capiat, tùm Episcopus meliorem In dies de vobis opinionem concipiat.

57. Majores vereamini, & observate; eisdemque rectè monentibus obtemperate. Præter latinæ linguæ, & litterarum stu-

dia, Ecclesiasticæ imprimis disciplinæ institutionibus diligenter incumbite. Sic demùm vos moribus, & vitæ modestiâ probate, ut & à parochis, tum etiam à populo bonum testimonium Episcopus habeat, vosque dignos judicet, quos majoribus ordinibus adscribat.

Ad Parochiarum Lustratores.

§8. Vos vero, qui visitationis munus geritis, in explendis muneris atque officii vobis commissi partibus sedulò invigilate atque elaborate: onus quod sustinetis, quam grave sit, quam plenum curis perpendite; tum quam in eo vobis committendo spem, fiduciamque Episcopus habuit, videte; tum efficite, ut ejus expectationi respondeatis vigiliarum vestrarum studiis, assiduâque sollicitudine.

§9. Ecclesias quæ in uniuscujusque vestrûm regione sunt, sedulò visitate: earumque partes singulas inspicite. Pervestigate in uniuscujusque Parochiæ finibus, an aliqua publicorum peccatorum labes sit, an flagitia, quibus Episcopali curâ Episcopus medeatur, necesse sit.

60. Ecclesiarum item cultum, nitorem, cæteraque ejus generis omnia curate vestrâ diligentia, quæ totis in Christo visceribus ab unoquoque vestrûm expetitur.

Monitionum conclusio.

61. Hæc omnia, & singula his monitionibus nominatim sigillatimque expressa; vos

omnes ac singuli quorum interest, quanto potestis amore & pietate non amplectamini solum & legite : sed mente animoque comprehendite, servate, omnique sollicitâ executione præstare, totosque vos ad cohortationum, admonitionum, decretorum & constitutionum rationem accommodare.

62. Quod omne ut faciatis, sicut nos pro Episcopali nostri officii munere vos commonefecimus : ita etiam unumquemque vestrum per unigeniti Filii Dei adventum, per ejus crucem, perque animarum vestrarum salutem obsecramus, obtestamur, divinâque contestatione monemus.... Cavete igitur ne quem vobiscum paterno modo agentem, sollicitèque monentem & in conspectu Dei vos deprecantem, auditis; eundem rursus, non in hac vita solum culpas vestras animadvertentem, sed in divino prætereâ judicio easdem accusantem audiat.


63. At ipse Deus, & Pater noster, & Dominus Jesus-Christus dirigat vias vestras in omni sancta obedientia; exhortetur corda vestra, & confirmet in omni opere, & sermone bono, ita ut dignè ambuletis vocatione qua vocati estis, per omnia ei placentes; sicque sanctis vestrarum virtutum progressionibus probati, appareatis ante Deum & Patrem nostrum in adventu Domini nostri Jesu-Christi cum omnibus sanctis ejus. Amen.

PARTIS TERTIÆ FINIS.



PARS QUARTA.

DE SACRO-SANCTO MISSÆ SACRIFICIO.


NON (a) est mihi voluntas in vobis, dicit Dominus exercituum (ad Sacerdotes veteris legis), & munus non suspiciam de manu vestrâ: ab ortu enim solis usque ad occasum, magnum est nomen meum in Gentibus, & in omni loco sacrificatur & offertur nomini meo oblatio munda. (b) Quoniam igitur sub priori testamento, teste Apostolo Paulo, propter Levitici Sacerdotii imbecillitatem consummatio non erat; oportuit, Deo Patre misericordiarum ita ordinante, Sacerdotem alium secundum ordinem Melchisedech surgere Domi-

(a) *Malach. i.*

(b) *Concil. Trid. Sess 22, c. 1.*

num nostrum Jesum-Christum , qui posset omnes , quotquot sanctificandi essent , consummare , & ad perfectum adducere.

Is igitur Deus & Dominus noster , etsi semel se ipsum in ara crucis , morte intercedente , Deo Patri oblaturus erat , ut æternam illic redemptionem operaretur ; quia tamen per mortem Sacerdotium ejus extinguendum non erat ; in coena novissima , qua nocte tradebatur , ut dilectæ sponsæ suæ Ecclesiæ visibile , sicut hominum natura exigit , relinqueret sacrificium , quo cruentum illud semel in cruce peragendum repræsentaretur ; ejusque memoria in finem usque sæculi permaneret , atque illius salutaris virtus in remissionem eorum , quæ à nobis quotidie committuntur , peccatorum applicaretur , Sacerdotem secundum ordinem Melchisedech se in æternum constitutum declarans ; corpus & sanguinem suum sub speciebus panis & vini Deo Patri obtulit , ac sub earundem rerum symbolis , Apostolis quos tunc Sacerdotes Novi Testamenti constituerebat , ut sumerent tradidit ; & eisdem , eorumque in Sacerdotio successoribus , ut offerrent , præcepit per hæc verba , *Hoc facite in meam commemorationem.*

Hæc est oblatio munda , de qua supra Malachias , quæ omnium legalium hostiarum differentiam tantò excellentius complectitur , quantò excellentior , Deoque

acceptabilior est victima quæ offertur & immolatur.

(c) Nam dum conspicias Dominum immolatum, & illic situm Sacerdotem sacrificio incumbentem ac preces fundentem, tum vero turbam circumfusam pretioso illo sanguine intingi ac rubesceri, etiamnè te inter mortales versari, atque in terra consistere censes? An non potius, è vestigio, in coelos transferris, an non carnis cogitationem omnem abjiciens, nudo animo, mente purâ, circumspicis quæ in coelo sunt.

(d) Quanta idcirco cura adhibenda sit, ut Sacro-sanctum illud Missæ sacrificium omni religionis cultu ac veneratione celebretur, quivis facile existimare poterit, qui cogitarit, maledictum in sacris litteris vocari, qui facit opus Dei negligenter. Quod si necessario fatemur, nullum aliud opus adeò sanctum ac divinum à Christi fidelibus tractari posse, quam hoc ipsum tremendum mysterium, quo vivifica illa hostia, qua Deo Patri reconciliati sumus, in altari per Sacerdotes quotidie immolatur; satis etiam apparet, omnem operam & diligentiam in eo ponendam esse, ut quantâ maximâ fieri potest cordis munditiâ & puritate, atque exteriori devotionis

(c) *S. Chrysost. l. 3. de Sacerd. c. 3.*

(d) *Conc. Trid. Sess. 22, Decreto de Obser-
v. erit. in celeb. Miss.*

ac pietatis specie peragatur. Quod quidem ut assequatur Christi Sacerdos, varia præstare debet tum ante celebrationem sacrificii, tum ipso celebrationis tempore, tum demum peracto jam sacrificio.

CAPUT PRIMUM.

Ante orationem (e) præpara animam tuam, & noli esse quasi homo qui tentat Deum. Quod si Deum tentare atque ad iracundiam provocare dicitur, qui ipsum audet in oratione interpellare, non præmissa diligenti & accuratâ præparatione: quanto magis eundem suâ temeritate & audaciâ irritabit qui unigenitum suum illi offerre, ipsumque Angelorum & hominum Regem ac Dominum suscipere imparatus præsumet? (f) *Præparare igitur in occursum Dei tui.* Hæc autem præparatio in tribus potissimum consistit, nempe in puritate vitæ, in rectitudine intentionis, & in actuali devotione.

ARTICULUS PRIMUS.

De Vitæ Puritate.

Christus Dominus quamvis Apostolis, quos Sacerdotes consecraturus, & sacrâ Eucharistiâ refecturus erat, dixisset

(e) *Eccli. 18.* (f) *Amos. 4.*

(g) *Vos mundi estis*, illud tamen adjecit; *qui lotus est, non indiget nisi ut pedes lavet.* His verbis indicans homini etiam à gravioribus peccatis libero, affectus inordinatos, qui sunt animæ pedes abluendos esse. Etenim si in veteri testamento, ubi tantum hujus divinissimi sacrificii umbra erat, sub mortis comminatione priscis Sacerdotibus mandabatur, ut ab omni maculâ & immunditiâ essent expertes. (h) *Omnis homo qui accesserit de stirpe vestra ad ea quæ consecrata sunt, in quo est immunditia, peribit coram Domino.* (i) Quo non oportet esse puriorem Sacerdotem novæ legis tali fruentem sacrificio, quo solari radio non splendidiorē manum agni immaculati carnem dividentem, os quod igne spirituali repletur, linguam quæ tremendo nimis sanguine rubescit?

Atque hujus puritatis defectus sæpè in causa est, cur Sacerdotes non pauci tam parvum ex frequenti hujus divini sacrificii participatione fructum reportent, adeò ut non immeritò hanc Prophetæ objurgationem eis adaptaveris. (k) *Comedistis & non estis satiati: bibistis & non estis inebriati; operuistis vos & non estis calefacti: & qui mercedes congregavit misit eas in sacculum perisum: nempe in cor distractum & vanita-*

(g) *Joan.* (h) *Levit. 22.* (i) *S. Chrys. Hom. 83. in Matth.* (k) *Agg. 1.*

210 *De Sacro-sancto*

tibus discissum. Ne tamen omnino diffidas, si perfectam istam munditiem tibi deesseprehenderis; sed frequenti quotidianorum defectuum confessione & cordis contritione, animæ tuæ labes refarcire satagas.

ARTICULUS SECUNDUS.

De rectitudine intentionis.

Secunda Sacerdotis dispositio ad celebrandum est intentio recta; constat enim omnes actiones nostras vel vituperii notam, vel virtutis laudem moereri, prout finis quem intendimus laudabilis est vel vitiosus: væ igitur iis Sacerdotibus (1) qui dum.... divina mysteria accipiunt, non cœlestem panem, sed terrenum quærunt: non spiritum sed lucrum: non Dei honorem, sed suam ambitionem; non salutem animarum, sed quæstum pecuniarem: & ita corpus Domini non tam accipiunt quam rapiunt: quia accedunt non vocari à Dēo, sed impulsī à suā cupiditate & avaritiā.

Quin & illud peculiariter cavendum est, ne ex solā quadam aridā & insipidā consuetudine ad sacrificium offerendum accedas, sed excelsum aliquem, & cœlestem finem tibi proponas, quales sunt qui sequuntur. 1. Dei suprema laus & adoratio. 2. Sanctorum in cœlis coronatorum reli-

(1) *S. Bonav. Tract. de prep. ad Miss. c. 3.*

giosa memoria. 3. Peccatorum venia atque remissio. 4. Propriæ infirmitatis subsidium. 5. Tentationis amotio. 6. Alicujus boni spiritualis impetratio. 7. Pro acceptis Dei donis gratiarum actio. 8. Auxilium vivorum atque mortuorum. 9. Gratiae interioris augmentum. 10. Perseverantiæ in benè coëptis impetratio. 11. Sanctificatio ab omni inquinamento carnis & spiritus. 12. Continuus in virtute & mentis puritate profectus, ut Deo ardentissimâ caritate adhæreas.

Alii ex septem orationis Dominicæ petitionibus, vel ex septem verbis à Christo in cruce prolatis, totidem fines eliciunt, quos in singulos hebdomadæ dies distribuunt.

Quoniam verò personam Christi geris, qui seipsum in salutem totius generis humani Deo Patri obtulit; item & nomine Ecclesiæ agis communis omnium fidelium matris, cui satisfactionum suarum dispensationem salvator noster commisit; ideo in applicatione valoris sacro-sancti Sacrificiî maximè largum & profusum esse te oportet; non est enim quod repulsam aut audaciæ sugillationem pertimescas, ut potè cum offeras Deo filium suum unigenitum illi summè dilectum, ac per omnia æqualem, quæ quidem victima meriti est infinita, cujus pretium nullis limitibus terminis-
vè concluditur.

Sed ne à recto tramite in hujusmodi ap-

plicatione deviare, & in re tanti momenti officio tuo deesse contingat; operæ præ-
tium est advertere triplicem valoris Missæ
portionem, seu triplicem ejus fructum di-
stingui, nimirum generalem, specialem,
& medium.

Primus pertinet ad omnes fideles, quos
Christus & Ecclesia fructuum sacrificii par-
ticipes esse volunt, dummodò capaces
sint, & in eis nullus obex reperiatur: nec
ullâ ex parte ministri requiritur applicatio,
ut communis iste fructus in omnes diffun-
datur.

Secundus ita Sacerdoti proprius est, ut
alteri non possit applicari; cum enim tan-
quam Minister publicus pro seipso sacri-
ficium offerat, dicendo *offero pro innumera-
bilibus peccatis & offensionibus, & negligenti-
us meis*, eo ipso portionem fructûs ejus
sibi applicat, quæ semel ipsi vindicata, non
potest ab altero participari.

Tertius subest liberæ Sacerdotis offeren-
tis dispositioni; debet autem fructum illum
eis applicare pro quibus specialiter cele-
brare tenetur ratione beneficii, vel elee-
mosynæ, vel præcepti superioris, vel alio
quocumque titulo; idque ante Missam, vel
saltem in Missa ante consecrationem; si enim
essentia sacrificii, ut plerique sentiunt, in
sola consecratione consistat, applicatio post
illam facta non prodesset iis pro quibus
fieret, sacrificio quoad substantiam jam
consummato.

Missæ Sacrificio. 213

Cum autem fieri possit ut illi pro quibus peculiariter offerre intendis, fructuum sacrificii capaces non sint, vel eo non indigeant, idè optimum fore censent Theologi, si in eo casu conditionatam habeas voluntatem, & alios substituas qui eo fructu potiantur.

Ad scrupulos denique evitandos qui circa applicationem istam oriri possunt, debes, rejectis incertis opinionibus, hunc sacrificii fructum primo & principaliter illis applicare pro quibus celebrare teneris, tum, sine eorum præjudicio, aliis etiam applicare licebit tibi charitate aut alia quavis ratione conjunctis, seu commendatis; tuam intentionem, voluntati Christi summi Sacerdotis perfectè conformando & submittendo; sic enim poteris turâ conscientia, ex infinito & nunquam exhauriendo satisfactionum & meritorum ejus thesauro cujus dispensator constitueris, partem aliquam in plures derivare, quæ ex infinitâ Dei misericordiâ & bonitate non nisi uberrima sperari potest.

ARTICULUS TERTIUS.

De actuali Devotione.

I Gnem, (m) inquit Christus Dominus; veni mittere in terram & quid volo nisi ut accendatur. In hoc igitur sedulò tibi in-

(m) *Luc 12.*

cumbendum est, ut ardentissimum Christi amorem cujus deliciae sunt esse cum filiis hominum, flagrantissimam charitate & devotione compenses. Vix autem fieri poterit ut fervida illa devotione non exardescas, si fide viva, & intimo sensu sequentia capita mente conceperis.

Primum desumitur ex victima quae offertur, nempe ipsa est Christus Dominus, verus Deus & verus homo, salvator & iudex omnium, non jam mortalis & passibilis, sed immortalis & impassibilis; unde ratione ipsius, actio ipsa sacrificandi omnes humanas actiones transcendit, etiam actus coelitus tanta charitate Deo adhaerentium. Cavendum ergo ne tua irreverentia tantae rei oblationem dehonestes.

Secundum. Ex Persona cui offertur, quae est solus Deus: nulli enim Sanctorum, nec ipsi Beatae Virgini offerri potest, sed ex ipsa intrinseca rei natura soli Deo debetur; quia per victimae illius mactationem incruentam, agnoscimus Deum esse rerum omnium auctorem & Dominum, profiteamurque nos divinae majestati totos devoveri cum victimam, cujus sanguinem in huiusce nostri affectus testimonium offerimus.

Tertium. Ex modo quo offertur, nempe ex ipsa consecratione, qua panis & vinum in corpus & sanguinem Christi transubstantiantur, manentibus accidentibus sine subiecto. Est autem ista actio omnino mira-

culosa, & excedit omnem creaturæ virtutem & potentiam, à nulloque nisi à solo Deo præstari potest.

Quartum. Ex valore ipsius sacrificii, qui ratione victimæ infinitus est, sicut merita & passio Christi; ac proindè æquè placet Deo ac mors ipsius in cruce perpeffa; licet actualem efficientiam, Deo ita volente, non nisi finitam habeat.

Quintum. Ex fine propter quem institutum fuit: ut nimirum Deo creatori nostro supremum patriæ cultum exhiberemus; nostramque servitutem & subjectionem humillimè testificaremur. Ut dignas ei gratias pro universis beneficiis ejus perpetuò persolvamus. Ad auxilia divinæ gratiæ impetranda, & Dei protectionem in omnibus vitæ hujus angustiiis comparandam. Ad obtinendam peccatorum veniam, ad iram Dei placandam, & imminetia flagella avertenda. Ad succurrendum omnium vivorum & defunctorum necessitatibus. Uno verbo spectaculum factus es Deo & Angelis & hominibus; cave ergo ne quid indecens & ineptum in te appareat, quod Dei ac cœlestium civium purissimos oculos offendat, item ne quid agas quo, & Ecclesiæ militantis in terra, & patientis in Purgatorio, exspectatio defraudetur.

Sextum. Quoniam verò in hoc incruento sacrificio, cruentum illud quod semel in cruce peractum est, ex quo omnia bo-

na, omnesque thesauri divinæ gratiæ profluxerunt, non verbis tantum sed reipsa repræsentatur & exprimitur; una si quidem & eadem est hostia, idem principalis offerens, idem Christus qui immolatur: idcirco, cum ad sacrum faciendum te præparas, fasciculum tibi colligere debes ex omnibus anxietatibus & amaritudinibus Domini, & inter ubera tua collocare, cordisque medullis inserere; mente & affectu sedulo revolvendo omnia tormenta quæ pro salute nostrâ perpeffus est: hæc frequenter in ore, hæc semper in corde habeas; & hæc tibi sit sublimior Philosophia, scire Jesum, & hunc crucifixum.

Denique necessaria est ad excitandam devotionem humilitas, quæ, præ cæteris virtutibus, in institutione hujus sacrificii maximè enituit: item & ingens fames, fervens desiderium, atque ardentissimus amor hujus Angelici panis, ad quem sumendum nos amnatissimè invitat Dominus dicens. (n) *Venite ad me omnes qui laboratis & onerati estis, & ego reficiam vos.*

(n) *Matth. 11.*



CAPUT

CAPUT SECUNDUM.

Quid præstare debeat Sacerdos in ipsâ Missæ celebratione.

QUAM triste est & deplorandum, (a) ait Card. Bellarminus, videre Sacerdotem divina mysteria peragentem, Angelorum choris undique septum, qui ad ea quæ operatur & loquitur, stupent ac tremunt, & præ admiratione ingentes clamores excitant; & tamen ipse Sacerdos in medio positus, torus frigidus & quasi stupidus, non attendit quid agat, non intelligit quid loquatur; & ita properat ad finem, ita signa involvit, ita verba præcipitat, quasi latronibus à tergo insequentibus urgeretur! Clamamus in Sacramento Altaris Christum ipsum esse præsentem, & interim nonnulli ita se gerunt, ita sacra tractant mysteria, quasi nihil minus verum esse putarent. Nonne Sacerdoti ejusmodi illud aptissimè convenit, quod olim Tertullianus, cum diversam rem pertractaret, postulavit; *sacrificat? An insultat?*

Ut hanc tam gravem objurgationem à te avertas, sedulò allaborabis ut parato

(a) *Con. 9 Dom. 4. Advent. & lib. 1. de arte benè morien. c. 14.*

mærentique per poenitentiam animo ad sacrum faciendum accedas; ita ut per exteriora, pietas interior indicetur, rectumque populus exemplum à te defumat, quæ agenda sunt non intempestivè properes. ea simul cum verbis conglobando, ubi actus prius absolvendi sunt quam verba pronuntientur; quæ non secreta, altâ & intelligibili voce proferas; quæ verò secreta morosè & distinctè submissâ tamen voce exprimas; omnis linguæ festinatio prorsus amanderetur; quidquid demùm vel agendum vel ore proferendum est, cùm seriâ mentis consideratione jungatur. Ad hoc comparatum est præsens caput, in quo præmissis, ad singulas missæ partes, brevibus institutionibus, ex præclaro SS. Dom. nostri Papæ Benedicti XIV tractatu de sacrificio Missæ, ut plurimùm, excerptis; pii affectus, ex asceticis optimæ notæ auctoribus deprompti, tibi suppetent, ex quibus & uberiores profectus spirituales haurire, & pietatem tuam magis ac magis inflammare poteris.

ARTICULUS PRIMUS.

De ablutione manuum, vasis sacris, & vestibus Sacerdotalibus.

I. **V**etus est Ecclesiæ consuetudo, ut Sacerdotes antequam Missam celebrant manus lavent: hanc commemorat

Missæ Sacrificio. 219

S. Paulinus Episc. Nolanus Epist. 32. ad Severum, & S. Chrysostomus Hom. 20. ad Populum Antioch. num 7. ubi sic arguit Sacerdotem: *Non audes illotis manibus sacram victimam attrectare, etiam si mille necessitatibus premaris? Ne igitur illotâ accedas animâ; hoc enim multò, quam illud, est gravius, & acerbius supplicium importat.* Dum igitur manus lavat Sacerdos ferventissimo contritionis actu ab omni vel levissimâ culpâ cor suum abluere conetur, eò tendit oratio quam profert. *Da Domine virtutem manibus meis, ad abstergendam omnem maculam; ut sine pollutione mentis & corporis valeam tibi servire.*

2. In Rubrica Missalis præscribitur, ut calix omninò vel aureus sit, vel saltem argenteus, cujus tamen cuppa internè sit auro illita, itidem patena vel aurea sit, vel ex argento, & deaurata: super os calicis ponatur Purificatorium, & super illud Patena cum Hostiâ, quæ Pallâ operiatur; deinde Calix cum his omnibus obducto tegatur velo, & huic Bursa, ejusdem coloris quo sunt cætera Paramenta, imponatur, in quam Corporale conjectum sit plicatum, è lino, ab omni vel sericâ vel aureâ simbriâ nudum, omni ornatu detractò. Calicem & Patenam, antequam iis utaris, Episcopus consecraverit: Purificatorium verò, Corporale & Pallam, vel Episcopus benedixerit, vel quilibet alius Sacerdos, cui

220 - De Sacro-sancto

ejusmodi sit potestas talia benedicendi. Calix novum sepulcrum quo conditus est Christus Dominus; Patena revolutum lapidem significat supra portam monumenti; corporale syndonem mundam exprimit, quâ Joseph ab Arimatheâ Corpus Christi involvit; ut patet ex his Ildeberti Archiepiscopi Turonensis Carminibus.

*Ara Crucis, Tumulique Calix, Lapidisque
Patena,*

Sydonis officium candida Byssus habet.

Ex quibus admoneris, ut dum ista componis, Passionem Christi jugiter mente revolvas.

3. Ad illud idem spectant vestes Sacerdotales, quarum multiplices sunt symbolici significatus. In Ordinatione Subdiaconi, Episcopus ordinandi caput amictu obnubit dicens: *Accipe Amictum per quem designatur castigatio vocis.* Et Sacerdos Missam celebraturus, accipiens illum, ait: *Impone Domine capiti meo galeam salutis, ad expugnandos diabolicos incursus.* Juxta hanc orationem, ex Ecclesiæ sensu, Amictus designat normam illam rectam, quâ Sacerdos uti debet in omnibus suis verbis; itemque robur illud significat, quo diabolicas tentationes retundere debet & frangere. Non desunt aliæ Amictûs mysticæ significationes: quidam aiunt Amictum velum illud significare, quo Judæi Christo Jesu

faciem velarunt , cum illi colaphos impigerunt ; aut spineam coronam quam ejus capiti imposuerunt ; vel etiam exprimi Christum sub humanitatis amictu suam abscondisse Divinitatem. Quod vero ad moralem significationem pertinet , nonnulli putant , Amictu salutis galeam significari , spemque in Deum , quâ hostes nostros superemus , & fortitudinem in divinis exequendis officiis. Dicunt etiam , ex eo quod Amictu collum contegimus , de voce , quæ per os & guttur emittitur , custodiendâ ; quod super humeros extendatur , de suavi jugo Domini portando nos admoneri ; denique quod supra pectus alligetur , Sacerdotibus illud in memoriam revocari , nullis fas esse quam divinis cogitationibus eorum animum patere.

4. Cum Albam induit Sacerdos , ait : *Dealba me , Domine , & munda cor meum , ut in sanguine Agni dealbatus gaudiis perfruar sempiternis.* Ex hac oratione facile intelligi potest , per Albam significari Jesu-Christi integerrimam , & sacratissimam conversationem , quam ab initio suæ conceptionis usque in finem in carne duxit : unde Sacerdos dum hoc se indumento induit , acceptæ in Baptismo novæ & candidæ stolæ memor , seipsum admoneat , quomodò in sancta & candida conversatione persistat. Docent nonnulli per Albam nobis ob oculos poni Albam illam vestem , quâ indu-

tum Christum Jesum Herodes illufit , atque addunt , Albâ , de cordis & linguæ puritate , quam petimus per Agni immaculati merita ; itemque ejus longitudine , de perseverando nos admoneri , eam denique effe beatæ symbolum æternitatis.

5. Cum fe cingulo præcingit Sacerdos ait : *Præcinge me , Domine , cingulo puritatis , & extingue in lumbis meis humorem libidinis , ut maneat in me virtus continentia & castitatis.* Ex his verbis claret , non eâ duntaxat de causa cingulum adhiberi , ut impediat ne vestis fluat , ne-ve Sacerdoti offendiculum præbeat , sed quivis faciliè intelliget , in illo non deesse mysticum significatum. Itaque Sacerdos ex hoc admoneatur , quomodo , juxta Salvatoris nostri verbum , lumbos per continentiam debeat præcingere ; atque ab omni carnis luxuriâ appetitum frenare. Quidam piè putant cingulo funem significari , quo Christus Jesus est alligatus in horto.

6. Episcopus dùm sinistro Subdiaconi brachio Manipulum aptat , hæc profert verba : *Accipe Manipulum , per quem designatur fructus bonorum operum.* Et Sacerdos , quando illum sumit , ait : *Merear Domine portare Manipulum fletus & doloris , ut cum exultatione recipiam mercedem laboris.* Per Manipulum igitur pœnitentia debet intelligi , quâ quotidiani excessus labes extergitur : in sinistro brachio gestatur , quia in

præsenti tempore tantum vita nostra poenitentia emundatur. Addunt prætereà nonnulli Manipulo è brachio pendente vincula significari, quibus iterum Christus alligatus est, cum ad columnam flagellandus esset.

7. Episcopus in Ordinatione, sinistro Diaconi humero stolam imponit, dicens : *Accipe Stolam candidam de manu Dei ; adimple ministerium tuum ; potens est enim Deus, ut augeat tibi gratiam suam.* Cum verò Diacono Presbyteratus Ordinem confert, stolæ, quæ ex sinistro humero pendet, partem alteram super dextrum humerum ponit dicens : *Accipe jugum Domini, jugum enim ejus suave est, & onus ejus leve.* Cum Stolam induit Sacerdos, ait : *Redde mihi, Domine, stolam immortalitatis, quam perdidisti in prævaricatione primi parentis ; & quamvis indignus accedo ad tuum sacrum mysterium, merear tamen gaudium sempiternum.* Itaque Stola suave Christi jugum significat ; quia verò nonnisi per obedientiam, & jugo Domini colla subjiendo, ad eum statum restituendi sumus, unde per inobedientiam primi parentis decidimus, proptereà Sacerdos Stolam sibi imponens, à Deo petit stolam immortalitatis, quam in Adæ prævaricatione amisit.

8. Episcopus quando Diaconum ad Sacerdotium promovet, & super ejus humeros Planetam imponit, quæ ex anteriori parte pendet, in posteriori complicatur,

224 De Sacro-sancto

ait: *Accipe vestem sacerdotalem, per quam charitas intelligitur; potens est enim Deus, ut augeat tibi charitatem, & opus perfectum.* Cum vero Planetæ complicatam partem explicat ac demittit, ait: *Stolâ jucunditatis induat te Dominus.* Sacerdos Missam celebraturus, dum Planetam induit, ait: *Domine, qui dixisti jugum meum suave est, & onus meum leve; fac ut illud sic portare valeam, quod consequar tuam gratiam.* Planeta igitur charitatem significat, quæ cunctis virtutibus supereminet, & earum decorem suo tutamine protegit & illustrat; huic explicationi suffragantur & aliæ quæ afferuntur Planetæ significationes. Vocatur jugum Domini, & jugum leve, cujus suavitas è charitate proficiscitur. Alii subdunt Planetam esse vestem illam nuptialem de quâ loquitur Dominus in Evangelio; at per vestem illam nuptialem, charitatem intelligunt S. Patres. Denique qui dicunt per Planetam significari Christi tunicam inconsutilem, quam illi detraxerunt Judæi, quando cruci illam affixerunt, moralem etiam hunc innuunt significatum; dicendo Christum Jesum charitate impulsus crucem subiisse, & charitatem nostrorum operire multitudinem peccatorum.

9. Denique, ne aliquid huic argumento desit, Episcopus, dum Subdiaconum induit Tunicam, ait: *Tunicâ jucunditatis & indumento lætitiæ induat te Dominus.* Dum verò

Diaconum Dalmaticam induit, dicit: *Induat te Dominus indumento salutis, & vestimento latitiæ, & Dalmaticâ justitiæ circumdet te semper.* Ad Clericum primâ Tonsurâ initiarum, illum induendo superpelliceum, ait: *Induat te Dominus novum hominem, qui secundum Deum creatus est, in justitiâ & sanctitate veritatis.* Ex quibus admonentur Clerici & Altaris ministri, simul & quænam sint horum indumentorum symbolicae significationes; & quænam sint orationes quas mutato pronomine recitare debeant, dum hujusmodi vestes induunt.

ARTICULUS SECUNDUS.

De initio Missæ usque ad Symbolum.

QUæcumque in Missâ præmittuntur Symbolo, olim Missam Cathecumenorum conficiebant, & sunt veluti præparatio ad Missam Fidelium, ut olim dicebatur. Aliqui putant *Missæ* nomen ductum esse à verbo hæbraico *Missach*, quod est oblatio voluntaria: sed eruditorum vulgus hanc vocem è latino derivatam putant, idem enim valet ac missio, seu abeundi licentia, quia in nostra liturgia binæ dimissiones erant, quarum alterâ Diaconus Catechumenos & poenitentes post Evangelium & concionem; alterâ cæteros omnes, Missâ peractâ, dimittebat illis verbis, *Ita Missa est*, quæ secunda dimissio etiamnum remanet.

K v

226 *De Sacro-sancto*

1. Sacerdos stans ante Altaris gradus, in plano Sanctuarii, Missam incipit signo crucis, unde, ex Apostolica traditione cujus testis est Tertullianus, lib. de Corona militis, omnium suarum actionum Christiani sumunt initium. Postea dicit Antiphonam *Introibo*, quâ nihil præsentî actioni accommodatius; tum Psalm. 42. *Judica me Deus*, quem David Rex cecinit cum, Patriâ absens ut Saûlis iram vitaret, seipsum solabatur spe Hierosolymam tandem redeundi, quò sibi liceret ad Altare accedere, & sacrificia offerre. Psalmi hujus suum quisque versum alternis recitant Sacerdos, & Minister vices populi gerens; communem enim oportet esse utriusque ad Altare accedentis fiduciam & gaudium in sacrificiî oblatione. Concluditur Psalmus per *Gloria Patri* quem glorificationis hymnum appellaverunt veteres Patres; illum Fideles in ipsis Ecclesiæ primordiis, sacro abluti Baptismate in nomine Patris, & Filii, & Spiritûs Sancti, in honorem trium Divinarum Personarum canere cœperunt; huic additum est à Conc. Nicæno, ut probabilius est, *Sicut erat*, &c. ad Arianorum hæresim retundendam. Hic Psalmus omittitur in Missis defunctorum, & Passionis tempore, quia Psalmus est lætitiæ, ut constat ex illis verbis, *Quare tristis es anima mea?* Nullus autem in prædictis Missis lætitiæ locus.

2. Dicto *Gloria Patri*, Sacerdos ex Psal,

123 dicit: *Adjutorium nostrum in nomine Domini*, cui respondet Minister, *qui fecit cælum & terram*. Deinde Sacerdos & Minister dicunt *Confiteor*, & orationem *Misereatur*; quia Sacerdos & populus, pro quo Minister loquitur, mutuâ ejusmodi confessione & oratione affecuturos sese confidunt levium peccatorum remissionem, quò puriori mente Deo sacrificium offerant. Trina percussio pectoris ad hæc verba *mea culpa*, &c. contritionem cordis significat, ab exemplo ducta Publicani in Evangelio Luc 18.

3. Stans adhuc infrà gradus Altaris Sacerdos, quasdam preces ex sacris Paginis depromptas *Deus tu conversus*, &c. Ministro itidem respondente, recitat, quibus peccatorum à Deo veniam petit, eamque mentis postulat puritatem, quâ opus est sacrificio Missæ sanctè celebrando. Has preces concludit istâ salutatione quæ per totam Missam septies dicitur, *Dominus vobiscum*: educta est ex lib. Ruth cap. 11. Huic Minister respondet & *cum spiritu tuo*, quæ verba ex S. Pauli ad Galat. cap. 6. v. 18. desumpta videntur. Mutua ista salutatio signum est mutuæ communionis & pacis, quâ Fideles invicem in fide & charitate Christi conjunguntur. Observa ex septem vicibus quibus in Missa dicitur *Dominus vobiscum*, ter Sacerdotem ad populum non se convertere: Primò post *Confiteor*, ut potè qui totus sit in anima sua expianda: Secundò ante Evan;

gelium; quia verbo Dei annunciando intentus est: Tertiò ad Præfationem; cum sublatum ad Deum animum proximoque sacrificio defixum habeat, ut animadverit Gavantus.

4. Deinde Sacerdos, postquam adstantes ad preces Deo fundendas excitavit, dicens *Oremus*, gradus Altaris conscendens, recitat orationes *Aufer à nobis, & Oramus te, Domine, per merita Sanctorum*, &c. ac tùm primum osculatur Altare, quod aliquoties fit in Missæ cursu: Altare autem typus est Christi, eoque osculo adhærere se Christo profitetur, cui, sicut membra capiti, connexi sunt sancti quorum Reliquiæ ibi asservantur: neque enim Missam celebrare fas est in Altari, quod vel sacratum non fuerit, vel petrâ sacrâ non sit instructum: Altaris autem, & petræ consecratio postulat, ut in iis condantur Reliquiæ Sanctorum.

5. Sacerdos osculato Altari, ad cujus sinistram partem se confert, quæ *cornu Epistolæ* dicitur, legit *Introitum* qui constat ex Antiphonâ, Psalmo, & Gloria Patri. Introitus dicitur, seu quod Missæ principium est, seu quia à Choro canebatur, cum Sacerdos ad Altare accederet: hujus auctorem fuisse S. Gregorium communis est opinio. Cum autem plerumque ex verbis veteris Testamenti depromatur, docet Ivô Carnotensis cum quibusdam aliis, per eum nobis in memoriam revocari clamores &

desideria veterum Patrum Messiae adventum expectantium.

6. Lecto Introitu Sacerdos venit ad medium Altare, & dicit, alternis cum Ministro vicibus, ter *Kyrie eleison*, ter *Christe eleison*, & rursus ter *Kyrie eleison*. Græca sunt hæc verba quæ significant *Domine*, vel *Christe miserere*, quâ præcatione nihil ad ea quæ nobis opus sunt accommodatius, ut ea fugiamus pericula quæ semper nostræ imminent animæ, ni Deus nostri misereatur. Novies repetitur tùm ad designandum vehementem postulantium affectum; tùm quia, ut ait S. Thomas, trina fit supplicatio Personæ Patris, trina Personæ Filii, & trina Personæ Spiritus-Sancti, contra triplicem miseriam ignorantiae, culpæ, & poenæ; vel ad significandum quod omnes personæ sunt in se invicem.

7. Postulationem Misericordiæ Divinæ excipit Hymnus *Gloria in excelsis Deo*, quem græci Doxologiam vocant: illius principium ortum est ab Angelis qui Christo-Jesu nato illud cecinerunt, Luca 2. cætera quis addiderit incertum. Ab Oriente in Occidentem transiit, nec continuo in Missam illatus. Septimo sæculo in Missa tantùm Nativitatis Domini cani consueverat, deindè verò ad alias quoque Missas propagatus fuit; ita tamen, ut ab Episcopo tantùm die Dominicâ & solemnibus festis recitaretur, à Presbyteris verò nonnisi Dig

Paschatis, quod evincitur ex Lib. Sacramentorum S. Gregorii. Ab undecimo sæculo Hymnus ille in omnibus dicitur Missis, exceptis illis quæ celebrantur pro Defunctis, & iis quæ in Feriis infrà annum, extra tamen tempus Paschale, & in Dominicis à septuagesima ad sacrum Diem Paschæ; quia tempus illud, tempus est luctûs & poenitentiae, in quo non decet Hymnus lætitiæ & exultationis.

8. Post Hymnum *Gloria in excelsis*, si ex Rubrica dicendus sit, Sacerdos salutat populum per hæc verba *Dominus vobiscum*, Episcopus verò per ista *Pax vobis*; quibus verbis Christus Dominus post Resurrectionem suam Discipulos salutavit. Episcopus enim Christi figura est: in diebus tamen poenitentiae dicit *Dominus vobiscum*, ut reliqui Sacerdotes. Tùm Sacerdos adstantes excitat ut Deum deprecentur dicens *Oremus*, & recitat Orationes quæ vocantur *Collectæ*, Collecta eo donatur nomine, vel quia Sacerdos, qui veluti mediator est Deum inter & homines, vota omnium colligit; vel quia brevis est Oratio quam recitat suprà populum congregatum; vel quia omnes, collectis in se animis, cogitationes & affectus suos ad Deum elevant. Sacerdos interim, sicut in cæteris orationibus, elevatas ad humeros manus tenet, qui quidem orandi modus in veteri ac novo Testamento commendatur: in veteri

David cecinit, *in nomine tuo levabo manus meas. Expandi manus meas ad te.* In novo S. Paulus 1. ad Timoth. 2. *Volo, inquit, viros orare in omni loco levantes puras manus.*

9. Oratio seu Collecta ut plurimum ad Patrem dirigitur, & desinit in hæc verba *Per Dominum nostrum Jesum-Christum*; tum quia Dominus Jesus ad illum modum orare nos docuit Ioan. 6. *Quidquid petieritis Patrem in nomine meo*; tum quia nullum aliud nomen sub cælo datum hominibus, in quo oporteat nos salvos fieri, Actuum 4. tum denique quòd per eum habemus accessum ad Patrem Rom. 5. Ex quibus intelligitur hanc clausulam ab Apostolis esse derivatam, qui eam à Christo Domino acceperunt. Quædam tamen collectæ diriguntur ad Filium cum clausulâ *Qui vivis & regnas*, nè fortasse, inquit Bellarminus, alicui in mentem caderet, non aliam quàm Personam Patris posse disertis verbis invocari. Post Collectam Minister, populi nomine, respondet *Amen*. Hæc vox hæbraïca est, & interdum est affirmantis, cum post fidei dogma adhibetur: quandoque est desiderantis, si post aliquam orationem adhibearur, quâ opem à Deo efflagitamus: aliquando etiam est assentientis, si Sacerdotis oratio rem aliquam respiciat, quam nostrum sit exequi & perficere.

10. Dictâ oratione seu Collectâ legitur Epistola: eo nomine donatur, quia etsi ia-

terdum ex aliis quoque veteris novique Testamenti libris desumatur, plerumque tamen ex Epistolis S. Pauli depromitur. Statui posse videri hanc Lectionem in Missa ab Apostolis esse introductam, ut colligitur ex luculento S. Pauli textu Epist. ad Colos. c. 4. *Cum lecta fuerit apud vos Epistola hæc, facite, ut & in Laodicensium Ecclesia legatur, & eam quæ Laodicensium est, vos legatis; nullo enim alio conventus Christianorum novimus quam qui ad sacram sinaxim agebantur.* Ideo Epistola magnâ cum attentione & reverentiâ legenda est, tanquam sermones Dei per Prophetas & Apostolos nos edocentis; promptusque despondendus animus ad servanda ipsius mandata: de his admonent nos manus, in lectione Epistolæ, suprà librum positæ, & veluti operi admotæ. In fine respondet Minister *Deo gratias*, quam vocem vetustissimam esse & maximè commendandam patet ex S. Augustino qui exprobrat Donatistis quòd illam Catholicorum vocem irriderent.

II. Antiphona quæ post Epistolam dicitur, *Graduale* appellatur, à gradibus; vel quia juxta quosdam in Altaris gradibus canebatur; vel quod cani consueverit, dum Diaconus gradus suggestus seu Ambonis ascenderet. Addunt morem illum fuisse introductum, nè tempus, quo Diaconus recedens ab Altari, in Ambonem conscendit, sine cantu labereretur. Antiphona illa exe-

quendi desiderium significat, & ascensum ad apicem christianæ perfectionis qui sunt fructus Prophetarum & Apostolorum prædicationis.

12. *Alleluia* dicitur post Graduale; Hebraïca vox est, & significat *Laudate Dominum*. Hujus vocis auctorem fuisse David Regem colligitur è Psalmis, quorum multi hoc titulo inscribuntur; ea vox est etiam Tobiae cap. 13. In nova Lege narrat Sanctus Joannes Apoc. 19. se audivisse Choros Angelorum in coelo canentium *Alleluia*; unde licet conjicere pulcherrimum illud canticum è coelis in Ecclesiam fuisse deductum.

13. Quidam è scriptura versiculi qui post Graduale, diebus luctûs & poenitentiae, loco *Alleluia* recitantur, vocantur *Tractus*, cujus etimologia vocis est à trahendo, eo quod tractim & cum prolixitate verborum canatur. Denique *Sequentia* Rithmus est, qui & Jubilatio appellatur, atque etiam *Prosa*, quod in ea nulla carminis lex aut mensura servetur, sequentiae autem illi nomen inditum, quia Graduale consequitur.

14. Lectâ Epistolâ & iis quæ eam consequuntur, Sacerdos ad medium Altare redit, ubi, ut Evangelio legendo sese paret, recitat Orationem *Munda cor meum*, quâ Deum deprecatur, ut cor & labia sibi purificet, quò dignè sanctum annunciare possit Evangelium, quemadmodum (ministerio Seraphim. Isai. 6.) labia Isaiae calculo

234 *De Sacro-sancto*

mundavit ignito. Tùm à Deo benedictionem petens dicit *Jube Domine benedicere* ; Diaconus verò , qui eam postulat à Sacerdote , dicere debet *Jube Domne* , cujus rei apertissima ratio est ; nam vox *Dominus* propriè Deo tantùm convenit , *Domnus* verò , quæ trunca & diminuta vox est , tribuitur hominibus : illud autem discrimen est inter benedictionem quæ à Deo , & illam quæ ab homine petitur , quod à Deo gratias , quibus nobis opus est postulemus ; ab homine autem petamus , Deum ut pro nobis oret , qui super nos benedictionem suam effundat.

15. Post eas Orationes , Sacerdos ad dexteram Altaris partem se confert , & ibi legit Evangelium sive privatam celebret Missam sive solemnem. Illud in Ecclesiæ primordiis legi cœptum esse patet ex S. Clemente & Papiâ apud Eusebium Hist. Eccles. L. 2. c. 15. ubi narrat S. Marcum , Romanis flagitantibus , suum scripsisse Evangelium ; quod cum S. Petrus cognovisset , Librum illum auctoritate suâ comprobasse dicitur , ut deinceps in Ecclesiis legeretur. Sacerdos , dum incipit Evangelium , signo crucis librum signat , quasi dicat , ait Gavantus post Innocent. III. hic Crucifixi liber est ; seipsum verò signat in fronte , ore , & pectore ; in fronte quidem , juxta id quod ait S. Augustinus in Psal. 141. *Usque adeò de cruce non erubescò , ut non in occulto*

habeam crucem Christi, sed in fronte portem. Tùm in ore & pectore juxta illud Apostoli ad Rom. c. 10. *Corde creditur ad justitiam, ore autem confessio fit ad salutem.* In fine osculatur principium Evangelii submissâ voce dicens: *Per Evangelica dicta deleantur nostra delicta*, ad significandum amorem quo ea doctrina amplexanda est & executioni mandanda. Illud tamen non osculatur in Missis Defunctorum; neque cum celebrat coram Cardinali, vel Episcopo in locis ubi Jurisdictionem habent, quibus Evangelium ut osculentur, ipsum Missale deferretur. Demùm Sacerdoti dicenti *Initium, sive Sequentia sancti Evangelii.* Respondet Minister *Gloria tibi Domine*, & ad finem Evangelii idem dicit: *Laus tibi Christe*, in gratiarum actionem pro beneficio tantæ & tam salutaris doctrinæ. Populus verò stat, cum Evangelium legitur, ut significet paratum se esse ad ea Domini perficienda mandata, quæ in Evangelio leguntur.

16. Diximus, lecto Evangelio, Catechumenorum Missam esse peractam, ad cujus rei intelligentiam sciendum, publicos poenitentes olim in quatuor classes distribui. Alii *Flentes*, alii *Audientes*, alii *Prostrati*, alii *Consistentes* dicebantur. Flentes stabant extra templi januam ubi sua peccata deflebant. Audientes & Prostrati in ea templi parte quæ Narthex appellabatur, ubi etiam Catechumeni morabantur cum

Energumenis: hi omnes, ut patet ex Conc. Arausic. I. dicto Evangelio & Sermone habito, Diacono ad eos proclamante ut abscederint, extra templum dimittébantur. Quarta Pœnitentium classis, scilicet consistentes, unâ cum cæteris Fidelibus, Missæ integræ aderant, non tamen Eucharistiæ participes erant. Huic priori Missæ, licet Pœnitentes, seu *Audientes & Prostrati*, adessent, Catechumenorum tamen nomen attributum est, eo quod major eorum esset numerus.

ARTICULUS TERTIUS.

De Symbolo usque ad Canonem.

Missa quæ olim Fidelium, seu Missa Sacramentorum dicebatur incipit à Symbolo & in tres partes dividitur. Prima complectitur quæ præcedunt Canonem. Secunda quæ sunt Canonis. Tertia quæ Canonem sequuntur. De prima parte in præsentī articulo dicturi sumus.

I. Itaque Symbolum signum est quoddam seu tessera, quâ Fideles ab infidelibus seceruntur, ductâ similitudine ex militari signo, quo milites à transfugis distinguebantur. Quatuor sunt Symbola: Primum, *Apostolicum*, quod Apostoli condidere, istud non fuit litteris commendatum, sed voce traditum Fidelibus, atque ita ore ad os translatum. Secundum, Nicænum est, in Concilio

Missæ sacrificio. 237

Nicæno I. compositum ad profligandam Arii impietatem. Tertium, *Constantinopolitanum* in Concilio Constantinopolitano I. editum ad confutandam Macedonii hæresim. Quartum, *Athanasianum* est, quod sub S. Athanasii nomine circumfertur: ubi observandum, quatuor illa Symbola, non sic accipienda, quasi Ecclesia, *columna & firmamentum veritatis*, in fide variaverit; sed quod illam unam & semper eandem fidem à Christo semel per Apostolos acceptam, & immobilem retentam, pro data novarum hæreseum occasione, uberius explicet & evolvat; ita ut si ea Symbola conferamus, nullum inter ea discrimen appareat; sed Nicænum & Constantinopolitanum Concilium expressius enucleasse deprehendatur, quæ in Symbolo Apostolico ab Ariani & Macedonianis oppugnabantur.

2. Symbolum Constantinopolitanum illud est quod in Missa recitatur, eo quod in illo juxta Cardinalem Bona Orthodoxæ fidei articuli disertius & luculentius explicantur, & exortæ usque ad ea tempora hæreses profligentur. Ecclesiæ orientis multò ante, quam occidentalis Ecclesia illud in Missa recitare cœperunt. Jam in Hispania & in Gallia Narbonensi ritus ille sæculo sexto invaluerat ut colligitur ex can. 2. Conc. III. Toletani an. 589. habiti: in Germania verò ante annum 804. ut claret ex collatione quam sub Carolo Magno Leo

238 *De Sacro-sancto*

III. Pontifex, cum quibusdam Episcopis habuit, quæque à Baronio ad illum annum refertur. Nonnulli sunt quibus videtur Ecclesiam Romanam non ante 11. sæculum coepisse Symbolum in Missa recitare, istudque colligunt ex testimonio Bernonis Abbatis, qui narrat Romanos ab Imperatore Henrico interrogatos, ipso Bernone assistente, cur Symbolum non canerent, respondisse, id ita fieri quod Romana Ecclesia non fuisset aliquando ullâ hæreseos fæce infecta, sed secundum S. Petri doctrinam, in soliditate Catholicæ fidei permansisset inconcussa; sed Imperatorem non antea desiisse, quam omnium consensu id Dom. Benedicto Apostolico persuaserit, ut ad publicam Missam illud decantarent: verum ut rectè annotat Martene, non negat Berno Romæ Symbolum recitari consuevisse, sed cantari, unde dicendum Imperatorem à Pontifice illud impetrasse, non ut recitaretur, sed ut quemadmodum in aliis Ecclesiis caneretur. Multa enim Mabillonius, Pater Le Brun, & ipse Martene congerunt argumenta quibus evincitur, jam ante 9. sæc. Symbolum illud in Ecclesia Romana recitari consuevisse.

3. Quod attinet ad actiones Sacerdotis cum dicit *Credo*, Rubricæ hæc præscribunt: Dicto Evangelio stans in medio Altaris versus crucem elevans & extendens manus, incipit (si dicendum sit) *Credo*. Cum dicit,

Missæ Sacrificio. 239

in unum Deum, jungit manus & caput cruci inclinatur; quo erecto, stans ibidem junctis ante pectus manibus, ut prius, prosequitur usque ad finem. Cum dicit, *Jesum-Christum*, caput cruci inclinatur. Cum dicit, *Et incarnatus est*, usque ad, & *Homo factus est* inclusivè, genuflectit. Cum dicit, *simul adoratur*, caput cruci inclinatur. Cum dicit, *Et vitam venturi sæculi*, producit sibi manu dextrâ signum crucis à fronte ad pectus. Ex his quæ Sacerdos ex Rubrica facere jubetur; notanda est genuflexio ad ea verba, *Et incarnatus est*, usque ad illa inclusivè, *Et homo factus est*, quæ quidem genuflexio religiose instituta est in representationem, ac venerationem illius eximie humilitatis, quâ humiliavit, & exinanivit seipsum Filius Dei, formam servi accipiens, & habitu inventus ut homo. Rationem affert S. Thomas cur in Missâ post Evangelium dicatur Symbolum, & quamobrem in quibusdam Missis dicatur, in quibusdam verò omittatur. *Lectio*, inquit, *Evangelio Symbolum cantatur, in quo populus ostendit, se per Fidem doctrinæ Christi assentiri. Cantatur autem hoc Symbolum in Festis, de quibus fit aliqua mentio in Symbolo, sicut in Festis Christi, B. Virginis, & Apostolorum, qui hanc fidem fundaverunt, & aliis hujusmodi.*

4. Dicto Symbolo, si juxta Rubricam recitandum sit, Sacerdos osculatur Altare, salutatur populum dicens *Dominus vobiscum.*

240 *De Sacro-sancto*

& excitato populo ad orandum verbo illo *Oremus* dicit *Offertorium* quod quidem ex eo nomen traxisse videtur, quia cani consueverat dum Fideles, ex veteri consuetudine, panem & vinum in sacrificii usum offerebant. Offertorii nomine ea omnia continentur, quæ fiunt à Sacerdote & Ministris, quæque recitantur ab illis verbis *Dominus vobiscum*, usque ad clausulam *Secretæ orationis*, cum Sacerdos elatâ voce dicit: *Per omnia sæcula sæculorum*. Quia nempe, præviâ quâdam oblatione Deo dicat & devovet materiam panis & vini in corpus & sanguinem Christi convertendam. Illa igitur oblatio dumtaxat præparatoria est, neque enim in Missa fit sacrificium panis & vini, sed corporis & sanguinis Domini. Dum autem illam perficis oblationem, offer etiam Deo cor tuum, & omnium Fidelium, ut sicut panis & vinum mox convertenda sunt in corpus & sanguinem Christi; ita cor tuum & omnium Fidelium, in ipsum Christum per amorem & imitationem transformentur; adeò ut dicere omnes possint, *vivo ego, jam non ego, vivit verò in me Christus*.

5. Ut singula prosequamur, dicto Offertorio Sacerdos Calicem detegit, Patenam capit cum Hostia, & utrisque manibus sublatam usque ad pectus sustinens, elevatis ad coelum oculis & statim demissis, dicit orationem: *Suscipe sancte Pater*. In ea ora-
none

tione æternum Patrem quem Deum vivum & verum appellat, ut est apud Danielelem c. 14. orat, ut immaculatam Hostiam suscipiat pro suis innumerabilibus peccatis, offensionibus & negligentis; non se solum, sed quotquot adstant, & Fideles omnes vivos mortuosque Deo commendans, ut salutem æternam consequantur, juxta præceptum S. Pauli qui ad Hæbr. c. 7. Sacerdotes ait debere *prius pro suis delictis Hostias offerre, deinde pro populi.* In hac oratione Hostiam etsi nondum consecratam vocat immaculatam, quod quidem nemo miretur; neque enim ea verba ad panem referenda sunt, sed ad corpus Christi, in quod panis hic, vi futuræ consecrationis, remanentibus speciebus, quam primum est convertendus. In fine orationis Sacerdos faciens crucem cum Patenâ deponit Hostiam super corporale, & ad dexteram collocat Patenam, ita ut ejusdem quædam pars sub corporali recta sit. Illud autem signum crucis juxta quosdam significat Hostiam super crucem poni, ubi Christus Jesus æterno Patri ipse se obtulit, ut nos à peccatis redimeret.

6. Pergit Sacerdos, & in cornu Epistolæ Calicem apprehendit, Purificatorio extergit, & sinistrâ illius nodum tenens, acceptâ de Ministri manu ampullâ vini, ingerit vinum in Calicem; deinde eodem modo tenens Calicem producit signum crucis super ampullam aquæ dicens orationem: *Deus*

qui humanæ substantiæ, & infundens paululum aquæ in Calicem prosequitur: *Da nobis per hujus aquæ & vini mysterium.* Quod si celebret pro defunctis, non facit signum crucis super aquam, sed infundens illam absque benedictione, dicit orationem ut suprâ. Quodnam sit mysterium quod in ea vini & aquæ commixtione continetur explicat S. Cyprianus epist. ad Cæcil. *Videmus, inquit, in aqua Populum intelligi, in vino ostendi sanguinem Christi; quando autem in Calice aqua vino miscetur, Christo Populus adunatur, & credentium plebs ei in quem credidit copulatur & conjungitur.* Inde infert Gavantus nullam fieri aquæ benedictionem in Missis Defunctorum, quia aqua in his significat Populum Purgatorii, qui jam est in gratia. Quidam per eam aquæ & vini commixtionem putant, Incarnationis ostendi mysterium, in quo humana natura cum divina hypostaticè juncta est, quam explicationem tueri videntur hæc orationis verba ex 2. S. Pet. Epist. c. 1. desumpta: *Ejus divinitatis esse consortes qui humanitatis nostræ fieri dignatus est particeps J. C.* Alii demùm per eam commixtionem putant intelligi aquam & sanguinem quæ defluerunt à latere Christi; & sanè. Sacerdos juxta Riturum Ambrosianum, & Carthusiani cum aquam in Calicem infundunt, dicunt: *De latere Christi exivit sanguis & aqua. In nomine Patris, & Filii, & Spiritus-Sancti.*

Missæ Sacrificio. 243

7. Sacerdos calicem dexterâ apprehendit manu, eumque sublatum utrâque manu tenens ad altitudinem oculorum, videlicet sinistrâ pedem, dexterâ autem nodum infra cuppam, stans in medio Altari, elevatis in cœlum oculis, eam dicit orationem. *Offerimus tibi, Domine*: quâ dictâ, facit signum Crucis cum calice super corporale, & ipsum in medio ita post Hostiam collocat, ut Hostia media sit inter Sacerdotem & calicem, quem Pallâ regit. Observat. Card. Bona, in prædictâ oratione, Sacerdotem dicere *offerimus*, non verò *offero* sicut in oblatione Hostiæ, eo quod juxta Romanum Ritus in Missa solemni Sacerdos simul cum Diacono hanc orationem recitat, qui quidem Ritus in Missa privata retentus est. Animadvertit Bellarminus, Sacerdotem in prædictâ oratione non dicere *Calicem salutarem*, sed *Calicem salutaris*, id est Calicem Christi Salvatoris, qui instituit ut calix ille offerretur & consecraretur, & addit, quod etiam si diceretur *Calicem salutarem*, tamen vera esset eorum verborum sententia, quæ referenda essent non ad præsentem calicis statum; sed ad eum quo redigendus est per consecrationem.

8. Factâ oblatione calicis Sacerdos junctis manibus super Altare positus, aliquantulum inclinatus, submissâ voce ait: *In spiritu humilitatis*, quæ quidem verba desumuntur ex longiori trium Puerorum ora-

244 De Sacro-sancto

tione, qui Babylone in fornacem coniecti sunt, *Daniel. c. 3.* Postea erectus, elevans oculos, manusque expandens, & statim jungens ante pectus ait: *Veni sanctificator*, &c. & cum dicit *Benedic*, dexteram manu super Hostiam & Calicem simul signum crucis producit. Circa postremam hanc orationem observandum, quod quamvis propter hæc verba *Omnipotens æterne Deus*, directa illa videatur ad Patrem, seu indiscriminatim ad tres Personas, quæ sunt unus Deus; reveram tamen illam ad Spiritum sanctum dirigi. Istud indicant veteres liturgiæ Ecclesiæ Græcæ & Latinæ: in iis enim petitur ut ignis Spiritus sancti delabatur, absumatque panem & vinum, & in Corpus ac Sanguinem Christi convertat. Id etiam aperte significat verbum *Veni*; nam juxta Sacrarum Scripturarum idiomatum, duas tantum Personas Filium & Spiritum sanctum invitat Ecclesia ut dilabatur ex coelo: cum vero sermonem dirigit ad Patrem, non dicit *Veni*, Sed *Mitte nobis Redemptorem*, vel, *Mitte Spiritum tuum*. Quamobrem cum oratio *Veni sanctificator*, non possit intelligi de Filio, pro quo fit deprecatio; sequitur illam de Spiritu sancto esse intelligendam.

9. Dicta oratione *Veni sanctificator*, Sacerdos à medio Altari se confert ad cornu Epistolæ, & Ministro aquam fundente, lavat manus, id est extremitates digitorum

Missæ sacrificio. 245

pollicis & indicis dicens Psalmum *Lavabo inter innocentes cum Gloria Patri*; qui tamen versus in Missis defunctorum, & à Dominica Passionis usque ad Sabbatum sanctum omittitur. Binas hujus ablutionis rationes affert S. Thomas, primam quidem naturalem, quia aliqua pretiosa tractare non consuevimus nisi manibus ablutis; undè indecens videtur, quod ad tantum sacramentum aliquis accedat manibus inquinatis; secunda moralis est, quia extremitatum ablutio significat emundationem etiam à minimis peccatis, & talis emundatio requiritur ab eo qui accedit ad tantum sacramentum. Psalmus *Lavabo* huic actioni aptissimè convenit. Quamvis in eo Sacerdos ex intima animi sui conscientia suam innocentiam declaret his verbis: *Ego autem in innocentia mea*, &c. quod nonnullis visum est absolum à Christiana humilitate: attamen eodem tempore contestatur sibi opus esse Redemptoris ope & misericordiæ; addit enim: *Redime me & miserere mei*, nec timore peccandi caret nisi Deus præsto sit: *Nè perdas cum impiis*, &c. quibus sensibus laudata virtus continetur.

10. Sacerdos extergit manus, iisque ante pectus junctis ad medium altare redit; ubi, elevatis ad Deum oculis, statimque demissis, paululum se inclinans dicit orationem *Suscipe sancta Trinitas*. Manus junctæ, & corporis inclinationes de quibus hic

& alibi fit mentio, humilitatem Sacerdotis exprimunt, & Christi humilitatem significant juxta doctrinam S. Thomæ. Supradictæ orationis substantia in græcis liturgiis & in Missali Ambrosiano reperitur: in ea mentio fit de Passione, Resurrectione & Ascensione Domini nostri Jesu-Christi, idque ut totum exprimaturs Christi sacrificium: Victima enim hujus Sacrificii in incarnatione primùm electa & sanctificata, & in cruce mactata; in Resurrectione demùm ac in Ascensione consummata fuit & in odorem suavitatis accepta, quando absorptum fuit in Christo *quod mortale erat à vita*, ut ait Apostolus, & victima à Deo accepta est in odorem suavitatis, & ad ejus dexteram fuit collocata. Quatuor primis Ecclesiæ seculis Fideles veriti nè quam reprobandant deorum multitudinem sibi exprobrarent ii qui trium Personarum mysterium ignorabant, à sanctissima Trinitate nominandâ abstinebant, & omnes orationes ad Deum Patrem dirigebant: at vero sublato illo metu, nihil verita est Ecclesia tum Latina, tum Græca, in offerendo sacrificio, dicere: *suscipe Sancta Trinitas*. In eadem Oratione Sacerdos sanctissimam Trinitatem deprecatur, oblationem ut accipiat in honorem B. Mariæ Virginis, S. Joannis-Baptistæ, Ss. Apostolorum Petri & Pauli, Sanctorum quorum Reliquiæ conduntur in Altari, & omnium aliorum Sanctorum, ut

Missæ sacrificio. 247

illis proficiat ad honorem nobis autem ad salutem ; quidquid enim honoris & gloriæ adepti sunt sancti, id omne vi sacrificii Christi sunt consecuti, & Christi honor & gloria diffunditur in Sanctos, qui sunt viventia membra cum eo, veluti cum capite, conjuncta.

11. Post Orationem *Suscipe Sancta Trinitas*, Sacerdos osculatur Altare, & ad populum conversus dicit *Orate Fratres*, & submissâ voce prosequitur, *ut meum ac vestrum sacrificium*, &c. Non absimili Oratione respondet Minister Deum deprecans, ut sacrificium suscipiat ad laudem & honorem nominis sui, & ad nostram & Ecclesiæ universæ utilitatem. Deinde Sacerdos in gyrum vertitur ad eam partem ubi est Missale, ita ut circulum describat, & in medio Altari remaneat, ac submissâ voce dicit, *Amen*; subindè dicit *Oremus*, & Orationes prosequitur, quæ dicuntur Secretæ. Ideo ex Minucio Felice Sacerdos dicit *Orate Fratres*, quia Christiani olim invicem se fratres appellare consueverant, ut pote qui unum Deum parentem haberent, essentque ejusdem Fidei consortes, & spei coheredes. Præfatæ Orationes vocantur *Secretæ* eo quod submissâ voce à Sacerdote recitandæ sint, ita ut Sacerdos ipsemet se audiat, & à circumstantibus non audiat.

12. Sacerdos ubi ad postremæ orationis

248 *De Sacro-sancto*

secretæ finem pervenit, vocem attollens dicit : *Per omnia secula seculorum*, quæ clausula ad orationes pertinet quæ jam recitatæ sunt, & ideo elatâ voce profertur, ut Populus respondeat *Amen*, & orationes à Sacerdote recitatas confirmet. Sequitur deinde Præfatio; ipsa est oratio, seu gratiarum actio, quæ canoni quasi proloquium quoddam præmittitur, & quâ disponitur Sacerdos & Populus ad tremendorum mysteriorum confectionem; unde Sacerdos post salutationem ad populum, in qua tamen ad eum non se convertit, incipit per hæc verba *Sursum corda*, ut dum respondet Plebs per Ministrum, *habemus ad Dominum*, admonetur nihil aliud se quam Dominum cogitare debere: simili ratione prosequitur Sacerdos & dicit *gratias agamus Domino Deo nostro*, & respondet Minister, *dignum & justum est*. Tum facultatem à Deo Sacerdos petit in Angelorum choros ingeri, humili supplicatione dicens: *Cum quibus & nostras voces*, &c. Demum præfatio in illum definit hymnum quem Græci triumphalem, nos Angelicum appellamus, *Sanctus, Sanctus*, &c. qui desumptus est ex Isaïa cap. 6. & concluditur per hæc verba *Benedictus qui venit*, quæ turbæ cecinerunt cum Christus-Jesus ante Passionem suam solemniter ingressus est Hierosolymam, ut habetur Matth. c. 21. Cum Sacerdos ad illa verba pervenit *Sanctus, Sanctus*, &c. junctis ante pectus

manibus , & inclinatus reliqua verba voce non ita elatâ prosequitur ; intereâ Minister campanulam pulsat ad excitandos adstantium animos ad devotionem ; & cum dicit Sacerdos *Benedictus qui venit* se erigit , sibi-que à fronte ad pectus signum crucis producit.

ARTICULUS QUARTUS.

De Canone usque ad Consecrationem.

1. **C** Anon idem valet ac Regula : eâ utitur voce Ecclesia , ut significet Canonem Missæ firmam esse regulam , juxta quam Novi Testamenti sacrificium est celebrandum ; vocatur etiam actio per excellentiam , quod in eo Sacramenta Domini conficiantur , quomobrem in Canone ad orationem *Communicantes* appositus est titulus *infra* seu *intra Actionem*. De Canone sic loquitur Conc. Trid. sess. 22. cap. 4.
 „ Cum sancta sanctè administrari conveniat,
 „ sitque hoc omnium sanctissimum sacri-
 „ cium , Ecclesia Catholica ut dignè reve-
 „ renterque offerretur , ac perciperetur ,
 „ sacrum Canonem multis ante seculis in-
 „ stituit ita ab omni errore purum , ut nihil
 „ in eo contineatur , quod non maximè
 „ sanctitatem & pietatem quamdam redo-
 „ leat , mentesque offerentium in Deum
 „ erigat : Is enim constat cum ex ipsis Do-
 „ mini verbis , tum ex Apostolorum Tra-

„ditionibus, ac Sanctorum quoque Pontificum piis institutionibus.

2. Circa Canonem hæc in antecessum observare juvat. 1. Præscribit Rubrica omnium seculorum monumentis confirmata ut secretò recitetur; imo Conc. Trid. ejusdem sess. can. 9. sic decernit: *si quis dixerit Ecclesiæ Romanæ ritum, quo submissâ voce pars Canonis, & verba Consecrationis proferruntur, damnandum esse, anathema sit.* Respicit S. Synodus ad Eucharistici sublimitatem Mysterii, & ad majorem venerationem, quæ ex Secreto paritur erga res divinas, quæque silentio excitatur & alitur; tum etiam ad Spiritûs-Sancti operationem, quæ, panem & vinum convertens in Corpus & Sanguinem Christi, non cadit sub sensus. Aliam rationem affert S. Thomas 3. part. quæst. 83. art. 4. ubi ait, Sacerdotem ea clarâ voce dicere, quæ ad se & ad Populum; demissâ vero quæ ad se solum pertinent, cujusmodi est Oblatio & Consecratio. 2. Sacerdos multa crucis signa ducit super Hostiam & Calicem: circa quæ observat Bossuetius; benedictiones quæ fiunt super panem & vinum ante Consecrationem suos effectus habere, tum erga ipsum Sacramentum consecrandum, tum erga homines per Sacramentum sanctificandos; Benedictiones verò, quæ fiunt super panem & vinum jam consecratum, non ad Corpus Divinum, sed ad eos referri, qui

illud sumpturi sunt, ut illud dignè suscipiant; aut si Corpus Christi respiciant, ita ad illud referri, ut Benedictiones exprimant & gratias quibus abundat, quasque largè cupit in nos effundere, nisi peccatis nostris præpediatur. Aliam hujusmodi signorum significationem profert S. Thomas quæst. supra cit. Sacerdos, inquit, post Consecrationem non utitur crucis signatione ad benedicendum & consecrandum, sed solum ad commemorandum virtutem crucis, & modum Passionis Christi. Nempe nihil Ecclesia prætermittit, quo in animis imprimat Sacerdotum & adstantium, idem esse Sacrificium Altaris cum sacrificio Crucis; vult igitur omne verbum quod exprimit Corpus & Sanguinem Domini, cum signo crucis proferri, ut declaretur Hostiam, & liquorem in Calice contentum, idem esse corpus quod cruci fuit affixum, & ipsum sanguinem qui in cruce effusus est. Nunc singulas Canonis orationes prosequamur.

3. Finitâ Præfatione ut supra, Sacerdos stans ante medium Altaris, aliquantulum elevat manus, oculisque etiam ad Deum elevatis, & sine morâ demissis, ac manibus junctis, & super Altare positis, profundè inclinatus incipit Canonem secretò dicens, *Te igitur clementissimè Pater.* Hæc prima Canonis Oratio pergit usque ad eam, *Hanc igitur oblationem; nam Memento Domine & communicantes non sunt diversa*

232 *De Sacro-sancto*

Orationes , sed pars primæ , ut deducitur ex clausula *Per eundem Dominum* quæ apponitur ad finem omnium Orationum. In hac Oratione Deo Patri preces diriguntur pro Ecclesia Sancta Catholica , pro summo Pontifice , pro Episcopo , Diœcesis in qua Missa celebratur , pro Rege , & pro omnibus Fidelibus. Sacerdos cum dicit , *uti accepta habeas & benedicas* prius osculatur Altare in medio , deinde erigit se , jungit manus ante pectus , & dexterâ manu ter signum crucis ducit communiter super Hostiam & Calicem cum dicit *Hæc dona , hæc munera , hæc sancta sacrificia illibata*. De osculo Altaris , & signis crucis suprâ jam diximus. Tria autem crucis signa fiunt , ut significetur maximum hoc mysterium à sanctissima perfici Trinitate. Verba ista , *hæc sancta sacrificia illibata* sic explicat Innocen. III. dicuntur illibata , id est immaculata , quæ sine maculâ cordis & corporis oportet offerri.

4. Postquam oravit Sacerdos pro Ecclesia sancta Catholica , pro Papa , pro Episcopo , pro Rege , ac pro omnibus Catholicis ; pro iis pergit orare , quibus sacrificiî fructum applicare intendit , quorum tamen nomina voce non pronunciat , sed eas personas præsentis animo habet , *Memento , Domine Famulorum , &c.* ac pro iis itidem orat qui sacrificio interfunt , & *omnium circumstantium*. Notanda sunt hæc verba ,

Missæ Sacrificio. 253

pro quibus tibi offerimus, vel qui tibi offerunt: Quæ quidem non ita sunt intelligenda quasi laici consecrare possint; sed eo sensu quod quamquam Sacerdotis dumtaxat sit celebrare, tum quia virtute Christi solus Sacramentum perficit, tum quia solus ex persona Christi consecrationis verba pronunciat: tamen Laici hoc etiam sensu sunt offerentes, tum quod per ministerium Sacerdotum offerant, tum quod suam cum Sacerdotum intentione jungant, tum quod externum aliquid conferant, Missæ ministrando, necessaria ad Sacrificium suppeditando, vel eleemosinam largiendo.

5. Verba illa *communicantes & memoriam venerantes* quæ, ut supra diximus, pars sunt primæ Orationis, jungunturque cum his vocibus *supplices rogamus*. Significant unionem Sanctorum qui in cœlo sunt, cum Fidelibus qui degunt in terris, pro quibus preces fundit Ecclesia. Nempe novit pia mater Deum ea propter Sanctos suos facere, quæ propter nos facturum ne audet quidem sperare; unde ut eum sibi propitium faciat, Sanctorum virtutem, merita, & gloriam commemorat. Omnium prima, à qua opem petimus est Beata Virgo Maria cæteris omnibus sanctior & gloriosior; deinde Sanctorum duodecim Apostolorum, qui Ecclesiæ columnæ sunt fit commemoratio: illis additur S. Paulus, quem à B. Petro numquam Ecclesia Ro-

254 *De Sacro-sancto*

mana sejungit. Post duodecim Apostolos mentio fit duodecim Martyrum, omniumque Sanctorum intercessionem implorat Ecclesia. Cum autem apprimè sciat ne tantilli quidem momenti esse eorum suffragia nisi per merita & virtutem Christi, ideo Orationem istam, sicut & reliquas omnes, per hanc clausulam concludit *Per Christum Dominum nostrum.*

6. Secunda Canonis Oratio illud habet initium, *Hanc igitur oblationem*, & in ea petitiones quatuor continentur; quarum prima est, ut Deus oblationem nostram proximè per consecrationem faciendam, quæque in intentione præsens habetur, placatus accipiat; secunda ut dies nostros in sua pace disponat; tertia ut ab æternâ nos liberet damnatione; quarta denique ut in electorum suorum grege nos jubeat numerari, seu ut nobis tribuat electorum ingredi viam, ut cum iis æternâ pace perfruamur. In pervigiliis Paschatis, & Pentecostes, ac per totam octavam, quædam in hac Oratione adduntur, quæ ad eos, qui in his diebus baptisantur pertinent. Nam juxta veterem disciplinam, in pervigiliis Paschatis, & Pentecostes, catechumeni Baptismo abluebantur; deinde vestibus albis amicti sacrificio Missæ aderant, & sacram Eucharistiam suscipiebant. In hac Oratione Sacerdos extensas tenet manus super Hostiam & Calicem, donec ad illa

verba pervenerit, *Per Christum*, &c. ubi manus jungit. Hic ritus fit ad imitationem moris qui vigeat in veteri lege, in cuius sacrificiis super victimam manus imponebantur, quod indicium erat Sacerdotem conjungi cum victimâ, & cum eâ Deo consecrari. Eo igitur ritu Sacerdos sese, Populumque Christianum Deo offert cum Christo jamjam Mysticè immolando, ut ejus virtute sacrificii impetret à Deo remissionem peccatorum, vitæ præsentis pacem, & æternæ gloriam.

7. Tertia Canonis Oratio ab illis incipit verbis, *Quam oblationem tu Deus*; quæ Oratio ad finem usque consecrationis continuatur. In hac Oratione respiciens Ecclesia non solum oblationem panis & vini, eorumque proximè instantem Transubstantiationem in Corpus & Sanguinem Christi, sed etiam sui ipsius, & Sacerdotis celebrantis, adstantiumque oblationem, Deum orat, ut eam facere dignetur *benedictam*; hoc est, ut rectè explicat Paschasius, „per „quam benedicamur; *adscriptam*, per quam „nos omnes in coelo conscribamur; *ratam*, „per quam in visceribus Christi censeamur; *rationabilem*, per quam à bestiali „sensu exuamur; *acceptabilemque facere dignetur*, quatenus & nos per quod in nobis displicuimus, acceptabiles in ejus unico Filio simus „. In eadem Oratione Deum

256 *De Sacro-sancto*

orat Ecclesia ut panis & vini transubstantiatio nobis fiat in Christi Corpus & Sanguinem, id est nobis fiat fructuosa. Quinque sunt crucis signa, quæ in hac Oratione fiunt, dum ea pronuntiantur verba, *benedictam, adscriptam, &c.* His vero signis quidam putant Christum significari, qui secundum carnem passus est in quinque sensibus: ita S. Bonavent. in expositione Missæ.

8. In progressu tertiæ hujus orationis Sacerdos ea exponit quæ pridie mortis suæ Christus Dominus fecit & dixit: nimirum accepisse panem in sanctas ac venerabiles manus suas; & elevatis oculis in cælum ad Deum Patrem suum Omnipotentem, gratias illi egisse, panem benedixisse, fractum dedisse Discipulis suis, ac dixisse: *Accipite & bibite ex eo omnes; Hoc EST, &c.* Similiter & Christum-Jesum, post cænam, in sanctas suas manus Calice accepto, item gratias egisse Deo Patri, Calicem benedixisse, ac præbuisse Discipulis suis dicendo *Accipite & bibite ex eo omnes; Hic EST, &c.* Cum autem Sacerdos prædicta Christi verba vel recitativè tantum seu historicè tantum à Christo dicta, & materialiter, ut aiunt, proferre possit; vel etiam significativè & formaliter, ut loquuntur Theologi, ita ut intendat facere quod fecit Christus & verba exprimunt; graviter profectò er-

raret qui auderet affirmare ista consecrationis verba, *Hoc est enim corpus meum. Hic est enim Calix sanguinis mei*, à Sacerdote dici recitativè tantùm, & non significativè, aliàs non loqueretur aut ageret ex persona Christi, quod certè communi sanctorum Patrum, Theologorum, ipsiusque Concil. Florentini doctrinæ, in decreto unionis prorsus adversatur. Utrum verò verba illa non modò significativè, ut diximus, sed etiam recitativè proferantur, disputant inter se Theologi; communior est sententia affirmans, in quam propensior est S. Thomas 3. part. quæst. 78. art. 5. Observat idem S. Doctor vocem istam *Calix* per metonymiam poni pro liquore in eo contento; ita ut sensus sit: *Hic est sanguis meus in Calice contentus*. Addit, dici Sanguinem Novi Testamenti, eo quod non per figuram, ut in veteri Testamento, sed revera effusus sit; docet pariter vocari sanguinem æterni Testamenti, tam ratione æternæ Dei præordinationis, quàm ratione æternæ hæreditatis, quæ per hoc Sacramentum disponitur. Demùm vox illa *pro multis* idem significat ac pro omnibus, juxta modum loquendi scripturæ sacræ, qui quidem patet ex vers. 18. & 19. cap. 5. Epist. ad Rom. inter se collatis.

9. Reliquum est ut actiones quasdam prosequamur quas in hac tertia oratione peragit Sacerdos. Itaque manibus sumit Hos-

tiam, cum dicit *Accepit panem*; oculos ad coelum tollit, cum dicit *elevatis oculis*; crucis ducit signum super Hostiam, cum dicit *benedixit*; manibus sumit Calicem, cum dicit *accipiens & hunc præclarum Calicem*; caput inclinât, cum dicit *item tibi gratias agens*; signat signo crucis, cum dicit *benedixit*. Has autem actiones facile quivis intelligit verbis quæ interea proferuntur omnino respondere, ac quidquid Christus gessit expressè repræsentare. Consecratâ Hostiâ, Sacerdos unum tantummodò genu flectit usque ad terram, manibusque interea Altari innititur, quo facilius sese restituat in pedes: deinde Hostiam in altum elevat & ostendit populo adorandam: idem facit consecrato Calice. Observat Cardinalis Bona Græcos non statim post consecrationem, sed paulò ante communionem Calicem simul & Hostiam elevare; ostendit vero P. Le Brun, in Ecclesia Romana & Gallicanâ ab initio XII. sæculi Presbyteros consuevisse, ubi ad ea verba pervenissent *omnis honor & gloria*, Hostiam & Calicem elevare, quam nunc secundam seu parvam elevationem appellamus; eam verò quæ nunc fit post Consecrationem eo esse introductam, ut Mysterii veritas, quæ à Berengario impetebatur, publico hoc testimonio declararetur. Ecclesia Græca & Latina semper credidit, post Consecrationem ipsos Angelos venerabundos circum Eucharistiam

stare, tamquam circum Imperatorem custodes; consentaneum est igitur Sacerdoti coelituum undique choris circumdato, ut, quantum fert humana fragilitas, illorum reverentiam æmuletur.

ARTICULUS QUINTUS.

A Consecratione usque ad Communionem.

1. **I**N tertiæ Orationis fine Sacerdos profert ista verba: *Hæc quotiescumque feceritis in mei memoriam facietis*, ut declaretur, neminem tam audacem futurum, qui ad Altare Domini accederet, & augustissimum celebraret mysterium, nisi Christus id jussisset. Quamobrem appositè sequitur quarta Canonis Oratio quæ incipit, *Unde & memores* & ducitur usque ad *Memento*; nam ante illud verbum ponitur clausula *Per Christum*, &c. In hac Oratione Sacerdos iterum nomine Populi, ut in oratione *Suscipe Sancta Trinitas*, *Passione*, *Resurrectione*, & *Ascensione Christi* commemoratis, æterno Deo Patri Corpus, & Sanguinem offert ejus Filii; *Hostiam* scilicet *puram*, & purificantem; *Hostiam sanctam*, & sanctificantem; *Hostiam immaculatam* & maculas tergentem; *Panem vitæ æternæ* & *Calicem salutis perpetuæ*, quia Christiani esu & potu sacro-sancti sacrificii spiritualem vitam, atque adeò salutem æternam sibi comparant: subsunt hæc ver-

260 *De Sacro-sancto*

ba de tuis donis & datis, propter panis & vini in corpus & sanguinem Christi transubstantiationem, quod quidem præstantissimum Dei donum est. Tria crucis signa ducit Sacerdos super Hostiam & Calicem, cum dicit: *Hostiam puram, Hostiam sanctam, Hostiam immaculatam*, quartum super Hostiam, cum dicit *Panem sanctum*; quintum denique super Calicem cum dicit: & *Calicem salutis perpetuæ*, ut innuatur virtute Crucis Christi hæc omnia bona in nos diffundi. Interim præscribit Rubrica ut Sacerdos post Consecrationem duos digitos pollicem & indicem conjunctos teneat, quos non sejungat nisi quando Hostiam tangere vel tractare debet, usque ad ablu-tionem digitorum post communionem; ne videlicet si aliqua particula digitis adhæserit, dispergatur; quod quidem ut ait S. Thomas pertinet ad reverentiam Sacramenti.

2. In progressu hujus orationis Sacerdos Deum orat, ut propitio ac sereno vultu respicere dignetur ad oblata sibi dona Corporis & Sanguinis Christi, non quòd, ut calumniatur Lutherus, censeat se mediatorem esse inter Patrem & Christum, sed quia, ut observat Bellarm. etsi oblatio consecrata ex parte rei quæ offertur, & ex parte Christi principalis offerentis semper Deo placeat, tamen ex parte Ministri, vel Populi adstantis, qui simul etiam offerunt,

Missæ sacrificio. 261

potest non placere. Præterea Sacerdos Deum precatur, ut sacra dona sic dignetur accipere, quemadmodum accepit Abelis munera, & Abrahæ sacrificium, & quod illi olim Melchisedech obtulit. Trium illorum sacrificiorum præcipuam in Canone mentionem facit Ecclesia, eo quod expressius novæ legis sacrificium significant; sicuti enim Abel Genes. 4. obtulit de primogenitis gregis sui, ita Christus sese obtulit ut *primogenitum in multis fratribus* ad Rom. c. 8. Præterea sanguis Abel justus à fratre Cain interfecti, Christum-Jesum à Judæis necatum ac pro peccatis nostris mortuum repræsentat. Item in Abrahæ sacrificio Isaac immolatus, quin vitam amitteret, figura fuit Jesu-Christi, qui mortuus est ut resurgeret & ad novam vitam rediret. Denique Melchisedech obtulit panem & vinum; & Christus in Altari, sub specie panis & vini, corpus & sanguinem suum offert Deo Patri pro nobis, ipsum nobis pacificans, ita S. Bonav. in exposit. Mis. Adduntur hæc verba; *Sanctum Sacrificium, immaculatam Hostiam* quæ quidem rectum & integrum continent sensum sive ad sacrificium Melchisedech, de quo sit mentio in præcedentibus verbis: sive ad ipsum novæ legis sacrificium referantur, ita ut verba illa *sanctum sacrificium* cum istis jungantur & *accepta habere*; cæteris omnibus, sicuti *accepta* usque ad *Melchisedech* in parenthesis conclusis.

262 *De Sacro-sancto*

3. Hæc oratio in eam definit præcationem: *Supplices te rogamus... Jube hæc perferri, per manus sancti Angeli tui, in sublime Altare tuum, &c.* S. Thomas sub nomine *Angeli* ipsum Jesum-Christum intelligit, qui vocatur magni consilii Angelus: ad hæc verba in *sublime Altare tuum* observat Odo Cameracensis in Ecclesia Christi duo esse Altaria, quorum alterum hic apud nos visibile, ex quo visibiliter, nempe ratione specierum, corpus & sanguinem Christi sumimus; alterum invisibile in Cœlo, ad quod, per ministerium Angelorum, vota & supplicationes nostræ perferuntur, ut inde benedictionem & gratiam Dei percipiamus. Sacerdos sese profundè inclinat, & manus junctas super Altare tenet, cum dicit *Supplices te rogamus*, quod quidem benè supplicanti competit; cum dicit *ut quotquot ex hac Altaris*, osculatur Altare quod typus est Christi; cum Christi corpus nominat, signum crucis ducit super Hostiam; atque itidem super Calicem, cum nominat Sanguinem; ac cum benedictionem cœlestem & gloriam appellat, ipse se signo crucis signat, quorum quidem rituum significationes suprâ jam attulimus.

4. Quinta Canonis oratio incipit, *Memento etiam Domine* ubi oratur pro defunctis; hoc enim ab Apostolis traditum universa per totum orbem observat, & observavit Ecclesia, ut pro animabus defunc-

tōrum qui in Purgatorio igne expiantur inter sacrificandum oret. In hoc loco Sacerdos, quorum voluerit defunctorum memoriam agit specialem; & pergens orat etiam pro animabus omnibus quæ in Purgatorio detinentur; ut verba illa indicant, *ipsis Domine, & omnibus in Christo quiescentibus*: pro iis scilicet omnibus postulat *locum refrigerii*, quod respicit ignem illum quo cremantur; *locum lucis*, quod spectat ad eas tenebras in quibus versantur; *locum pacis*, quod ad illam pertinet mentis anxietatem, quâ conflictantur: quo triplici poenarum genere miseræ illæ animæ à divina expiantur justitiâ. Ideo autem diximus pro omnibus qui sunt in Purgatorio orationem fieri, quia ipsis solis defunctis Missæ sacrificium tamquam satisfactorium prodest. Testatur id S. August. Enchirid. c. 109. „Neque negandum est, inquit, Defun-
 „torum animas pietate suorum viventium
 „relevari, cum pro illis sacrificium media-
 „toris offertur, vel eleemosynæ in Eccle-
 „sia fiunt. Sed eis hæc prosunt qui cum vi-
 „verent, ut hæc sibi postea possent pro-
 „desse meruerunt. „ Idem statuit Conc.
 Trid. sess. 22. de sacrificio Missæ c. 2. &
 sess. 25. Decreto de Purgatorio. Supra jam
 monuimus quando quis specialem Missæ
 fructum applicare vult etiam pro defunc-
 tis; applicationem illam fieri debere ante
 Consecrationem, in qua, juxta probabi-

264 *De Sacro-sancto*

liorem opinionem, essentia stat sacrificii.

5. Sexta & ultima Canonis oratio incipit, *Nobis quoque peccatoribus*, quæ verba elatâ paululûm voce dicuntur ad excitandam præsentium devotionem, & definit in clausulam *Per omnia secula seculorum*, quæ proximè orationem præcedit Dominicam. Quamobrem Feria VI. in Parasceve, cum integer Canon omittitur, qui ad consecrationem pertinet, nulla è senis hisce orationibus dicitur, nec *Per omnia secula seculorum*; sed post ablutionem manuum, iniriûm sumitur absolutè ab Oratione Dominica. Sacerdos igitur ante consecrationem Deum est precatus, ut dignetur Ecclesiam Militantem in Triumphantis consortium admittere; idem petiit post consecrationem pro Ecclesia Patiente; in hac verò oratione idem sibi & adstantibus petit, quorum nomine offert sacrificium; petit autem his verbis: *Intra quorum* (Sanctorum qui in Coelo sunt) *nos consortium, non aestimator meriti, sed venia quæsumus largitor admitte.* Novit scilicet Ecclesia Deum non nisi intercedentibus meritis tribuere beatitudinem; sed nec illud ignorat, ut in Sanctorum admittamur consortium, non modò necessariam esse gloriam, sed etiam gratiam & veniam peccatorum, quæ nobis datur per Christum Dominum nostrum. S. Joannem Baptistam putant rerum Lyturgicarum petiti in hac oratione nominari: observant S. Matthiam

Missæ Sacrificio. 265

S. Matthiam in prima Canonis parte inter Apostolos fuisse prætermissum, quia Passionis tempore nondum erat Apostolus; & ipsum post S. Stephanum nominari propter Martyrii ordinem, non dignitatis. Denique advertunt Sanctos ex diverso quoque ordine hic appellari, ex ordine Prophetarum, S. Joannem; Diaconorum, S. Stephanum; Apostolorum, S. Matthiam; Discipulorum, S. Barnabam; Episcoporum, S. Ignatium; Summorum Pontificum, S. Alexandrum; Presbiterorum, S. Marcellinum; Clericorum, S. Petrum Exorcistam; Conjugatorum, SS. Perpetuam, Felicitatem & Anastasiam; Virginum, SS. Agatham, Luciam, Agnetem & Cæciliam; quæ quidem SS. Virginum & Mulierum nomina à sancto Gregorio Canoni fuerunt addita.

6. Post Sanctorum imploratam intercessionem Sacerdos, ut cum adstantibus per Jesu-Christi merita inter Sanctos admittatur in cælum, ait: *Per quem hæc omnia, Domine, semper bona creas*, &c. Nonnulli censent verba illa ad novarum frugum referri benedictionem quæ in hac Missæ parte fiebat; alii existimant novis illis frugibus benedicendis aliam peculiarem adhibitam fuisse orationem ante prædicta verba: utcumque sit de præsentis controversiâ; certum est, non in qualibet Missa novarum frugum aliarum-ve id genus potuisse fieri

benedictionem, in omnibus tamen Missis verba ista dici consuevisse; illud quoque certum est; in hac Missæ parte, non amplius fieri frugum benedictionem, eademque verba nunc in qualibet Missa dici supra Corpus & Sanguinem Christi, unde necessitas oritur hæc & sequentia explicandi nullâ habitâ novarum frugum ratione. De illorum explicatione verborum plures scripserunt, hæc autem est, veluti in compendium referta, horum omnium interpretatio. *Per quem hæc omnia Domine semper bona creas.* Deus enim Pater omnia creavit per Jesum-Christum, atque ita panem & vinum in Christi corpus & sanguinem conversum: *sanctificas, vivificas, benedixisti & prestas nobis;* nam in Christo Jesu dona ad Altare oblata fiunt dona sacra, verum vitæ spiritualis alimentum, & fons coelestium benedictionum: *Per ipsum & cum ipso, & in ipso est tibi Deo Patri omnipotenti, &c.* Deo enim Patri omnis honor & gloria per Filium Mediatorem Dei & hominum, ipsi Deo Patri æqualem & consubstantialem, & in unitate Spiritûs Sancti, qui ex utroque procedens æquè cum Patre & Filio simul adoratur in secula seculorum. Interea Sacerdos juxta præscriptum Rubricæ cum dicit *sanctificas, vivificas, benedixisti,* ad singula verba signum crucis ducit super Hostiam & Calicem: deinde discooperit Calicem, genuflectit, surgit, dexteram ma-

Missæ sacrificio. 267

aus pollice & indice apprehendit Hostiam, finistrâ Calicem supra nodum tenens, & Hostiâ ipsâ ab una ad alteram Calicis oram tria crucis signa ducit cum dicit *per ipsum*, & *cum ipso*, & *in ipso*. Duo postea, tenens adhuc Hostiam inter se & Calicem, crucis signa facit, primum cum dicit *Est tibi Deo Patri*, alterum cum ait *in unitate spiritûs sancti*, ac denique ad illa verba, *omnis honor & gloria*, tenens Hostiam supra Calicem, utrumque paululum extollit.

7. Sequitur Oratio Dominica quæ non ex S. Gregorii jussu, ut quidam falso putant, recitatur in Missa, sed ex vetustissima & Apostolica traditione, cujus testes sunt Ss. Optatus Milevitanus, Cyrillus Hierosolymitanus, &c. Ante eam orationem Sacerdos devotè præfatur verbis illis: *Oremus*, *Præceptis salutâribus moniti*, & *divinæ institutione formati audemus dicere*, quæ vetustissima sunt, ad ea respexisse videtur S. Hieronymus Lib. 3. advers. Pelag. „ Sic docuit, inquit, Apostolos suos (Christus) ut quotidie in corporis illius sacrificio credentes audeant loqui: *Pater noster*. „ Hanc orationem elatâ voce recitat Sacerdos; cujus Ritus ratio desumitur ex Arcani disciplina, juxta quam neque Oratio Dominica, neque Symbolum in publicis conventibus recitabantur, in quibus esse poterat aliquis Infidelis, vel Catechumenus ad baptismum suscipiendum non satis

instructus & probatus; ex quo patet quamobrem in Horis Canonicis submissa, elata verò voce in Missa recitarentur Symbolum & Oratio Dominica: Infideles enim & Catechumeni Horis Canonicis adesse poterant; huic verò Missæ parti, ut supra diximus, non poterant, sed post Evangelii explanationem dimittebantur. Testatur S. Gregorius Magnus lib. 7. Epist. 64. Orationem Dominicam in Missa Græcorum non à Sacerdote solum, sed ab universo etiam populo recitari; hanc disciplinam aliquanto tempore retinuit Ecclesia Gallicana, ut constat ex S. Gregorio Turon. lib. 2. de Miraculis S. Martini; nunc vero ultima tantum verba *sed libera nos à malo*, in Missa solemni, elata voce profert populus; & in Missa privata, Minister populi vices gerens, ad cujus desideria confirmanda Sacerdos submissa voce dicit *Amen*.

8. Oratio *Libera nos*, quæ proximè sequitur, Orationis Dominicæ continuatio quædam est: in ea Sacerdos Dominum precatur, ut nos liberet *ab omnibus malis præteritis*, quæ sunt peccata; *præsentibus*, quæ sunt variæ tentationes, quibus ad peccandum impellimur; *futuris*, quæ sunt poenæ peccatis debitæ, sive temporales, sive æternæ. In hac eadem oratione confugimus ad B. Mariam semper Virginem, Sanctos Apostolos Petrum & Paulum, &

Missæ Sacrificio. 269

Andream , quia primus ad Apostolatum vocatus , fratrem suum Petrum ad Jesum adduxit ; & ad omnes Sanctos , ut eorum meritis Deus largiatur nobis gratiam , indulgentiam , & pacem. Sacerdos dum incipit orationem *Libera nos* , Purificatorio extergit Patenam quæ jacebat sub Corporali , eamque manu dexterâ apprehendit inter digitum indicem & medium , verticalem illam tenens super Altare ; ubi ad ea verba pervenerit , *Et omnibus Sanctis* , sibi à fronte ad pectus crucis signum ducit ; & ad ea verba , *in diebus nostris* , Patenam osculatur ; cum autem dixerit , *ab omni perturbatione securi* , Patenæ Hostiam superimponit , Calicem discooperit , & genuflectit. Post Panis seu Hostiæ oblationem , Patena statim Corporali supponitur ; eâ enim nihil opus est usque ad fractionem Hostiæ & Communionem : atque inde fit , ut cum dicit Sacerdos *Libera nos quesumus* , instante tempore quo Hostiam frangat & sese communicet , patenam apprehendat. Jam vero Patenâ sibi crucis signum ducit , eamque osculatur , quia Patena instrumentum est pacis , ut potè quæ fit vas ubi ponitur sacra Eucharistia , quæ Christianorum est pax : eâque utitur ad signum crucis sibi faciendum ; per crucem enim Christus ea omnia disjecit , quibus pax nostra perturbatur. *Ipse enim est pax nostra , &c. solvens inimicitias in carne sua* , inquit Apostolus Ephes. c. 2.

9. Sacerdos facta genuflexione surgit ; sumit Hostiam , quam supra Calicem tenens utraque manu , reverenter frangit per medium in duas partes dicens : *Per eundem Dominum nostrum Jesum-Christum Filium tuum.* Dimidium illud Hostiæ , quod habet in dextera , ponit super Patenam , & ab altera media parte , quam habet in sinistra , fragmentum detrahit dicens , *qui tecum vivit & regnat* , & illud fragmentum retinens inter pollicem & indicem dexteræ manus , partem quam sinistrâ tenet adjungit mediæ super Patenam positæ , interim dicens , *in unitate Spiritus-Sancti Deus* ; ac manu dexterâ fragmentum illud tenens supra Calicem , quem sinistrâ per nodum infra cuppam retinet , elatâ voce dicit *Per omnia secula seculorum* ; Minister respondet *Amen.* Tum Sacerdos ipso fragmento ter-na crucis signa ducit supra Calicem dicens : *Pax Domini sit semper vobiscum* ; Minister respondet : *Et cum spiritu tuo.* Denique Sacerdos fragmentum illud in Calicem immittit dicens : *Hæc commixtio & consecratio Corporis & Sanguinis Domini nostri Jesu-Christi fiat accipientibus nobis in vitam æternam. Amen.* Est autem Fidei Catholicæ dogma , incorruptibile , & impassibile esse Corpus Christi in Eucharistia , ipsum integrum esse in quolibet Hostiæ fragmento , integrumque à Fidelibus sumi in quacumque Hostiæ particulâ ; unde quando

in Rubrica legitur : *frangitur Hostia* illud non potest ad ipsum Christi Corpus referri , sed tantum ad accidentia seu species sacramentales. Hostiæ fractio ad ipsius-met Christi institutum refertur , qui , in institutione Eucharistiæ , accepit panem in sanctas manus suas , benedixit , fregit , deditque discipulis suis , idque iussit eosdem in sui facere memoriam.

10. Varii varias sacrorum illorum Rituum mysticas afferunt rationes ; sufficiat nobis annorasse illos plenos esse mysterii ; in Missa enim , usque ad hanc de qua loquimur partem , Jesu-Christi Passio & mors repræsentatur per consecrationem corporis & sanguinis separatim factam : namque vi verborum consecrationis , mystica fit separatio corporis à sanguine , & sanguinis à corpore ; sub speciem panis corpore Christi , & sub speciem vini sanguine subeunte ; licet reipsa corpus Christi , utpote vivens , non sit sine sanguine , nec sanguis vicissim sine corpore. Reliquum erat igitur ut gloriosa exprimeretur Christi Resurrectio ; neque id concinnius fieri poterat , quam si Hostiæ particula immitteretur in Calicem , atque ita Corpus iterum conjungeretur cum Sanguine. In hanc significationem consentit Innocentius III. lib. 6. Myst. c. 2. qui & observat ideò ter signum crucis produci cum fragmento Hostiæ super Calicem , quia virtus Trinitatis animam Christi crucifixi

272 *De Sacro-sancto*

Corpori ejus reddidit. Olim consuetudo erat, ut Episcopus antequam diceret, *Pax Domini sit semper vobiscum*, quibusdam conceptis precationibus solemnitati respondentibus populo benediceret, ut constat ex Missalibus vetustissimis à Cardinali Bona *Rerum Liturgicarum lib. 2. cap. 16.* probè inspectis, ex per-antiquo Pontificali Romano Leoni X. dedicato, & ex codicibus manuscriptis antiquæ notæ apud Menardum in notis ad sacramentar. S. Greg. pag. 27. Hunc autem Ritus retinuit & observat Episc. Aurelianensis, quando Missam celebrat in Pontificalibus. Demùm ista verba *Hæc commixtio & consecratio Corporis & sanguinis Domini*, &c. sunt notanda. Vox illa *commixtio*, ut observat Innocent. III. referri debet ad species panis & vini quibus continetur corpus & sanguis. Ad vocem verò *consecratio* illud animadvertit P. Lebrun pag. 589 quod, cum corpus consecratum sub specie panis consecratio corporis dicatur, & sanguis consecratus sub specie vini dicatur consecratio sanguinis; corpus & sanguis in Calicem simul commixta, dici possunt consecratio corporis & sanguinis.

II. Sacerdos, dictâ oratione *Hæc commixtio*, inclinatus in SS. Sacramentum, manibus junctis, ter dicit intelligibili voce *Agnus Dei*, &c. & dexterâ percutiens sibi pectus, sinistrâ supra Corporale positâ, di-

Missæ Sacrificio. 273

cit *miserere nobis*: deindè non jungit manus, sed iterùm percutit sibi pectus cum dicit secundò *miserere nobis*, quod & tertio facit cum dicit *dona nobis pacem*. Verba illa *Agnus Dei qui tollis peccata mundi*, verba sunt S. Joannis Bapt. cum primùm vidit Christum ad se venientem. Jozn. c. 1. v. 29. Sergius sum Pont. ut refert P. Lebrun, instituerat ter dici *miserere nobis*; qui quidem usus usque ad annum millesimum invaluit, ut constat ex antiquis illius ævi Missalibus; sed multis postea ingruentibus Ecclesiæ adversitatibus, ut ait Innocentius III. five ad tollendum schisma, ut alii scribunt, statutum fuit ut in tertio diceretur, *dona nobis pacem*. Pectus sibi percutit Sacerdos in signum contritionis, non modò cum dicit *miserere nobis*, sed etiam cum dicit *dona nobis pacem*, fortassè quia olim tertio itidem dicebatur *miserere nobis*. In Missis Defunctorum, juxta nostram Rubricam, Sacerdos non percutit sibi pectus, neque dicit *miserere nobis*, sed *dona eis requiem*, ut ostendat Defunctorum se magis quam sui esse memorem. Ita sentit Hugo à S. Victore, cui assentitur Gavantus.

12. Manibus junctis super Altare positis, oculisque ad Sacramentum intentis, Sacerdos mediocriter inclinatus dicit tres orationes, *Domine Jesu-Christe, qui dixisti. Domine Jesu-Christe Fili Dei, & Perceptio Corporis* prout in ordine Missæ apponuntur.

M v

274 *De Sacro-sancto*

Tres illæ orationes non ex antiqua summorum Pontificum institutione, sed ex piorum & religiosorum hominum traditione communioni præmitti solent, ut scribit Micrologus, cui consentiunt Bona, Bellarminus, Gavantus. In prima oratione Sacerdos Ecclesiæ pacem precatur; illâ expletâ, si quidem danda sit pax, osculatur Altare, & dicit *pax tecum*, quique accipit pacem respondet, *Et cum spiritu tuo*. Olim dabatur pax cum osculo, de illo, quod etiam sanctum appellatur, loquitur Apostolus 1. ad Corinth. c. 16. & B. Apost. Petrus Epist. 1. c. 5. *salutate*, inquiunt, *invicem in osculo sancto*, ejusdem meminerunt, Tertullianus, Athenagoras, S. Augustinus, Chrysostomus, &c. unde videtur esse institutionis Apostolicæ. Hujus osculi causam hanc affert Isidorus, „ nempe ut „ charitate omnes reconciliati invicem, digni Sacramento Corporis & Sanguinis „ Christi consocientur, quia non recipit „ diffentionem cujusdam Christi indivisibile „ corpus „. Veteri tandem simplicitate in malitiam degenerante, subtractum paulatim est osculum, & ejus vice mos introductus porrigendi tabellam, cum crucis vel Christi imagine, quam quidam *osculatorium* appellant; alii mutuo amplexu munus illud persolvunt. Sacerdos antequam det pacem osculatur Altare, ut ostendat se pacem dare non posse, nisi à Christo, cujus figurâ

Missæ Sacrificiò. 275

est Altare , pacem prius acceperit. In Missis Defunctorum non datur osculum pacis , & trium orationum prima ex præscripto Rubricæ omittitur , quia , ut observat S. Thomas , 3. part. quæst. 83. art. 4. in Missis Defunctorum non pro præsentì pace sacrificium offertur , sed pro requie mortuorum. Pax etiam omittitur in signum mœroris in Missa Feriæ VI. in Parasceve.

ARTICULUS SEXTUS.

De Communione usque ad finem Missæ.

I. **D** ICTÂ oratione tertiâ , quæ incipit *Perceptio* , Sacerdos genuflectit , surgit , & voce submissâ dicit , *Panem celestem accipiam , & nomen Domini invocabo ;* quo dicto dexterâ manu accipit de Patenâ reverenter ambas Hostiæ partes , & collocat inter pollicem & indicem sinistræ manûs , quibus Patenam inter indicem & medium supponit ; ac parùm inclinatus , dexterâ ter sibi pectus percutiens , ter etiam dicit voce aliquantulum elevatâ : *Domine non sum dignus & secretò prosequitur , ut intres sub tectum meum , sed tantum dic verbo , & sanabitur anima mea :* Quibus dictis pollice & indice dexteræ accipit duas Hostiæ partes à sinistra manu inter pollicem & indicem dexteræ , eademque Hostiâ seipsum signat crucis signo dicens : *Corpus Domini nostri Jesu-Christi custodiat animam*

276 De Sacro-sancto

meam in vitam æternam, amen: & se inclinans, cubitis super Altare positus, reverenter sumit utramque Hostiæ partem: quibus sumptis, Patenam deponit super Corporale, & erigens se junctis manibus ante faciem, aliquantisper quiescit in sanctissimi Sacramenti meditatione. Verba illa Panem caelestem, &c. sunt ex Psal. 115. & ista, Domine, non sum dignus, verba sunt Centurionis de quo Matth. c. 8. in quibus parva est quædam immutatio, substituuntur enim voces istæ anima mea, pro iis, puer meus. Consuetudinem prædicta verba recitandi ad Communionem esse per antiquam, constat ex Origene Hom. 5. & S. Chrysostomo Homil. de S. Thoma Apostolo.

2. Sumptâ sanctissimâ Hostiâ, Sacerdos depositis manibus dicit secretò: *Quid retribuam Domino pro omnibus quæ retribuit mihi? Quæ verba sunt ex Psal. 115. deinde discooperit Calicem, genuflectit, se erigit, accipit Patenam, inspicit Corporale, colligit fragmenta cum Patenâ, si qua in eo sint, pollice vel indice dexteræ manus Patenam suprâ Calicem, & ipsos digitos extergit, ne quid in eis fragmentorum remaneat, dexterâ Calicem accipit, Patenam sinistrâ tenens, & dicit: Calicem salutaris accipiam, quæ postrema verba sunt ex psal. 17. & signans se signo crucis cum Calice dicit: Sanguinis Domini nostri Jesu-Christi custodiat, &c. & manu sinistrâ sup-*

Missæ sacrificio. 277

ponens Patenam Calici, quem tenet dexterâ infrâ nodum, reverenter sumit totum Sanguinem cum particula in eo posita. Deinde secreto dicit orationem: *Quod ore sumpsimus Domine, &c.* & super Altare porrigit Calicem Ministro in cornu Epistolæ, quo vinum fundente, se purificat; postea vino & aqua pollices & indices abluit super Calicem, quos purificatorio abstergit, interim dicens: *Corpus tuum Domine quod sumpsi, &c.* Deinde idem vinum & aquam sumit. De Purificatione, quæ post Communionem fit solo vino, loquuntur Innocentius III. in cap. *Ex parte* de celebrat. Missar. & S. Thomas 3 part. quæst. 83. ideò sumitur, ut os abluatur. De digitorum ablutione, quæ fit cum vino & aquâ, loquitur idem S. Doctor, nec innuit illam à Sacerdote assumi. Existimat Durandus hanc ablutionem olim in locum mundum conjici consuevisse: nunc vero ob reverentiam Sacramenti, & propter periculum ne aliquod fragmentum digitis, aut Calici aliqua sanguinis gutta adhæserit, Sacerdos vinum hoc bibit aqua mixtum; S. Pius V. scribit hanc ablutionem sumendam esse ab ea Calicis parte, è quâ haustus fuerit sanguis. Peccaret Sacerdos, ait Pontas Diction. verbo *Missæ*, cas. 27. qui in regione vini minimè feraci, ubi propterea vinum esset maximi pretii, tum in prima, tum in secunda purificatione uteretur solâ aquâ, quia fa-

ceret contra præceptum & usum Ecclesiæ; & sacræ etiam Trident. Synodi, quæ novos Ritus in Missa novasque cæremonias omnino prohibet.

3. Si qui eorum, qui Missæ adfunt, Eucharistiam velint percipere; postquam Sacerdos sumpsit sub utraque specie Sacramentum, Minister recitat *Confiteor*, & Sacerdos ad eos qui ad mensam accedunt Eucharisticam conversus, recitat orationes *Misereatur vestri*, & *Indulgentiam*, &c. ubi Minister responderit *Amen*, Sacerdos se ad Altare convertit, genuflectit, accipit Pyxidem vel Patenam, & dexterâ tenens Corpus Christi, conversus ad eos qui Sacramenti fieri volunt participes, semel dicit *Ecce Agnus Dei*; &c. Deindè ter dicit *Domine, non sum dignus*, &c. Tum unicuique porrigit Sacramentum, faciens cum eo signum crucis suprâ Pyxidem seu Patenam, & singulis dicit: *Corpus Domini nostri Jesu-Christi*, &c. Omnibus communicatis, revertitur ad Altare nihil dicens; & non dat eis benedictionem, quia illam daturus est in fine Missæ. Si particulæ positæ erant super Corporale, extergit illud cum Patena, & si qua in eo fuerint fragmenta, in Calicem immittit. Observat Baronius ad ann. Christi 57. olim sumpturis Eucharistiam quasdam mensulas spongiâ expolitas apponi consuevisse; his hodie linteamina munda successerunt, ut si quid fortè deci-

dat, iis excipiat. Rubrica Missalis, & Rituale Romanum præscribunt, ut Communio populi intrâ Missam fiat, nisi quandoque ex rationabili causa post Missam sit facienda; cum orationes quæ post Communionem in Missa dicuntur, non solum ad Sacerdotem, sed etiam ad alios Communicantes spectent. Est autem apud Auctores rationabilis & iusta causa, si pluri mi adessent Missæ, & suspitioni locus esset, nè plures tædio afficerentur finem Missæ exspectantes, qui finis longè abesse posset, si multi ad Eucharistiam suscipiendam accederent. Ex quo apparet eos errare, qui nullo discrimine, post finem Missæ sacram præbent Eucharistiam.

4. Adversus Missas, quæ ideò privatæ dicuntur, quod in iis solus Sacerdos nec quisquam alius Sacramentum suscipiat, calumnias evomere suas Lutherus, Calvinus, Kemnitius, & alii ejusdem furfuris homines: ad eos confutandos sufficiat Sacro-sanctum, firmissimisque nixum fundamentis referre Trident. Synodi Decretum sextum sess. 22. de sacrif. Miss.
„ Optaret quidem Sacro-sancta Synodus,
„ ut in singulis Missis Fideles adstantes, non
„ solum spiritali affectu, sed Sacramentali
„ etiam Eucharistiæ perceptione, communi-
„ carent; quo ad eos sanctissimi hujus sacri-
„ ficii fructus uberius proveniret: nec ta-
„ men si id non semper fiat, propterea

„ Missas illas , in quibus solus Sacerdos sa-
 „ cramentaliter communicat , ut privatas &
 „ illicitas damnat , sed probat atque adeò
 „ commendat ; si quidem illæ quoque Missæ
 „ verè communes censeri debent , partim
 „ quod in eis populus spiritualiter commu-
 „ nicet , partim verò quod à publico Ec-
 „ clesiæ Ministro , non pro se tantum , sed
 „ pro omnibus Fidelibus qui ad Christi
 „ Corpus pertinent , celebrentur “. Unde
 ejusdem sess. can. 8. sic decernit. „ Si quis
 „ dixerit , Missas , in quibus solus Sacerdos
 „ sacramentaliter communicat , illicitas esse ,
 „ adeoque abrogandas , anathema sit “. Et
 sanè ac sacrificii essentiam non pertinet ,
 ut ei aliqui intersint , & de Sacramento par-
 ticipent ; omne enim sacrificium ad Deum
 refertur , & ejus fructus æquè ad eum qui
 abest , quam ad eum qui adest pervenire
 potest ; cum præsertim sacrificium efficacis-
 sima sit Oratio ; possit autem Oratio eum
 adjuvare , qui nesciat etiam illam pro se
 offerri. Nunc Missæ cursum repetamus.

5. Postquam Sacerdos Sacramentum ipse
 sumpsit , & adstantibus distribuit , si qui
 sint communicandi , & sumpsit ablutiones ,
 extergit os & Calicem purificatorio , quo
 facto , disponit Calicem & collocat in me-
 dio Altari ut in Missæ initio. Tùm se con-
 fert ad cornu Epistolæ quo Minister Mis-
 sale transtulit : junctis manibus legit An-
 tiphonam quæ *Communio* dicitur , redit ad

medium Altare illudque osculatur; conversus ad Populum dicit *Dominus vobiscum*, Ministro respondente; *Et cum spiritu tuo*; & reversus ad librum legit extensis manibus orationem quæ dicitur *Postcommunio*; postremò librum claudit: tùm redit rursus ad medium Altare, quod osculatur; ad populum autem conversus dicit, *Dominus vobiscum*, atque *Ite Missa est*, vel volvens se ad Altare, *Benedicamus Domino*, si ita præscribat Rubrica; cui respondet Minister *Deo gratias*: in Missis vero Defunctorum dicit, *Requiescant in pace*, cui Minister respondet *Amen*. Denique inclinatus in medio Altari dicit orationem, *Placeat*; & conversus ad Populum, ei benedicit, quod prætermittit in Missis Defunctorum: inde se conferens ad cornu Evangelii dicit *Dominus vobiscum*; recitat Evangelium S. Joannis, vel aliud Evangelium quod Rubrica præscripserit, signans in principio librum seu chartam & seipsum in fronte, ore, & pectore: cum dicit *Et verbum caro factum est*, genu flectit versus cornu Evangelii, & surgens prosequitur ut priùs; quo finito Minister respondet *Deo gratias*. Lècto demum Evangelio Sacerdos ab Altari recedens, & sacris vestibus se exuens, Canticum recitat trium Puerorum *Benedicite omnia opera*, &c.

6. Antiphona quæ *Communio* dicitur, idcirco eo nomine donatur quia intèrèa ca-

nebatur dum Populo Eucharistia distribuebatur. Aliæ consequuntur orationes, quæ vocantur *Postcommunio*, quia proximè post Communionem recitantur, ad gratias Deo agendas quod tantorum mysteriorum nos voluerit esse participes, & ad gratiam ab eo postulandam, ut ejus fructum, & quidquid operari sanctificationem potest, conservemus: unde hujusmodi orationes vocabantur *gratiarum actio*, in aliquibus locis appellabantur *Orationes ad complendum*, quia iis res tota finiebatur. Rubrica Missalis præscribit ut prædictæ orationes multiplicentur secundum numerum Collectarum in Missæ principio, & Secretarum ante Præfationem præmissarum. Per Quadragesimam in Missa Feriali post orationes quæ vocantur *Postcommunio*, Sacerdos præfatus formulam, *Humiliate capita vestra Deo*, dicit orationem *super populum*. Vetusissima est ista Oratio, ut colligitur è Sacramentario Gelasiano: olim per totum annum, nunc per Quadragesimam tantum recitatur; ut divino Populus muniatur præsidio adversus insidias Diaboli, quas hostis generis humani diebus poenitentiae multiplicat: ita rem explicant Amalarius & Micrologus.

7. De illa formula dimittendi Populum, *Ite Missa est*, alibi sermonem habuimus; sensus horum verborum hujusmodi est; *vobis abire licet, nam fit Missa seu dimissio.*

Juxta eam, quæ nunc invaluit, disciplinam, quoties in Missa dicitur *Gloria in excelsis*, toties dicitur *Ite Missa est*; toties autem in Missa dicitur *Gloria in excelsis*, quoties in Nocturno officio dictus est Hymnus *Te Deum*; si verò Hymni illi omitantur, dicitur *Benedicamus Domino*, ut invitetur Populus ad gratias de expleto Missæ sacrificio Deo agendas: quamobrem in Missis Ferialibus, & etiam Dominicis Adventûs & Quadragesimæ omittatur prædicta formula; alii dicunt cum Micrologo, id fieri ad designandam temporis mæstitiam, quia videtur aliquid lugubre præferre, quod non publica denunciatur dimissio, sed unusquisque per se discedat. Alii, cum Cardinali Bona, sentiunt omisam fuisse formulam *Ite Missa est*, quando Populus absolutâ Missâ non illicò Ecclesiâ abibat, sed expectabat dum Horæ recitarentur Canonicae, eamque consuetudinem etiam in Missis minus solemnibus & quotidianis invaluisse. In Missis Defunctorum dicitur *Requiescant in pace*, vel ex sola generali consuetudine, ut prætendunt quidam, vel quia tota Missa pro defunctis in eo est, ut ipsis à Deo quietem impetret; vel quia post Missam non erat dimittendus Populus, qui remanebat ad Cadaveris sepulturam, aliasque preces pro animabus Defunctorum.

8. Oratio *Placeat* in pluribus reperitur

sacramentariis post sæculum IX. scriptis. Eam Sacerdos secretò recitat, est enim pro ipso peculiaris oratio, illamque dicit inclinatus, ut æquum est, ad Altare, in signum humilitatis & religionis, si quidem ad sanctissimam Trinitatem illam dirigit. Haud ita vetus est consuetudo quâ Sacerdos benedicit populo in fine Missæ, de ea altum est silentium apud auctores IX. sæculi. Guido Abbas qui XI. floruit sæculo asserit, hunc ritum inolevisse, cum jam populus communicare cessaret, nec tamen à Divinis mysteriis se subtraheret; nè videlicet Presbyteri eum tam benedictione quam communione privatum discedere permitterent. Ternis olim crucis signis Sacerdotes populo benedicebant; sublatus est autem à Clemente VIII. huiusmodi ritus, & solis Episcopis reservatus in omnibus Missis; nam ex Alexandri VII. decretis, potestas fit Abbatibus regularibus ternas dandi benedictiones in Missis tantum Pontificalibus. Vetustissima est è contrâ Episcoporum solemnis benedictio, hujus antiquitatis multa reperire est argumenta apud Christianum Lupum *tom. 5. pag. 526.* Olim ante communionem eam Episcopus largiri solebat, ut suo loco ostendimus, & tunc nulla in fine Missæ præscripta erat; quod quidem patet ex vetustissimo Missali Vaticano MS. supra laudato, in quo ritus Episcopalis benedictionis fusiùs explicatur; hoc

enim peculiariter notatur, quod quando hæc solemnis benedictio datur ante communionem; non est necesse in fine Missæ iterum benedicere; unde cum Episcopus Aurelianensis, in Missis Pontificalibus priorem det benedictionem, ante hæc verba *Pax Domini*, &c. non iterum benedicit populum in fine Missæ.

9. Sacerdos postquam à Deo benedictionem populo precatus est, & in Missis pro Defunctis, post orationem *Placeat* legit initium Evangelii secundum Joannem; signum Crucis ducit super initium Evangelii, signatque sibi frontem, os & pectus; horum Rituum eadem sunt mysticæ explanationes quæ suprâ assignatæ sunt. Ubi ad hæc verba pervenerit, *Et Verbum caro*, &c. genu-flectit, Divinumque Verbum adorat, quod eò se dimisit, ut humanam carnem assumeret. Minister dicit *Deo gratias*, ut Missa in gratiarum desinat actionem. Ante recognitionem Missalis Romani à S. Pio V. nullum extabat præceptum hujus Evangelii recitandi, ut constat ex quibusdam Missalibus tam editis quam MS. à Cardinali Bona recensitis; unde aliqui illud legebant alii verò omittebant, prout cuique collibitum erat: at verò, ut scribit Burius in vita S. Pii, statuit præfatus S. Pontifex ut in fine Missæ à Sacerdotibus recitaretur, quia est veluti compendium præcipuorum fidei nostræ mysteriorum, Ss. Trinitatis,

286 *De Sacro-sancto*

Creationis mundi, Incarnationis Christi, quæ tunc profitetur Sacerdos suo & totius Ecclesiæ nomine. Quanti illud facerent ipsimet Philosophi Gentiles, testatur S. Augustinus *lib. 10. de civit. Dei C. 29.* censuebant nempe illud aureis litteris esse conscribendum, & per omnes Ecclesias in locis eminentissimis esse proponendum: Fidelium verò tanta erat erga istud Evangelii initium devotio, ut illud collo appensum, tanquam fidei suæ symbolum contra Arianorum impietatem, gestare solerent; ut refert Maldonatus *comment. in cap. 1. Evan. S. J. num. 15.* Lecto demùm Evangelio, Sacerdos ab Altari recedens, & sacris vestibus se exuens, hymnum recitat trium Puerorum *Benedicite*, ex veteri consuetudine cujus meminit Micrologus, quæque multis probatur Missalibus apud Cardinalem Bona, *rerum Liturgic. lib. 2. cap. 20.* Quædam Ecclesiæ, loco cantici *Benedicite*, recitant Hymnum *Te Deum*.

10. Jam verò ex suprâ-dictis patet, Introitum cum reliquis usque ad Evangelium in cornu Epistolæ recitari, & *Kyrie eleison*, *Gloria in excelsis*, & *Credo*, cæteraque omnia quæ ad substantiam pertinent sacrificii, in medio dici Altaris; Sacerdotem vero, sacrificio peracto, redire ad cornu Epistolæ, ibique orationem recitare quæ appellatur *Postcommunio*; tum factâ ex medio Altaris super Populum benedi-

Missæ Sacrificio. 287

tionem, transire ad cornu Evangelii, ubi recitat initium Evangelii secundum Joannem, censent nonnulli rerum Lyturgicarum periti hujusmodi Ritus à Missis solemnibus ad privatas fuisse derivatos. Nempe cum Offertorii tempore Fideles, ut supra monuimus, oblationes ad Altare soliti essent deferre, supra quas Sacerdos multas impendebat benedictiones; necesse erat ut oblationes illæ ad cornu Epistolæ repõnerentur, ac proinde ab eo loco amoveretur liber, & ad alteram Altaris partem asportaretur, quo Sacerdos commodè posset legere & oblationes benedicere; quia vero in præfatis solemnibus Missis post Communionem pars Altaris ad cornu Epistolæ, summotis inde jam oblationibus, expedita erat, pars vero ad cornu Evangelii à Subdiacono occupabatur, qui Calicem tergebat & componebat, ad Sacrarium deferendum; propterea Missale ad cornu Epistolæ referebatur; porro ulterius anxie nihil opus est quærere, cur non in cornu Epistolæ, sed in cornu Evangelii legatur initium Evangelii secundum Joan. fortasse in eadem parte Altaris decere visum est, ut secundum Evangelium legatur, ubi antea primum recitatum fuerat. Atque hoc est naturale fundamentum, cur modò in hoc, modò in illo Altaris loco, in diversis Missæ partibus, Sacerdos has vel illas dicat preces & orationes. Quamquam & in hujus

modi Ritibus non defit Mysticus sensus; quidam enim dicunt, cornu Epistolæ Populum Hebræorum qui primi vocati sunt ad Evangelium, cornu autem Evangelii Ethnicos significari, qui Evangelium à Judæis aspernatum acceperunt; reditum vero ad cornu Epistolæ post Communionem futuram exprimere Hebræorum conversionem.

CAPUT TERTIUM.

*Quid præstare debeat Sacerdos post
Missæ Celebrationem.*

Peractâ Missâ aut Communione ; per magni refert, nosse uti illo tempore, quo apud nos demoratur Christus, & tanti hospitis præsentia frui. Neque enim tempus, ad negotia salutis agenda, magis opportunum nobis obvenire potest, quam cum ipsum penes & intra nos habemus salutis authorem. (a) „ Oportet igitur „ (ait pius imitationis Christi author) ut non „ solum præpares te ad devotionem ante „ Communionem, sed ut etiam te sollicite „ conserves in ea post Sacramenti percep- „ tionem; nec minor custodia post exigi- „ tur, quam devota præparatio prius; nam „ bona postmodum custodia, optima iterum

est

(a) *Lib. 4. cap. 12.*

Missæ sacrificio. 289

„ est præparatio ad majorem gratiam: ex
„ eo quippè redditur quis valdè indisposi-
„ tus, si statim fuerit ad exteriora nimis
„ effusus „.

Ex teipso discite quid facto sit opus: si
quispiam te invitasset; sed domo jam excep-
tum, mox, quasi tædio consortii tui affectus,
te defereret, ad ludicra & inania quæque
sefe convertens; nulloque familiari collo-
quio aut benevolentiae & humanitatis ob-
sequio tecum agere dignatus: nonnè illi
inurbanitatem istam & contemptum crimi-
ni verteres, ac hujusmodi amicum, ut potè
parum officii sui memorem, dedignareris?
Vide itaque quid de iis dicendum, qui Deo
in domum suam recepto, mox illi dorsum
obvertunt, & abscedunt, nec curant cum
eo paulisper conversari. Quidnam hoc est,
nisi talem tantumque vilipendere hospitem,
imò illum graviter offendere? maxime cum
is sit hospes qui in domum tuam venit,
non ut reficiatur à te, sed ipse te reficiat.
Quid ergo sic properas? Quid quæris præ-
ter Deum tuum? Plus ille te docebit quàm
omnes libri; plus delectabit quàm omnes
amici; plura præstabit commoda, quàm
omnes mundi artes, honores, opes, &
scientiæ.

I. Cantico igitur trium Puerorum abso-
luto, quo ad gratias Deo pro tanto bene-
ficio persolvendas, omnes debuisti creaturas
invitare ardentissimo affectu & flagrantis-

lima devotione: cave ab inanibus hominum colloquiis; in locum ab omni strepitu & distractione remotum te recipe; mane in secreto, ac suavissimo frui hospite tuo; deduc illum in interiori cordis tui cubiculo, & clauso ostio, cæterisque cogitationibus exclusis, illi soli vacare stude, nec ab eo discedas, donec ipse benedixerit tibi: his etenim pretiosis horæ momentis, larga vel tenuis fieri debet in animam tuam donorum coelestium effusio, pro modulo charitatis, affectuum & desideriorum tuorum, animique tui gratæ significationis. Sicuti namque ingratus animus fontem divinæ largitatis exsiccat, ita & grata donorum ejus memoria torrentem aperit spiritualium benedictionum.

2. Dilata itaque cor tuum, & implebit illud bonorum omnium largitor; aperi os tuum & attrahes in te spiritum sanctum: prout coelestis illius aura afflaverit, vel audi quid loquatur in te Dominus Deus tuus, vel cum eo tua commiscere colloquia ne formides; (b) *Non enim habet amaritudinem conversatio illius, nec tadium convivus ejus, sed latitiam & gaudium.*

3. Perfectissimos diversarum virtutum actus elicies. Christum adorabis, non tantum ut in throno gloriæ suæ residentem in coelis, sed ut intima cordis tui penetrabilia inhabitantem: omnes animæ tuæ facultates

(b) *Sapient. c. 8.*

tes, omnia corporis tui membra, sensus & organa, summo pietatis affectu illi subijcies; adeò ut in ejus honorem & obsequium cedant.

4. Firmâ fide credes & confiteberis tantum hospitem in vili pectoris tui tugurio receptum, & sub exiguis sacramenti speciebus delitescentem, esse verè Deum & hominem; Deum ab æterno per omnia Patri æqualem & consubstantialem; hominem in tempore, operante supremi Numinis virtute; cujus Divinitati & Humanitati ea omnia competunt, quæ credit & docet Ecclesia.

5. Cum in ipso omnium bonorum pignus habeas, ipsius meritis omnia, quibus indiges, dona sperabis & gratiæ & gloriæ, imò & naturæ, in quantum ad salutem tibi sunt profutura; certò confisus illum promissis suis non defuturum, modo partes tuas expleveris.

6. Quia vero amor amore compensatur, & ipse ineffabili & infinitâ te prosecutus est charitate, nihil non tentabis, ut eum toto corde, totâ mente, totisque viribus diligas; gaudebisque quam maximè quod ipsius dotes & attributa tantæ sint excellentiæ, ut nonnisi à seipso possint ex æquo percipi.

7. Infinitam Redemptoris mundi mirare benignitatem, & illam humilitatis abyssum, quâ in hoc sanctissimo se abscondit

sacramento, ut sui ipsius, omniumque, quibus affluit, bonorum te faceret participem. Humiliare igitur in conspectu Dei tui, attentis peccatis quibus deliquisti, præfenti teporis in quo versaris statu, excelsoque virtutum apice ad quem tendere debueras, à quo tamen longo diffides intervallo.

8. In profundo nihili tui demissus, humiliter agnosce nihil quidpiam penes te esse, quo pro tanto beneficio grates Deo persolvas; adeoque tenuitatis & indigentiae tuæ tibi ipsi conscius, beatissimam Virginem, sanctos Angelos, & omnes Coelites, in subsidium adhibe tuæ paupertatis, invitando eos ad magnificandum Dominum tecum, & ad exaltandum uno consensu nomen illius.

9. Quoniam verò nec intensissimi omnium Coelestium religiosi actus ejus sunt dignitatis & valoris, ut tantam Dei erga te munificentiam valeant compensare; ipsum Dei & hominum mediatorem Jesum Christum deprecare, ut sibi vice tuâ & intra te satisfacere dignetur, omnesque acceptet vitæ suæ labores & angustias, omnia mortis suæ opprobria & tormenta, omnem denique gloriæ suæ excelsitudinem & excellentiam, in dignam pro gratia tibi præstitâ gratulationem.

10. Ad pedes Domini, cum summo doloris & amoris sensu, provolutus, ignosci

tibi suppliciter exora, omnes ante actæ vitæ tuæ iniquitates, omnem torporem & negligentiam, omnemque segnitiam & ignaviam quibus in exsequendis muneribus tuis, & in prosecutione virtutum præpediris; quod quidem ut assequaris, tuas cum ipsius meritis consociabis satisfactiones.

11. Peramagter etiam cum ipso conquerere, de quotidianis tuis excessibus; animæque tuæ languoribus & miseriis; ingemisce & dole, quod cum ipse sit qui venerit ignem mittere in terram, nihilque tantoperè velit, quam ut accendatur; concretum tamen gelu pectus habeas, & ad ardorem hujus splendidissimi solis non liquefias. Roga eum ut perlustret cor tuum, & omnia interiora tua, virtusque de eo exeat ad sanandum & vivificandum quidquid morbidum & vitiosum in te repererit.

12. Aperi ei totum cor tuum eâ quæ congruit amicum inter & amicum, filium & patrem confidentiâ, cum ipse horum omnium partes, tui causâ, sustineat. Omnes igitur anxietates tuas & ærumas, omnes calamitates & angustias, quidquid denique ad salutem tum animæ tum corporis conferre valet, illi fidenter expones, certò persuasus eum tibi non defuturum; neque enim amare potest & deferere.

13. Cùm eo potissimum fine sanctissimum istud sacramentum sit institutum, ut omnes qui hujus fuerint participes in Jesum trans-

formentur: (c) *Qui manducat me*, inquit, & ipse vivet propter me; per nimiam illam charitatem qua te dilexit, obsecra eum & obtestare; ut omnes virtutes, & omnia, quibus dicatur, spiritalia dona in te transfundat, & fiat invicem perfecta studiorum, consiliorum, voluntatumque communio; adeo ut quod vivas, jam non vivas ipse, vivat vero in te Christus.

14. Omnia vitæ tuæ momenta, sed extremum imprimis spiritum tuum illi commenda, eximiumque istud efflagita perseverantiæ donum, quo cætera dona cumulantur; ut moriatur anima tuâ morte justorum, & fiant novissima tua illorum familia.

15. Nec verò propriis tuis ita intendendum est commodis, ut & aliorum obliviscaris pro quibus orandum tibi incumbit, sacerdotis est plorare inter vestibulum & Altare, & pro omnibus, quibus gravatur populus, necessitatibus Dominum deprecari. Supplex nimirum à Deo deposces ut sanctissimam Ecclesiam omnium Fidelium matrem exaltare & amplificare dignetur; ut ad istius almæ matris sinum omnes errantes hæretici, schismatici vè revocentur; omnesque infideles, in regione umbræ mortis sedentes, illuminentur; Dominum exorabis ut Pastores Ecclesiæ regat & tueatur; Principibus Christianis pacem donet

Missæ Sacrificio. 293

& concordiam; peccatoribus veram cordis conversionem & remissionem, justisque profectum concedat & perseverantiam; ut omnes propinquos, benefactores, amicos tuos, imo & adversantes tibi, vel eos qui te aliquando molestiâ affecerunt, vultu sereno & acceptabili respiciat; omnibusque Fidelibus defunctis lucem æternam & requiem indulgeat.

His vel similibus exercitiis, prout Religio tibi suggererit, peractis; cor tuum & sensus externos omni custodiâ conservare satages, crebrisque per diem piis affectibus, ne tanti memoria beneficii dilabatur, summam Dei erga te dignationem compensare conaberis. Cum autem ea sit humani ingenii conditio, ut illi pretiosiora quæque ex usu vilescant & tædium afferant: ne repetitis semper iisdem actibus fervor languescat charitatis, subjiciuntur tibi quædam meditationes de præcipuis Christi dotibus, quarum sensus si attentè & sedatâ mente ponderaveris, non modicum fructum reportabis.



MEDITATIONES ANTE ET POST SACRUM,

Pro singulis hebdomadae diebus.

DOMINICA.

JESUS DEUS NOSTER.

Quis venit? Christus Jesus: (a) Qui est super omnia Deus benedictus in secula: (b) Quem constituit Pater heredem universorum, per quem fecit & secula: Qui cum sit splendor gloriae & figura substantiae ejus, fortansque omnia verbo virtutis suae, purificationem peccatorum faciens, sedet ad dexteram Majestatis in excelsis: Qui tanto melior Angelis effectus est, quanto differentius praeter illis nomen hereditavit. Cui enim dixit Deus aliquando Angelorum Filius meus es tu; ego hodie genui te? Et rursus, ego ero illi in patrem, & ipse erit mihi in Filium. Unde & cum iterum introducit primogenitum in orbem terrae, dicit, & adorent illum omnes Angeli Dei.

Nec minori cultu dignus est Jesus ille noster in Eucharistia, sub speciebus panis & vini deitiescens; ut pote qui cum omnibus suis dotibus & attributis ibi resideat, majestate nimirum, omnipotentia, æter-

(a) Rom. 9. 5. (b) Hebr. 1. 2. ad 7.

nitate, immensitate, sapientiâ, bonitate, justitiâ, & misericordiâ; omniaque ista simul cum humanitate sua in hoc sanctissimo recundat Sacramento, ne videlicet opprimaris à gloria.

Mirare igitur summam Dei sancti hujus erga te benignitatem, dicendo cum Propheta (c) *Verè tu es Deus absconditus Deus Israël Salvator*; & rursus (d) *Ergo ne credibile est, ut habitet Deus cum hominibus super terram; si calum & cali calorum te capere non possunt, quanto magis domus hæc mea coenosa & sordibus referta?*

2. *Ad quem venit?* Ad te pauperculam & vilissimam creaturam, quæ Deum & Creatorem contempta, (e) *mutavit gloriam suam in Idolum*: dereliquisti enim Dominum Deum tuum; confregisti jugum ejus, rupisti vincula ejus, dixisti; non serviam; & ad Deos alienos, mundum, carnem, satanam declinasti.

Et nunc revertere averfatrix anima, (f) scito & vide quia malum & amarum est reliquisse te Dominum Deum tuum. Ante majestatem tantam (g) ad cujus nutum columnæ cœli pavent & contremiscunt; perfidiam & abjectionem tuam confitere, exemplo illius cujus erat ista vox.

(h) *Numquid homo Dei comparatione jus-*

(c) *Isai. 45. 15.* (d) *2. Paral. 6. 18.*

(e) *Jer. 2. 11.* (f) *Ibid. 19*

(g) *Job. 26. 11.* (h) *Ibid. 4. 17.*

sificabitur, aut factore suo purior erit vir? Ecce qui serviunt ei non sunt stabiles, & in Angelis suis reperit pravitatem. (i) Ecce inter Sanctos ejus nemo immutabilis, & cali non sunt mundi in conspectu ejus: quanto magis abominabilis & inutilis homo, qui bibit quasi aquam iniquitatem?

3. Ad quid venit? Ut se tibi totum communitet, & cum ipso (k) maxima & pretiosa donet promissa, ut divinæ efficiaris confors naturæ, vitæ illius vivas, ipsi coaduneris, unus sis spiritus & una caro, atque æternæ vitæ pignus accipias. (l) Qui manducat meam carnem & bibit meum sanguinem, in me manet & ego in illo. Qui manducat me & ipse vivet propter me. Qui manducat hunc panem vivet in æternum.

Ad tantam Dei erga te stupefactus munificentiam, totus in laudibus & gratiarum actionibus effundaris, ac coelestium spirituum choris qui undequaque altare circumdant, venerabundus immiscere, sæpius istud Apocalypsis iterando. (m) Dignus est Agnus qui occisus est, accipere virtutem & divinitatem, & sapientiam, & fortitudinem, & honorem, & gloriam, & benedictionem. Deumum ditioni ejus & imperio totum te consecra, ex intimo pietatis affectu cum Psalmistâ dicendo. (n) Nonne Deo subjecta erit anima mea, ab ipso enim salutare meum.

(i) Ibid. 15. 15. (k) 2. Pet. 1. (l) Joan. 6.

(m) Apoc. 3. 12. (n) Ps. 61. 1.

FERIA II.

JESUS REX NOSTER.

1. *Quis venit?* Christus Jesus (a) *Rex Regum & Dominus Dominantium.* (b) *Qui constitutus est Rex à Deo super Sion montem sanctum ejus: cui Pater dedit Gentes hereditatem, & possessionem ejus terminos terra.* Ille Jesus sapientia æterna Patris (c) *cujus sunt consilium & aquitas, prudentia & fortitudo, divitiæ & gloria, opes superbæ & justitiæ: per quem Reges regnant, & legum conditores justæ decernunt; per quem potentes imperant, & potentes decernunt justitiam.* Rex ille (d) *cujus militum non est numerus: nam (e) millia millium ministrant ei, & decies millies centena millia assistunt ei.*

Obstupesce igitur, tantam præpotentis hujus principis demiratus dignationem, qui in pectore tuo tanquam in Regia sua commorari peroptat, & in anima tua, veluti in throno suo sedere: iisque utere vocibus (f) *Domine quid est homo quod memor es ejus, aut filius hominis quoniam visitas eum?* Quasi verò non sit (g) *homo putredo, & filius hominis vermis.*

2. *Ad quem venit?* ad fervum infidelem (h) *qui cum ei decem millia talenta debeat, nihil habet ex quo tanto debito valeat*

- (a) *Apo. 19. 16.* (b) *Pf. 2. 6.* (c) *Prov. 8.*
 (d) *Job. 25. 3.* (e) *Dan. 7. 10.* (f) *Pf. 8. 5.*
 (g) *Job. 25. 6.* (h) *Mat. 18. 24.*

satisfacere. Ad subditum perduellem, qui sæpius hanc nefariam emisit rebellionis vocem, (i) *Nolumus hunc regnare super nos.* Ad ingratum qui multis à Rege suo muneribus auctus, multis donis ampliatus, ad hostilia castra frequenter transvolavit, & crudele bellum adversus supremum Dominatorem suum machinatus, arma in ipsius defensionem comparata contra ipsum convertit; omnes animæ suæ facultates, omnia corporis membra & organa, sensus-ve suos ad peccatum inflectendo.

Ad pedes clementis & benigni Regis tui provolutus, tuam confitere perfidiam; & summum ipsius in te professus dominium, cum Propheta dicito. (k) *Tu es ipse Rex meus & Deus meus, qui mandas salutes Jacob.* Sed & roga eum & obsecra, ut adveniat in te regnum ipsius; nec (l) peccatum regnet amplius in tuo mortali corpore; ne-ve (m) dominetur tui omnis injustitia; sed virtute suâ sibi subjiciat quidquid in te tuo adversatur imperio, iis utendo vocibus: (n) *Domine Deus noster, possederunt nos Domini absque te, tantum in te recordemur nominis tui: vel istis, (o) Exurgat Deus & dissipentur inimici ejus, & fugiant qui oderunt eum à facie ejus, sicut deficit fumus deficient.*

3. *Ad quid venit?* Non ut perfidum ad-

(i) *Luc 19. 14.* (k) *Psf. 43. 5.*

(l) *Rom. 6. 12.* (m) *Psf. 118.*

(n) *Isai. 26. 13.* (o) *Psf. 67.*

ministratorem jubeat venundari, & omnia quæ ipsius sunt subjiciat servituti: non ut transfugum, compedibus alligatum, cruciandum tradat tortoribus; sed ut vel sui ipsius periculo, solvat eum à captivitate, atque à morte probrosa liberet. Attende & vide (p) Regem illum Salomonem, cum diademate spineo, quo coronavit eum Synagoga mater sua, in die desponsationis illius, & in die lætitiæ cordis ejus; inspicere septrum arundineum, chlamydem coccineam, sputa, colaphos, flagella, clavos, crucem, ludibria, & omnis generis tormenta, quorum memoriam in hoc sancto recolis sacrificio. Quid sentis de Deo tuo, de Rege tuo? Sic igitur tuas injurias non nisi maximis repensavit beneficiis.

Adde quod & beneficia tanta novis muneribus cumulavit; non enim te ut servum, sed inter familiares & amicos unanimes ac intimos adscitum, mensæ suæ te affidere fecit, in qua cibo Angelorum saginaris, & pane pascaris delicias præbente Regibus. Quid plura? Ut fidissimo in opere redemptionis hominum coadjutori, universos gratiæ suæ tibi concedidit thesauros. (q) Sic nempe honorabitur quemcumque voluerit Rex honorare. Nonne ergo æquitati consonum, ut tam grandi munere donatus,

(p) Cant. 3. 11. (q) Esth. 6. 9.

(r) Ps. 144. (s) Ps. 94. 3.

302 Mandationes

è corde tuo erumpat ista Psalmistæ grati
animi testificatio. (r) *Exaltabo te Deus
meus Rex ; & benedicam nomini tuo in seculum
seculi , (s) Quoniam Deus magnus Dominus
& Rex magnus super omnes Deos.*

F E R T A I I I .

J E S U S M A G I S T E R N O S T E R .

I. *Quis venit ?* Christus Jesus , qui ut est
Deus & verbum Patris , (a) *lux est vera quæ
illuminat omnem hominem venientem in hunc
mundum : & quatenus homo , (b) datus est
reftis populis , dux & præceptor Gentibus , ille
est de quo Dominus ad Moysen ait : (c)
Prophetam suscitabo eis de medio fratrum suo-
rum similem tui ; & ponam verba mea in ore
ejus , & loquetur ad eos omnia quæ præcepero
illi , qui autem verba ejus , quæ loquetur in
nomine meo , audire noluerit ergo ultor existam.*

Promissum istud adimplevit Deus in ple-
nitudine temporum : (d) multisque modis olim loquens Patribus in Pro-
phetis , novissimè diebus istis locutus est nobis
in Filio. (e) Apparuit , si quidem , gratia
Dei salvatoris nostri omnibus hominibus , eru-
ditiens nos ut abnegantes impietatem & secula-
ria desideria ; sobriè , & justè , & piè vivamus

(r) Ps. 144. (s) Ps. 94. 3. (a) Joan. 1. 9.

(b) Isa. 55. 4. (c) Deut. 18.

(d) Heb. 1. (e) Tit. 2.

ante & post Sacrum. 303

in hoc saculo. Unde & in monte, dum transfiguraretur Christus, audita est ista vox æterni Patris: (f) Hic est Filius meus dilectus in quo mihi bene complacui, ipsum audite.

(g) Exulta igitur, & lætare fili Sion, quia, in hoc sanctissimo Sacramento, dedit tibi Deus doctorem justitiæ (h) in quo sunt omnes thesauri sapientiæ & scientiæ absconditi. Namque (i) non faciat à te ultra avolare doctorem tuum, & oculi tui videbunt præceptorem tuum, & aures tuæ audient vocem post tergum monentis: hæc est via ambulate in eâ, & non declinetis neque ad dexteram neque ad sinistram. Ora ergo eum & obtestare, ut (k) erigat tibi aurem cordis, & audias eum quasi magistrum, atque ex intimo affectu dicito: (l) Loquere, Domine, quia audit servus tuus.

2. Ad quem venit? Ad rudem & indocilem discipulum, qui præcepta Domini sui & (m) sanam doctrinam non sustinens, coacervavit sibi magistros prurientes auribus, & à veritate quidem auditum avertit, ad fabulas autem conversus est; qui vocem Christi unius magistri sui despectus (n) Prophetis prophetantibus mendacium manibus applausit. Quoties enim eloquia sapientiæ, & disciplinam Domini Dei tui detrectatus; instigantibus mundo, carni, sathanæ, mo-

(f) Matt. 17. (g) Joel 2. (h) Colos. 2.

(i) Is. 50. (k) Ibid. 50. (l) 1. Reg. 3.

(m) (n) Jer. 5.

rem gessisti? Quoties Christo legem suam ad aures tui cordis afflanti, si, non verbo, saltem factis respondisti: (o) *Recede à nobis scientiam viarum tuarum nolumus*; (p) *Durus est sermo tuus, & quis potest eum audire?* Nonne iis annumerari posses ad quos spectabat hæc Salvatoris exprobratio (q) *Sermo meus non capit in vobis*; & ista Dei apud Jeremiam objurgatio: (r) *Populo huic factum est cor incredulum, & exasperans, recesserunt & abierunt?*

(s) Verumtamen scito iniquitatem tuam, quia in Dominum tuum prævaricatus es: & dispersisti vias tuas alienis, & vocem meam non audisti: convertere fili revertens ait Dominus. Ora eum qui docet hominem scientiam, ut det tibi scientiam sanctorum, spiritu intelligentiæ repleat te: præbeat servo suo cor docile, fiantque omnes animæ tuæ facultates à Deo edoctæ. Veniam deprecare quod verum tuum avversatus Doctorem, ad magistros inanes fallacesque deflexeris, dicendo cum Psalmista: (t) *Narraverunt mihi iniqui fabulationes, sed non ut lex tua.* Denique cum fidelibus Christi Discipulis, summum illi studium tuum, his verbis profiteri; (u) *Domine ad quem ibimus, verba vitæ æternæ habes?*

(o) Job 21. (p) Joan. 6. (q) Ibid. 8.

(r) Jer. 5. (s) Ibid. 3. (t) Ps. 118.

(u) Joann. 6.

3. *Ad quid venit? (x) Ad dandam scientiam salutis plebi ejus, in remissionem peccatorum eorum; ad illuminandum his qui in tenebris & in umbra mortis sedent; ut scilicet instruaris (y) in charitate, & in omnes divitias plenitudinis intellectus, in agnitionem mysterii Dei Patris, & ipsius Christi Jesu qui est in nobis spes gloriæ. Ut doceat te non sapientiam hominum quæ destruantur, (z) sed Dei sapientiam, quæ abscondita est, quam prædestinavit Deus ante secula in gloriam nostram, quam nemo principum hujus seculi cognovit. Ut implearis (a) in omnem plenitudinem Dei, & possis comprehendere cum omnibus sanctis quæ sit latitudo, & longitudo, & sublimitas, & profundum, scire etiam supereminentem scientiæ charitatem Christi. Metire etenim istam Hostiæ brevitatem, quæ sese exinanivit Deus majestatis, ut tui juris fieret, & perspectas habebis omnes ejus amoris dimensiones.*

Verum & agnosce quæ sit supereminens virtus Magistri tui; non enim vox ejus forinsecus tantum corporis auribus insonabit, sed ipse (b) dabit leges suas in corde tuo, & in mente tua superscribet eas; Ipse largietur tibi (c) spiritum sapientiæ & revelationis, in agnitione ejus, & illuminatos oculos cordis, ut scias quæ sit spes vocationis ejus, & quæ divitiæ gloriæ hereditatis ejus in sanctis. Tantam igitur eximii tui Doctoris demiratus virtu-

(x) *Luc. 1.* (y) *Colos. 2.* (z) *1. Cor. 2.*

(a) *Eph. 3.* (b) *Heb. 8.* (c) *Eph. 1.*

tem & sapientiam, cum Regina Saba (ecce enim plusquam Salomon hic) exclamavit, (d) *Beati servi tui, qui stant coram te semper, & audiunt sapientiam tuam; vel cum Psalmistâ (e) Beatus homo quem tu erudieris Domine, & de lege tuâ docueris eum.*

Sedens cum Magdalenâ secus pedes Domini, osculta sermones ejus, quoniam veniens evangelisabit tibi pacem. [f] *Audiam, inquires, quid loquatur in me Dominus Deus, quoniam loquetur pacem in plebem suam.* Hactenus viam tam desiderandæ pacis non cognovisti, quæ in perfecta cupiditatum & pravorum affectuum posita est cohibitione, carnisque & sensuum afflictatione: obsecra itaque coelestem tuum Magistrum, ut edoceat te absconditam illam crucis sapientiam; adeo ut cum Apostolo possis dicere. [g] *Non judicavi me scire aliquid nisi Jesum-Christum, & hunc crucifixum.*

F E R I A I V.

JESUS nostrarum MEDICUS animarum.

Quis venit? Christus Jesus [a] sanans omnem languorem, & omnem infirmitatem in populo. Etenim ab Adami-lapsu, omne genus humanum, veluti quidam ægrotus jacebat in terra desperato morbo laborans: [b] Omne caput languidum, & omne cor marens; à planta pedis usque ad verticem non

(d) 3. Reg. 10. (e) Ps. 93. (f) Ps. 84.

(g) 1. Cor. 2. (a) Mat. 4. (b) Is. 1.

ante & post Sacrum. 307

erat in eo sanitas, sed vulnus & livor & plaga tumens, quæ non erat circumligata, nec curata medicamine, neque fota oleo.

„Quærendus erat medicus, inquit Beatus Ambrosius, [c] sed quis iste tantus, qui faucibus mentis [humanæ] medeatur ulceribus? Quis homo tantus qui possit aliis subvenire, cum ipse sibi non possit? Quis aliis posset vitam reddere, cum ipse mortem non possit evadere? Omnes enim in Adam moriuntur; Quia [d] per unum hominem peccatum intravit in mundum & per peccatum mors, & ita in omnes homines mors pertransivit. Denique missi sunt sancti, missi sunt Prophetæ, qui oracula divina loquerentur, nec quidquam promovere potuerunt. Quæramus ergo aliquem de Angelis aut Archangelis medicum: sed quomodo mihi possunt præsidium ferre ne peccem, cum ipse Archangelus à peccato non abstinuerit? Quâ ratione ad Paradisum Angelus revocare me poterit, cum ipse Sathanas & Angeli sui sedem quam acceperant non servaverint.

Idcirco misit Pater Verbum suum ut ægrum sanaret, & ipse æterni Patris Filius magnus de cœlo descendit Medicus; viso ægroto [e] quem latrones, seu demones, despoliatum, & multis plagis im-

(c) *Comment. in cap. 4. Joan.* (d) *Rom. 5.*

(e) *Luc 10.*

positis, semivivum reliquerant, non p̄transiit, sed misericordiā motus est, & appropians alligavit vulnera ejus infundens oleum & vinum, & curam illius egit. Collige ergo & adhortare omnes animæ tuæ facultates, ut superexaltent nomen sanctum ejus, istud Psalmistæ iterando [f] *Benedic anima mea Domino & omnia quæ intra me sunt nomini sancto ejus: Benedic anima mea Domino, & noli oblivisci omnes retributiones ejus, qui sanat omnes infirmitates tuas, qui redimit de interitu vitam tuam, qui replet in bonis desiderium tuum; renovabitur ut Aquilæ juvenus tua.*

2. *Ad quem venit?* Ad ægrotum quem [g] circumdederunt mala quorum non est numerus. Namque in corpore mortis hujus circumfers ubique [h] legem membrorum repugnantem legi mentis, & captivantem te in lege peccati: intellectum tuum excæcavit ignorantia; [i] animalis si quidem homo non percipit ea quæ sunt spiritus Dei, stultitia enim est illi & non potest intelligere. Voluntatem vero inflammavit triplex illa concupiscentia apud B. Joannem recensita; [k] ex qua, veluti è fonte quodam, scaturiunt & exæstuant omnes animæ pravi motus & affectus, qui sicuti febres acutissimæ mentem animum sensumque perturbant &

(f) Ps. 102. (g) Ps. 39. (h) Rom. 7.

(i) Cor. 2. (k) 1. Joan. 2.

excruciant: „febris enim nostra, ait S. Am-
 „brosius [l] avaritia est, febris nostra li-
 „bido est, febris nostra luxuria est, febris
 „nostra ambitio est, febris nostra iracun-
 „dia est„. Hæ omnes ut potè febre fla-
 grantiores, animam gravius præcipitant.

At verò, quod deterius est, inquit S.
 Augustinus, [m] venit ad ægrum qui men-
 tem febribus perdidit, quique eò periculo-
 sius & desperatiùs ægrotat, quò sanum se
 esse judicat; venit ad phreneticum, qui
 & ipsà ægritudine quâ mentem perdidit,
 ipsum medicum cœdit, vulneravit, occi-
 dit. Quænam igitur digna scelere tuo pœ-
 na; nonne hanc justam audire commina-
 tionem promeruisti? [n] Curavimus Baby-
 lonem, & non est sanata, derelinquamus
 eam, quoniam pervenit usque ad coelos
 judicium ejus, & elevatum est usque ad
 nubes. Verumtamen ne desperes, ubi me-
 dicus Deus est, nullus insanabilis morbus
 ei potest occurrere; [o] *unxit me Domi-
 nus*, ait ille, *ut mederer contritis corde*: con-
 fite ergo peccatum tuum, & ipsius mi-
 sericordiam his Psalmistæ verbis deprecere:
 [p] *Miserere mei, Domine, quoniam infirmus
 sum, sana me Domine, quoniam conturbata
 sunt ossa mea, & anima mea turbata est val-
 de, sed tu Domine usquequò?* [q] *Ego dixi,*

[l] Comm. in cap. 4. Joan. [m] Ser. 175.

[n] Jer. 51. [o] Is. 61. [p] Ps. 6. [q] Ps. 40.

Domine, miserere mei, sana animam meam quia peccavi tibi.

*Ad quid venit? Non ut [r] tolleret massam de ficis, sicut Isaias, & cataplasmaree super vulnus tuum, & sanaretur; sed ut [s] de ipso sanguine suo ægrotis medicamenta faceret: namque [t] verè languores nostros ipse tulit, & dolores nostros ipse portavit; vulneratus est propter iniquitates nostras, attritus est propter scelera nostra, disciplina pacis nostræ super eum, & livore ejus sanati sumus. Christus enim, inquit S. Augustinus, [u] „etiam cum occideretur „medicus erat; vapulabat & curabat, patiebatur phreneticum, nec deserebat „ægrotum; tenebatur, alligabatur, colaphis percutiebatur, arundine plagas accipiebat, irridebatur, insultabatur ei, postremò audiebatur, damnabatur, ligno suspendebatur, undique circumfremebatur „& medicus erat. Vis illum, inter tot „opprobria & supplicia, medicum agnoscere? Audi ista verba: [x] *Pater dimitte „illis non enim sciunt quid faciunt. [Peccatores] perditâ mente sæviebant, & „medici sanguinem sæviendo fundebant.... „verum quando Dominus sanguinem fundebat; ipsam suam mortem, ad medicamenti confectionem impendebat,,**

(r) Is. 38. (s) S. Aug. Sup.

[t] Is. 53. [u] Sup. [x] Luc. 23.

ante & post Sacrum. 311

Cum igitur in hoc sanctissimo Sacramen-
to, tam efficax, tam præsens remedium
præstò sit tibi, omnibus etiam desperatissi-
mis vulneribus curandis sufficientissimum :
[y] *Quare non est obducta cicatrix tua ?*
Non medicamenti sed ægrotantis vitio ? *Vis*
sanus fieri ? [z] *Da locum medico tuo cœ-*
lesti, & non discedat à te, quia opera ejus
tibi sunt necessaria. Expone illi omnes ani-
mæ tuæ morbos, omnia vulnera. Dico
cum Lazari sororibus [a] *Domine, ecce*
quem amas infirmatur, vel cum Propheta :
[b] *Sana me Domine, & sanabor, saluum me*
fac & salvus ero, verum & tu noli pocu-
lum recusare, ait S. Augustinus; [c] „ Sa-
„ nari non potes nisi amarum calicem bi-
„ beris, calicem tentationum, quibus abun-
„ dat hæc vita, calicem tribulationum,
„ angustiarum, passionum. Bibe, inquit
„ medicus, bibe ut vivas; & ne responde-
„ ret ei languidus, non possum, non fero,
„ non bibo: prior bibit medicus sanus, ut
„ bibere non dubitaret ægrotus,,. Ne er-
go manum ejus repellas, etiam si ampu-
tare voluerit & exurere; sed cum eodem
S. Doctore clames: *Hic ure, hic seca, modo*
parcas, & in æternum parcas.

[y] *Jer. 8. (z) Eccl. 38. (a) Jer. 17.*

[b] *Jer. 88. (c) 1. Pet. 2.*

F E R I A V.

J E S U S P A S T O R N O S T E R.

1. *Quis venit?* Christus Jesus Pastor & Episcopus animarum nostrarum ad quem converſi ſumus: [d] omnes enim nos quaſi oves aliquando erravimus; unusquiſque in viam ſuam declinavit. Ecce, ait Dominus Deus, (e) diſperſæ ſunt oves meæ, eo quod non ſit eis paſtor, & factæ ſunt in devorati-
onem omnium beſtiarum agri; erraverunt gre-
ges mei in cunctis montibus, & in univerſo colle excelſo; ſuper omnem faciem terræ diſ-
perſi ſunt, & non eſt qui requirat. Propte-
rea ſuſcitabo ſuper oves meas Paſtorem unum,
qui paſcat eas, ſervum meum David, ipſe
paſcet eas, & erit eis in paſtorem, [f] ille
ſicut paſtor gregem ſuum paſcet, in brachio ſuo
congregabit agnos, & in ſinu ſuo levabit,
ſatas ipſe portabit. Venit itaque Chriſtus
Patris ſui mandatis obtemperans, (g) requi-
ſivit oves ſuas, & viſitavit eas, liberavit-
que de omnibus locis in quibus diſperſæ
fuerant in die nubis & caliginis, requieſce-
re eas fecit in herbis virentibus, & in
paſcuis pinguibus pavit eas ſuper montes
Iſraël.

(h) *Exultemus igitur Domino & jubilemus*
Deo ſalutari noſtro, nos enim populus ejus,

[d] 1ſ. 53. (e) Ezech. 34. (f) 1ſ. 40.

(g) Ezech. ſup. (h) Pf. 94.

ante & post Sacrum. 313

& oves pascuæ ejus; (i) quia per viscera misericordiæ suæ, visitavit nos oriens ex alto. Verum & superexaltemus infinitam tanti Pastoris charitatem, qui in hoc sanctissimo sacramento, ipse nostra fieri pascua non dedignatur. (k) „ Quis Pastor, inquit S. „ Chrysostomus, oves proprio pascit cruce- „ re? Et quid dico Pastor? matres multas „ sunt, quæ post partûs dolores, filios tra- „ dunt aliis nutricibus: hoc autem ipse non „ est passus, sed ipse nos proprio sanguine „ pascit, & per omnia sibi coagmentat. „ Ineffabilem ergo tanti Pastoris amorem, „ amore summo repensans, pro tam admira- „ bili illius erga te munificentia ipsi gratulare, „ cum Psalmista dicendo: (l) *Dominus regit me, & nihil mihi deerit, in loco pascuæ, ibi me collocavit, super aquam refectiõnis educavit me, animam meam convertit.*

2. *Ad quem venit?* Forsitan ad lupum ovinâ pelle circumvestitum, qui gregem Domini depopularus, quod crassum est, occidit, dum lanis ovium operiretur. (m) Ad Pastorem & Idolum, qui derelicta non visitavit, dispersum non quæsit, non sanavit contritum, quod stabat non enutrivit, carnes comedit pinguium, & ungulas earum dissolvit. Saltem ad ovem venit fugitivam, quæ ad caulas Domini

(i) *Luc 1.* (k) *Hom. 83. in Matt.*

(l) *Pf. 22.* (m) *Zach. 11.*

Pastoris hujus boni humeris sæpius reportata, rursus ovile ejus deseruit, sollicitudinem illius fefellit, & patientiam ipsius molestis defatigavit laboribus. Venit ad ovem regiminis impatientem, quæ nulla ovis fidelis munia exsecuta est.

Ausculata etenim Christum Pastorem tuum & confundere. *Ego*, inquit, *(n)* *cognosco meas*, & *cognoscunt me meæ*, *oves mea vocem meam audiunt*, & *sequuntur me*. Tu vero, nedum hujusmodi partes adimpleveris, imò, cum hoste gregis ipsius infensissimo, operibus tuis multoties clamitasti: *(o)* *Nescio Dominum*: & *quis est Dominus*, *ut audiam vocem ejus*? *(p)* *Vocavit te & renuisti*; extendit manum suam nec dignatus es aspicere; despexisti omne consilium ejus, & increpationes illius neglexisti. Quoties, crucem veluti pedum pastorale suum elevans, ad quod congregat oves electas, inclamat in evangelio: *(q)* *Si quis vult venire post me, abneget semetipsum, tollat crucem suam quotidie, & sequatur me*? Tu è contrà cœlestem hanc vocem aspernatus, & concupiscentiis falsis, omnibusque carnis illecebris obsecutus; in vitiorum & flagitiorum ima proruisti.

Quando igitur supremus pastor gregem suum in ultimo judicii die visitaturus est,

(n) *Jean. 10.* *(o)* *Exod. 5.*

(p) *Prov. 1.* *(q)* *Matt. 16.*

ante & post Sacrum. 315

unicuique prout gessit, sive bonum sive malum, redditurus; ex qua parte confitere promereberis; an à dextra cum ovibus & electis, an à sinistra cum hædis & reprobis? Age ergo, dum tempus est, omnes tuas à recto tramite aberrationes detestatus, supplex boni tui Pastoris auxilium & miserationem implora, quia (r) *benignus & misericors est & præstabilis super malitia*; iisque Regis poenitentis utere vocibus: (s) *Erravi sicut ovis quæ periit, quære servum tuum.* (t) *Domine ne elongaveris auxilium tuum à me, ad defensionem meam conspice.* Erue à framea Deus animam meam & de manu canis unicam meam; salva me ex ore leonis: & à cornibus unicornium humilitatem meam.

Ad quid venit? Ut boni erga nos pastoris officio fungatur: omnes enim quotquot ante ipsum venerant pastores, paucis exceptis (u) fures erant & latrones; id unum intendebant, ut gregem Domini mactarent & occiderent: mercenariorum more, propriis suis inhiabant commodis, seipfos solummodo pascebant, ovibus Dei fovendis & enutriendis parùm intenti. Non ita verò Christus Jesus: (x) *Venit enim Filius hominis quærere & saluum facere quod perierat.* (y) *Ego, inquit, veni ut vitam habeant oves,*

(r) Joël. 2. (s) Ps. 118. (t) Ps. 21.

(u) Jo. 10. (x) Luc. 19. (y) Jeau. 10.

& abundantius habeant: Ego sum Pastor bonus. O sapidum & suave verbum! Recogita coelestem illum Pastorem omnes Judææ civitates, omnia castella, non sine molestis laboribus & sudoribus, peragran-tem, ut oves domûs Israël dispersas congregaret: attende quali misericordiâ Samaritanam prævenit, quantâ benignitate Zachæum visitat, qualivè mansuetudine mulierem in adulterio deprehensam indemnata dimittit. Quænam est ista tanta dignatio & clementia? Nonne dulcis hujus oraculi exsecutio: Ego sum Pastor bonus?

Verum audi quid sequatur: Bonus Pastor animam suam dat pro ovibus suis. Mercenarius, veniente lupo, dimittit oves & fugit, quia non pertinet ad eum de ovibus: Haud ita se gessit Pastor noster eximius; ille pro nobis animam suam ponere non dubitavit: nimirum ut nos lupi infernalis dentibus eriperet; ipse sathanæ ministrorum & satellitum cruentis morsibus lacerari & interimi non recusavit. (1) Circumderunt me, inquit, vituli multi, tauri pingues obsederunt me, aperuerunt super me os suum sicut leo rapiens & rugiens: demùm sicut ovis ad occisionem ductus est, & sicut agnus ad victimam deportatus.

Quid ergo cunctaris tanto Pastori adherere, & in omnibus sedulò obtemperare?

ante & post Sacrum. 317

Om̃em sollicitudinem tuam in eum projice, quoniam ipse tui curam gerit. Roga eum & obtestare, ut omnium tuarum infirmitatum evagationum-ve miseratus, à boni erga te Pastoris officio non cesset; quæ perierint in te merita, requirat; quod ægrotum repererit, sanet; quod abjectum fuerit reducat; quod confractum, alliget; quod infirmum, consolidet; quod pingue & forte, custodiat: adeò ut istud in te, & in omnibus fidelibus adimpleatur boni hujus Pastoris promissum (a). *oves meæ vocem meam audiunt, & ego cognosco eas & sequuntur me: & ego vitam æternam do eis, & non peribant in æternum, & non rapiet eas quisquam de manu mea.* Deprecare etiam pro universis ab Ecclesiæ sinu avulsis, ut ad unitatem catholicam revocati; fiat unum ovile, & unus Pastor; & omnes unanimes, idem sapientes, uno ore honorificemus Deum, & Patrem Domini nostri Jesu-Christi.

F E R I A V I.

JESUS REDemptor NOSTRus.

1. *Quis venit?* Christus Jesus, (b) unus Mediator Dei & hominum qui dedit semetipsum redemptionem pro omnibus. Enim verò (c) iniquitates nostræ diviserant inter nos

(a) *Joan. Sup.* (b) *1. Tim. 2.* (c) *Is. 59.*

318. Meditationes

& Deum nostrum, & peccata nostra faciem ejus à nobis absconderant, ne exaudiret. (d) cum igitur omnes mortui effemus delictis nostris. *eramus pariter omnes naturâ filii iræ, filii vindictæ, filii poenæ,* (e) *vasa apta in interitum.* Nobis itaque Redemptore opus erat & Mediatore, qui nos à tam funestâ liberaret maledictione. Verum quis ille tantus, qui peccata nostra, exitiosum hunc inter Deum & hominem divisionis parietem, dissolvat, & cum Deo nos reconciliet? Non aliquis ex Patriarchis & Prophetis, non Moyses ipse; omnes enim peccaverunt & redemptione indigent; lex verò per Moysen promulgata, (f) umbram duntaxat habens furororum bonorum, (g) ad nihil perfectum ex se adducebat, & melioris spei erat tantum introductio.

Reprobatione igitur factâ præcedentis hujus mandati propter infirmitatem illius & inutilitatem, (h) volens Deus ostendere in seculis supervenientibus abundantes divitias gratiæ suæ in bonitate super nos; & propter nimiam charitatem suam quâ nos dilexit (i) *proprio filio suo non pepercit sed pro nobis omnibus tradidit illum.* Ingrediens itaque mundum Jesus, præstantioris testamenti sponsor factus, Patri suo

(d) *Eph. 2.* (e) *Rom. 9.* (f) *Hebr. 10.*
(g) *Ibid. 7.* (h) *Eph. 2.* (i) *Rom. 8.*

ait, (k) *Hostiam & oblationem nolūsti; corpus autem aptasti mihi: Holocaustomata pro peccato non tibi placuerunt; tunc dixi ecce venio: Dedit semetipsum pro nobis, ut nos redimeret ab omni iniquitate, & delens (l) chirographam decreti quod erat contrarium nobis, ipsum tulit de medio affigens illud cruci; expoliansque principatus & potestates, à quibus captivi tenebamur, traduxit confidenter patam triumphans illos in semetipso.*

(m) *Consurge ergo, solve vincula colli tui captiva filia Sion; quia ecce venit tibi salvator noster: (n) Spiritus Domini super me, inquit, eo quod unxerit me, & miserit me ut prædicarem captivis indulgentiam & clausis apertionem. Ad tantam Dei erga te obstupescens benignitatem, exclama: (o) Sic Deus dilexit mundum ut filium suum unigenitum daret; (p) dilexit me Christus & tradidit semetipsum pro me; frequenterque istud usurpa justī Zachariæ Canticum. (q) Benedictus Dominus Deus Israël, quia visitavit & fecit redemptionem plebis suæ, & erexit cornu salutis nobis in domo David pueri sui, &c.*

2. *Ad quem venit? Ad nefarium peccati servum, qui diaboli laqueis aliquandò irretitus, (r) captivus ab eo tenebatur ad*

(k) Heb. 10. (l) Col. 2. (m) Is. 52.

(n) Ibid. 61. (o) Jo. 3. (p) Gal. 2.

(q) Luc 1. (r) 2. Tim. 2.

ipsius voluntatem. (f) Ambulasti etenim secundum consuetudinem perversi hujus seculi, & secundum principem potestatum aëris hujus, spiritum nequitiae, qui in diffidentiae filios operatur; conversatus igitur in desideriis carnis peccati, & instabilium cogitationum tuarum; quam benè te deceret humilis ista Beati Pauli confessio!

(t) *Ego carnalis sum venundatus sub peccato.* Numquid ignoras, (u) quoniam cui teipsum exhibuisti servum ad obediendum, servus factus es hujus cui obedisti; sive peccati ad mortem, sive obeditionis ad justitiam; atque adeò cum peccato mortem gesseris, & ab ipso fueris superatus, servum hujus te profiteri necesse est?

Illud tamen tui sceleris auget atrocitatem quod, supremi Numinis donis male usus, pretium ad redemptionem tuam impensum, in salvatoris contumeliam & in tui ipsius perniciem dissipaveris. Quanam enim utilitas in Christi sanguine, qui Sacramentorum canalibus pro te & per te tam largè & copiosè diffunditur? (x) Si irritam quis faciens legem Moysis sine ullà miseratione moritur; quanto tu deteriora mereris supplicia, qui filium Dei sæpius conculcasti, & sanguinem testamenti in quo sanctificatus es pollutum duxisti? En sang

(f) Eph. 2. (t) Rom. 7.

(u) Ibid. 6. (x) Heb. 10.

guis ille adversum te dicit testimonium, clamat enim ad Deum de Altari, & melius loquitur quam Abel.

In tanto versatus periculo ad quem confugies, nisi ad eundem Redemptorem Jesum-Christum? (y) *Non enim in alio aliquo est salus; neque aliud nomen sub cælo datum est hominibus, in quo nos oporteat salvos fieri.* Ne ergo te deterreat peccatorum tuorum immanitas, & à recta in illum, fiducia te disturbet: quoniam (z) si peccaverimus, ipsum habemus advocatum apud Patrem, & ipse est propitiatio pro peccatis nostris, non pro nostris tantum, sed etiam pro totius mundi. Ora eum ut Redemptoris tui partes semper sustineat. Dicendo cum Psalm. *Redime me, Domine, & misereore mei: Tuus sum ego. salvum me fac: vel* cum S. August. *Ecce in manibus tuis, bone Jesu, descripsisti me, lege scripturam tuam & salva me.*

3. *Ad quid venit?* (a) *Ut sine timore, de manu inimicorum nostrorum liberati, serviamus illi, in sanctitate & justitia coram ipso omnibus diebus nostris.* (b) *Ut mundaret sibi populum acceptabilem sectatorem bonorum operum;* (c) *& essemus sancti & immaculati in conspectu ejus, in charitate radicati & fundati.* Itaque non ab omni nos Christus exemit

(y) Act. 4. (z) 1. Jo. 2. (a) Luc. 1.

(b) Tit. 2. (c) Eph. 1.

jugo, sed (d) liberati à peccato per mortem ipsius, servi facti sumus justitiæ, servi facti sumus Deo, cui servire, regnare est. Funes igitur ceciderunt tibi in præclaris. Oh quam dispar utraque servitus! (e) Cum enim servus esses peccati, liber equidem eras justitiæ; at verò quem fructum habuisti ex operibus hujusmodi libertatis in quibus nunc erubescis? Nam finis illorum mors est: nunc autem liberatus à peccato, servus autem factus Deo, habes fructum tuum in sanctificationem, finem verò vitam æternam.

Æquum est ergo ut hoc idem quod & Christus sentias, & quæ bonè de te speravit, opitulante ipsius gratiâ, perficere coneris. (f) Induere igitur Dominum Jesum Christum, & curam carnis ne feceris in desideriis; (g) sed sicut exhibuisti membra tua servire immunditiæ, & iniquitati ad iniquitatem, ita nunc exhibe illa servire justitiæ in sanctificationem: adeò ut (h) adimplens quæ desunt passionum Christi in carne tua, & (i) mortificationem ejus in corpore tuo semper circumferens, vita Jesu in corpore tuo manifestetur.

Verùm æmulare charismata adhuc meliora, excellentior enim via tibi demon-

(d) Rom. 6. (e) Ibid. (f) Rom. 13.
 (g) Ibid. 6. (h) Colos. 1.
 (i) 2. Cor. 4.

stratur: nempe (k) mortuus est Christus, ut & qui vivunt, jam non sibi vivant, sed ei qui pro ipsis mortuus est, (l) empti enim & redempti sumus pretio magno, (m) non corruptibilibus auro vel argento... sed pretioso sanguine quasi agni immaculati Christi, & incontaminati. (n) Vive ergo in fide Filii Dei, qui dilexit te, & tradidit semetipsum pro te; eique ita firmiter adhæreas, ut cum Apostolo valeas dicere. (o) Quis nos separabit à charitate Christi? An angustia? an fames? an nuditas? ... In his omnibus superamus propter eum qui dilexit nos; certus sum enim, quia neque mors, neque vita, neque Angeli, neque Principatus... neque creatura alia, poterit nos separare à charitate Dei quæ est in Christo Jesu Domino nostro. (p) Et nunc magnificabitur Christus in corpore meo, sive per vitam, sive per mortem; mihi enim vivere Christus est, & mori lucrum.

S A B B A T O.

JESUS SACERDOS ET VICTIMA.

1. Quis venit? Christus-Jesus (a) Sacerdos in æternum secundum ordinem Melchisedech; qui cum sit (b) assistens Pontifex

(k) Ibid. 5. (l) 1. Cor. 6.

(m) 1. Pet. 1. (n) Gal. 2. (o) Rom. 8.

(p) Philip. 1. (a) Ps. 109. (b) Heb. 9.

futurorum bonorum, non per tabernaculum manufactum, & hujus creationis, sicuti veteris legis Pontifices; sed per amplius & perfectius tabernaculum, (c) in quo inhabitat omnis plenitudo divinitatis corporaliter; per carnem videlicet suam, in utero Beatissimæ Virginis, operante Spiritu sancto formatam; (d) neque per sanguinem hircorum & vitulorum, sed per proprium sanguinem, introivit semel in sancta, æternæ redemptionis author nobis factus & mediator.

Quam præcellens ille sit, quantis videribus cumulatus, discite ex eodem Apostolo: (e) *Talis decebat*, inquit, ut nobis esset Pontifex sanctus, innocens, impollutus, segregatus à peccatoribus, & excelsior cælis factus, qui non habet necessitatem quotidie, quemadmodum alii Sacerdotes, prius pro suis delictis hostias offerre, deinde pro populi; sed qui semel seipsum offerendo, universa nostra expiavit delicta.

Ausculata & eundem Gentium Doctorem utriusque legis Sacerdotium & sacrificia, ut par est æstimantem: in antiquâ scilicet, [f] omnis Sacerdos præstò erat quotidie ministrans, & easdem sæpè hostias offerens, quæ nunquam poterant auferre peccata; in nova verò Christus unâ oblatione consummavit in sempiternum sancti-

(c) Colos. 2. (d) Heb. Sup.

(e) Heb. 7. (f) Heb. 10.

ficatos. [g] Ibi sanguis victimarum, & cinis vitalæ aspersus inquinatos sanctificabat ad emundationem carnis; hic, (h) *Sanguis Christi emundat conscientiam nostram ab operibus mortuis, ad serviendum Deo viventi.* In lege veteri [i] plures facti sunt Sacerdotes, idcirco quod morte prohiberentur permanere; at verò [k] *Iesus eo quod maneat in æternum sempiternum habet Sacerdotium.*

Recogita ergo quali te honore Christus ampliaverit, quem ad Sacerdotium suum adsciscere non est dedignatus: de tua tibi abjectione conscius, exclama cum Psalm. [l] *Quis sicut Dominus Deus noster qui in altis habitat. . . suscitans à terra inopem & de stercore elevans pauperem, ut collocet eum cum Principibus populi sui?* [m] *Habens tamen fiduciam in introitu Sanctorum, in sanguine ejusdem Christi, accede cum vero corde, emundatus à conscientia mala, in plenitudine fidei.*

2. *Ad quem venit?* Forsan ad Sacerdotem, qui Dominum Deum suum multoties aspernatus, [n] obtulit super Altare illius panem pollutum, dicendo, saltem operibus, *mensa Domini despecta est, mensa Domini contaminata est, & donum quod superimpa-*

[g] *Ibid.* 9. (h) *Ibid.* (i) *Ibid.* 7.

(k) *Ibid.* (l) *Pf.* 112.

(m) *Heb.* 10. (n) *Malach.* 1.

nitur contemptibile; „Polluimus enim, inquit S. Hieronymus, [o] panem, id est Corpus Christi, quando indigni accedimus ad Altare, & sordidi cum simus, non veremur mundissimum corpus sumere, & sanguinem bibere: tunc enim factis dicimus mensa Domini despecta est „.

Quoties heu frumento electorum, & vino virgines germinante [p] incrassatus, impinguatus, dilatatus, à Deo salutari tuo recessisti, & in diis alienis eum provocasti, dæmonius & non Deo cor tuum immolans?

Ad te igitur spectat ista Domini apud Prophetam increpatio: [q] *Sacerdotes mei contempserunt legem meam, & polluerunt sanctuaria mea, inter sanctum & profanum non habuerunt distantiam, & inter pollutum & mundum non intellexerunt; coinquinabar in medio eorum. Gravis proinde illa tibi impendet Christi ad persecutores suos comminatio [r] fiat mensa eorum coram ipsis in laqueum, & in retributiones & in scandalum. . . . Quoniam super dolorem vulnerum meorum addiderunt: appone iniquitatem super iniquitatem eorum & non intrent in iustitiam tuam: deleantur de libro viventium, & cum iustis non scribantur. Imminet tibi & istud*

(o) *Comm. in Mal. (p) Deut. 32.*

(q) *Ezech. 22. (r) Ps. 68.*

ante & post Sacrum. 327

quo percussus est Judas proditor terribile anathema: [f] *Induit maledictionem sicut vestimentum; & intravit sicut aqua in interiora ejus, & sicut oleum in ossibus ejus, fiat ei sicut vestimentum quo operitur, & sicut zona qua semper præcingitur.*

Nunc verò ad quem confugies? Nisi ad eundem [t] Pontificem magnum qui penetravit cælos, Jesum Filium Dei: Adeas ergo cum fiduciâ ad thronum istum gratiæ, ut misericordiam consequaris, & gratiam invenias in auxilio opportuno. Neque enim habemus Pontificem qui non possit compati infirmitatibus nostris, tentatum autem per omnia pro similitudine absque peccato: [u] in eo autem in quo passus est & tentatus, potens est & eis qui tentantur auxiliari, & omnia populi delicta repropitiare.

3. *Ad quid venit.* [x] *Ut fiat omnibus sibi obtemperantibus causa salutis æternæ: si enim in diebus carnis suæ, preces supplicationesque Deo Patri cum clamore valido & lacrymis offerens, exauditus est pro suâ reverentiâ; quantò magis nunc consummatus in gloria sua, & semper vivens ad interpellandum pro nobis, salvare in perpetuum poterit accedentes per semetipsum ad Deum? Ut autem æternâ illâ fruaris beatitudine, necesse est [y] ut sicut Christus didicit ex*

(f) Ps. 108. (t) Heb. 10. (u) Ibid. 2.

(x) Ibid. 5. (y) Ibid. 5.

iis quæ passus est obedientiam, discas pariter & tu ipse Deo obtemperare.

Neque enim eo duntaxat consilio venit ad te [z] *Apostolus & Pontifex confessionis nostræ Jesus*, [a] ut seipsum tradat hostiam & oblationem Deo in odorem suavitatis, verum ut unâ etiam cum ipso [b] te exhibeas hostiam viventem sanctam, Deo placentem, & probando quæ sit voluntas Supremi hujus Numinis bona, beneplacens & perfecta, rationabile illi præstes obsequium.

Enim verò mente sequere æternum Sacerdotem nostrum, à primo peregrinationis suæ exordio, ad extremum usque vitæ suæ spiritum; exultavit ille ut gigas ad currendam Dei mandatorum viam. (c) Ingressi videlicet mundum, his Patrem suum verbis affatur: *in capite libri scriptum est de me, ut faciam Deus voluntatem tuam, Deus meus volui, & legem tuam in medio cordis mei.* Dùm oves Domûs Israël dispersas quæreretur, regnum Dei annuntiando: [d] *Ego, inquit, cibum habeo manducare quem vos nescitis, meus cibus est, ut faciam voluntatem ejus qui misit me Patris, & ut perficiam opus ejus.* Denique in cruce pendens perdidit vitam ne perderet obedientiam, [e] *factus obediens usque ad mortem, mortem autem crucis.* Hoc est perpe-

(z) *Ibid.* 3. (a) *Ephes.* 5. [b] *Rom.* 12.

[c] *Heb.* 10. [d] *Joan.* 4. [e] *Philip.* 2.

tuum quod de seipso obtulit holocaustum.

Itaque ut schisma, hac in parte, non sit inter caput & membra mystici ejus corporis; debes sicut ille ambulavit, & ipse ambulare; quæ Deo placita sunt semper facere; in ea vocatione in qua vocatus es permanere; nullum aliud munus ambire quam illud ad quod fueris destinatus: & bona & mala de manu ipsius æquanimiter suscipere. Quo pacto, victimam quam sapius tractas imitaberis, & cum fidelibus ejus Discipulis licebit dicere: [f] *Propter te, Domine, mortificamur totâ die astimati sumus sicut oves occisionis.* Demùm & ista Psalmistæ verba fidenter proferes (g) *Introibo, Domine, in domum tuam in holocaustis*

[f] Rom. 8. [g] Ps. 65.



ORATIO S. AMBROSII

ANTE MISSAM.

*Per singulos Hebdomadæ dies distributa.**Die Dominicâ.*

Summe Sacerdos, & vere Pontifex, Jesu Christe, qui te obtulisti Deo Patri hostiam puram & immaculatam in Ara crucis pro nobis miseris peccatoribus, quique dedisti nobis Carnem tuam ad manducandum, & Sanguinem tuum ad bibendum, & posuisti mysterium illud in virtute Spiritus sancti, dicens: *Hæc quotiescumque feceritis, in mei memoriam facietis.* Rogo per eundem Sanguinem tuum, magnum salutis nostræ pretium: rogo per hanc miram & ineffabilem charitatem, quâ nos miseros & indignos sic amare dignatus es, ut lavares nos à peccatis nostris in Sanguine tuo: Doce me servum tuum indignum, quem inter cætera dona tua, ad officium Sacerdotale vocare dignatus es, nullis meis meritis, sed solâ dignatione misericordiæ tuæ; Doce me, quæso, per Spiritum sanctum tuum, tantum mysterium tractare eâ reverentia & honore, eâque devotione & timore, quibus oportet & decet. Fac me, Domine Jesu-Christe, per gratiam tuam semper illud de

Oratio ante Missam. 332

tanto mysterio credere & intelligere, sentire & firmiter tenere, dicere & cogitare quod tibi placet, & expedit animæ meæ. Intret Spiritus tuus bonus in cor meum, qui sonet ibi sine sono, & sine strepitu verborum loquatur omnem veritatem tantorum mysteriorum: Profunda quippe sunt nimis, & sacro testâ velamine: Propter magnam clementiam tuam concede mihi Missarum solemnia mundo corde & purâ mente celebrare. Libera cor meum ab immundis & nefandis, vanis & noxiis cogitationibus. Muni me beatorum Angelorum piâ & fidâ custodiâ, atque fortissimâ tutelâ, ut hostes omnium bonorum confusi discedant. Per virtutem tanti mysterii, & per manum sancti Angeli tui repelle à me, Domine Jesu-Christe, & à cunctis servis tuis, durissimum spiritum superbiæ, coenodoxiæ, invidiæ & blasphemiæ, fornicationis & immunditiæ, dubietatis & diffidentiae. Confundantur qui nos persequuntur: pereant illi qui nos perdere festinant.

Feria secunda.

R Ex Virginum, & amator castitatis & integritatis, coelesti rore benedictionis tuæ extingue in corpore meo fomitem ardentis libidinis, ut maneat in me tenor castitatis animæ & corporis. Mortifica in membris meis carnis stimulos, omnesque libidinis commotiones, & da mihi veram & per-

332 *Oratio ante Missam.*

petuam castitatem, cum cæteris donis tuis, quæ tibi placent in veritate, ut sacrificium laudis casto corpore & mundo corde valeam tibi offerre. Quantâ enim, Domine Jesu-Christe, cordis contritione & lacrymarum fonte, quantâ reverentiâ & tremore, quantâ corporis castitate, & animæ puritate illud divinum & coeleste sacrificium est celebrandum, ubi Caro tua in veritate sumitur, ubi Sanguis tuus in veritate bibitur: ubi summis ima, terrena divinis junguntur: ubi adest præsentia sanctorum Angelorum: ubi tu es sacerdos, & sacrificium mirabiliter & ineffabiliter constitutus?

Feria tertia.

Quis dignè hoc celebrare poterit, nisi tu Deus omnipotens, offerentem feceris dignum? Scio & verè scio, & idipsum pietati tuæ confiteor, quia non sum dignus accedere ad tantum mysterium, propter nimia peccata mea, & infinitas negligentias meas: Sed scio, & veraciter credo ex toto corde, & ore confiteor, quia tu potes me facere dignum, qui solus potes facere mundum de immundo conceptura semine, & de peccatoribus justos & sanctos. Per hanc omnipotentiam tuam te rogo ut concedas mihi peccatori hoc coeleste sacrificium celebrare cum timore & tremore, cum cordis puritate, & lacrymarum fonte, cum lætitiâ spiritali & coelesti gaudio. Sentiat mens mea

Oratio ante Missam. 333

dulcedinem beatissimæ præsentiaæ tuæ, & excubias sanctorum Angelorum tuorum in circuitu meo.

Feria quarta.

EGo enim, Domine, memor venerandæ passionis tuæ, accedo ad Altare tuum, licet peccator, ut offeram tibi sacrificium, quod tu instituisti, & offerri præcepisti in commemorationem tui, pro salute nostrâ. Suscipe istud, quæso, summe Deus, pro Ecclesiâ sanctâ tuâ, & pro cuncto populo tuo quem acquisisti pretioso sanguine tuo. Et quoniam me peccatorem inter te & eundem populum tuum medium esse voluisti, licet in me boni operis testimonium non agnoscas, officium saltem dispensationis creditæ non recuses; nec per me indignum famulum tuum eorum salutis pereat pretium; pro quibus victima factus salutaris, dignatus es esse redemptio. Profero etiam, Domine, si digneris propitius intueri, tribulationes plebium, pericula populorum, captivorum gemitus, miserias orphanorum, necessitates peregrinorum, inopiam debilium, desperationes languentium, defectus senum, suspiria juvenum, vota virginum, lamenta viduarum.

Feria quinta.

TU enim misereris omnium, Domine, & nihil odisti eorum quæ fecisti. Memorare quæ sit nostra substantia: quia tu Pater noster es, quia tu Deus noster es, ne

334 *Oratio ante Missam.*

irascaris satis, neque multitudinem viscerum tuorum super nos contineas; non enim in justificationibus nostris prosternimus preces nostras ante faciem tuam; sed in miserationibus tuis multis. Aufer à nobis, Domine, iniquitates nostras, & ignem sancti Spiritus in nobis clementer accende. Aufer cor lapideum de carne nostra & da nobis cor carneum, quod te amet, te diligat, te delectetur, te sequatur, & te perfruatur. Oramus, Domine, clementiam tuam, ut sereno vultu familiam tuam, sacri tui nominis officia præstolantem, aspicere digneris: & ut nullius sit irritum votum, nullius vacua postulatio, tu nobis preces suggere, quas ipse audire propitius & exaudire delecteris.

Feria Sexta.

Rogamus etiam te, sancte Pater, pro spiritibus fidelium defunctorum, ut sit illis salus, fanitas, gaudium & refrigerium sempiternum, hoc magnum pietatis Sacramentum. Domine Deus meus, sit illis hodie magnum & plenum convivium de te Pane vivo, qui de coelo descendisti, & das vitam mundo; de carne tuâ sanctâ & benedictâ, Agni videlicet immaculati, qui tollit peccata mundi: quæ de sancto & glorioso beatæ Virginis Mariæ utero est assumpta, & de Spiritu sancto concepta; ac de illo pietatis fonte, qui per lanceam mi-

Oratio ante Missam. 335

litis ex tuo sacratissimo latere emanavit; ut exinde referti & satiiati, refrigerati & consolati exultent in laude & gloriâ tuâ. Peto clementiam tuam, Domine, ut descendat super panem tibi sacrificandum plenitudo tuæ benedictionis, & sanctificatio tuæ divinitatis. Descendat etiam, Domine, illa sancti Spiritûs tui invisibilis, incomprehensibilisque majestas, sicut quondam in patrum hostias descendebat, qui & oblationes nostras, Corpus & Sanguinem tuum efficiat, & me indignum sacerdotem doceat tantum tractare mysterium cum cordis puritate, & lacrymarum devotione, cum reverentiâ & tremore, ita ut placidè ac benignè suscipias sacrificium de manibus meis, ad salutem omnium, tam vivorum, quàm Defunctorum.

Sabbato.

R Ogo te etiam, Domine, per ipsum sacrosanctum mysterium Corporis & Sanguinis tui, quo quotidie in Ecclesia tua pascimur & potamur, abluimur & sanctificamur, atque unius tuæ summæ divinitatis participes efficiamur: Da mihi virtutes tuas sanctas, quibus repletus, bona conscientia, ad altare tuum accedam, ita ut hæc coelestia Sacramenta efficiantur mihi salus & vita. Tu enim dixisti ore tuo sancto & benedicto: *Panis quem ego dabo, caro mea est pro mundi vita. Ego sum panis vivus*

336 *Oratio ante Missam.*

qui de calo descendi. Si quis manducaverit ex hoc pane, vivet in æternum. Panis dulcissime, sana palatum cordis mei, ut sentiam suavitatem amoris tui. Sana illud ab omni languore, ut nullam præter te sentiam dulcedinem. Panis candidissime, habens omne delectamentum, & omnem saporem, qui nos semper reficis, & nunquam in te deficis. Comedat te cor meum: & dulcedine saporis tui repleantur viscera animæ meæ. Manducat te Angelus ore pleno; manducet te peregrinus homo pro modulo suo, ne deficere possit in via, tali recreatus viatico. Panis sancte, Panis vive, Panis munde, qui descendisti de coelo & das vitam mundo, veni in cor meum, & munda me ab omni inquinamento carnis & spiritus. Intra in animam meam, sana & munda me interiùs, & exterius. Esto tutamen, & perpetua salus corporis, & animæ meæ. Repelle à me insidiantes mihi hostes: recedant procul à præsentia potentiae tuæ, ut foris & intus per te munitus, recto tramite perveniam ad tuum regnum: ubi non in mysteriis, sicut in hoc tempore agitur, sed facie ad faciem te videbimus, cum tradideris nos regnum Deo Patri, & eris Deus omnia in omnibus. Tunc enim me de te satiabis satietate mirificâ: ita ut nec esuriam, nec sitiam in æternum. Qui cum eodem Deo Patre, & Spiritu sancto vivis & regnas in secula seculorum. Amen.

PRÆPARATIO

PRÆPARATIO

A D M I S S A M.

PRO opportunitate Sacerdotis
facienda.

ANT. Ne reminiscaris, &c, *In duplicibus tantum duplicatur, & pariter ante Missas quæ ritu duplici celebrantur, (hoc est) cum unica Oratione, sive sit votiva pro re gravi, sive pro defunctis (quamquam pro defunctis omit- ti possunt Antiphona & Psalmi), & tempore Paschali additur, Alleluia.*

Psal. 83. Quam dilecta, pag. 23.

Psalmus 84.

Benedixisti, Domine, terram tuam: *
avertisti captivitatem Jacob.

Remisisti iniquitatem plebis tuæ, * ope-
ruisti omnia peccata eorum.

Mitigasti omnem iram tuam: * averti-
sti ab ira indignationis tuæ.

Converte nos, Deus, salutaris noster: *
& averte iram tuam à nobis.

Numquid in æternum irasceris nobis? *
aut extends iram tuam à generatione in
generationem?

Deus, tu conversus vivificabis nos, *
& plebs tua lætabitur in te.

ij *Præparatio ad Missam.*

Ostende nobis, Domine, misericordiam tuam: * & salutare tuum da nobis.

Audiam quid loquatur in me Dominus Deus: * quoniam loquetur pacem in plebem suam.

Et super sanctos suos: * & in eos qui convertuntur ad cor.

Verumtamen prope timentes eum salutare ipsius: ut inhabitet gloria in terra nostra.

Misericordia & veritas obviaverunt sibi: * iustitia & pax osculatæ sunt.

Veritas de terra orta est: * & iustitia de coelo prospexit.

Etenim Dominus dabit benignitatem; * & terra nostra dabit fructum suum.

Iustitia ante eum ambulabit: * & ponet in via gressus suos.

Gloria Patri. Sicut erat, &c.

Psalms 85.

INclina, Domine, aurem tuam, & exaudi me: * quoniam inops & pauper sum ego.

Custodi animam meam, quoniam sanctus sum: * salvum fac servum tuum, Deus meus, sperantem in te.

Miserere mei, Domine, quoniam ad te clamavi totâ die: * lætifica animam servi tui, quoniam ad te, Domine, animam meam levavi.

Quoniam tu, Domine, suavis & mitis: *

Præparatio ad Missam. iiij

& multæ misericordiæ omnibus invocantibus te.

Auribus percipe, Domine, orationem meam: * & intende voci deprecationis meæ.

In die tribulationis meæ clamavi ad te: * quia exaudisti me.

Non est similis tui in diis, Domine, * & non est secundum opera tua.

Omnes gentes quascumque fecisti venient, & adorabunt coram te, Domine; * & glorificabunt nomen tuum.

Quoniam magnus es tu, & faciens mirabilia: * tu es Deus solus.

Deduc me, Domine, in via tua, & ingrediar in veritate tua: * lætetur cor meum ut timeat nomen tuum.

Confitebor tibi, Domine Deus meus, in toto corde meo: * & glorificabo nomen tuum in æternum.

Quia misericordia tua magna est super me: * & eruisti animam meam ex inferno inferiori.

Deus, iniqui insurrexerunt super me, & synagoga potentium quæsierunt animam meam: * & non proposuerunt te in conspectu suo.

Et tu, Domine Deus miserator & misericors: * patiens, & multæ misericordiæ, & verax.

Respice in me & miserere mei: * da imperium tuum puero tuo, & salvum fac filium ancillæ tuæ.

iv *Preparatio ad Missam.*

Fac mecum signum in bonum , ut videant qui oderunt me , & confundantur : * quoniam tu , Domine , adjuvisti me , & consolatus es me.

Gloria Patri. Sicut erat , &c.

Psalms. 115.

CRedidi , propter quod locutus sum : * ego autem humiliatus sum nimis. Ego dixi in excessu meo : * Omnis homo mendax.

Quid retribuam Domino , * pro omnibus quæ retribuit mihi ?

Calicem salutaris accipiam : * & nomen Domini invocabo.

Vota mea Domino reddam coram omni populo ejus : * pretiosa in conspectu Domini mors Sanctorum ejus.

O Domine , quia ego servus tuus : * ego servus tuus , & filius ancillæ tuæ.

Dirupisti vincula mea : * tibi sacrificabo hostiam laudis , & nomen Domini invocabo.

Vota mea Domino reddam in conspectu omnis populi ejus : * in atriis domus Domini , in medio tui Jerusalem.

Gloria Patri. Sicut erat , &c.

Psalms 129.

DE profundis clamavi ad te , Domine : * Domine exaudi vocem meam.

Fiant aures tuæ intendentes : * in vocem deprecationis meæ.

Si iniquitates observaveris , Domine ; * Domine quis sustinebit ?

Præparatio ad Missam. v

Quia apud te propitiatio est, * & propter legem tuam sustinui te, Domine.

Sustinuit anima mea in verbo ejus: * speravit anima mea in Domino.

A custodia matutina usque ad noctem, * speret Israël in Domino.

Quia apud Dominum misericordia: * & copiosa apud eum redemptio.

Et ipse redimet Israël * ex omnibus iniquitatibus ejus.

Gloria Patri, &c.

Deinde repetitur Antiphona, Ne reminiscaris, Domine, delicta nostra, vel parentum nostrorum: neque vindictam sumas de peccatis nostris. Tempore Paschali additur, Alleluia.

Postea Sacerdos dicit: Kyrie eleison. Christe eleison. Kyrie eleison.

Pater noster, &c.

℣. Et ne nos inducas in tentationem.

℞. Sed libera nos à malo.

℣. Ego dixi, Domine, miserere mei.

℞. Sana animam meam quia peccavi tibi.

℣. Convertere, Domine, aliquantulum.

℞. Et deprecare super servos tuos.

℣. Fiat misericordia tua, Domine, super nos.

℞. Quemadmodum speravimus in te.

℣. Sacerdotes tui induantur justitiam.

℞. Et Sancti tui exultent.

℣. Ab occultis meis munda me, Domine.

℞. Et ab alienis parce servo tuo.

vj *Præparatio ad Missam.*

Ps. Domine, exaudi orationem meam.

R. Et clamor meus ad te veniat.

Ps. Dominus vobiscum,

R. Et cum spiritu tuo.

Oremus.

Aures tuæ pietatis mitissime Deus, inclina precibus nostris, & gratiâ sancti Spiritûs illumina cor nostrum; ut tuis mysteriis dignè ministrare, teque æterna charitate diligere mereamur.

Deus, cui omne cor patet, & omnis voluntas loquitur, & quem nullum latet secretum, purifica per infusionem sancti Spiritûs cogitationes cordis nostri; ut te perfectè diligere, & dignè laudare mereamur.

URe igne sancti Spiritûs renes nostros, & cor nostrum, Domine, ut tibi casto corpore serviamus, & mundo corde placeamus.

Mentes nostras, quæsumus, Domine, Paracletus qui à te procedit, illuminet, & inducat in omnem, sicut tuus promissit Filius, veritatem.

Adfit nobis, quæsumus, Domine; virtus Spiritûs sancti, quæ & corda nostra clementer expurget, & ab omnibus tueatur adversis.

Deus, qui corda Fidelium sancti Spiritûs illustratione docuisti, da nobis in eodem spiritu recta sapere, & de ejus semper consolatione gaudere.

Præparatio ad Missam. vij.

Conscientias nostras, quæsumus, Domine visitando purifica; ut veniens Dominus noster Iesus-Christus Filius tuus, paratam sibi in nobis inveniat mansionem. Qui tecum vivit & regnat in unitate Spiritûs sancti Deus, per omniâ secula sæculorum. Amen.

FORMA INTENTIONIS.

AD laudem & gloriam sanctissimæ Trinitatis, in memoriam Salvatoris nostri JESU-CHRISTI Vitæ, Passionis, Mortis, Resurrectionis, ac in operum & meritum suorum, omniumque Sanctorum unionem. Ad laudem quoque & exaltationem beatissimæ Virginis MARIE, Cælestium Angelorum, Sanctorum, atque Sanctarum, & signanter NN. & aliorum Sanctorum. Offero etiam cum ipsorum beatorum Spirituum laudibus, Sanctorumque omnium precibus & meritis; nunc & semper, hoc, & omnia alia sacrificia, officia, orationes, & bona opera totius mundi, pro meis præsentibus & futuris animæ & corporis necessitatibus, in auxilium & consolationem meam, & in remissionem omnium peccatorum meorum, quorum veram contritionem semper habere intendo, conor & cupio, omniumque vivorum, & defunctorum meorum parentum, & consanguineorum, amicorum, inimicorum, benefactorum in spiritualibus, & temporalibus, ac illorum quibus fui gravamen,

viii *Præparatio ad Missam.*

scandalum, occasio peccandi. Pro omni gradu sanctæ Catholicæ Ecclesiæ, ac illius conservatione, augmento, & exaltatione, Christianorum principum unione, hæreseum extirpatione, Summi Pontificis salute; Regis nostri Christianissimi incolumitate, & animarum in Purgatorio existentium liberatione. Pro conservatione & augmento omnium Religionum. Pro conversione omnium Infidelium. Pro mihi commissis & commendatis. Denique pro illis omnibus vivis atque defunctis pro quibus Dominus noster J. Q. & ejus Mater sciunt & volunt me debere orare & sacrificare; sic oro, obsecro, ac orare, obsecrare, sacrificare intendo, ac propono; ac juxta intentionem sanctæ Catholicæ Ecclesiæ, ego N. Minister licet indignus. In nomine Patris, & Filii, & Spiritus sancti. Amen. Pater. Ave, &c.

Gregorius XIII. Pontifex Maximus, concessit cuilibet celebranti Missam, & dicenti quæ sequuntur, 50. annorum Indulgentiam.

EGo volo Missam celebrare, & conficere Corpus & sanguinem Domini JESU-CHRISTI, juxta ritum sanctæ Romanæ Ecclesiæ: ad laudem omnipotentis Dei, totiusque Curiæ triumphantis; ad utilitatem meam, totiusque Curiæ militantis: pro omnibus qui se commendaverunt orationibus meis in genere & specie, & pro

Præparatio ad Missam. ix

felici statu sanctæ Romanæ Ecclesiæ. Amen.

G Audium cum pace, emendationem vitæ, spatium veræ poenitentiae, gratiam & consolationem sancti Spiritûs, perseverantiam in bonis operibus, tribuat nobis omnipotens & misericors Dominus.
: Amen.

Alia sancti Ambrosii ante Missam Oratio.

AD mensam dulcissimi convivii tui, pie Domine JESU-CHRISTE, ego peccator de propriis meritis nihil præsumens, sed de tua confidens misericordia & bonitate, accedere vereor, & contremisco. Nam cor & corpus habeo multis criminibus maculatum, mentem & linguam non cautè custoditam. Ergo, ô pia Deitas! ô tremenda Majestas! ego miser inter angustias deprehensus, ad te fontem misericordiæ recurro, ad te festino sanandus: sub tuam protectionem fugio, & quem Judicem sustinere nequeo, Salvatorem habere suspiro. Tibi, Domine, plagas meas ostendo; tibi verecundiam meam detego. Scio peccata mea multa & magna, pro quibus timeo. Spero in misericordias tuas, quarum non est numerus. Respice ergo in me oculis misericordiæ tuæ, Domine JESU-CHRISTE, Rex æternæ, Deus & homo, crucifixus propter hominem. Exaudi me sperantem in te: misere mei pleni miseriis & peccatis, tu qui

x Preparatio ad Missam.

fontem miserationis nunquam manere cessabis. Salve, salutaris Victimæ, pro me, & omni humano genere in patibulo Crucis oblata. Salve, nobilis & pretiose Sanguis, de vulneribus crucifixi Domini mei JESU-CHRISTI profluens, & peccata totius mundi abluens. Recordare, Domine, creaturæ tuæ, quam tuo Sanguine redemisti. Poenitet me peccasse: cupio emendare quod feci. Aufer à me, quæso, clementissime Pater, omnes iniquitates & peccata mea; ut purificatus mente & corpore, dignè degustare merear Sancta Sanctorum: & concede, ut sancta prælibatio Corporis & Sanguinis tui, quam ego indignus sumere intendo, sit peccatorum meorum remissio, sit delictorum perfecta purgatio, sit turpium cogitationum effugatio, ac bonorum sensuum regeneratio, operumque tibi placentium salubris efficacia, animæ quoque & corporis contra inimicorum meorum insidias firmissima tuitio. Amen.

Oratio ad beatam Virginem Mariam ante celebrationem Missæ.

O Mater pietatis & misericordiæ, beatissima Virgo Maria, ego miser & indignus peccator ad te confugio: toto corde & affectu, & precor dulcissimam pietatem tuam, ut sicut dulcissimo Filio tuo in Cruce pendenti assististi, ita & mihi mi-

Præparatio ad Missam. xj

fero Sacerdoti, & Sacerdotibus omnibus, hic, & in tota Sancta Ecclesia ipsum hodiè offerentibus, clementer assistere digneris; ut tuâ gratiâ adjuti, dignam & acceptabilem hostiam in conspectu summæ & individuæ Trinitatis offerre valeamus.

Amen.

Ad Sanctum, vel Sanctam cujus eo die Festum celebratur, Oratio.

O Sancte N. vel sancta N. ecce ego miser peccator de tuis meritis confusus, offero nunc sacratissimum Sacramentum Corporis & Sanguinis Domini nostri JESU-CHRISTI pro tuo honore & gloria; precor te humiliter & devotè, ut pro me hodiè intercedere digneris, ut tantum Sacrificium dignè & acceptabiliter offerre valeam, & cum tecum, & cum omnibus Electis ejus, æternaliter laudare, & cum eo regnare valeam. Amen.

Beda, de venerabili Eucharistiæ Sacramento.

Sacerdos non legitimè impeditus, celebrare omittens, quantum in eo est,
1. Privat Sanctam Trinitatem laude & gloria. 2. Angelos lætitiâ. 3. Peccatores veniâ. 4. Justos subsidio & gratiâ. 5. In Purgatorio existentes refrigerio. 6. Ecclesiam spirituali Christi beneficio. 7. Et seipsum medicinâ & remedio.

GRATIARUM

ACTIONES

POST MISSAM.

ANT. Trium Puerorum. *In Duplicibus dicitur integra.*

Canticum trium Puerorum. DAN. 3.

Benedicite, omnia opera Domini, Domino; * laudate & superexaltate eum in secula.

Benedicite, Angeli Domini, Domino: * benedicite, cœli, Domino.

Benedicite, aquæ omnes, quæ super cœlos sunt, Domino * benedicite, omnes virtutes Domini, Domino.

Benedicite, sol & luna, Domino: * benedicite, stellæ cœli, Domino.

Benedicite, omnis imber & ros, Domino: benedicite, omnes spiritus Dei Domino.

Benedicite, ignis & æstus, Domino: * benedicite, frigus & æstus, Domino.

Benedicite, rores & pruina, Domino: * benedicite, gelu & frigus, Domino.

Benedicite, glacies & nives, Domino: * benedicite noctes & dies Domino.

Benedicite lux & tenebræ Domino: *

Gratiarum actiones post Miss. xiiij
benedicite, fulgura & nubes, Domino.

Benedicat terra Dominum: * laudet & superexaltet eum in secula.

Benedicite, montes, & colles, Domino: * benedicite, universa germinantia in terra, Domino.

Benedicite, fontes, Domino: * benedicite, maria & flumina, Domino.

Benedicite, cete, & omnia quæ moventur in aquis, Domino: benedicite, omnes volucres cœli, Domino.

Benedicite, omnes bestię & pecora, Domino: * benedicite, filii hominum, Domino.

Benedicat Israël Dominum: * laudet & superexaltet eum in secula.

Benedicite, Sacerdotes Domini, Domino: * benedicite, servi Domini, Domino.

Benedicite, spiritus & animæ justorum, Domino: * benedicite, sancti & humiles corde, Domino.

Benedicite, Anania, Azaria, Misaël, Domino: * laudate & superexaltate eum in secula.

Benedicamus Patrem & Filium cum sancto Spiritu: * laudemus & superexaltemus eum in secula.

Benedictus es, Domine, in firmamento cœli: * & laudabilis, & gloriosus, & superexaltatus in secula.

Gloria Patri,

xiv *Gratiarum actiones*

Psalmus 15.

Laudate Dominum in sanctis ejus: *
laudate eum in firmamento virtutis
ejus.

Laudate eum in virtutibus ejus: * lau-
date eum secundum multitudinem magni-
tudinis ejus.

Laudate eum in sono tubæ: * laudate
eum in psalterio & cithara.

Laudate eum in tympano & choro: *
laudate eum in cordis & organo.

Laudate eum in cymbalis benesonanti-
bus: laudate eum in cymbalis jubilationis: *
omnes spiritus laudet Dominum.

Gloria Patri, &c.

ANT. Trium Puerorum cantemus Hym-
num quem cantabant sancti in camino ig-
nis, benedicentes Domino.

Tempore Paschali additur. Alleluia.

Kyrie eleison. Christe eleison. Kyrie
eleison. Pater noster.

℣. Et ne nos inducas in tentationem.

℞. Sed libera nos à malo.

℣. Confiteantur tibi, Domine, omnia
opera tua.

℞. Et sancti tui benedicant tibi.

℣. Exultabunt sancti in gloria.

℞. Lætabuntur in cubilibus suis.

℣. Non nobis, Domine, non nobis.

℞. Sed nomini tuo da gloriam.

℣. Domine, exaudi orationem meam.

℞. Et clamor meus ad te veniat.

V. Dominus vobiscum,

R. Et cum spiritu tuo.

Oremus.

DEus, qui tribus pueris mitigasti flammam ignium, concede propitius, ut nos famulos tuos non exurat flamma vitiorum.

Actiones nostras, quæsumus, Domine, aspirando præveni, & adjuvando prosequere: ut cuncta nostra oratio & operatio à te semper incipiat, & per te coepta finiatur.

DA nobis, quæsumus, Domine, vitiorum nostrorum flammam extinguere, qui beato Laurentio tribuisti tormentorum suorum incendia superare. Per Christum Dominum nostrum. Amen.

Oratio Sancti Thomæ Aquinatis.

Gratias tibi ago, Domine sancte, Pater omnipotens, æterne Deus, qui me peccatorem, indignum famulum tuum, nullis meis meritis, sed solâ dignatione misericordiæ tuæ, satiare dignatus es pretioso Corpore & sanguine Filii tui Domini nostri Jesu-Christi: Et precor, ut hæc sancta Communio non sit mihi reatus ad poenam, sed intercessio salutaris ad veniam. Sit mihi armatura fidei, & scutum bonæ voluntatis. Sit vitiorum meorum evacuatio, con-

cupiscentiæ & libidinis exterminatio, charitatis & patientiæ, humilitatis & obedi-
 tiæ, omniumque virtutum augmentatio:
 contra insidias inimicorum omnium, tam
 visibilium quàm invisibilium firma defensio:
 motuum meorum tam carnalium, quàm spi-
 ritualium, perfecta quietatio: in te uno ac
 vero Deo firma adhæsiō, atque finis mei
 felix consummatio. Et precor te, ut ad illud
 ineffabile convivium, me peccatorem perdu-
 cere digneris: ubi tu cum Filio tuo & Spi-
 ritu Sancto, Sanctis tuis es lux vera, satie-
 tas plena, gaudium sempiternum, juncun-
 ditas consummata, & felicitas perfecta.
 Per eundem Christum Dominum nostrum.
 Amen.

Oratio dicenda post Missam.

Omnipotens sempiterne Deus, conser-
 vator animarum, mundiue Redemp-
 tor, me famulum tuum ante Majestatem
 tuam prostratum benignissimè respice, &
 Sacrificium quod in honore nominis tui,
 pro salute Fidelium tam vivorum, quàm
 etiam defunctorum, & pro peccatis & of-
 fensionibus meis obtuli, piissimè recipe;
 iram tuam à me remove; gratiam & mi-
 sericordiam mihi concede; januam Paradisi
 mihi pande; ab omnibus malis me poten-
 ter eripe; & quidquid proprio commisi
 reatu, clementer indulge. Et sic in hoc

seculo, in præceptis tuis fac me perseverare, ut dignus Electorum gregi copulari efficiar: te præstante, Deus meus, cujus nomen benedictum; honor atque regnum permanet in secula seculorum. Amen.

RITHMUS S. THOMÆ

AD SACRAM EUCHARISTIAM.

A Doro te devotè, latens Deitas.
Quæ sub his figuris verè latitas:
Tibi se cor meum totum subjicit,
Quia te contemplans, totum deficit.

Visus, tactus, gustus in te fallitur;
Sed auditu solo tutò creditur.

Credo quidquid dixit Dei Filius,
Nil hoc verbo veritatis verius.

In cruce latebat sola Deitas;
At hîc latet simul & humanitas:
Ambo tamen credens atque confitens;
Peto quod petivit latro pœnitens.

Plagas, sicut Thomas, non intueor.
Deum tamen meum te confiteor,
Fac me tibi semper magis credere,
In te spem habere, te diligere.

O memoriale mortis Domini!
Panis vivus, vitam præstans homini;
Præsta meæ menti de te vivere,
Et te illi semper dulce sapere.

Pie pellicane, JESU Domine,
Me immundum munda tuo sanguine;
Cujus una stilla salvum facere,

xviii *Gratiarum actiones*

Totum mundum quit ab omni scelere.

JESU, quem velatum nunc aspicio,

Oro fiat illud quod tam fitio :

Ut te revelatâ cernens facie,

Visu sim beatus tuæ gloriæ. Amen.

Oratio ad Dei Filium.

A Nima Christi sanctissima, sanctifica me: Corpus Christi sacratissimum, salva me: Sanguis Christi pretiosissime, inebria me: aqua lateris Christi purissima, munda me: sudor vultus Christi virtuosissime, sana me: passio Christi piissima, conforta me. O bone JESU, custodi me: Intrâ vulnera tua absconde me. Non permittas me separari à te. Ab hoste maligno defende me. Jube me venire ad te, & pone me juxta te: ut cum Angelis & Archangelis tuis laudem te, per infinita secula seculorum. Amen.

O Bsecro te, mitissime & bone JESU, ut hæc immortalis hostia pro me tibi gratias referat, me tibi reconciliet, me tibi restituat, mihi peccatori veniam tribuat, & ad vitam perducatur æternam. Amen.



GRATIARUM ACTIO

POST MISSAM.

O Dulcedo cordis mei, & vita animæ meæ, & jucunda requies spiritûs mei, dulcis JESU. Immortales tibi ago gratias pro omnibus beneficiis mihi collatis; signanter vero, quia hodie me dignum fecisti, verum & immaculatum Corpus & Sanguinem tuum pretiosum consecrare, pertractare, illudque tibi offerre in memoriam tuorum mirabilium, ad tuam gloriam, & in remissionem omnium peccatorum, tam meorum, quam illorum pro quibus orare & offerre proposui; illoque in salutem & consolationem animæ meæ cibari & nutriri. Quapropter verè dicere audeo: Cibus meus Christus, & ego ejus. Multiplico ergo, & quotiescumque respiro, multiplicare intendo meam voluntatem in infinitum, in tuis laudibus; precorque beatissimam Virginem, Angelos, Sanctos, Sanctas, & Creaturas universas, pro me immensas tibi referre gratias. Immò quia ista minimè sufficiunt, te supplico, ut tibi ipsi gratias agere, te laudare & glorificare complaceas: & quia dignatus es istam indignam, tuam tamen facere habitationem, dignare quoque apud ipsam perpetuam facere mansionem. Effice me hominem secundum cor tuum. Uni me tibi intimè, & totum transf-

XX *Gratiarum actiones*

forma, & transmuta in te. Salva me, JESU-CHRISTE, & cunctam à me hostis antiqui depelle nequitiam, per innocentissimam tuam Passionem. Oro itidem, ut digneris gratias & indulgentias omnes, quas hoc sacrificio, vel communione mediante acquirere & lucrari possum, concedere tam mihi, quam aliis vivis & defunctis, quibus applicare proposui: quia teipsum pro ipsis exoro, pro quibus & tu vis, & sanctissimus Pontifex intendit hac de causa me debere orare. Amen.

Pater noster, &c. Ave, &c.

ALIA ORATIO POST MISSAM.

Gratias ago tibi, omnipotens & misericors Deus, gratiarum actiones tremendæ majestati tuæ, piissime & immense Pater, habeo, quia me indignissimum & nefandissimum peccatorem, pretioso Corpore & Sanguine Filii tui Domini nostri JESU-CHRISTI, consolari & satiare dignatus es. Quæso igitur, dulcissime Domine JESU, ut hæc sancta communio non sit mihi ad judicium & condemnationem; sed, tuâ gratiâ & pietate, sit mihi suavitas & dulcedo, animæ meæ salus & sanctitas, in omni tentatione pax & gaudium, in omni tribulatione lumen & virtus, in omni verbo & opere solatium, & tutela finalis in morte; ad evadendas omnium inimicorum meorum insidias; & proficiat mihi ad sa-

post Missam. XXJ

Intem corporis & animæ in vitam æternam : & præsta , ut ibi nulla remaneat peccati macula , ubi tua sancta introierunt sacramenta. Qui cum Patre & Spiritu sancto vivis & regnas in secula seculorum.

Amen.

*Precatiuncula Sacerdotibus quotidie legenda ;
ut in dies Deo ferventiùs deserviant. Ex
Thom. à Kemp. de Imit. Christi.*

ADjuvet nos gratia tua , omnipotens Deus , ut qui officium Sacerdotale suscepimus , dignè & devotè tibi cum omni puritate & in conscientia bona famulari valeamus.

Et si non possumus in tanta innocentia vitæ conversari , ut debemus , concede nobis tam dignè flere mala quæ gessimus , ut in spiritu humilitatis , ac bonæ voluntatis proposito , tibi ferventiùs deservire valeamus.

Oratio ad Beatissimam Virginem Mariam.

OSerenissima & inclita Mater Domini nostri Jesu-Christi Virgo Maria , Regina mundi , quæ eundem Creatorem omnium creaturarum tuo sanctissimo utero fuisti digna portare , cujus idem sacratissimum Corpus & Sanguinem sumpsi , ad ipsum pro me misero peccatore intercedere digneris , ut quidquid in hoc ineffabili sacramento ignoranter , negligenter , irreve-

xxij *Gratiarum actiones*

reuter & accidentaliter omisi, tuis precibus sanctissimis mihi indulgere dignetur. Qui vivit & regnat in secula seculorum. Amen.

ALII ORATIO Sancti Bonaventurae.

TRansfige, dulcissime Domine JESU, medullas & viscera animæ meæ suavissimo ac saluberrimo amoris tui vulnere, verâ, serenâque & apostolicâ sanctissimâ charitate; ut langueat & liquefiat anima mea solo semper amore & desiderio tui, te concupiscat, & deficiat in atria tua; cupiat dissolvi, & esse tecum. Da ut anima mea te esuriat, panem Angelorum, refectionem animarum sanctarum, panem nostrum quotidianum, supersubstantialem, habentem omnem dulcedinem & saporem, & omne delectamentum suavitatis: te in quem desiderant Angeli prospicere, semper esuriat & comedat cor meum, & dulcedine saporis tui repleantur viscera animæ meæ, te semper sitiât fontem vitæ, fontem sapientiæ & scientiæ, fontem æterni luminis, torrentem voluptatis, ubertatem domûs Dei: te semper ambiat, te quærat, te inveniat, ad te tendat, ad te perveniat; te meditetur, te loquatur, & omnia operetur in laudem & gloriam nominis tui, cum humilitate & discretione, cum dilectione & delectatione, cum facilitate & affectu, cum perseverentia usque in finem, & tu

sis solus semper spes mea, jucunditas mea, gaudium meum, quies & tranquillitas mea, pax mea, suavitas mea, odor meus, dulcedo mea, cibus meus, refectio mea, refugium meum, auxilium meum, sapientia mea, portio mea, & possessio mea, thesaurus meus, in quo fixa & firma, & immobiliter semper sit radicata mens mea & cor meum. Amen.

*SANCTUS AUGUSTINUS de Dignitate
Sacerdotum sic ait.*

O Veneranda Sacerdotum dignitas, in quorum manibus Dei Filius, velut in utero Virginis incarnatur! O felices Sacerdotes, si sacerdotaliter vixeritis! O coeleste mysterium, quod per vos Pater, & Filius, & Spiritus Sanctus tam mirabiliter operantur sub tam ineffabili ministerio vestro, quo uno eodemque momento idem Deus, qui præsidet in cœlo, in manibus vestris est in sacrificio! Cœlum miratur, horrescit infernus, contremiscit diabolus, reveretur quàm plurimùm Angelica celsitudo. Quid retribuam Domino (ut taceam de cœteris) qui retribuit mihi, pro tam singulari dono mihi sacrificio impenso, quod est datum optimum & omne donum perfectum? O venerabilium sanctitudo manuum! O felix exercitium! Ubi tractat Christum Sacerdos Dei Filium, cuius deliciae sunt esse cum filiis hominum.

XXIV *Grat. actiones post Miss.*

O, Sacerdotes, attendite! major est dignitas vobis collata, quam Angelis, qui adorant quod vos conficitis, nec ipsi conficere possunt. O altitudo sapientiæ Dei! O ineffabilis clementia Salvatoris! quod datum non est Angelis, concessum est homini. Sacerdos hoc sacramentum ineffabile conficit: Angelus conficienti, sibi quasi famulus assistit.

S. Chrysostomus idem argumentum prosequitur his verbis.

Multi Sacerdotes, & pauci Sacerdotes, multi in nomine pauci in opere. Videte ergo, ô Christi ministri, quomodo sedearis super Cathedram, quia Cathedra non facit Sacerdotem, sed Sacerdos Cathedram; non locus sanctificat hominem sed homo locum. Qui bene sederit super Cathedram, honorem accipit ab illa; qui male sederit injuriam facit Cathedræ: in judicio enim sedes, si bene vixeris & bene docueris, omnium judex eris; si autem bene docueris & male vixeris, tui soliûs. Nam bene vivendo & bene docendo, populum instruis quomodo vivere debeat, bene autem docendo & male vivendo, Deum instruis quomodo te debeat condemnare. *Hom. 43. oper. imperf. in Mat.*

F I N I S.

INDEX RERUM

Quæ hoc Libello continentur,

IN PRIMA PARTE.

OFFICIUM parvum pro obtinenda à Deo gratia perfectè cognoscendi excellentiam ministerii Ecclesiastici, illudque ritè adimplendi.

Ad Nocturnum, Page 1

Ad Laudes, 7

Ad Primam, 11

Ad Tertiam, 14

Ad Sextam, 16

Ad Nonam, 18

Ad Vesperas, 20

Ad Completorium, 23

Lectiões pro singulis Hebdomadæ diebus, 27

IN SECUNDA PARTE.

Exercitium diurnum, 41

Manè surgendo, 42

Orationi mentali vacandum, 43

Horæ canonicæ ritè persolvendæ, 49

Ante egressum è Domo, 54

In ipso Templi ingressu, Ibid.

Post Missam, 56

Post regressum in domum, 57

Piis Lectiõibus ac potissimum Script. sacræ intendendum, 58

XXV] I N D E X.

| | |
|---|------------|
| <i>Studio incumbendum ,</i> | <u>46</u> |
| <i>Cibi sumptio sobriè & piè instituenda ,</i> | <u>71</u> |
| <i>Solis oblectationibus , & colloquiis licitis indulgendum ,</i> | <u>78</u> |
| <i>Ejaculationes sæpiùs per diem faciendæ ,</i> | <u>84</u> |
| <i>Conscientiâ discutiendâ ,</i> | <u>85</u> |
| <i>Exuendo vestes ,</i> | <u>92</u> |
| <i>Evigilando per noctem ,</i> | <u>93</u> |
| <i>Diversæ Orationes ,</i> | <u>94</u> |
| <i>Singulis Hebdomadibus confessio peccatorum peragenda ,</i> | <u>107</u> |
| <i>Singulis mensibus ad mortem sese præparandum ,</i> | <u>115</u> |
| <i>Singulis annis exercitiis spiritualibus in secessu vacandum.</i> | <u>116</u> |

I N T E R T I A P A R T E.

| | |
|---|------------|
| <i>Speculum Sacerdotum & Clericorum ,</i> | <u>121</u> |
| <i>Notio optimi Clerici ,</i> | <u>122</u> |
| <i>Ejusdem argumenti series ,</i> | <u>123</u> |
| <i>Sacerdos sicut dignitate ita & sanctitate sit præcellens ,</i> | <u>124</u> |
| <i>Ejusdem argumenti veritas confirmatur ,</i> | <u>126</u> |
| <i>De cura salutis propriæ ,</i> | <u>127</u> |
| <i>Zelus gloriæ Dei ,</i> | <u>129</u> |
| <i>Zelus domûs Dei ,</i> | <u>130</u> |
| <i>Zelus salutis animarum ,</i> | <u>131</u> |
| <i>Catechisandis Pueris & rudibus danda opera ,</i> | <u>133</u> |
| <i>Christus in omnibus imitandus ,</i> | <u>135</u> |
| <i>Ecclesiæ vulnus improborum mores ,</i> | <u>137</u> |
| <i>Peccata Sacerdotum gravissima ,</i> | <u>138</u> |

I N D E X. xxvii

| | |
|--|------------|
| <i>De modestia seu de vita exemplari,</i> | <u>140</u> |
| <i>In exterioris hominis compositione immodestia vitanda,</i> | <u>142</u> |
| <i>Lingua refrananda,</i> | <u>144</u> |
| <i>De habitu & tonsurâ Clericali,</i> | <u>146</u> |
| <i>Derisiones malorum virtus superet,</i> | <u>148</u> |
| <i>De castitate custodienda,</i> | <u>149</u> |
| <i>Cavenda cum mulieribus familiaritas,</i> | <u>151</u> |
| <i>Observanda sobrietas, convivia declinanda,</i> | <u>154</u> |
| <i>Otium fugiendum,</i> | <u>156</u> |
| <i>Præpositis suis obtemperandum,</i> | <u>157</u> |
| <i>Quanta esse debeat Sacerdotis humilitas,</i> | <u>160</u> |
| <i>Mundus odio habendus,</i> | <u>152</u> |
| <i>Divitiæ contemnendæ,</i> | <u>163</u> |
| <i>Honores metuendi,</i> | <u>165</u> |
| <i>Inordinatus erga propinquos affectus refecandus,</i> | <u>167</u> |
| <i>Qui frequentandi & consulendi,</i> | <u>171</u> |
| <i>Ductore in viâ salutis opus est,</i> | <u>172</u> |
| <i>Beatissima Virgo Maria speciali cultu honoranda,</i> | <u>174</u> |
| <i>Speculum boni Pastoris, ex SS. Gregorio & Bernardo,</i> | <u>176</u> |
| <i>Monitiones S. Caroli Borromæi ad Clericos & Sacerdotes,</i> | <u>179</u> |

I N Q U A R T A P A R T E.

| | |
|--|--------------|
| <i>De Sacro-sancta Missæ sacrificio,</i> | <u>205</u> |
| <i>CAPUT PRIMUM. Quid præstare debeat Sacerdos, antequam Missæ celebrationem, Omissus est in contextu hic titulus,</i> | <u>208</u> |
| <i>Articulus primus. De vitæ puritate,</i> | <u>Ibid.</u> |

Articulus secundus. De rectitudine intentionis,

210

Articulus tertius. De actuali devotione,

213

CAPUT SECUNDUM. *Quid præstare debeat
Sacerdos in ipsa Missæ celebratione,*

217

*Articulus primus. De ablutione manuum, vasis
sacris, & vestibus sacerdotalibus,*

218

*Articulus secundus. De initio Missæ usque ad
Symbolum,*

225

*Articulus tertius. De symbolo usque ad Ca-
nonem,*

236

*Articulus quartus. De Canone usque ad Consec-
rationem,*

249

*Articulus quintus. A Consecratione usque ad
Communione,*

259

*Articulus sextus. De Communione usque ad
finem,*

273

CAPUT TERTIUM. *Quid præstare debeat Sa-
cerdos post Missæ celebrationem,*

288

MEDITATIONES *ante & post sacrum pro sin-
gulis hebdomadæ diebus,*

Dominicâ. Jesus Deus noster,

296

Feria II. Jesus Rex noster,

299

Feria III. Jesus Magister noster,

302

Feria IV. Jesus nostrarum Medicus animarum,

306

Feria V. Jesus Pastor noster,

312

Feria VI. Jesus Redemptor noster,

317

Sabbato. Jesus Sacerdos & Victimâ,

323

*Oratio S. Ambrosii ante Missam , per singulos
hebdomadae dies distributa.* 330

*Preparatio ad Missam pro opportunitate Sa-
cerdotis facienda ,* j

Gratiarum actiones post Missam , xij

E R R A T A.

- P** *Ag. 30 lin. 4. viginti , lege viginti.*
Pag. 32 lin. 4. prin-ipio , lege prin-cipio.
Pag. 58 lin. 14. ipsi , lege ipsis.
Pag. 59 lin. 22. sollicita , lege sollicitat.
Pag. 79 l. 16. jama perire , lege jam aperire.
Pag. 80 lin. 22. hermoniam , lege harmoniam.
Pag. 96 lin. 25. ur , lege ut.
Pag. 162 lin ult. (o) S. Hier. lege S. Bern.
Pag. 187 lin. 26. eterum , lege veterum.
Pag. 224 lin. 23. illam , lege illum.
Ibid. lin. 30. tunicam , lege tunicâ.
Pag. 225 lin. 1. Diaconum , lege Diacono.
Ibid. lin. 5. illum , lege illi.
Pag. 247 lin. 30. noo , lege non.
*Pag. 275 lin. 26. dele ista verba , Pollice &
indice dexteræ.*
Pag. 280 lin. 15. ac , lege ad.
P. 297 l. 15. contempta , lege contemnens.
P. 303 lin. 25. despectus , lege despiciens.
Pag. xxij lin. 5. alii , lege alia.

PRIVILEGE DU ROY.

L OUIS, PAR LA GRACE DE DIEU,
ROY DE FRANCE ET DE
NAVARRÉ: A nos amés & féaux Con-
seillers les Gens tenans nos Cours de
Parlemens, Me. des Requêtes ordinaire
de notre Hôtel, Grand Conseil, Prévôt
de Paris, Baillifs, Sénéchaux, leurs Lieu-
tenans Civils & autres nos Justiciers qu'il
appartiendra; SALUT. Notre amé M.
COURET, DE VILLENEUVE, Imprimeur
à Orléans, Nous a fait exposer qu'il dé-
sireroit faire réimprimer & donner au pu-
blic des Livres qui ont pour titres, *The-
saurus Sacerdotum & Clericorum*, & *Etrennes
Orleannoises*, s'il Nous plaisoit lui accor-
der nos Lettres de Permission pour ce
nécessaires: A CES CAUSES, voulant favo-
rablement traiter l'Exposant, Nous lui
avons permis & permettons par ces pré-
sentes, de faire réimprimer lesdits Liyres
autant de fois que bon lui semblera, &
de les vendre, faire vendre & débiter par
tout notre Royaume pendant le temps de
trois années consécutives, à compter du
jour de la date des présentes. Faisons dé-
fenses à tous Imprimeurs, Libraires & au-
tres personnes de quelque qualité & con-
dition qu'elles soient, d'en introduire

d'impression étrangere dans aucun lieu de
notre obéissance ; à la charge que ces
Présentes seront enregistrées tout au long
sur le Registre de la Communauté des
Imprimeurs & Libraires de Paris , dans
trois mois de la date d'icelles ; que la ré-
impression desdits Livres sera faite dans
notre Royaume & non ailleurs , en bon
papier & beaux caractères , conformément
à la feuille imprimée attachée pour mo-
dèle sous le contre-scel des présentes ; que
l'impétrant se conformera en tout aux Re-
glemens de la Librairie , & notamment à
celui du 10 Avril 1725 ; qu'avant de les
exposer en vente , les imprimés qui auront
servi de copie à la réimpression desdits Li-
vres , seront remis dans le même état où
l'approbation y aura été donnée , ès mains
de notre très-cher & féal Chevalier, Chan-
celier de France le Sieur de Lamoignon , &
qu'il en fera ensuite remis deux Exem-
plaires de chacun dans notre Bibliothèque
publique , un dans celle de notre Château
du Louvre , un dans celle de notre très-
cher & féal Chevalier Chancelier de France,
le Sieur de Lamoignon , & un dans celle de
notre très-cher & féal Chevalier , Garde
des Sceaux de France , le Sieur de Ma-
chault , Commandeur de nos Ordres : le
tout à peine de nullité des Présentes ; du
contenu desquelles vous mandons & enjoi-
gnons de faire jouir ledit Exposé & ses

ayans causes pleinement & paisiblement ;
sans souffrir qu'il leur soit fait aucun trouble
ou empêchement. Voulons qu'à la copie
des présentes , qui sera imprimée tout au
long au commencement ou à la fin desdits
Livres , foi soit ajoutée comme à l'original.
Commandons au premier notre huissier ou
sergent sur ce requis , de faire pour l'exé-
cution d'icelles tous actes requis & nécessai-
res , sans demander autre permission , &
nonobstant clameur de haro , Charte nor-
mande & lettres à ce contraires. CAR
TEL EST NOTRE PLAISIR. Donné à Ver-
sailles le dix-neuvième jour du mois de
Mars , l'an de grace mil sept cent cinquante-
trois , & de notre Règne le trente-huitième.
Par le Roy , en son Conseil. Signé ,
SAINSON.

*Registré sur le Registre XIII. de la Chambre
Royale des Libraires & Imprimeurs de Paris ,
N. 165. fol. 130. conformément aux anciens
Reglemens confirmés par celui du 28 Février
1723. A Paris le 13 Avril 1753.*

Signé HERISSANT, Adjoint.

